

মেঘনাদবধ কাব্য

প্রথম সর্গ

সন্মুখে সমরে পড়ি, বীর-চূড়ামণি
বীরবাহু, চলি যবে গেলা যমপুরে
অকালে, কহ, হে দেবি অমৃতভাবিণি,^১
কোন বীরবরে বরি সেনাপতি-পদে,
পাঠাইলা রণে পুনঃ রক্ষঃকুলনিধি^২
রাঘবারি ? কি কৌশলে, রাক্ষসভরসা
ইন্দ্রজিত মেঘনাদে^৩—অজেয় জগতে—
উর্মিলাবিলাসী^৪ নাশি, ইন্দ্রে নিঃশঙ্কিলা ?^৫
বন্দি চরণারবিন্দ, অতি মন্দমতি
আমি, ডাকি আবার তোমায়, শ্বেতভূজে
ভারতি ! যেমতি, মাতঃ, বসিলা আসিয়া,
বান্দীকির রসনায় (পদ্মাসনে যেন)
যবে খরতর শরে, গহন কাননে,
ক্রৌঞ্চবধু সহ ক্রৌঞ্চে নিবাদ বিধিলা,^৬
তেমতি দাসেরে, আসি, দয়া কর, সতি ।
কে জানে মহিমা তব এ ভবমণ্ডলে ?
নরাধম আছিল যে নর নরকুলে
চৌর্ঘ্যে রত^৭, হইল সে তোমার প্রসাদে,
মৃত্যুঞ্জয়, যথা মৃত্যুঞ্জয়^৮ উমাপতি !
হে বরদে, তব বরে চোর রত্নাকর
কাব্যরত্নাকর কবি ! তোমার পরশে,
সূচন্দন-বৃক্ষশোভা বিষবৃক্ষ ধরে !
হায়, মা, এ হেন পুণ্য আছে কি এ দাসে ?
কিন্তু যে গো গুণহীন সন্তানের মাঝে
মূঢ়মতি, জননীর স্নেহ তার প্রতি
সমধিক । উর তবে, উর দয়াময়ি
বিশ্বরমে ! গাইব, মা, বীররসে ভাসি,
মহাগীত; উরি, দাসে দেহ পদছায়া ।

—তুমিও আইস, দেবি, তুমি মধুকরী
কল্পনা ! কবির চিন্ত-ফুলবন-মধু
লায়ে, রচ মধুচক্র, গৌড়জন যাহে
আনন্দে করিবে পান সুধা নিরবধি ।
কনক-আসনে বসে দশানন বলা—
হেমকূট-হেমশিরে শৃঙ্গবর যথা
তেজঃপুঞ্জ । শত শত পাত্রমিত্র আদি
সভাসদ, নতভাবে বসে চারি দিকে ।
ভূতলে অতুল সভা—স্বফটিকে গঠিত;
তাহে শোভে রত্নরাজী, মানস-সরসে
সরস কমলকুল বিকশিত যথা ।
শ্বেত, রক্ত, নীল, পীত শুভ সারি সারি
ধরে উচ স্বর্ণছাদ, ফণীন্দ্র^৯ যেমতি,
বিস্তারি অযুত ফণা, ধরেন আদরে
ধরারে ।^{১০} বুলিছে বলি ঝালরে মুকুতা,
পদ্মরাগ, মরকত, হীরা; যথা ঝোলে,
(খচিত মুকুলে ফুলে) পল্লবের মালা
ব্রতালয়ে । ক্ষণপ্রভা^{১১} সম মুষ্ণু হাसे
রতনসম্ভবা বিভা^{১২}—ঝালসি নয়নে ।
সুচারু চামর চারুলোচনা কিঙ্করী
ঢুলায়; মৃগালভূজ আনন্দে আন্দোলি
চন্দ্রাননা । ধরে ছত্র ছত্রধর; আহা
হরকোপানলে কাম যেন রে না পুড়ি
দাঁড়ান সে সভাতলে ছত্রধর-রূপে !^{১৩}—
যেহে দ্বারে দৌবারিক, ভীষণ মূরতি,
পাণ্ডব-শিবির দ্বারে রুদ্রেশ্বর যথা
শূলপাণি !^{১৪} মন্দে মন্দে বহে গন্ধে বহি,
অনন্ত বসন্ত-বায়ু, রঙ্গে সঙ্গে আনি

১. অমৃতের ন্যায় মধুর ভাষা যে নারীর । এখানে বাগদেবী সরস্বতীকে সন্বেদন করা হয়েছে। ২. রাক্ষস কুলের রত্ন স্বরূপ । ৩. মেঘগর্জনের ন্যায় রব যার সে মেঘনাদ । দেবরাজ ইন্দ্রেকে পরাজিত করে তিনিই ইন্দ্রজিৎ ।
৪. উর্মিলা যার প্রিয়পাত্রী সেই উর্মিলার স্বামী লক্ষ্মণ । ৫. শঙ্কা বা ভয় দূর করল ।
৬. বান্দীকির কবিভূষণি লাভের পৌরাণিক ঘটনা । ৭. বান্দীকির রত্নাকর নামে কুখ্যাত দস্যুজীবনের প্রসঙ্গ ।
৮. মৃত্যুকে বিনি জয় করেছেন—মহাদেব ৯. ফণাধারী সাপকুলের ইন্দ্রস্বরূপ অর্থাৎ অধিপতি—বাসুকি ।
১০. বাসুকি তাঁর মস্তকে পৃথিবী ধারণ করে আছেন এই পৌরাণিক প্রসঙ্গ । ১১. বিদ্যুৎ ।
১২. রত্ন থেকে বিচ্ছুরিত হয় যে রশ্মি । ১৩. মহাদেবের কোপানলে মদনভাস্কর পৌরাণিক প্রসঙ্গ ।
১৪. মহাভারতের প্রসঙ্গ—শূলহস্তে মহাদেব কুরুক্ষেত্রে পাণ্ডবশিবির পাহারা দিয়েছিলেন ।

কাকলী লহরী, মরি! মনোহর, যথা
বাঁশরীস্বরলহরী গোকুল বিপিনে! ১৫
কি ছার ইহার কাছে, হে দানবপতি
ময়, মণিময় সভা, ইন্দ্রপ্রস্থে যথা
স্বহস্তে গড়িলা তুমি তুঘিতে পৌরবে? ১৬

এ হেন সভায় বসে রক্ষসকুলপতি,
বাক্যহীন পুত্রশোকে! ঝর ঝর ঝরে
অবিরল অশ্রুধারা—তিতিয়া বসনে,
যথ তরু, তীক্ষ্ণ শর সরস শরীরে
বাজিলে, কাঁদে নীরবে। কর যোড় করি,
দাঁড়ায় সম্মুখে ভয়দূত, ধূসরিত
ধূলায়, শোণিতে আর্দ্র সর্ব কলেবর।
বীরবাহ সহ যত যোধ শত শত
ভাসিল রণসাগরে, তা সবার মাঝে
একমাত্র বাঁচে বীর; যে কাল তরঙ্গ
গ্রাসিল সকলে, রক্ষা করিল রাক্ষসে—
নাম মকরাক্ষ, বলে যক্ষপতি সম।
এ দূতের মুখে শুনি সুতের নিধন,
হায়, শোকাকুল আজি রাজকুলমণি
নৈকেষেয়! ১৭ সভাজন দুঃখী রাজ-দুঃখে।
আঁধার জগত, মরি, ঘন আবরিলে
দিননাথে। কত ক্ষণে চেতন পাইয়া,
বিষাদে নিশ্বাস ছাড়ি, কহিলা রাবণ;—

“নিশার স্বপনসম তোর এ বারতা,
রে দূত! অমরবৃন্দ যার ভুজবলে
কাতর, সে ধনুর্দ্বারে রাখব ভিখারী
বাধিল সম্মুখে রণে? ফুলদল দিয়া
কাটিলা কি বিধাতা শাশ্বলী তরুবরে? ১৮—
হা পুত্র, হা বীরবাহ, বীর-চূড়ামণি।
কি পাপে হারানু আমি তোমা হেন ধনে?
কি পাপ দেখিয়া মোর, রে দারুণ বিধি,
হরিলি এ ধন তুই? হায় রে, কেমনে
সহি এ যাতনা আমি? কে আর রাখিবে
এ বিপুল কুল-মান এ কাল সমরে।
বনের মাঝারে যথা শাখাদলে আগে

একে একে কাঠুরিয়া কাটি, অবশেষে
নাশে বৃক্ষে, হে বিধাতা; এ দূরন্ত রিপু
তেমতি দুর্কল, দেখ, করিছে আমারে
নিরন্তর। হব আমি নিশ্চল সমূলে
এর শরে! তা না হলে মরিত কি কভু
শূলী শস্ত্রসম ভাই কুন্তকর্ণ মম,
অকালে আমার দোষে? আর যোধ যত—
রাক্ষস-কুল-রক্ষণ? হায়, সূর্ণগথা,
কি কুক্ষণে দেখেছিলি, তুই রে অভাগী,
কাল পঞ্চবটীবনে কালকূটে ভরা
এ ভুজগে? কি কুক্ষণে (তোর দুঃখে দুঃখী)
পাবক-শিখা-রূপিণী জানকীরে আমি
আনিবু এ হৈম গেহে? হায় ইচ্ছা করে,
ছাড়িয়া কনকলঙ্কা, নিবিড় কাননে
পশি, এ মনের জ্বালা জুড়াই বিরলে।
কুসুমদাম-সজ্জিত, দীপাবলী-তেজে
উজ্জলিত নাট্যশালা সম রে আছিল
এ মোর সুন্দরী পুরী! কিন্তু একে একে
শুখাইছে ফুল এবে, নিবিছে দেউটী;
নীরব রবাব, বীণা, মুরজ, মুরলী;
তবে কেন আর আমি থাকি রে এখানে?
কার রে বাসনা বাস করিতে আঁধারে?”

এইরূপে বিলাপিলা আক্ষেপে রাক্ষস-
কুলপতি রাবণ; হায় রে মরি, যথা
হস্তিনায় অন্ধরাজ, সঞ্জয়ের মুখে
শুনি, ভীমবাহ ভীমসেনের প্রহারে
হত যত প্রিয়পুত্র কুরুক্ষেত্র-রণে! ১৯

তবে মন্ত্রী সারণ (সচিবশ্রেষ্ঠ^{১০} বুধঃ^{১১})
কৃতাজলিপুটে উঠি কহিতে লাগিলা
নতভাবে;—“হে রাজন, ভুবনবিখ্যাত,
রাক্ষসকুলশেখর, ক্ষম এ দাসেরে!
হেন সাধ্য কার আছে বুঝায় তোমারে
এ জগতে? ভাবি, প্রভু, দেখ কিন্তু মনে;—
অভ্রভেদী^{১২} চূড়া যদি যায় শুঁড়া হয়ে
বজ্রাঘাতে, কভু নহে ভূধর অধীর

১৫. কৃষ্ণের ব্রজলীলার প্রসঙ্গ। ১৬. যুধিষ্ঠিরকে সন্তুষ্ট করার মানসে দানবশিষ্টী ময়দানব ইন্দ্রপ্রস্থে পাণ্ডবদের রাজসভা ও যজ্ঞসভা নির্মাণ করেছিলেন। মহাভারতের কাহিনী। ১৭. নিক্ষা নামে রাক্ষসীর পুত্র— রাবণ।

১৮. অসম্ভাব্যতা বোঝাতে এই উপমা—ফুলের পাপড়ি দিয়ে শালবৃক্ষ যেন ছেদন করা হয়েছে।

১৯. মহাভারতের পাণ্ডব ও কৌরবের কুরুক্ষেত্র যুদ্ধের প্রসঙ্গ। ২০. শ্রেষ্ঠ মন্ত্রী। ২১. জ্ঞানী ব্যক্তি।

২২. আকাশভেদী।

১. পীড়নে। বিশেষতঃ এ ভবমণ্ডল
 ধাম্যময়, বৃথা এর দুঃখ সুখ যত।
 ২. হোঁহের ছলনে ভুলে অজ্ঞান যে জন।”
 উত্তর করিলা তবে লক্ষা-অধিপতি;—
 “গা কহিলে সত্য, ওহে অমাত্য-প্রধান”
 পারণ। জানি হে আমি, এ ভব-মণ্ডল
 ধাম্যময়, বৃথা এর দুঃখ, সুখ যত।
 কিন্তু জেনে শুনে তবু কাঁদে এ পরাণ
 অগোধ। হৃদয়-বৃন্তে ফুটে যে কুসুম,
 তাহারে ছিঁড়িলে কাল, বিকল হৃদয়
 তাহে শোক-সাগরে, মৃগাল যথা জলে,
 ধবে কুবলয়ধন” লয় কেহ হরি।”
 এতেক কহিয়া রাজা, দূত পানে চাহি,
 আদেশিলা,—“কহ, দূত, কেমনে পড়িল
 পমরে অমর-ত্রাস বীরবাহ বলা?”
 প্রণমি রাজেন্দ্রপদে, করযুগ যুড়ি,
 আরাভিলা ভগ্নদূত;—“হায়, লক্ষাপতি,
 কেমনে কহিব আমি অপূর্ব কাহিনী?
 কেমনে বর্ণিব বীরবাহুর বীরতা”
 ধনকল করী যথা পশে নলবনে,
 পশিলা বীরকুঞ্জর” অরিদল মাঝে
 গনুর্জর। এখনও কাঁপে হিয়া মম
 ধরথরি, স্মরিলে সে ভৈরব ছক্কারে!
 গনেছি, রাক্ষসপতি, মেঘের গর্জনে;
 গিহনাদে; জলধির কন্ডোলে; দেখেছি
 ৩. ইরম্মদে” দেব, ছুটিতে পবন
 লথে; কিন্তু কভু নাহি শুনি ত্রিভুবনে,
 এ হেন ঘোর ঘর্ঘর কোদণ্ড-টঙ্কারে।
 ৪. কভু নাহি দেখি শর হেন ভয়ঙ্কর।—
 পশিলা বীরেন্দ্রবৃন্দ বীরবাহ সহ
 গণে, যুথনাথ সহ গজযুথ যথা।
 ঘন ঘনাকারে” ধূলা উঠিল আকাশে,—
 মেঘদল আসি যেন আবরিলা রুবি
 গগনে; বিদ্যুতঝলা-সম চকমকি
 উড়িল কলস্কুল” অম্বর প্রদেশে
 শশশনে।— ধন্য শিক্ষা বীর বীরবাহ!
 ৫. যে মরিল অরি, কে পারে গণিতে?”

এইরূপে শত্রুমাঝে যুঝিলা স্বদলে
 পুত্র তব, হে রাজন! কত ক্ষণ পরে,
 প্রবেশিলা যুদ্ধে আসি নরেন্দ্র রাঘব।
 কনক-মুকুট শিরে, করে ভীম ধনুঃ,
 বাসবের চাপ” যথা বিবিধ রতনে
 খচিত,” —এতেক কহি, নীরবে কাঁদিল
 ভগ্নদূত, কাঁদে যথা বিলাপী, স্মরিয়া
 পূর্বদুঃখ! সভাজন কাঁদিলা নীরবে।
 অশ্রুস্রব-আঁধি পুনঃ কহিলা রাবণ,
 মন্দোদরীমনোহর;— “কহ, রে সন্দেশ-
 বহু” কহ, শুনি আমি, কেমনে নাশিলা
 দশাননায়ুজ শূরে দশরথায়ুজ?”
 “কেমনে, হে মহীপতি,” পুনঃ আরভিল
 ভগ্নদূত, “কেমনে, হে রক্ষঃকুলনিধি,
 কহিব সে কথা আমি, শুনিবে বা তুমি?
 অগ্নিময় চক্ষুঃ যথা হর্যাক্ষ,” সরোষে
 কড়মড়ি ভীম দন্ত, পড়ে লক্ষ্য দিয়া
 বৃষস্কন্ধে, রামচন্দ্রে আক্রমিলা রণে
 কু মারে। চৌদিকে এবে সমর-তরঙ্গ
 উথলিল, সিদ্ধু যথা দ্বন্দ্বি বায়ু সহ
 নিঘোষে”! ভাতিল অসি অগ্নিশিখাসম
 ধূমপুঞ্জসম চন্দ্রাবলীর” মাঝারে
 অযুত! নাদিল কবু” অম্বরশি-রবে”!—
 আর কি কহিব, দেব? পূর্বজন্মদোষে,
 একাকী বাঁচিনু আমি! হায় রে বিধাতঃ
 কি পাপে এ তাপ আজি দিলি তুই মোরে?
 কেন না শুইনু আমি শরশয্যোপরি,
 হৈমলক্ষা-অলঙ্কার বীরবাহ সহ
 রণভূমে? কিন্তু নহি নিজ দোষে দোষী।
 ক্ষত বক্ষঃস্থল মম, দেখ, নৃপমণি,
 রিপু-প্রহরণে; পৃষ্ঠে নাহি অস্ত্রলেখা।”
 এতেক কহিয়া স্তব্ধ হইল রাক্ষস
 মনস্তাপে। লক্ষাপতি হরষে বিষাদে
 কহিলা; “সাবাসি, দূত। তোর কথা শুনি,
 কোন্ বীর-হিয়া নাহি চাহে রে পশিতে
 সংগ্রামে? ডমরুধ্বনি শুনি কাল ফণী,
 কভু কি অলসভাবে নিবাসে বিবরে?”

১০. প্রধান সভাসদ। ২৪. পদ্ম উৎপাটনের পরে জলে ভাসমান বিপর্যস্ত পদ্মের নাল। ২৫. বীরত্ব।

১৬. হস্তীর ন্যায় বলশালী বীরশ্রেষ্ঠ। ২৭. বজ্রামি—বিদ্যুৎ ২৮. ধনুকের ছিলায় শব্দ। ২৯. ঘন মেঘের ন্যায়।

৩০. বাণের ঝাঁক। ৩১. দেবরাজ ইন্দ্রের ধনুক। ৩২. দূত। ৩৩. পুত্ররাজ সিংহ।

৩৪. বায়ু ও সমুদ্রের চিরন্তন দ্বন্দ্ব—কবি কল্পনা। এই প্রসঙ্গে গ্রীক পুরাণের কাহিনী দ্বারা কবি প্রভাবিত।

৩৫. চমনির্মিত ঢাল ৩৬. শব্দ। ৩৭. সাগর জলের গর্জন।

ধন্য লক্ষা, বীরপুত্রধারী। চল, সবে,—
চল যাই, দেখি, ওহে সভাসদ জন,
কেমনে পড়েছে রণে বীর-চূড়ামণি
বারবাহু, চল, দেখি জুড়াই নয়নে।”

উঠিলা রাক্ষসপতি প্রাসাদ-শিখরে,
কনক-উদয়াচলে দিনমণি^{৭০} যেন
অংশুমালী^{৭১}। চারি দিকে শোভিল কাঞ্চন-
সৌধ-কিরীটিনী লক্ষা^{৭২}—মনোহরা পুরী।
হেমহর্ষ্য সারি সারি পুষ্পবন মাঝে;
কমল-আলয় সরঃ; উৎস রজঃ-ছটা;
তরুসাজী; ফুলকুল-চক্ষু-বিনোদন,
যুবতীযৌবন যথা; হীরচূড়াশিরঃ
দেবগৃহ; নানা রাগে রঞ্জিত বিপণি,
বিবিধ রতন-পূর্ণ; এ জগৎ যেন
আনিয়া বিবিধ ধন, পূজার বিধানে,
রেখেছে, রে চারুলক্ষে, তোর পদতলে,
জগত-বাসনা তুই, সুখের সদন।

দেখিলা রাক্ষসেশ্বর উন্নত প্রাচীর—
অটল অচল যথা; তাহার উপরে,
বীরমদে মস্ত, ফেরে অস্ত্রীদল, যথা
শৃঙ্গধরোপরি সিংহ। চারি সিংহদ্বার
(রুদ্ধ এবে) হেরিলা বেদেহীহরঃ^{৭৩} তথা
জাগে রথ, রথী, গজ, অশ্ব, পদাতিক
অগণ্য। দেখিলা রাজা নগর বাহিরে,
রিপুবন্দ, বালিবন্দ সিদ্ধুতীরে যথা,
নক্ষত্র-মণ্ডল কিম্বা আকাশ-মণ্ডলে।
থানা দিয়া পূর্ব দ্বারে, দুর্বার সংগ্রামে,
বসিয়াছে বীর নীল; দক্ষিণ দুয়ারে
অঙ্গদ, করভসম নব বলে বলী;
কিম্বা বিষধর, যবে বিচিত্র কঞ্চুক^{৭৪}
ভূষিত, হিমাশ্তে^{৭৫} অহি ভ্রমে উর্দ্ধ ফণা—
ত্রিশূলসদৃশ জিহ্বা লুলি অবলেপে^{৭৬}।
উত্তর দুয়ারে রাজা সুগ্রীব আপনি
বীরসিংহ। দাশরথি পশ্চিম দুয়ারে—
হায় রে বিষম এবে জানকী-বিহনে,

কৌমুদী-বিহনে যথা কুমুদরঞ্জন
শশাঙ্ক। লক্ষ্মণ সঙ্গে, বায়ুপুত্র হনু,
মিত্রবর বিভীষণ। এত প্রসরণে,^{৭৭}
বেড়িয়াছে বৈরিদল স্বর্ণ-লক্ষাপুরী,
গহন কাননে যথা ব্যাধ-দল মিলি,
বেড়ে জালে সাবধানে কেশরিকামিনী,—
নয়ন-রমণী রূপে, পরাক্রমে ভীমা
ভীমাসমা^{৭৮}। অদূরে হেরিলা রক্ষঃপতি
রণক্ষেত্র। শিবাকুল, গৃধিনী, শকুনি,
কুক্কুর, পিশাচদল ফেরে কোলাহলে।
কেহ উড়ে; কেহ বসে; কেহ বা বিবাদে;
পাকশাট মারি কেহ খেদাইছে দূরে
সমলোভী জীব; কেহ, গরজি উল্লাসে,
নাশে ক্ষুধা-অগ্নি; কেহ শোষে রক্তস্রোতে।
পড়েছে কুঞ্জরপুঞ্জ ভীষণ-আকৃতি;
ঝড়গতি ঘোড়া, হায় গতিহীন এবে!
চূর্ণ রথ অগণ্য, নিষাদী^{৭৯}, সাদী^{৮০}, শূলী^{৮১},
রথী, পদাতিক পড়ি যায় গড়াগড়ি
একত্রে। শোভিছে বর্ম, চর্ম, অসি, ধনুঃ
ভিন্দিপাল^{৮২}, তুণ, শর, মুঙ্গর, পরশু^{৮৩},
স্থানে স্থানে; মণিময় কিরীট, শীর্ষক^{৮৪},
আর বীর-আভরণ, মহাতেজস্কর।
পড়িয়াছে যন্ত্রীদল যন্ত্রদল মাঝে।
হৈমধ্বজ দশ হাতে, যম-দশাঘাতে,
পড়িয়াছে ধ্বজবহ। হায় রে, যেমতি
স্বর্ণ-চূড় শস্য ক্ষত কৃষিদলবলে,^{৮৫}
পড়ে ক্ষেত্রে, পড়িয়াছে রাক্ষসনিকর,
রবিকুলরবি শুর রাঘবের শরে!
পড়িয়াছে বীরবাহু বীর-চূড়ামণি,
চাপি রিপুচয় বলী, পড়েছিল যথা
হিড়িম্বার স্নেহনীড়ে পালিত গরুড়
ঘটোৎকচ, যবে কর্ণ, কালপৃষ্ঠধারী,^{৮৬}
এড়িলা একাত্মী বাণ রক্ষিতে কৌরবে।^{৮৭}
মহাশোকে শোকাকুল কহিলা রাবণ;
“যে শয্যায় আজি তুমি শুয়েছ, কুমার

৩৮. সূর্য। ৩৯. কিরণ যার মালা স্বরূপ—সূর্য। ৪০. স্বর্ণনির্মিত সৌধরাজি লক্ষার মুকুটস্বরূপ।

৪১. বিদেহরাজকন্যা সীতাকে যে হরণ করেছে—রাবণ। ৪২. আবরণ। ৪৩. শীত ঋতুর শেষে। ৪৪. গর্বে, তেজে। ৪৫. বেষ্টনে। ৪৬. চতীর ন্যায় ভয়ঙ্করী। ৪৭. গজারোহী সৈন্যদল। ৪৮. অথারোহী সৈন্যদল। ৪৯. শূলধারী সৈন্যদল ৫০. বর্শাজাতীয় ক্ষেপণীয় যুদ্ধাস্ত্র। ৫১. কুঠার। ৫২. শিরস্ত্রাণ। ৫৩. কৃষকদের ক্ষমতায়। ৫৪. ধনুকধারী কর্ণ ৫৫. নির্দিষ্ট একজনকে বিনাশ করতে পারে যে বাণ—একাত্মী। মাহাভারতের ঘটোৎকচ বধের কাহিনীর উল্লেখ।

প্রিয়তম, বীরকুলসাধ এ শয়নে
সদা। রিপূদলবলে দলিয়া সমরে
জন্মভূমি-রক্ষাহেতু কে ডরে মরিতে ?
যে ডরে, ভীৰু সে মৃত; শত ধিক্ তারে।
ওধু বৎস, যে হৃদয়, মুগ্ধ মোহমদে
গোমল সে ফুল-সম। এ বজ্র-আঘাতে,
কত যে কাতর সে, তা জানেন সে জন,
অন্তর্যামী যিনি; আমি কহিতে অক্ষম।
হে বিধি, এ ভবভূমি তব লীলাস্থলী;—
পরের যাতনা কিন্তু দেখি কি হে তুমি
হও সুখী ? পিতা সদা পুত্রদুঃখে দুঃখী—
তুমি হে জগত-পিতা, এ কি রীতি তব ?
৪। পুত্র। হা বীরবাহু। বীরেন্দ্রে-কেশরী।
কেমনে ধরিব প্রাণ তোমার বিহনে ?”

এইরূপে আক্ষেপিয়া রাক্ষস-ঈশ্বর
রাবণ, ফিরায়ে আঁখি, দেখিলেন দূরে
শাগর-মকরালয়। মেঘশ্রেণী যেন
অচল, ভাসিছে জলে শিলাকুল, বাঁধা
দৃঢ় বাঁধে। দুই পাশে তরঙ্গ-নিচয়,
ফণাময়, ফণাময় যথা ফণিবর,
উৎখলিছে নিরন্তর গভীর নির্যোবে।
অপূর্ক-বন্ধন সেতু; রাজপথ-সম
প্রশস্ত; বহিছে জনশ্রোতঃ কলরবে,
শ্রোতঃ-পথে জল যথা বরিবার কালে।

অভিমনে মহামানী বীরকুলবর্ভ
রাবণ, কহিলা বলী সিদ্ধ পানে চাহি;—
“ধিক্ সুন্দর মালা আজি পরিয়াছ গলে,
শ্রোতঃ। হা ধিক্, ওহে জলদলপতি।
এই কি সাজে তোমারে, অলম্ব্য, অজেয়
তুমি ? হায়, এই কি হে তোমার ভূষণ,
শঙ্কর ? কোন গুণে, কহ, দেব, শুনি,
কোন গুণে দাশরথি কিনেছে তোমারে ?
শ্রোতঃজনবেরী তুমি; প্রভঞ্জন-সম”
শীঘ্র পরাক্রমে। কহ, এ নিগড় তবে
পর তুমি কোন পাপে ? অধম ভালুকে
শূন্যলিয়া যাদুকর, খেলে তারে লয়ে;
কেশরীর রাজপদ কার সাধ্য বাঁধে
শ্রোতঃসে ? এই যে লঙ্কা, হৈমবতী পুরী,
শ্রোতঃ তব বন্ধস্থলে, হে নীলাবুস্বামি,

কৌস্তভ-রতন যথা মাধবের বৃকে,
কেন হে নির্দয় এবে তুমি এর প্রতি ?
উঠ, বলি; বীরবলে এ জাঙাল”^{৫৩} ভাঙি,
দূর কর অপবাদ; জুড়াও এ জ্বালা,
ডুবায়ে অতল জলে এ প্রবল রিপু।
রেখে না গো তব ভালে এ কলঙ্ক-রেখা,
হে বারীন্দ্রে, তব পদে এ মম মিনতি।”

এতেক কহিয়া রাজরাজেন্দ্রে রাবণ,
আসিয়া বসিলা পুনঃ কনক-আসনে
সভাতলে; শোকে মগ্ন বসিলা নীরবে
মহামতি; পাত্র, মিত্র, সভাসদ-আদি
বসিলা চৌদিকে, আহা, নীরব বিষাদে।
হেন কালে চারি দিকে সহসা ভাসিল
রোদন-নিদান মৃদু; তা সহ মিশিয়া
ভাসিল নুপুরধ্বনি, কিঙ্কণীর বোল”^{৫৪}
ঘোর রোলে। হেমাঙ্গী সঙ্গিনীদল-সাথে
প্রবেশিলা সভাতলে চিত্রাঙ্গদা দেবী।
আলু থালু, হায়, এবে কবরীবন্ধন।^{৫৫}
আভরণহীন দেহ, হিম্নানীতে যথা
কুসুমরতন-হীন বন-সুশোভিনী
লতা। অশ্রুময় আঁখি, নিশার শিশির-
পূর্ণ পদ্মপর্ণ যেন। বীরবাহু-শোকে
বিবশা রাজমহিষী, বিহঙ্গিনী যথা,
যবে গ্রাসে কাল ফণী কুলায়ে পশিয়া
শাবকে; শোকের ঝড় বহিল সভাতে।
সুর-সুন্দরীর রূপে শোভিল চৌদিকে
বামাকুল; মুক্তকেশ মেঘমালা, ঘন
নিশ্বাস প্রলয়-বায়ু; অশ্রুবারি-খারা
আসার”^{৫৬}; জীমূত-মন্ত্র”^{৫৭} হাহাকার রব।
চমকিলা লঙ্কাপতি কনক-আসনে।
ফেলিল চামর দূরে তিতি নেত্রীয়ে
কিঙ্করী; কাঁদিল ফেলি ছত্র ছত্রধর;
ক্ষোভে, রোবে, দৌবারিক নিষ্কোথিলা অসি
ভীমরূপী; পাত্র, মিত্র, সভাসদ যত,
অধীর, কাঁদিলা সবে ঘোর কোলাহলে।

কত ক্রণে মৃদু স্বরে কহিলা মহিষী
চিত্রাঙ্গদা, চাহি সতী রাবণের পানে;
“একটি রতন মোরে দিয়াছিল বিধি
কৃপাময়; দীন আমি থুয়েছি নু তারে

৫৩ ঝড়। ৫৪. পাখিধরা ফাঁদ। ৫৫. বাঁধ। ৫৬. নুপুরের শব্দ। ৫৭. খোঁপা ৫৮. বৃষ্টিধারা।

৬৫ মেঘের গর্জনধ্বনি।

রক্ষাহেতু তব কাছে, রক্ষঃকুল-মণি
তরুর কোটরে রাখে শাবকে যেমতি
পাখী। কহ, কোথা তুমি রেখেছ তাহারে,
লঙ্কানাথ? কোথা মম অমূল্য রতন?
দরিদ্র-ধন-রক্ষণ রাজধর্ম; তুমি
রাজকুলেশ্বর; কহ, কেমনে রেখেছ,
কাস্মালিনী আমি, রাজা, আমার সে ধনে?”

উত্তর করিলা তবে দশানন বলী;—

“এ বৃথা গঞ্জনা, প্রিয়ে, কেন দেহ মোরে।
গ্রহদোষে দোষী জনে কে নিন্দে, সুন্দরি?
হায়, বিধিবশে, দেবি, সহি এ যাতনা
আমি। বীরপুত্রধাত্রী এ কনকপুরী,
দেখ, বীরশূন্য এবে; নিদাঘে যেমতি
ফুলশূন্য বনস্থলী, জলশূন্য নদী।
বরজে সজারু পশি বারুইর যথা
ছিন্ন ভিন্ন করে তারে, দশরথাস্বয়ং
মজাইছে লঙ্কা মোর। আপনি জলধি
পরেন শৃঙ্খল পায়ে তার অনুরোধে।
এক পুত্রশোকে তুমি আকুলা, ললনে,
শত পুত্রশোকে বুক আমার ফাটিছে
দিবা নিশি। হায়, দেবি, যথা বনে বায়ু
প্রবল, শিমুলশিখী^{৩০} ফুটাইলে বলে,
উড়ি যায় তুলারশি, এ বিপুল-কুল-
শেখর রাক্ষস যত পড়িছে তেমতি
এ কাল সমরে। বিধি প্রসারিছে বাছ
কিনাশিতে লঙ্কা মম, কহিনু তোমাতে।”

নীরবিলা রক্ষোনাথ; শোকে অধোমুখে
বিধুমুখী চিত্রাঙ্গদা, গন্ধর্কবন্দিনী,
কাঁদিলা,—বিহুলা, আহা, স্মরি পুত্রবরে।
কহিতে লাগিলা পুনঃ দাশরথি-অরি;—

“এ বিলাপ কভু, দেবি, সাজে কি
তোমাতে?”

দেশবৈরী নাশি রণে পুত্রবর তব
গেছে চলি স্বর্গপুরে; বীরমাতা তুমি;
বীরকর্মে হত পুত্র-হেতু কি উচিত
ক্রন্দন? এ বংশ মম উজ্জ্বল হে আজি
তব পুত্রপরাক্রমে; তবে কেন তুমি
কাঁদ, ইন্দুনিভাননে, তিত অশ্রুনীরে?”

উত্তর করিলা তবে চারুনেত্রী দেবী

চিত্রাঙ্গদা;—“দেশবৈরী নাশে যে সমরে,
শুভক্ষণে জন্ম তার; ধন্য বলে মানি
হেন বীরপ্রসূনের^{৩০} প্রসু^{৩১} ভাগ্যবতী।
কিন্তু ভেবে দেখ, নাথ, কোথা লঙ্কা তব;
কোথা সে অযোধ্যাপুরী? কিসের কারণে,
কোন লোভে কহ, রাজা, এসেছে এ দেশে
রাঘব? এ স্বর্ণ-লঙ্কা দেবেন্দ্রবাঞ্ছিত,
অতুল ভবমণ্ডলে; ইহার চৌদিকে
রজত-প্রাচীর সম শোভেন জলধি।
শুনেছি সরযুতীরে বসতি তাহার—
ক্ষুদ্র নর। তব হৈমসিংহাসন-আশে
যুঝিছে কি দাশরথি? বামন হইয়া
কে চাহে ধরিতে চাঁদে? তবে দেশরিপু
কেন তারে বল, বলি? কাকোদর^{৩২} সদা
নশশিরিঃ; কিন্তু তারে প্রহারয়ে যদি
কেহ, উর্ধ্ব-ফণা ফণী দংশে প্রহারকে।
কে, কহ, এ কাল-অগ্নি জ্বালিয়াছে আজি
লঙ্কাপুরে? হায়, নাথ, নিজ কর্ম-ফলে,
মজালে রাক্ষসকুলে, মজিলা আপনি।”

এতেক কহিয়া বীরবাহুর জননী,
চিত্রাঙ্গদা, কাঁদি সঙ্গে সঙ্গীদলে লয়ে,
প্রবেশিলা অন্তঃপুরে। শোকে, অভিমানে,
তাজি সুকনকাসন, উঠিলা গর্জিয়া
রাঘবারি। “এত দিনে” (কহিলা ভূপতি)
“বীরশূন্য লঙ্কা মম! এ কাল সমরে,
আর পাঠাইব কারে? কে আর রাখিবে
রাক্ষসকুলের মান? যাইব আপনি।
সাজ হে বীরেন্দ্রবৃন্দ, লঙ্কার ভূষণ।
দেখিব কি গুণ ধরে রঘুকুলমণি।
অরাবণ, অরাম বা হবে ভব আজি।”

এতেক কহিলা যদি নিকষানন্দন
শুরসিংহ, সভাতলে বাজিল দুন্দুভি
গভীর জীমুতমস্ত্রে। সে ভৈরব রবে,
সাজিল কব্ধূরবৃন্দ^{৩৩} বীরমদে মাতি,
দেব-দৈত্য-নর-ত্রাস। বাহিরিল বেগে
বারী^{৩৪} হতে (বারিশ্রোতঃ-সম পরাক্রমে
দুর্বার) বারণযুথ^{৩৫}; মন্দুরা^{৩৬} ত্যজিয়া
বাজীরাজী, বক্রগ্রীব, চিচাইয়া রোঘে
মুখস^{৩৭}। আইল চড়ে রথ স্বর্ণচূড়,

৩০. শিমুলের বীজকোষ। ৩১. বীরকুলে পুষ্পস্বরূপ—বীরকুলের গৌরব। ৩২. প্রসবিনী জননী। ৩৩. সর্প।

৩৪. রাক্ষসগণ। ৩৫. হস্তিশালা ৩৬. হস্তির দল ৩৭. অশ্বশালা। ৩৮. ঘোড়ার মুখের লাগামসংলগ্ন লৌহবস্তু।

ধৈর্য পুরিয়া পুরী। পদাতিক-ব্রজ,
কনক শিরস্ক^{১১} শিরে, ভাস্বর^{১০} পিধানে^{১২}
অসিবর, পৃষ্ঠে চন্দ্র অভেদ্য সমরে,
হস্তে শূল, শালবৃক্ষ অপ্রভেদী যথা,
আয়সী^{১৩}-আবৃত দেহ, আইল কাতারে।
আইল নিষাদী যথা মেঘবরাসনে
বজ্রপাণি; সাদী যথা অশ্বিনী-কুমার,
ধরি ভীমাকার ভিন্দিপাল, বিশ্বনাশী
পরশু,—উঠিল আভা আকাশ-মণ্ডলে,
যথা বনস্থলে যবে পশে দাবানল।
রক্ষঃকুলধ্বজ ধরি, ধ্বজধর বলী
মেলিলা কেতনবর, রতনে খচিত,
বিস্তারিয়া পাখা যেন উড়িলা গরুড়
অম্বরে। গস্তীর রোলে বাজিল চৌদিকে
এণবাদ্য, হয়বুহ হেথিল উল্লাসে,
গরজিল গজ, শঙ্খ নাদিল ভৈরবে;
কোদণ্ড-টঙ্কার সহ অসির বান্ বনি
রোধিল শ্রবণ-পথ মহা কোলাহলে।

টলিল কনকলঙ্কা বীরপদভরে :—
গর্জিলা বারীশ^{১৪} রোষে। যথা জলতলে
কনক-পঙ্কজ-বনে, প্রবাল-আসনে,
বারুণী^{১৫} রূপসী বসি, মুক্তাফল দিয়া
কবরী বাঁধিতেছিল,^{১৬} পশিল সে স্থলে
আরাব^{১৭}; চমকি সতী চাহিলা চৌদিকে।
কহিলেন বিধুমুখী সখীরে সন্তাষি
মধুস্বরে;—“কি কারণে, কহ, লো স্বজনি,
সহসা জলেশ পশী অস্তির হইলা?
দেখ, থর থর করি কাঁপে মুক্তাময়ী
গৃহচূড়া। পুনঃ বুঝি দুষ্ট বায়ুকুল
যুঝিতে তরঙ্গচয়-সঙ্গে দিলা দেখা।
ধিক্ দেব প্রভঞ্নে^{১৮}! কেমনে ভুলিলা
আপন প্রতিজ্ঞা, সখি, এত অল্প দিনে

বায়ুপতি? দেবেশ্বের সভায় তাঁহারে
সাধিনু সে দিন আমি বাঁধিতে শৃঙ্খলে
বায়ু-বৃন্দে; কারাগারে রোধিতে সবারে।^{১৯}
হাসিয়া কহিলা দেব;—অনুমতি দেহ,
জলেশ্বর, তরঙ্গিনী বিমলসলিলা
আছে যত ভবতলে কিঙ্করী তোমারি,
তা সবার সহ আমি বিহারি সতত,—
তা হলে পালিব আঞ্জা;—তখনি, স্বজনি,
সায় তাহে দিনু আমি। তবে কেন আজি,
আইলা পবন মোরে দিতে এ যাতনা?”

উত্তর করিলা সখী কল কল রবে;^{২০}
“বৃথা গঞ্জ প্রভঞ্নে, বারীন্দ্রমহিষি,
তুমি। এ ত ঝড় নহে; কিন্তু ঝড়াকারে
সাজিছে রাবণ রাজা স্বর্ণলঙ্কাধামে,
লাঘবিতে রাঘবের বীরগর্ভ রণে।”

কহিলা বারুণী পুনঃ;—“সত্য, লো স্বজনি,
বৈদেহীর হেতু রাম রাবণে বিগ্রহ।
রক্ষঃকুল-রাজলক্ষ্মী মম প্রিয়তমা
সখী। যাও শীঘ্র তুমি তাঁহার সদনে,
শুনিতে লালসা মোর রণের বারতা।
এই স্বর্ণকমলাটি দিও কমলারে।
কহিও, যেখানে, তাঁর রাঙা পা দুখানি
রাখিতেন শশিমুখী বসি পদ্মাসনে,
সেখানে ফোটে এ ফুল, যে অবধি তিনি
আঁধারি জলধি-গৃহ, গিয়াছেন গৃহে।”

উঠিলা মুরলা সখী, বারুণী-আদেশে,
জলতল তাজি, যথা উঠয়ে চটুলা
সফরী,^{২১} দেখাতে ধনী রজঃ-কান্তি-ছটা-^{২২}
বিভ্রম বিভাবসুরে। উতরিলা দৃতী
যথায় কমলালায়ে, কমল-আসনে,
বসেন কমলময়ী কেশব-বাসনা
লঙ্কাপুরে। ক্ষণকাল দাঁড়য়ে দুয়ারে,

১২. মুকুট। ১৩. উজ্জ্বল। ১৪. আচ্ছাদন—এখানে তরবারির ঝাপ।

১৫. লৌহবর্ম ১৬. সমুদ্র ১৭. জলদেবতা বরণের স্ত্রী (শুদ্ধরূপ বরণানী)।

১৮. কবির কল্পনায় সমুদ্রতলদেশের রূপ। ১৯. রব। ২০. ঝড়।

২১. সফলকে বন্দী করতে। ২২. সখী অর্থে মুরলা নদী—নদীর কলকল ধ্বনি কবিকল্পনায় কথা বলার শব্দ।

২৩. পুটি মাছ। ২৪. রৌপ্যের ন্যায় উজ্জ্বল অঙ্গকান্তি।

জুড়াইলা আঁখি সখী, দেখিয়া সন্মুখে,
 যে রূপমাধুরী মোহে মদনমোহনে।
 বহিছে বাসস্তানিল—চির অনুচর—
 দেবীর কমলপদপরিমল-আশে
 সূস্ননে। কুসুম-রাশি শোভিছে চৌদিকে,
 ধনদের^{১৫} হৈমাগারে রত্নরাজী যথা।
 শত স্বর্ণ-খুপদানে পুড়িছে অগুরু,
 গন্ধরস, গন্ধামোদে আমোদি দেউলে।
 স্বর্ণপাত্রে সারি সারি উপহার নানা,
 বিবিধ উপকরণ। স্বর্ণদীপাবলী
 দীপিছে,^{১৬} সুরভি তৈলে পূর্ণ—হীনতেজাঃ,
 ঋদ্যোতিকাদ্যোতি^{১৭} যথা পূর্ণ-শশী-তেজে।
 ফিরায়ে বদন, ইন্দু-বদনা ইন্দিরা
 বসেন বিবাদে দেবী, বসেন যেমতি—
 বিজয়া-দশমী যবে বিরহের সাথে
 প্রভাতয়ে গৌড়গৃহে—উমা চন্দ্রাননা
 করতলে বিন্যাসিয়া কপোল, কমলা
 তেজস্বিনী, বসি দেবী কমল-আসনে;—
 পশে কি গো শোক হেন কুসুম-হৃদয়ে ?
 প্রবেশিলা মন্দগতি মন্দিরে সুন্দরী
 মুরলা; প্রবেশি দূতী, রমার চরণে
 প্রণমিলা, নতভাবে। আশীষি ইন্দিরা—
 রক্ষঃ-কুল-রাজলক্ষ্মী—কহিতে লাগিলা;—
 “কি কারণে হেথা আজি, কহ লো মুরলে,
 গতি তব ? কোথা দেবী জলদলেষ্ৱরী,
 প্রিয়তমা সখী মম ? সদা আমি ভাবি
 তাঁর কথা। ছিনু যবে তাঁহার আলয়ে,
 কত যে করিলা কৃপা মোর প্রতি সতী
 বারুণী, কভু কি আমি পারি তা ভুলিতে ?
 রমার আশার বাস হরির উরসে^{১৮};—
 হেন হরি হারা হয়ে বাঁচিল যে রমা,
 সে কেবল বারুণীর স্নেহৌষধগুণে ?
 ভাল ত আছেন, কহ, প্রিয়সখী মম
 বারীন্দ্রাণী ?” উত্তরিলা মুরলা রূপসী;—
 “নিরাপদে জলতলে বসেন বারুণী।
 বৈদেহীর হেতু রাম রাবণে বিগ্রহ;
 শুনিতে লালসা, তাঁর রণের বারতা।
 এই যে পদ্মটি, সতি, ফুটেছিল সুখে।

যেখানে রাখিতে তুমি রাজা পা দুখানি;
 তেঁই পাশি-প্রণয়িনী প্রেরিয়াছে এরে।”
 বিবাদে নিশ্বাস ছাড়ি কহিলা কমলা,
 বৈকুণ্ঠধামের জ্যোৎস্না;— “হায় লো স্বজনি,
 দিন দিন হীন-বীৰ্য্য রাবণ দুশ্শক্তি,
 যাদঃ-পত্তি^{১৯}-রোধঃ^{২০} যথা চলোন্মি^{২১}—
 আঘাতে।
 শুনি চমকিবে তুমি। কুব্ধকর্ণ বলী
 ভীমাকৃতি, অকম্পন, রণে ধীর, যথা
 ভূধর, পড়েছে সহ অতিকায় রথী।
 আর যত রক্ষঃ আমি বর্ণিতে অক্ষম।
 মরিয়াছে বীরবাহু—বীর-চূড়ামণি,
 ওই যে ত্রন্দন-ধ্বনি শুনিছ, মুরলে,
 অন্তঃপুরে, চিত্রাঙ্গদা কাঁদে পুত্রশোকে
 বিকলা। চঞ্চলা আমি ছাড়িতে এ পুরী।
 বিদরে হৃদয় মম শুনি দিবা নিশি
 প্রমদা-কুল-রোদন। প্রতি গৃহে কাঁদে
 পুত্রহীনা মাতা, দৃতি, পতিহীনা সতী।”
 সুধিলা মুরলা;— “কহ, শুনি, মহাদেবি,
 কোন্ বীর আজি পুনঃ সাজিছে যুধিতে
 বীরদর্পে ?” উত্তরিলা মাধব-রমণী;—
 “না জানি কে সাজে আজি। চল লো মুরলে,
 বাহিরিয়া দেখি মোরা কে যায় সমরে।”
 এতেক কহিয়া রমা মুরলার সহ,
 রক্ষঃকুল-বালা-রূপে, বাহিরিলা দৌঁহে
 দুকুল^{২২}-বসনা। রুণু রুণু মধুবোলে
 বাজিল কিঙ্কিনী; করে শোভিল কঙ্কণ,
 নয়নরঞ্জন কাঞ্চি^{২৩} কৃশ কটিদেশে।
 দেউল দুয়ারে দৌঁহে দাঁড়িয়ে দেখিলা,
 কাতারে কাতারে সেনা চলে রাজপথে,
 সাগরতরঙ্গ যথা পবন-তাড়নে
 দ্রুতগামী। ধায় রথ, ঘুরয়ে ঘর্ষরে
 চক্রনেমি^{২৪}। দৌঁড়ে ঘোড়া ঘোর ঝড়াকারে।
 অধীরিয়া বসুধারে পদভরে, চলে
 দস্তী^{২৫} আক্ষফালিয়া শুণ্ড, দণ্ডধর যথা
 কাল-দণ্ড। বাজে বাদ্য গস্তীর নিক্ণেণে।
 রতনে খচিত কেতু উড়ে শত শত
 তেজস্কর। দুই পাশে, হৈম-নিকেতন-

১৫. ধনের অধিপতি যক্ষরাজ কুবের। ১৬. দীপ্যমান—যা জ্বলছে। ১৭. জোনাকির আলো। ১৮. বক্ষ।

১৯. সমুদ্র। ২০. তটভূমি। ২১. সদাচঞ্চল তরঙ্গ। ২২. পটবস্ত্র। ২৩. মেখলা। ২৪. চাকার পরিধি। ২৫. হতি।

বাতায়নে দাঁড়াইয়া ভুবনমোহিনী
লঙ্কাবধু বরিয়য়ে কুসুম-আসার,
করিয়া মঙ্গলধ্বনি। কহিলা মুরলা,
চাহি ইন্দিরার ইন্দুবদনের পানে;—

“ত্রিদিব-বিভব, দেবি, দেখি ভবতলে
আজি! মনে হয় যেন, বাসব আপনি,
স্বরীশ্বর, সুর-বল-দল সঙ্গে করি,
প্রবেশিলা লঙ্কাপুরে। কহ, কৃপাময়ি,
কৃপা করি কহ, শুনি, কোন্ কোন্ রথী
রণ-হেতু সাজে এবে মন্ত বীরমদে?”

কহিলা কমলা সতী কমলনয়না;—
‘হায়, সখী, বীরশূন্য স্বর্ণ লঙ্কাপুরি।
মহারথীকুল-ইন্দ্র^{১৬} আছিল যাহারা,
দব-দৈত্য-নর-ত্রাস, ক্ষয় এ দুর্জয়
গে। শুভ ক্ষণে ধনুঃ ধরে রঘুমণি!
ওই যে দেখিছ রথী স্বর্ণ-চূড়-রথে,
গীমমূর্ত্তি, বিরূপাক্ষ রক্ষঃ-দল-পতি,
ক্ষুেড়নধারী^{১৭} বীর, দুর্ব্বার সমরে।
জপুষ্ঠে দেখ ওই কালনেমি, বলে
রূপকুল-কাল বলী, ভিন্দিপালপাণি।
মম্বারোহী দেখ ওই তালবৃক্ষকৃতি
গলজঙ্ঘা, হাতে গদা, গদাধর যথা
রারি! সমর-মদে মন্ত, ওই দেখ
মন্ত, ভীষণ রক্ষঃ, বক্ষঃ শিলাসম
গঠিন! অন্যান্য যত কত আর কব?
ত শত হেন যোধ হত এ সমরে,
যথা যবে প্রবেশয়ে গহন বিপিনে
বন্ধানর, তুঙ্গতর মহীরুহব্যূহ
পুড়ি ভস্মরাশি সবে ঘোর দাবানলে।”

সুধিলা মুরলা দূতী; “কহ, দেবীশ্বরি,
কি কারণে নাহি হেরি মেঘনাদ রথী
ইন্দ্রজিতে রক্ষঃ-কুল-হর্যাক্ষ বিগ্রহে?
হত কি সে বলী, সতি, এ কাল সমরে?”

উত্তর করিলা রমা সুচারুহাসিনী;
“প্রমোদ-উদ্যানে বুঝি ভ্রমিছে আমোদে,
যুবরাজ, নাহি জানি হত আজি রণে
বারবাছ; যাও তুমি বারুণীর পাশে,

মুরলে। কহিও তাঁরে এ কনক-পুরী
তাজিয়া, বৈকুণ্ঠ-ধামে ত্বরা যাব আমি।
নিজদোষে মজে রাজা লঙ্কা-অধিপতি।
হায়, বরিবার কালে বিমল-সলিলা
সরসী, সমলা যথা কন্দর্প-উগমে,
পাপে পূর্ণ স্বর্ণলঙ্কা। কেমনে এখানে
আর বাস করি আমি? যাও চলি, সখি,
প্রবাল-আসনে যথা বসেন বারুণী
মুক্তাময় নিকেতনে। যাই আমি যথা
ইন্দ্রজিৎ, আনি তারে স্বর্ণ-লঙ্কা-ধামে।
প্রাক্তনের^{১৮} ফল ত্বরা ফলিবে এ পুরে।”

প্রণমি দেবীর পদে, বিদায় হইয়া,
উঠিলা পবন-পথে মুরলা রূপসী
দূতী, যথা শিখতিনী^{১৯}, আখণ্ডল-ধনুঃ-
বিবিধ-রতন-কান্তি আভায় রঞ্জিয়া
নয়ন, উড়য়ে ধনী মঞ্জু কুঞ্জবনে।

উতরি জলধি-কূলে, পশিলা সুন্দরী
নীল-অশ্ব-রাশি। হেথা কেশব-বাসনা
পদ্মাক্ষী, চলিলা রক্ষঃ-কুল-লক্ষ্মী, দূরে
যথায় বাসব-ত্রাস বসে বীরমণি
মেঘনাদ। শূন্যমার্গে চলিলা ইন্দির।

কত ক্ষণে উতরিলা হৃষীকেশ-প্রিয়া,
সুকেশিনী, যথা বসে চির-রণজয়ী
ইন্দ্রজিত। বৈজয়ন্তধাম-সম পুরী,—
অলিন্দে সুন্দর হৈমময় স্তম্ভাবলী
হীরাচূড়; চারি দিকে রম্য বনরাজী
নন্দনকানন যথা।^{২০} কুহরিছে ডালে
কোকিল; ভ্রমরদল ভ্রমিছে গুঞ্জরি;
বিকশিছে ফুলকুল; মন্মরিছে পাতা;
বহিছে বাসন্তানিল; ঝরিছে ঝর্ঝরে
নির্ঝর। প্রবেশি দেবী সুবর্ণ-প্রাসাদে,
দেখিলা সুবর্ণ-দ্বারে ফিরিছে নির্ভয়ে
ভীমরূপী বামাবন্দ, শরাসন^{২১} করে।
দুলিছে নিষঙ্গ-^{২২} সঙ্গে বেণী পৃষ্ঠদেশে।
বিজলীর ঝলা সম, বেণীর মাঝারে,
রত্নরাজী, তুণে শর মণিময় ফণী!
উচ কুচ-যুগোপরি সুবর্ণ কবচ,^{২৩}

১৬. মহারথীদের মধ্যে বিশিষ্ট। ১৭. লৌহক্ষুকধারী ১৮. জন্মান্তরের কর্মফল যা ভোগ করা হয়নি।

১৯. ময়ূরী। ২০. স্বর্গের উদ্যানের মতো। ২১. ধনুক। ২২. তুল। ২৩. বর্ম।

রবি-কর-জাল যথা প্রফুল্ল কমলে ।
 তুণে মহাখর শর; কিন্তু খরতর
 আয়ত-লোচনে শর । নবীন যৌবন-
 মদে মস্ত, ফেরে সবে মাতঙ্গিনী যথা
 মধুকালে । বাজে কাঞ্চী, মধুর শিজিতে,^{১০৪}
 বিশাল নিতম্ববিশ্বে; নৃপুত্র চরণে ।
 বাজে বীণা, সপ্তস্বর, মুরজ, মুরলী;
 সঙ্গীত-তরঙ্গ, মিশি সে রবের সহ,
 উথলিছে চারি দিকে, চিত্ত বিনোদিয়া ।
 বিহারিছে বীরবর, সঙ্গে বরাজনা
 প্রমদা, রজনীনাথ বিহারেন যথা
 দক্ষ-বালা-দলে লয়ে; কিম্বা, রে যমুনে,
 ভানুসুতে^{১০৫}, বিহারেন রাখাল যেমতি
 নাচিয়া কদম্বমূলে, মুরলী অধরে,
 গোপ-বধু-সঙ্গে সঙ্গে তোর চারু কূলে!^{১০৬}
 মেঘনাদধাত্রী নামে প্রভাবা রাক্ষসী ।
 তার রূপ ধরি রমা, মাধব-রমণী,
 দিলা দেখা, মুটে যষ্টি, বিশদ-বসনা^{১০৭} ।
 কনক-আসন ত্যজি, বীরেন্দ্রকেশরী
 ইন্দ্রজিৎ, প্রণমিয়া ধাত্রীর চরণে,
 কহিলা,— “কি হেতু, মাতঃ, গতি তব আজি
 এ ভবনে? কহ দাসে লঙ্কার কুশল ।”
 শিরঃ চুশ্বি, ছয়বেশী অম্বুরাশি-সূতা^{১০৮}
 উত্তরিলা;— “হায়! পুত্র, কি আর কহিব
 কনক-লঙ্কার দশা! ঘোরতর রণে,
 হত প্রিয় ভাই তব বীরবাছ বলী!
 তার শোকে মহাশোকী রাক্ষসাস্থিপতি,
 সসৈন্যে সাজেন আজি যুঝিতে আপনি ।”
 জিজ্ঞাসিলা মহাবাহু বিস্ময় মানিয়া;—
 “কি কহিলা, ভগবতি? কে বধিল কবে
 প্রিয়ানুজে? নিশা-রণে সংহারিনু আমি
 রঘুবরে; খণ্ড খণ্ড করিয়া কাটিনু
 বরষি প্রচণ্ড শর বৈরিদলে; তবে
 এ বারতা, এ অদ্ভুত বারতা, জননি,
 কোথায় পাইলে তুমি, শীঘ্র কহ দাসে ।”

রত্নাকর-রত্নোত্তমা ইন্দ্রিরা সুন্দরী
 উত্তরিলা;— “হায়! পুত্র, মায়াবী মানব
 সীতাপতি; তব শরে মরিয়া বাঁচিল ।
 যাও তুমি ত্বরা করি; রক্ষ রক্ষঃকুল-
 মান, এ কাল সমরে, রক্ষঃ-চূড়ামণি!”
 ছিঁড়িলা কুসুমদাম রোষে মহাবলী
 মেঘনাদ; ফেলাইলা কনক-বলয়
 দূরে; পদ-তলে পড়ি শোভিল কুণ্ডল,
 যথা অশোকের ফুল অশোকের তলে
 আভাময়! “ধিক মোরে” কহিলা গস্ত্রী
 কুমার, “হা ধিক মোরে! বৈরিদল বেড়ে
 স্বর্ণলঙ্কা, হেথা আমি রামাদল মাঝে?
 এই কি সাজে আমারে, দশাননাস্বজ
 আমি ইন্দ্রজিৎ; আন রথ ত্বরা করি;
 যুচাব এ অপবাদ, বধি রিপুকূলে!”^{১০৯}
 সাজিলা রথীন্দ্রবর্ষভ^{১১০} বীর-আভরণে,
 হৈমবতীসুত^{১১১} যথা নাশিতে তারকে
 মহাসুর^{১১২}; কিম্বা যথা বৃহন্নলারূপী
 কিরীটী, বিরাটপুত্র সহ, উদ্ধারিতে
 গোধন, সাজিলা শুর শমীবৃক্ষমূলে।^{১১৩}
 মেঘবর্ণ রথ; চক্র বিজলীর ছটা;
 ধ্বজ ইন্দ্রচাপরূপী; তুরঙ্গম বেগে
 আশুগতি । রথে চড়ে বীর-চূড়ামণি
 বীরদর্পে, হেন কালে প্রমীলা সুন্দরী,
 ধরি পতি-কর-যুগ (হায় রে, যেমতি
 হেমলতা আলিঙ্গয়ে তরু-কুলেশ্বরে)
 কহিলা কাঁদিয়া ধনী; “কোথা প্রাণসখে,
 রাখি এ দাসীরে, কহ, চলিলা আপনি?
 কেমনে ধরিবে প্রাণ তোমার বিরহে
 এ অভাগী? হায়, নাথ, গহন কাননে,
 ব্রততী বাঁধিলে সাথে করি-পদ, যদি
 তার রঙ্গরসে মনঃ না দিয়া, মাতঙ্গ
 যায় চলি, তবু তারে রাখে পদাশ্রমে
 যুথনাথ । তবে কেন তুমি, গুণনিধি,
 ত্যজ কিঙ্করীকে আজি?” হাসি উত্তরিলা

১০৪. ভূষণের ধ্বনি । ১০৫. সূর্যকন্যা যমুনার প্রতি সন্মোহন । ১০৬. রাখাকৃষ্ণের ব্রজলীলার প্রসঙ্গ ।

১০৭. শুভ গোশাক পরিহিতা । ১০৮. সমুদ্রমন্ডন কালে উখিত বলে লক্ষ্মীর অপর নাম । ১০৯. শত্রু সকলকে ।

১১০. ঋষভ বা বৃষসদৃশ বলশালী শ্রেষ্ঠ রথী । ১১১. কার্ত্তিক ১১২. কার্ত্তিক কর্তৃক তারকাসুর বধের পৌরাণিক কাহিনী । ১১৩. অজ্ঞাতবাস কালে বিরাট রাজ্যে অর্জুনের যুদ্ধ সম্ভার প্রয়োজনে ছয়বেশ ত্যাগের মহাভারতীয় কাহিনী ।

মেঘনাদ, “ইন্দ্রজিতে জিতি তুমি, সতি,
বৈধেছ যে দৃঢ় বাঁধে, কে পারে খুলিতে
সে বাঁধে? ত্বরায় আমি আসিব ফিরিয়া
কল্যাণি, সমরে নাশি তোমার কল্যাণে
রাঘবে। বিদায় এবে দেহ, বিধুমুখি।”

উঠিল পবন-পথে, ঘোরতর রবে,
রথবর, হৈমপাখা বিস্তারিয়া যেন
উড়িলা মৈনাক-শৈল,^{১১৪} অশ্বর উজ্জলি।
শিঞ্জিনী^{১১৫} আকর্ষি রোষে, টঙ্কারিলা ধনুঃ
বীরেন্দ্র, পক্ষীন্দ্র যথা নাদে মেঘ মাঝে
ভৈরবে। কাঁপিল লক্ষা, কাঁপিলা জলধি।

সাজিছে রাবণ রাজা, বীরমদে মাতি;—
বাজিছে রণ-বাজনা; গরজিছে গজ;
হেযে অশ্ব; হুকারিছে পদাতিক, রথী;
উড়িছে কৌশিক-ধ্বজ;^{১১৬} উঠিছে আকাশে
কাঞ্চন-কঙ্কুক-বিভা।^{১১৭} হেন কালে তথা
দ্রুতগতি উতরিলা মেঘনাদ রথী।

নাদিলা কর্করদল হেরি বীরবরে
মহাগর্বে। নমি পুত্র পিতার চরণে,
করযোড়ে কহিলা;—“হে রক্ষঃ-কুল-পতি,
শুনেছি, মরিয়া না কি বাঁচিয়াছে পুনঃ
রাঘব? এ মায়া, পিতঃ, বন্ধিতে না পারি।
কিন্তু অনুমতি দেহ; সমূলে নিশ্চূল
করিব পামরে আজি। ঘোর শরানলে
করি ভস্ম, বায়ু-অস্ত্রে উড়াইব তারে;
নতুবা বাঁধিয়া আনি দিব রাজপদে।”

আলিঙ্গি কুমারে, চুশ্বি শিরঃ, মৃদুস্বরে
উত্তর করিলা তবে স্বর্ণ-লঙ্কাপতি;—
“রাক্ষস-কুল-শেখর তুমি, বৎস; তুমি
রাক্ষস-কুল-ভরসা। এ কাল সমরে,
নাহি চাহে প্রাণ মম পাঠাইতে তোমা
বারম্বার। হায়, বিধি বাম মম প্রতি।
কে কবে শুনেছে পুত্র, ভাসে শিলা জলে,
কে কবে শুনেছে, লোক মরি পুনঃ বাঁচে?”

উত্তরিলা বীরদর্পে অসুরারি-রিপু;—

“কি ছার সে নর, তারে ডরাও আপনি,
রাজেন্দ্র? থাকিতে দাস, যদি যাও রণে
তুমি, এ কলঙ্ক, পিতঃ, ঘৃষিবে জগতে।
হাসিবে মেঘবাহন; রুষিবেন দেব
অগ্নি। দুই বার আমি হারানু রাঘবে;
আর এক বার পিতঃ, দেহ আজ্ঞা মোরে;
দেখিব এ বার বীর বাঁচে কি ঔষধে।”

কহিলা রাক্ষসপতি;—“কুন্তকর্ণ বলী
ভাই মম,— তায় আমি জাগানু অকালে
ভয়ে; হায়, দেহ তার, দেখ, সিদ্ধ-তীরে
ভূপতিত, গিরিশৃঙ্গ কিম্বাতরু যথা
বজ্রাঘাতে। তবে যদি একান্ত সমরে
ইচ্ছা তব, বৎস, আগে পূজ ইষ্টদেবে,—
নিকুণ্ডিলা যজ্ঞ সাজ কর, বীরমণি!
সেনাপতি-পদে আমি বরিনু তোমারে।
দেখ, অস্ত্রাচলগামী দিননাথ এবে;
প্রভাতে যুগিও, বৎস, রাঘবের সাথে।”

এতেক কহিয়া রাজা, যথাবিধি লয়ে
গঙ্গোদক, অভিষেক করিলা কুমারে।
অমনি বন্দিল বন্দী,^{১১৮} করি বীণাধ্বনি
আনন্দে; “নয়নে তব, হে রাক্ষস-পুত্রি,^{১১৯}
অশ্রুবিন্দু; মুক্তকেশী শোকাবশে তুমি;
ভূতলে পড়িয়া, হায়, রতন-মুকুট,
আর রাজ-আভরণ, হে রাজসুন্দরি,
তোমার। উঠ গো শোক পরিহরি, সতি।
রক্ষঃ-কুল-রবি ওই উদয়-অচলে।
প্রভাত হইল তব দুঃখ-বিভাবরী।
উঠ রাণি, দেখ, ওই ভীম বাম করে
কোদণ্ড, টঙ্কারে যার বৈজয়স্ত-ধামে
পাশুবর্ণ আখণ্ডল। দেখ তুণ, যাহে
পশুপতি-ত্রাস অস্ত্র পাশুপত-সম!
গুণি-গণ-শ্রেষ্ঠ গুণী, বীরেন্দ্র কেশরী,
কামিনীরঞ্জন রূপে, দেখ মেঘনাদে!
ধন্য রাণী মন্দোদরী! ধন্য রক্ষঃ-পতি
নৈকষেয়! ধন্য লক্ষা, বীরধাত্রী তুমি।

১১৪. উড়ন্ত মৈনাকের প্রসঙ্গ। ১১৫. ধনুকের ছিলা ১১৬. কোষ অর্থাৎ কেশমী কাপড়ের কজ বা পতাকা।

১১৭. সুবর্ণ বর্মের আভা। ১১৮. স্তুতি গায়ক। ১১৯. শোকাবশে লক্ষ্মীপুত্রীকে মূর্তিমতী নারীরূপে কবিকল্পনা।

আকাশ-দুহিতা ওগো শুন প্রতিধ্বনি,
কহ সবে মুক্তকণ্ঠে, সাজে অরিন্দম
ইন্দ্রজিৎ। ভয়াকুল কাঁপুক শিবিরে
রঘুপতি, বিভীষণ, রক্ষঃ-কুল-কালি,
দশুক-অরণ্যচর ক্ষুদ্র প্রাণী যত।”

বাজিল রাক্ষস-বাদ্য, নাদিল রাক্ষস;—
পূরিল কনক-লঙ্কা জয় জয় রবে।

ইতি শ্রীমেঘনাদবধে কাব্যে অভিব্যেকো নাম
প্রথমঃ সর্গঃ।

দ্বিতীয় সর্গ

অস্তে গেলা দিনমণি; আইলা গোধূলি,
একটি রতন ভালে।^১— ফুটিলা কুমুদী;
মুদিলা সরসে আঁখি বিরসবদনা
নলিনী; কুঞ্জনি পাখী পশিল কুলায়ে;
গোষ্ঠ-গৃহে গাভী-বৃন্দ ধায় হান্না রবে।
আইলা সূচারু-তারা শশী সহ হাসি,
শর্করী; সুগন্ধবহ বহিল চৌদিকে,
সুস্থনে সবার কাছে কহিয়া বিলাসী,
কোন্ কোন্ ফুল চুশি কি ধন পাইলা।
আইলেন নিদ্রা দেবী; ক্রান্ত শিশুকুল
জননীর ক্রোড়-নীড়ে লভয়ে যেমতি
বিরাম, ভূচর সহ জলচর-আদি
দেবীর চরণাশ্রমে বিশ্রাম লভিলা।

উতরিলা শশিপ্রিয়া ত্রিদশ-আলয়ে।
বসিলেন দেবপতি দেবসভা মাঝে,
হেমানসে; বামে দেবী পুলোম-নন্দিনী
চারুনেত্রা। রজ-ছত্র, মণিময় আভা,
শোভিল দেবেন্দ্র-শিরে। রতনে খচিত
চামর যতনে ধরি, ঢুলায় চামরী।
আইলা সুসমীরণ, নন্দন-কানন-
গন্ধমধু বহি রঙ্গে। বাজিল চৌদিকে
ত্রিদিব-বাদিত্র^২। ছয় রাগ, মুস্তিমতী
ছত্রিশ রাগিণী সহ, আসি আরঙিলা
সঙ্গীত। উর্বশী, রজ্জা সূচারুহাসিনী,
চিত্রলেখা, সুকেশিনী মিশ্রকেশী, আসি
নাচিলা, শিঞ্জিতে রঞ্জি দেব-কুল-মনঃ।
যোগায় গন্ধর্ষ স্বর্ণ-পাত্রে সুধারসে।
কেহ বা দেব-ওদন^৩; কুঙ্কুম, কস্তুরী,
কেশর বহিছে কেহ; চন্দন কেহ বা;

সুগন্ধ মন্দার-দাম গাঁথি আনে কেহ।
বৈজয়ন্ত-ধামে সুখে ভাসেন বাসব
ত্রিদিব-নিবাসী সহ; হেন কালে তথা,
রূপের আভায় আলো করি সুর-পূরী
রক্ষঃ-কুল-রাজলক্ষ্মী আসি উতরিলা।

সসন্ত্রমে প্রণমিলা রমার চরণে
শচীকান্ত। আশীষিয়া হৈমানসে বসি,
পদ্মাঙ্কী পুণ্ডরীকাক্ষ^৪-বন্ধোনিবাসিনী
কহিলা; “হে সুরপতি, কেন যে আইনু
তোমার সভায় আজি, শুন মনঃ দিয়া।”

উত্তর করিলা ইন্দ্র; “হে বারীন্দ্র-সুতে,
বিশ্বরমে^৫, এ বিশ্বে ও রাঙা পা দুখানি
বিশ্বের আকাঙ্ক্ষা মা গো! যার প্রতি তুমি,
কৃপা করি, কৃপা-দৃষ্টি কর, কৃপাময়ি,
সফল জনম তারি। কোন্ পুণ্য-ফলে,
লভিল এ সুখ দাস, কহ, মা, দাসেরে?”

কহিলেন পুনঃ রমা, “বহুকালাবধি
আছি আমি, সুরনিধি, স্বর্ণ-লঙ্কাধামে।
পূজে মোরে রক্ষোব্রাহ্মণ। হায়, এত দিনে
বাম তার প্রতি বিধি। নিজ কর্ষ-দোষে,
মজিছে সবংশে পাপী; তবুও তাহারে
না পারি ছাড়িতে, দেব। বন্দী যে দেবেন্দ্র,
কারাগার-দ্বার নাহি খুলিলে কি কভু
পারে সে বাহির হতে? যত দিন বাঁচে
রাবণ, থাকিব আমি বাঁধা তার ঘরে।
মেঘনাদ নামে পুত্র, হে বৃত্রবিজয়ি,
রাবণের, বিলক্ষণ জান তুমি তারে।
একমাত্র বীর সেই আছে লঙ্কাধামে
এবে; আর বীর যত, হত এ সমরে।

১. প্রাক-সম্ভাষ্য গোধূলি লয়ে আকাশের সম্ভাষাতারা—শুকতারা। ২. বাদ্যযন্ত্র ৩. খাদ্য।

৪. পুণ্ডরীক—শ্বেতপদ্ম। শ্বেতপদ্মের ন্যায় চোখ যার—বিষ্ণু। ৫. ভুবনমোহিনী।

বিক্রম-কেশরী শুর আক্রমিবে কালি
রামচন্দ্রে; পুনঃ তারে সেনাপতি-পদে
বরিয়াছে দশানন। দেব-কুল-প্রিয়
রাঘব; কেমনে তারে রাখিবে, তা দেখ।
নিকুণ্ডিলা যজ্ঞ সাজ করি, আরঙিলে
যুদ্ধ দস্তী মেঘনাদ, বিষম শঙ্কটে
ঠেকিবে বৈদেহীনাথ, কহিনু তোমাংরে।
অজ্জয় জগতে মন্দোদরীর নন্দন,
দেবেন্দ্র। বিহঙ্গকুলে বৈনতেয়ং যথা
বল-জ্যেষ্ঠ, রক্ষঃ-কুল-শ্রেষ্ঠ শুরমণি।”

এতেক কহিয়া রমা কেশব-বাসনা
নীরবিলা; আহা মরি, নীরবে যেমতি
বীণা, চিন্ত বিনোদিয়া সুমধুর নাদে।
ছয় রাগ, ছত্রিশ রাগিণী আদি যত,
শুনি কমলার বাণী, ভুলিলা সকলে
স্বকর্ম; বসন্তকালে পাখীকুল যথা,
মুঞ্জরিত কুঞ্জ, শুনি পিকবর-ধ্বনি।

কহিলেন স্বরীশ্বর; “এ ঘোর বিপদে,
বিশ্বনাথ কিনা, মাতঃ, কে আর রাখিবে
রাঘবে? দুর্বার রণে রাবণ-নন্দন।
পন্নগ-অশনে^৭ নাগ নাহি ডরে যত,
ততোধিক ডরি তারে আমি। এ দণ্ডোলি,^৮
বৃত্রাসুর-শিরঃ চূর্ণ যাহে, বিমুখয়ে
অস্ত্র-বলে মহাবলী; তেঁই এ জগতে
ইন্দ্রজিৎ নাম তার। সর্বশুচি^৯-বরে
সর্বজয়ী বীরবর। দেহ আঞ্জা দাসে,
যাই আমি শীঘ্রগতি কৈলাস-সদনে।”

কহিলা উপেন্দ্র-প্রিয়া বারীন্দ্রনন্দিনী;
“যাও তবে সুরনাথ, যাও ত্বর করি।
চন্দ্র-শেখরের পদে, কৈলাস-শিখরে,
নিবেদন কর, দেব, এ সব বারতা।
কহিও সতত কাঁদে বসুন্ধরা সতী,
না পারি সহিতে ভার; কহিও, অনন্ত
ক্লান্ত এবে। না হইলে নিমূল সমূলে
রক্ষঃপতি, ভবতল রসাতলে যাবে।
বড় ভাল বিরূপাক্ষ^{১০} বাসেন লক্ষ্মীরে।
কহিও, বৈকুণ্ঠপুরী বহু দিন ছাড়ি
আছয়ে সে লঙ্কাপুরে। কত যে বিরলে
ভাবয়ে সে অবিরল, এক বার তিনি,

কি দোষ দেখিয়া, তারে না ভাবেন মনে?
কোন পিতা দুহিতারে পতি-গৃহ হতে
রাখে দূরে—জিঞ্জাসিও, বিজ্ঞ জটায়ুরে।^{১১}
দ্রাবক^{১২} না পাও যদি, অধিকার পদে
কহিও এ সব কথা।”—এতেক কহিয়া,
বিদায় হইয়া চলি গেলা শশিমুখী
হরিপ্রিয়া। অনস্বর-পথে^{১৩} সুকেশিনী,
কেশব-বাসনা দেবী গেলা অধোদেশে।
সোনার প্রতিমা, যথা। বিমল সলিলে
ডুবে তলে জলরাশি উজলি স্বতজ্জে।

আনিলা মাতলি^{১৪} রথ; চাহি শচী পানে
কহিলেন শচীকান্ত মধুর বচনে
একান্তে; “চলহ, দেবি, মোর সঙ্গে তুমি।
পরিমল-সুধা সহ পবন বহিলে,
দ্বিগুণ আদর তার। মৃগালের রুচি
বিকচ কমল-গুণে, শুন লো ললনে।”
শুনি প্রণয়ীরা বাণী, হাসি নিতম্বিনী,
ধরিয়া পতির কর, আরোহিলা রথে।

স্বর্ণ-হৈম-দ্বারে রথ উতরিল দ্বারা।
আপনি খুলিল দ্বার মধুর নিনাদে
অমনি। বাহিরি বেগে, শোভিল আকাশে
দেবযান; সচকিতে জগত জাগিলা,
ভাবি রবিদেব বুঝি উদয়-অচলে
উদিল। ডাকিল ফিঙা; আর পাখী যত
পূরিল নিকুঞ্জ-পুঞ্জ প্রভাতী সংগীতে।
বাসরে কুসুম-শয্যা ত্যজি লঙ্কাশীলা
কুলবধু, গৃহকার্য্য উঠিলা সাধিতে।

মানস-সকাশে শোভে কৈলাসশিখরী
আভাময়; তার শিরে ভবের ভবন,
শিখি-পুচ্ছ-চূড়া যেন মাধবের শিরে।
সুশ্যামাঙ্গ শৃঙ্গধর; স্বর্ণ-ফুল-শ্রেণী
শোভে তাহে, আহা মরি পীত ধড়া যেন।
নির্ঝর-ঝরিত-বারি-রাশি স্থানে স্থানে—
বিশদ চন্দনে যেন চর্চিত সে বপুঃ।

ত্যজি রথ, পদব্রজে, সহ স্বরীশ্বরী,
প্রবেশিলা স্বরীশ্বর আনন্দ-ভবনে।
রাজরাজেশ্বরী-রূপে বসেন ঈশ্বরী^{১৫}
স্বর্ণাসনে; চুলাইছে চামর বিজয়া;
ধরে রাজ-ছত্র জয়া। হায় রে, কেমনে,

৬. বিনতানন্দন গরুড়। ৭. পন্নগ—সর্প। সর্প যার আহার—গরুড়পক্ষী। ৮. বজ্র। ৯. যিনি সবকিছুকে পরিশোধিত বা পবিত্র করেন—অগ্নি। ১০. বিরূপ বা বিকৃত চোখ যাব—মহাদেব। নিয়ত ধ্যানের ফলে মহাযোগী। মহাদেবের চোখের দৃষ্টি সর্বদাই উর্ধ্বমুখী। ১১. জটাজুটধারী মহাদেব। ১২. মহাদেব। ১৩. আকাশ-পথে। ১৪. দেবরাজ ইন্দ্রের রথের সারথি। ১৫. দেবী দুর্গা।

ভবভবনের^{১৬} কবি বর্ণিবে বিভব ?
 দেখ, হে ভাবুক জন, ভাবি মনে মনে।
 পুঞ্জিলা শক্তির পদ মহাভক্তি ভাবে
 মহেন্দ্র ইন্দ্রাণী সহ। আশীষি অম্বিকা
 জিঞ্জাসিলা;—“কহ, দেব, কুশল বারতা,—
 কি কারণে হেথা আজি, তোমা দুই জনে?”
 কর-যোড়ে আরঙিলা

দত্তোলি-নিষ্কেপী;—

“কি না তুমি জান, মাতঃ, অখিল জগতে ?
 দেবদ্রোহী লঙ্কাপতি, আকুল বিগ্রহে,
 বরিয়াছে পুনঃ পুত্র মেঘনাদে আজি
 সেনাপতি-পদে ? কালি প্রভাতে কুমার
 পরম্প^{১৭} প্রবেশিবে রণে, ইষ্টদেবে
 পুঞ্জি, মনোনীত বর লভি তার কাছে।
 অবিদিত নহে মাতঃ, তার পরাক্রম।
 রক্ষঃ-কুল-রাজলক্ষ্মী, বৈজয়ন্ত-ধামে,
 আসি, এ সংবাদ দাসে দিলা, ভগবতী।
 কহিলেন হরিপ্রিয়া, কাঁদে বসুক্কা,
 এ অসহ ভার সতী না পারি সহিতে;
 ক্লান্ত বিশ্বধর শেষ; তিনিও আপনি
 চঞ্চলা সতত এবে ছাড়িতে কনক-
 লঙ্কাপুরী। তব পদে এ সংবাদ দেবী
 আদেশিলা নিবেদিতে দাসেরে, অন্নদে !
 দেব-কুল-প্রিয় বীর রঘু-কুল-মণি।
 কিম্ব দেবকুলে হেন আছে কোন্ রথী
 যুঝিবে যে রণ-ভূমে রাবণির সাথে ?
 বিশ্বনাশী কুলিশে, মা, নিস্তেজে সমরে
 রাক্ষস, জগতে খ্যাত ইন্দ্রজিত নামে।
 কি উপায়ে, কাত্যায়নি,^{১৮} রক্ষিবে রাঘবে,
 দেখ ভাবি। তুমি কৃপা না করিলে, কালি
 আরাম করিবে ভব দুরন্ত রাবণি !”

উত্তরিলা কাত্যায়নী;—“শৈব-কুলোত্তম
 নৈকষেয়; মহা স্নেহ করেন ত্রিশূলী^{১৯}
 তার প্রতি; তার মন্দ, হে সুরেন্দ্র, কভু
 সম্ভবে কি মোর হতে ? তবে মগ্ন এবে
 তাপসেন্দ্র,^{২০} তেঁই, দেব, লঙ্কার এ গতি।”
 কৃতাজ্জলি-পুটে পুনঃ বাসব কহিলা;—
 “পরম-অধর্ম্মচারী নিশাচর-পতি—

দেব-দ্রোহী ! আপনি, হে নগেন্দ্র-নন্দিনি,
 দেখ বিবেচনা করি। দরিদ্রের ধন
 হরে যে দুস্মৃতি, তব কৃপা তার প্রতি
 কভু কি উচিত, মাতঃ ? সুশীল রাঘব,
 পিতৃ-সত্য-রক্ষা-হেতু, সুখ-ভোগ ত্যজি
 পশিল ভিখারী-বেশে নিবিড় কাননে।
 একটি রতনমাত্র তাহার আছিল
 অমূল; যতন কত করিত সে তারে,
 কি আর কহিবে দাস ? সে রতন, পাতি
 মায়াজাল, হরে দুষ্ট। হায়, মা, স্মরিলে
 কোপানলে দহে মনঃ ? ত্রিশূলীর বরে
 বলী রক্ষঃ, তৃণ-জ্ঞান করে দেব-গণে।
 পর-ধন, পর-দার লোভে সদা লোভী
 পামর। তবে যে কেন (বুঝিতে না পারি)
 হেন মুঢ়ে দয়া কর, দয়াময়ি ?”

নীরবিলা স্বরীশ্বর; কহিতে লাগিলা
 বীণাবাণী স্বরীশ্বর; মধুর সুস্বরে;—
 “বৈদেহীর দুঃখে, দেবি, কার না বিদরে
 হৃদয় ? অশোক-বনে বসি দিবা নিশি
 (কুঞ্জবন-সখী পাখী পিঞ্জরে যেমতি)
 কাঁদেন রূপসী শোকে। কি মনোবেদনা
 সহেন বিধুবদনা পতির বিহনে;
 ও রাঙা চরণে, মাতঃ, অবিদিত নহে।
 আপনি না দিলে দশু, কে দণ্ডিবে, দেবি,
 এ পাষণ্ড রক্ষোনাথে ? নাশি মেঘনাদে,
 দেহ বৈদেহীরে পুনঃ বৈদেহীরঞ্জনে;
 দাসীর কলঙ্ক^{২১} ভঞ্জ, শশাঙ্কধারিণী^{২২}।
 মরি, মা, শরমে আমি, শুনি লোকমুখে,
 ত্রিদিব-ঈশ্বরে রক্ষঃ পরাভাবে রণে !”

হাসিয়া কহিলা উমা; “রাবণের প্রতি
 দ্বেষ তব, জিষ্ণু। তুমি, হে মঞ্জুনাশিনী^{২৩}
 শচি, তুমি ব্যগ্র ইন্দ্রজিতের নিধনে।
 দুই জন অনুরোধ করিছ আমারে
 নাশিতে কনক-লঙ্কা। মোর সাধ্য নহে
 সাধিতে এ কার্য। বিরূপাক্ষের রক্ষিত
 রক্ষঃ-কুল; তিনি বিনা তব এ বাসনা,
 বাসব, কে পারে, কহ, পূর্ণিতে জগতে ?
 যোগে মগ্ন, দেবরাজ, বৃষধ্বজ আজি।

১৬. শিবের আবাস। ১৭. শক্র দমনকারী। ১৮. দুর্গা। ১৯. মহাদেব। ২০. মহাদেব।

২১. লঙ্কা—মেঘনাদ কর্তৃক ইন্দ্রের পরাজয়ে শচীর লঙ্কা। ২২. দেবী দুর্গা। শিবের ন্যায় তাঁর মস্তকেও চন্দ্রকলা থাকে।

২৩. সুন্দরী শ্রেষ্ঠা—যে সুন্দরীকুলের গর্ভ হ্রস্ব করে।

যোগাসন নামে শৃঙ্গ, মহাভয়ঙ্কর,
খন ঘনাবৃত, তথা বসেন বিরলে
যোগীন্দ্র। কেমনে যাবে তাঁহার সমীপে?
পক্ষীন্দ্র গরুড় সেথা উড়িতে অক্ষম।”

কহিলা বিনত-ভাবে অদিতিনন্দন,—
“তোমা বিনা কার শক্তি, হে মুক্তি-দায়িনি
জগদম্বা, যায় যে সে যথা ত্রিপুরারি
ভৈরব? বিনাশি, দেবি, রক্ষঃকুল, রাখ
ত্রিভুবন; বৃদ্ধি কর ধর্মের মহিমা;
হ্রাসো বসুধার ভার; বসুন্ধরাধর
বাসুকিরে কর স্থির; বাঁচাও রাখবে।”
এইরূপে দৈত্য-রিপু স্তম্ভিলা সতীরে।

হেন কালে গন্ধামোদে সহসা পুরিল
পুরী; শঙ্খঘণ্টাধরনি বাজিল চৌদিকে
মঙ্গল নিক্ণ সহ, মৃদু যথা যবে
দূর কুঞ্জবনে গাহে পিককুল মিলি।
টলিল কনকাসন। বিজয়া সখীরে
সম্ভাষিয়া মধুস্বরে, ভবেশ-ভাবিনী
সুধিলা; “লো বিধুমুখি, কহ শীঘ্র করি,
কে কোথা, কি হেতু মোরে পূজিছে অকালে?”

মন্ত্র পড়ি, ঋড়ি পাতি, গণিয়া গণনে,
নিবেদিলা হাসি সখী; “হে নগনন্দিনি,
দাশরথি রথী তোমা পূজে লঙ্কাপুরে।
বারি-সংঘটিত-ঘটে, সুসিন্দুরে আঁকি
ও সুন্দর পদযুগ, পূজে রঘুপতি
নীলোৎপলাঞ্জলি দিয়া, দেখিনু গণনে।
অভয়-প্রদান তারে কর গো, অভয়ে।
পরম ভকত তব কৌশল্যা-নন্দন
রঘুশ্রেষ্ঠ; তার তারে বিপদে, তারিণি!”

কাঞ্চন-আসন তাজি, রাজরাজেশ্বরী
উঠিয়া, কহিলা পুনঃ বিজয়ারে সতী;
“দেব-দম্পতীরে তুমি সেব যথাবিধি,
বৈজয়ে! যাইব আমি যথা যোগাসনে
(বিকটশিখর!) এবে বসেন ধূর্জটি।”

এতেক কহিয়া দুর্গা দ্বিরদ-গামিনী
প্রবেশিলা হৈম গেহে। দেবেন্দ্রে বাসবে
ঐদিব-মহিষী সহ, সম্ভাষি আদরে,

স্বর্ণাসনে বসাইলা বিজয়া সুন্দরী।
পাইলা প্রদাস দাঁহে পরম-আহ্লাদে।
শতীর গলায় জয়া হাসি দোলাইলা
তারাকারা^{১৪} ফুলমালা; কবরী-বন্ধনে
বসাইলা চিরকুচি, চির-বিকচি
কুসুম-রতন-রাজী; বাজিল চৌদিকে
যন্ত্রদল, বামাদল গাইল নাচিয়া।
মোহিল কৈলাসপুরী; ত্রিলোক মোহিল।
স্বপনে শুনিয়া শিশু সে মধুর ধ্বনি,
হাসিল মায়ের কোলে, মুদিত নয়ন।
নিদ্রাহীন বিরহিণী চমকি উঠিলা,
ভাবি প্রিয়-পদ-শব্দ শুনিলা ললনা
দুয়ারে। কোকিলকুল নীরবিল বনে।
উঠিলেন যোগীরজ, ভাবি ইষ্টদেব,
বর মাগ বলি, আসি দরশন দিলা।

প্রবেশি সুবর্ণ-গেহে, ভবেশ-ভাবিনী
ভাবিলা, “কি ভাবে আজি ভেটব ভবেশে?”
ক্ষণ কাল চিন্তি সতী চিন্তিলা রতীরে।
যথায় মন্থথ-সাথে, মন্থথ-মোহিনী
বরাননা,^{১৫} কুঞ্জবনে বিহারিতেছিল,
তথায় উমার ইচ্ছা, পরিমলময়-
বায়ু তরঙ্গিণী-রূপে বহিল নিমিষে।
নাচিল রতির হিয়া বীণা-তার যথা
অঙ্গুলির পরশনে! গেলা কামবধু,
দ্রুতগতি বায়ুপথে, কৈলাস-শিখরে।
সরসে নিশান্তে যথা ফুটি, সরোজিনী
নমে ত্রিষাম্পতি^{১৬}-দুতী উষার চরণে,
নমিলা মদন-প্রিয়া হরপ্রিয়া-পদে।
আশীষি রতীরে, হাসি কহিলা অম্বিকা;—
“যোগাসনে তপে মগ্ন যোগীন্দ্র; কেমনে,
কোন্ রঙ্গে, ভঙ্গ করি তাঁহার সমাধি,
কহ মোরে, বিধুমুখি?” উত্তরিলা নমি
সুকেশিনী;—“ধর, দেবি, মোহিনী মুরতি।
দেহ আঙ্ঘা, সাজাই ও বর বপুঃ, আনি
নানা আভরণ; হেরি যে সবে, পিনাকী^{১৭}
ভুলিবেন, ভুলে যথা ঋতুপতি, হেরি
মধুকালে বনস্থলী কুসুম-কুণ্ডলা।^{১৮}”

১৪. তারার ন্যায় আকার বিশিষ্ট। ১৫. সুন্দর যার মুখশ্রী। ১৬. সূর্য। ১৭. পিনাক নামক ধনুক যিনি ব্যবহার করেন।

১৮. কামদেবের সহযোগে মোহিনী বেশধারিণী পার্বতী কর্তৃক মহাদেবের ধ্যানভঙ্গের পৌরাণিক প্রসঙ্গ।

এতেক কহিয়া রতি, সুবাসিত তেলে
মাজি চুল, বিনানিলা মনোহর বেণী।
যোগাইলা আনি ধনী বিবিধ ভূষণে,
হীরক, মুকুতা, মণি-খচিত; আনি
চন্দন, কেশর সহ কুকুম, কস্তুরী;
রত্ন-সঙ্কলিত-আভা কৌষেয় বসনে।
লাক্ষ্যরসে^{২৯} পা দুখানি চিত্রিলা হরষে
চানুনেত্রা। ধরি মূর্তি ভুবনমোহিনী,
সাজিলা নগেন্দ্র-বালা; রসানে^{৩০} মাঞ্জিত
হেম-কান্তি-সম কান্তি দ্বিগুণ শোভিল।
হেরিলা দর্পণে দেবী ও চন্দ্র- আনুনে;
প্রফুল্ল নলিনী যথা বিমল সলিলে
নিজ-বিকচিত^{৩১}-রুচি। হাসিয়া কহিলা,
চাহি স্মর-হর-প্রিয়া^{৩২} স্মর-প্রিয়া পানে;—
“ডাক তব প্রাণনাথে।” অমনি ডাকিলা
(পিককুলেশ্বরী যথা ডাকে ঋতুবরে।)
মদনে মদন-বাঙ্গা। আইলা ধাইয়া
ফুল-ধনুঃ; আসে যথা প্রবাসে প্রবাসী,
স্বদেশ-সঙ্গীত-ধ্বনি শুনি রে উল্লাসে।

কহিলা শৈলেশসূতা; “চল মোর সাথে,
হে মন্মথ, যাব আমি যথা যোগীপতি
যোগে মগ্ন এবে; বাছ, চল ত্বরা করি।”

অভয়ার পদতলে মায়ার নন্দন,
মদন আনন্দময়, উত্তরিলা, ভয়ে;—
“হেন আঞ্জা কেন, দেবি, কর এ দাসেরে ?
স্মরিলে পূর্বের কথা, মরি, মা, তরাসে।
মুঢ় দক্ষ-দোষে যবে দেহ ছাড়ি, সতি,
হিমাদ্রির গৃহে জন্ম গ্রহিলা আপনি,
তোমার বিরহ-শোকে বিশ্ব-ভার ত্যজি
বিশ্বনাথ, আরঙিলা ধ্যান; দেবপতি
ইন্দ্র আদেশিলা দাসে সে ধ্যান ভাঙিতে।
কুলগ্ণে গেনু, মা, যথা মগ্ন বামদেব
তপে; ধরি ফুল-ধনুঃ, হানি কুক্ষণে
ফুল-শর। যথা সিংহ সহসা আক্রমে
গজরাজে, পুরি বন ভীষণ গর্জনে,

থ্রাসিলা দাসেরে আসি রোষে বিভাবসু,
বাস যাঁর, ভবেশ্বর, ভবেশ্বর-ভালে।
হায়, মা, কত যে জ্বালা সহিনু, কেমনে
নিবেদি ও রাঙা পায়ে ? হাহাঙ্কার রবে,
ডাকিঁশু বাসবে, চন্দ্রে, পবনে, তপনে;
কেহ না আইল; ভস্ম হইনু সত্বরে!—
ভয়ে ভগ্নোদ্যম আমি ভাবিয়া ভবেশে;—
ক্ষম দাসে, ক্ষেমঙ্করি। এ মিনতি পদে।”
—আখাসি মদনে, হাসি কহিলা শঙ্করী;—
“চল রঙ্গে মোর সঙ্গে নির্ভয় হৃদয়ে,
অনঙ্গ। আমার বরে চিরজয়ী তুমি!
যে অগ্নি কুলগ্ণে তুতোমা পাইয়া স্বতেজে
জ্বালাইল, পূজা তব করিবে সে আজি,
ঔষধের গুণ ধরি, প্রাণ-নাশ-কারী
বিষ যথা রক্ষে প্রাণ বিদ্যার কৌশলে।”

প্রণমিয়া কাম তবে উমার চরণে
কহিলা; “অভয় দান কর যারে তুমি,
অভয়ে, কি ভয় তার এ তিন ভুবনে ?
কিন্তু নিবেদন করি ও কমল-পদে;—
কেমনে মন্দির হতে, নগেন্দ্র-নন্দিনি,
বাহিরিবা, কহ দাসে, এ মোহিনী-বেশে ?
মুহূর্ষে মাতিবে, মাতঃ, জগত, হেরিলে
ও রূপ-মাধুরী; সত্য কহিনু তোমারে।
হিতে বিপরীত, দেবি, সত্বরে ঘটিবে।
সুরাসুর-বৃন্দ যবে মথি জলনাথে,
লভিলা অমৃত, দুষ্ট দিতিসূত^{৩৩} যত
বিবাদিল দেব সহ সুধামধু-হেতু।
মোহিনী মুরতি ধরি আইলা শ্রীপতি।
ছন্দবেশী হৃষীকেশে ত্রিভুবন হেরি,
হারািলা জ্ঞান সবে এ দাসের শরে!
অধর-অমৃত আশে ভুলিলা অমৃত
দেব-দৈত্য^{৩৪}; নাগদল নন্দশিরঃ লাজে
হেরি পৃষ্ঠদেশে বেণী; মন্দর আপনি
অচল হইল হেরি উচ্চ কুচ-যুগে।
স্মরিলে সে কথা, সতি, হাসি আসে মুখে।

২৯. আলতা। ৩০. স্বর্ণ উজ্জ্বল করবার একপ্রকার কঠিন প্রস্তর। ৩১. প্রশুভিত। ৩২. স্মর-হর—মহাদেব। তাঁর
প্রেমসী—সূর্যা। ৩৩. হর-কোপনালে মদনভস্ম কাহিনীর প্রসঙ্গ। ৩৪. দিতির পুত্র। ৩৫. সমুদ্রমহানে অমৃত লাভের পর
দেবদেবতারঙ্গস্বর্ষকালে মোহিনীবেশে বিকৃত দৈত্যদের ছন্দা—পৌরাণিক প্রসঙ্গ।

মলম্বা^{৩৬} অম্বরে তাম্র এত শোভা যদি
ধরে, দেবি, ভাবি দেখ বিশুদ্ধ কাঞ্চন-
কান্তি কত মনোহর !” অমনি অম্বিকা,
সুবর্ণ বরণ ঘন মায়ায় সৃজিয়া,
মায়াময়ী, আবরিলা চাক্র অবয়বে ।
হায় রে, নলিনী যেন দিবা-অবসানে
ঢাকিল বদনশশী । কিম্বা অগ্নি-শিখা,
ভস্মরাশি মাঝে পশি, হাসি লুকাইলা !
কিম্বা সুধা-ধন যেন, চক্র-প্রসরণে,
বেড়িলেন দেব শক্র সুধাংশু-মণ্ডলে !^{৩৭}

দ্বিরদ-রদ-নির্মিত গৃহদ্বার দিয়া
বাহিরিলা সুহাসিনী, মেঘাবৃত্তা যেন
উষা ! সাথে মনমথ, হাতে ফুল-ধনুঃ,
পৃষ্ঠে তুণ, খরতর ফুল-শরে ভরা—
কন্টকময় মুগালে ফুটিল নলিনী ।

কৈলাস-শিখরি-শিরে ভীষণ শিখর
ভৃগুমান, যোগাসন নামেতে বিখ্যাত
ভুবনে; তথায় দেবী ভুবন-মোহিনী
উত্তরিল গজপতি । অমনি চৌদিকে
গভীর গহ্বরে বন্ধ, ভৈরব নিনাদী
জলদল নীরবিলা, জল-কান্ত যথা
শান্ত শান্তিসমাগমে; পলাইল দূরে
মেঘদল, তমঃ যথা উবার হসনে !
দেখিলা সম্মুখে দেবী কপর্দী^{৩৮} তপসী,
বিভূতি-ভূষিত দেহ, মুদিত নয়ন,
তপের সাগরে মগ্ন, বাহ্য-জ্ঞান-হত !

কহিলা মদনে হাসি সূচারুহাসিনী;
“কি কাজ বিলম্বে আর, হে শম্বর-অরি ?^{৩৯}
হান তব ফুল-শর ।” দেবীর আদেশে
হটু পাড়ি মীনধ্বজ, শিঞ্জিনী টঙ্কারি,
সম্মোহন-শরে শূর বিধিলা উমেশে !
সিহরিলা শূলপাণি । লড়িল মস্তকে

জটাঙ্গুট, তরুরাজী যথা গিরিশিরে
ঘোর মড় মড় রবে লড়ে ভূকম্পনে ।
অধীর হইলা প্রভু ! গরজিলা ভালে
চিত্রভানু,^{৪০} ধকধকি উজ্জ্বল জ্বলনে !^{৪১}
ভয়াকুল ফুল-ধনুঃ পশিলা অমনি
ভবানীর বক্ষঃ-স্থলে,^{৪২} পশয়ে যেমতি
কেশরী-কিশোর^{৪৩} ত্রাসে, কেশরিণী-কোলে,
গভীর নির্যোষে ঘোষে ঘনদল যবে,
বিজলী ঝলসে আঁখি কালানল তেজে !
উন্মীলি নয়ন এবে উঠিলা ধূর্জটি ।
মায়্যা-ঘন-আবরণ তাজিলা গিরিজা ।

মোহিত মোহিনীরূপে, কহিলা হরষে
পশুপতি; “কেন হেথা একাকিনী দেবি,
এ বিজন স্থলে, তোমা, গণেশজননি ?^{৪৪}
কোথায় মুগেন্দ্রে তব কিঙ্কর, শঙ্করি ?
কোথায় বিজয়া, জয়া ?” হাসি উত্তরিল
সূচারুহাসিনী উমা; “এ দাসীরে, ভুলি,
হে যোগীন্দ্রে, বহু দিন আছ এ বিরলে;
তেরই আসিয়াছি, নাথ, দরশন-আশে
পা দুখানি । যে রমণী পতিপরায়ণা,
সহচরী সহ সে কি যায় পতি-পাশে ?
একাকী প্রত্যবে, প্রভু, যায় চক্রবাকী
যথা প্রাণকান্ত তার !” আদরে ঈশান,^{৪৫}
ঈষত হাসিয়া দেব, অজিন-আসনে
বসাইলা ঈশানীরে^{৪৬} । অমনি চৌদিকে
প্রফুল্লিল ফুলকুল; মকরন্দ-লোভে
মাতি শিলীমুখবন্দ আইল ধাইয়া;
বহিল মলয়-বায়ু; গাইল কোকিল;
নিশার শিশিরে ধৌত কুসুম-আসার
আচ্ছাদিল শৃঙ্গবরে ! উমার উরসে
(কি আর আছে রে বাসা সাজে মনসিজে^{৪৭}
ইহা হতে !) কুসুমেশু, বসি কুতূহলে,

৩৬. সোনার গিলটি। ৩৭. বসন। ৩৮. তামা—যে তামা সোনার গিলটি করা। ৩৯. স্বর্গ থেকে গরুড়ের অমৃত হরণ
প্রসঙ্গ। ৪০. মহাদেব। ৪১. শম্বরাসুরের শক্র—কামদেব শম্বরাসুরকে বধ করেছিল। ৪২. অগ্নি। ৪৩. মদনভঙ্গ প্রসঙ্গ।
৪৪. মদনভঙ্গ প্রসঙ্গ। ৪৫. সিংহশাবক। ৪৬. গণদেবতা গণেশজননী দুর্গা। ৪৭. মহাদেব। ৪৮. ঈশানের পত্নী—দুর্গা।
৪৯. কামদেব।

হানিলা, কুসুম-ধনুঃ টঙ্কারি কৌতুকে
শর-জাল;— প্রেমামোদে মতিলা ত্রিশূলী !
লঙ্কা-বেশে রাহু আসি গ্রাসিল চাঁদরে,
হাসি ভস্মে লুকাইলাঃ দেব বিভাবসু !

মোহন মুরতি ধরি, মোহি মোহিনীরে
কহিলা হাসিয়া দেব; “জানি আমি, দেবি,
তোমার মনের কথা, — বাসব কি হেতু
শচী সহ আসিয়াছে কৈলাস-সদনে;
কেন বা অকালে তোমা পূজে রঘুমণি ।
পরম ভকত মম নিকম্বানন্দন ;
কিন্তু নিজ কস্ম ফলে মজে দুষ্টমতি ।
বিদরে হৃদয় মম স্মরিলে সে কথা,
মহেশ্বরি ! হায়, দেবি, দেবে কি মানবে,
কোথা হেন সাধ্য রোধে প্রাক্তনের গতি ?
পাঠাও কামেরে, উমা, দেবেস্ত্র সমীপে ।
সত্বরে যাইতে তারে আদেশ, মহেশি,
মায়াদেবি-নিকেতনে । মায়ায় প্রসাদে
বধিবে লক্ষ্মণ শূর মেঘনাদ শূরে ।”

চলি গেলা মীনধ্বজ, নীড় ছাড়ি উড়ে
বিহঙ্গম-রাজ যথা, মুহুমুহুঃ চাহি
সে সুখ-সদন পানে । ঘন রাশি রাশি,
স্বর্ণবর্ণ, সুবাসিত বাস স্বাসি ঘন,
বরষি প্রসূনাসার^{৫০}—কমল, কুমুদী,
মালতী, সৈঁউতি, জাতি, পারিজাত-আদি
মন্দ-সমীরম-প্রিয়া—ঘিরিল চৌদিকে
দেবদেব মহাদেবে মহাদেবী সহ ।

দ্বিরদ-রদ-নির্ম্মিত হৈমময় ছারে
দাঁড়াইলা বিধুমুখী মদন-মোহিনী,
অশ্রুময় আঁখি, আহা ! পতির বিহনে !
হেন কালে মধু-সখা উত্তরিলা তথা ।
অমনি পসারি বাহু, উল্লাসে মন্থথ
আলিঙ্গন-পাশে বাধি, তুমিলা ললনে
প্রেমালাপে । শুখাইল অশ্রুবিন্দু, যথা
শিশির-নীরের বিন্দু শতদল দলে,
দরশন দিলে ভানু উদয়-শিখরে ।
পাই প্রাণ-ধনে ধনী, মুখে মুখ দিয়া,
(সরস বসন্তকালে সারী শুক যথা)

কহিলেন প্রিয়-ভাষে; “বাঁচালে দাসীরে
আশু আসি তার পাশে, হে রতি-রঞ্জন !
কত যে ভাবিতেছিলু, কহিব কাহারে ?
বামদেব নামে, নাথ, সদা, কাঁপি আমি,
স্মরি পূর্ব-কথা যত ! দুরন্ত হিংসক
শূলপাণি ! যেয়ো না গো আর তাঁর কাছে,
মোর কিরে^{৫১} প্রাণেশ্বর !” সুমধুর হাসে
উত্তরিলা পঞ্চসর; “ছায়ার আশ্রমে,
কে কবে ভাস্কর-করে ডরায়, সুন্দরি !
চল এবে যাই যথা দেবকুল-পতি ।”

সুবর্ণ-আসনে যথা বসেন বাসব,
উত্তরি মন্থথ তথা, নিবেদিলা নমি
বারতা । আরোহি রথে দেবরাজ রথী
চলি গেলা দ্রুতগতি মায়ায় সদনে ।
অগ্নিময় তেজঃ বাজী ধাইল অন্বরে,
অকম্প চামর শিরে; গভীর নির্যোষে
ঘোষিল রথের চক্র, চূর্ণি মেঘদলে ।

কত ক্ষণে সহস্রাঙ্ক^{৫২} উত্তরিলা বলী
যথা বিরাজেন মায়া । তাজি রথ-বরে,
সুরকুল-রথীবর পশিলা দেউলে ।
কত যে দেখিলা দেব কে পারে বর্ণিতে ?
সৌর-খরতর-কর-জাল-সঙ্কলিত
আভাময়^{৫৩} স্বর্ণাসনে বসি কুহকিনী
শক্তীশ্বরী । কর-যোড়ে বাসব প্রণমি
কহিলা; “আশীষ দাসে, বিশ্ব-বিমোহিনি !”

আশীষি সুখিলা দেবী; “কহ, কি কারণে,
গতি হেথা আজি তব, অদিতি-নন্দন ?”

উত্তরিলা দেবপতি;—“শিবের আদেশে,
মহামায়া, আসিয়াছি তোমার সদনে ।
কহ দাসে, কি কৌশলে সৌমিত্রি^{৫৪} জিনিবে
দশানন-পুত্রে কালি ? তোমার প্রসাদে
(কহিলেন বিরূপাক্ষ) ঘোরতর রণে
নাশিবে লক্ষ্মণ শূর মেঘনাদ শূরে ।”

ক্ষণ কাল চিন্তি দেবী কহিলা বাসবে;—
“দুরন্ত তাঁরকাসুর, সুর-কুল-পতি,
কাড়ি নিল স্বর্ণ যবে তোমায় বিমুখি
সমরে; কৃন্তিকা-কুল-বল্লভ সেনানী,

৫০. পুষ্পবৃষ্টি। ৫১. শপথ (দিব্য)। ৫২. ইন্দ্র।

৫৩. সূর্যের সমুদয় কিরণছটা একত্র সঙ্কলিত হলে যেমন উজ্জ্বল্য সৃষ্টি হয়—সেইরূপ আভাবুত।

৫৪. সুমিত্রের পুত্র লক্ষ্মণ।

পার্বতীর গর্ভে জন্ম লভিলা তৎকালে।^{৫৫}
 গধিতে দানব-রাজে সাজাইলা বীরে
 আপনি বৃষভ-ধ্বজ, সৃজি রুদ্র-তেজে
 অস্ত্রে। এই দেখ, দেব, ফলক,^{৫৬} মণ্ডিত
 সুবর্ণে; ওই যে অসি, নিবাসে উহাতে
 আপনি কৃতান্ত; ওই দেখ, সুনাসীর,^{৫৭}
 ঙয়ঙ্কর তুণীরে, অক্ষয়, পূর্ণ শরে,
 বিঘাকর ফণী-পূর্ণ নাগ-লোক যথা!
 ওই দেখ ধনুঃ, দেব!” কহিলা হাসিয়া,
 হেরি সে ধনুর কান্তি, শচীকান্ত বলী,
 “কি ছার ইহার কাছে দাসের এ ধনুঃ
 রত্নময়! দিবাকর-পরিধি যেমতি,
 স্কুলিছে ফলক-বর-ধাধিয়া নয়নে।
 অগ্নিশিখা-সম অসি মহাতেজস্কর!
 হেন তুণ আর, মাতঃ, আছে কি জগতে?”
 “শুন দেব,” (কহিলেন পুনঃ মায়াদেবী)
 “ওই সব অস্ত্রবলে নাশিলা তারকে
 ষড়ানন। ওই সব অস্ত্রবলে, বলি,
 মেঘনাদ-মৃত্যু, সত্য কহিনু তোমারে।
 কিস্ত হেন বীর নাহি এ তিন ভুবনে,
 দেব কি মানব, ন্যায়যুদ্ধে যে বধিবে
 রাবণিরে। প্রের তুমি অস্ত্র রামানুজে,
 আপনি যাইব আমি কালি লঙ্কাপুরে,
 রক্ষিব লক্ষ্মণে, দেব, রাক্ষস-সংগ্রামে।
 যাও চলি সুর-দেশে, সুরদল-নিধি।
 ফুল-কুল-সবী উষা যখন খুলিবে
 পূর্বাশার^{৫৮} হেমদ্বারে পদ্মকর দিয়া
 কালি, তব চির-ত্রাস, বীরেন্দ্রকেশরী
 ইন্দ্রজিত-ত্রাস-হীন করিবে তোমারে—
 লঙ্কার পঙ্কজ-রবি যাবে অস্ত্রাচলে।”
 মহানন্দে দেব-ইন্দ্র বন্দিয়া দেবীরে,
 অস্ত্র লয়ে গেলা চলি ত্রিদশ-আলয়ে।
 বসি দেব-সভাতলে কনক-আসনে
 ণাসব, কহিলা শুর চিত্ররথ শুরে;—
 মতনে লইয়া অস্ত্র, যাও মহাবলি,
 স্বর্ণ লঙ্কা-ধামে তুমি। সৌমিত্রি কেশরী
 মায়া প্রসাদে কালি বধিবে সমরে
 মেঘনাদে। কেমনে, তা দিবেন কহিয়া

মহাদেবী মায়া তারে। কহিও রাঘবে,
 হে গন্ধর্ব-কুল-পতি, ত্রিদিব-নিবাসী
 মঙ্গল-আকাঙ্ক্ষী তার; পার্বতী আপনি
 হর-প্রিয়া, সুপ্রসন্ন তার প্রতি আজি।
 অভয় প্রদান তারে করিও সুমতি!
 মরিলে রাবণি রণে, অবশ্য মরিবে
 রাবণ; লভিবে পুনঃ বৈদেহী সতীরে
 বৈদেহী-মনোরঞ্জন রঘুকুল-মণি।
 মোর রথে, রথীবর, আরোহণ করি
 যাও চলি। পাছে তোমা হেরি লঙ্কা-পুরে,
 বাধ্য বিবাদ রক্ষঃ; মেঘদলে আমি
 আদেশিব আবারিতে গগনে; ডাকিয়া
 প্রভঞ্জন, দিব আঙ্ক্য ক্ষণ ছাড়ি দিতে
 বায়ু-কূলে; বাহিরিয়া নাচিবে চপলা;^{৫৯}
 দন্তোলি-গভীর-নাদে পুরিব জগতে।”
 প্রণমি দেবেন্দ্র-পদে, সাবধানে লয়ে
 অস্ত্রে, চলি গেলা মর্ন্ত্যে চিত্ররথ রথী।
 তবে দেব-কুল-নাথ ডাকি প্রভঞ্জন
 কহিলা, “প্রলয়-ঝড় উঠাও সত্বরে
 লঙ্কাপুরে, বায়ুপতি; শীঘ্র দেহ ছাড়ি
 কারাবন্ধ বায়ুদলে^{৬০}; লহ মেঘদলে;
 দ্বন্দ্ব ক্ষণ-কাল বৈরী বারি-নাথ সনে
 নির্যোবে!” উল্লাসে দেব চলিলা অমনি,
 ভাঙিলে শৃঙ্খল লক্ষ্মী কেশীর যেমতি,
 যথায় তিমিরাগারে রুদ্ধ বায়ু যত
 গিরি-গর্ভে^{৬১}। কত দূরে শুনিলা পবন
 ঘোর কোলাহলে; গিরি (দেখিলা) লড়িছে
 অন্তরিত^{৬২} পরাক্রমে, অসমর্থ যেন
 রোধিতে প্রবল বায়ু আপনার বলে।
 শিলাময় দ্বার দেব খুলিলা পরশে।
 হুঙ্কারি বায়ুকুল বাহিরিল বেগে
 যথা অম্বুবাশি, যবে ভাঙে আচম্বিতে
 জাঙাল। কাঁপিল মহী; গর্জিল জলধি।
 তুঙ্গ-শৃঙ্গধরাকারে তরঙ্গ-আবলী
 কম্পোলিল, বায়ু-সঙ্গে রণরঙ্গে মাতি।
 ধাইল চৌদিকে মস্ত্রে^{৬৩} জীমূত; হাসিল
 ক্ষণ-প্রভা; কড়মড়ে নাদিল দন্তোলি।
 পলাইলা তারানাথ তারাদলে লয়ে।

৫৫. দেবসেনাপতি কাণ্ডিকের্য কর্তৃক তারকাসুর বধের পৌরাণিক প্রসঙ্গ। ৫৬. ঢাল। ৫৭. ইন্দ্র। ৫৮. পূর্বদিক।

৫৯. বিদ্যুৎ। ৬০. পবনদেব পর্বতগুহায় বায়ুকুল অবরুদ্ধ রাখেন, প্রয়োজনে মুক্ত করেন—ঝড় সম্পর্কে কবিকল্পনা।

৬১. পর্বত গুহা। ৬২. দৃষ্টির অগোচরে। ৬৩. গভীর রব।

ছাইল লঙ্কায় মেঘ, পাবক উগরি
রাশি রাশি; বনে বৃক্ষ পড়িল উপড়ি
মড়মড়ে; মহাবাড় বহিল আকাশে;
বর্ষিল আসার যেন সৃষ্টি ডুবাইতে
প্রলয়ে। বৃষ্টি শিলা তড়তড়তড়ে।

পশিল আতঙ্কে রক্ষঃ যে যাহার ঘরে।

যথায় শিবির মাঝে বিরাজেন বলী
রাঘবেন্দ্রে, আচম্বিতে উতরিলা রথী
চিত্ররথ, দিবাকর যেন অংশুমালী,
রাজ-আভরণ দেহে। শোভে কটদেশে
সারসন, রাশি-চক্র-সম তেজোরশি,
ঝোলে তাহে অসিবর—ঝল ঝল ঝলে।
কেমনে বর্ণিবে কবি দেব-ভূগ, ধনুঃ,
চর্ম, বর্ম, শূল, সৌর-কিরীটের আভা
স্বর্ণময়ী? দৈববিভা** ধাঁধিল নয়নে
স্বর্ণীয় সৌরভে দেশ পুরিল সহসা।

সসম্বন্ধে প্রণমিয়া, দেবদূত-পদে
রঘুবর, জিজ্ঞাসিলা, “হে ত্রিদিববাসি,
ত্রিদিব ব্যতীত, আ হা, কোন্ দেশ সাজে
এ হেন মহিমা, রূপ?—কেন হেথা আজি,
নন্দন-কানন ত্যজি কহ এ দাসেরে?
নাহি স্বর্ণাসন, দে, কি দিব বসিতে।
তবে যদি কুপা, পুতু, থাকে দাস প্রতি,
পাদ্য, অর্ঘ্য লয়ে এসো এই কুশাসনে।
ভিখারী রাঘব হায়!” আশীষিয়া রথী
কুশাসনে বসি তবে কহিলা সুস্বরে;

“চিত্ররথ নাম মম, শুন দাশরথি;
চিত্র-অনুচর আমি সেবি অহরহঃ
দেবেন্দ্রে; গন্ধর্বকুল আমার অধীনে।
আইন এ পুরে আমি ইন্দ্রের আদেশে।
তোমার মঙ্গলাকাঙ্ক্ষী দেবকুল সহ
দেবেশ। এই যে অস্ত্র দেখিছ নৃমণি,

দিয়াছেন পাঠাইয়া তোমার অনুজ্ঞে
দেবরাজ। আবির্ভাবি মায়া মহাদেবী
প্রভাতে, দিবেন কহি, কি কৌশলে কালি
নাশিবে লক্ষ্মণ শুর মেঘনাদ শুরে।
দেবকুল-প্রিয় তুমি, রঘুকুল-মণি।
সুপ্রসন্ন তব প্রতি আপনি অভয়া!”

কহিলা রঘুনন্দন; “আনন্দ-সাগরে
ভাসিনু, গন্ধর্বশ্রেষ্ঠ, এ শুভ সংবাদে।
অস্ত্র নর আমি; হায়, কেমনে দেখাব
কৃতজ্ঞতা? এই কথা জিজ্ঞাসি তোমারে।”

হাসিয়া কহিলা দূত; “শুন, রঘুমণি,
দেব প্রতি কৃতজ্ঞতা, দরিদ্র-পালন,
ইন্দ্রিয়-দমন, ধর্মপথে সদা গতি;
নিত্য সত্য-দেবী-সেবা; চন্দন, কুসুম,
নৈবেদ্য, কৌষিক বস্ত্র আদি বলি** যত,
অবেহলা করে দেব, দাতা যে যদ্যপি
অসৎ। এ সার কথা কহিনু তোমারে।”

প্রণমিলা রামচন্দ্র; আশীষিয়া রথী
চিত্ররথ, দেবরথে গেলা দেবপুরে।
থামিল তুমুল ঝড়; শান্তিলা জলধি;
হেরিয়া শশাঙ্কে পুনঃ তারাদল সহ,
হাসিল কনকলঙ্কা। তরল সলিলে
পশি, কৌমুদিনী পুনঃ অবগাহে দেহ
রজোময়; কুমুদিনী হাসিল কৌতুকে।
আইল ধাইয়া পুনঃ রণ-ক্ষেত্রে, শিবা
শবাহারী; পালে পালে গুণিনী, শকুনি,
পিশাচ। রাক্ষসদল বাহিরিল পুনঃ
ভীম-প্রহরণ**-ধারী—মত্ত বীরমদে।

ইতি শ্রীমেঘনাদবধে কাব্যে অস্ত্রলাভে নাম
দ্বিতীয়ঃ সর্গঃ

তৃতীয় সর্গ

প্রমোদ-উদ্যানে কাঁদে দানব-নন্দিনী
 প্রমীলা, পতি-বিরহে কাতরা যুবতী।
 অশ্রুআঁখি বিধুমুখী ভ্রমে ফুলবনে
 গুড়, ব্রজ-কুঞ্জ-বনে, হায় রে, যেমনি
 এজ্বালা, নাহি হেরি কদম্বের মূলে
 নীতধড়া পীতাম্বরে, অধরে মুরলী।^১
 গুড় বা মন্দিরে পশি, বাহিরায় পুনঃ
 পরহিণী, শূন্য নীড়ে কপোতী যেমতি
 বিবশা! কভু বা উঠি উচ্চ-গৃহ-চূড়ে,
 এক-দৃষ্টে চাহে বামা দূর লক্ষা পানে,
 অবিরল চক্ষুঃজল পূঁছিয়া আঁচলে!
 নীরব বাঁশরী, বীণা, মুরজ, মন্দিরা,
 গীত-ধ্বনি। চারি দিকে সখী-দল যত,
 পরস-বদন, মরি, সুন্দরীর শোকে!
 কে না জানে ফুলকুল বিরস-বদনা,
 মধুর বিরহে যবে তাপে বনস্থলী?

উতরিলা নিশী-দেবী প্রমোদ-উদ্যানে।
 সিহরি প্রমীলা সতী, মৃদু কল-স্বরে,
 গাসন্তী নামেতে সখী বসন্ত-সৌরভা,
 তার গলা ধরি কাঁদি কহিতে লাগিলা;—
 “ওই দেখ, আইল লো তিমির যামিনী,
 কাল-ভুজঙ্গিনী-রূপে দংশিতে আমারে,
 গাসন্তি! কোথায় সখি, রক্ষঃ-কুল-পতি,
 অরিন্দম ইন্দ্রজিৎ, এ বিপত্তি-কালে?
 এখনি আসিব বলি গেলা চলি বলী;
 কি কাজে এ ব্যাজ্ঞ আমি বুঝিতে না পারি।
 তুমি যদি পার, সেই, কহ লো আমারে।”

কহিলা বাসন্তী সখী, বসন্তে যেমতি
 কুহরে বসন্তসখা,—“কেমনে কহিব
 কেন প্রাণনাথ তব বিলম্বন আজি?
 কিন্তু চিন্তা দূর তুমি কর, সীমন্তিনি!
 ধরায় আসিবে শূর নাশিয়া রাঘবে।
 কি ভয় তোমার সখি। সুরাসুর-শরে
 অভেদ্য শরীর যার, কে তাঁরে আঁটিবে
 ব্রহ্মহে? আইস মোরা যাই কুঞ্জ-বনে।
 সরস কুমুম তুলি, চিকণিয়া গাঁথি
 ফুলমালা। দোলাইও হাসি প্রিয়গলে
 সে দামে,^২ বিজয়ী রথ-চূড়ায় যেমতি

বিজয়-পতাকা লোক উড়ায় কৌতুকে।”

এতেক কহিয়া দোঁহে পশিলা কাননে,
 যথায় সরসী সহ খেলিছে কৌমুদী,
 হাসাইয়া কুমুদেরে; গাইছে ভ্রমরী;
 কুহরিছে পিকবর; কুমুম ফুটিছে;
 শোভিছে আনন্দময়ী বনরাজী-ভালে
 (মণিময় সীথিরূপে) জোনাকের পাঁতি;
 বহিছে মলয়ানিল, মন্সরিছে পাতা।

আঁচল ভরিয়া ফুল তুলিলা দুজনে।
 কত যে ফুলের দলে প্রমীলার আঁখি
 মুক্তিল শিশির-নীরে, কে পারে কহিতে?
 কত দূরে হেরি বামা সূর্যমুখী দুঃখী,
 মলিন-বদনা, মরি, মিহির-বিরহে
 দাঁড়াইয়া তার কাছে কহিলা সুস্বরে;—
 “তোর লো যে দশা এই ঘোর নিশা-কালে,
 ভানু-প্রিয়ে, আমিও লো সহি সে যাতনা!
 আঁধার সংসার এবে এ পোড়া নয়নে!
 এ পরাণ দহিছে লো বিচ্ছেদ-অনলে!
 যে রবির ছবি পানে চাহি বাঁচি আমি
 অহরহঃ, অন্তাচল আচ্ছন্ন লো তিনি!
 আর কি পাইব আমি (উবার প্রসাদে
 পাইবি যেমতি, সতি, তুই) প্রাণেশ্বরে?”

অবচয়িৎ ফুল-চয়ে সে নিকুঞ্জ-বনে,
 বিবাদে নিশ্বাস ছাড়ি, সখীরে সম্ভাষি
 কহিলা প্রমীলা সতী; “এই ত তুলিনু
 ফুল-রাশি; চিকণিয়া গাঁথিনু, স্বজনি,
 ফুলমালা; কিন্তু কোথা পাব সে চরণে,
 পুষ্পাঞ্জলি দিয়া যাহে চাহি পূজিবারে!
 কে বাঁধিল মৃগরাজে বুঝিতে না পারি।
 চল, সখি, লক্ষাপুরে যাই মোরা সবে।”
 কহিল বাসন্তী সখী; “কেমনে পশিবে
 লক্ষাপুরে আজি তুমি? অলঙ্ঘ্য সাগর-
 সম রাঘবীয়ে চমু বেড়িছে তাহারে!
 লক্ষ লক্ষ রক্ষঃ-অরি ফিরিছে চৌদিকে
 অস্ত্রপাণি, দণ্ডপাণি দণ্ডধর যথা।”

রুঘিলা দানব-বালা প্রমীলা রূপসী!
 “কি কহিলি, বাসন্তি? পর্বত-গৃহ ছাড়ি
 বাহিরায় যবে নদী সিদ্ধুর উদ্দেশে,

কার হেন সাধ্য যে সে রোধে তার গতি ?
দানবনন্দিনী আমি; রক্ষঃ-কুল-বধু;
রাবণ শ্বশুর মম, মেঘনাদ স্বামী,
আমি কি ডরাই, সখি, ভিখারী রাখবে ?
পশিব লঙ্কায় আজি নিজ ভুজ-বলে;
দেখিব কেমনে মোরে নিবারে নৃমণি ?”

এতেক কহিয়া সতী, গজ-পতি-গতি,
রোষাবেশে প্রবেশিলা সুবর্ণ-মন্দিরে ।

যথা যবে পরম্প-পার্থ মহারথী,
যজ্ঞের তুরঙ্গ সঙ্গে আসি, উতরিলা
নারী-দেশে, দেবদত্ত শঙ্খ-নাদে রুষি,
রণ-রঙ্গে বীরাজনা সাজিল কৌতুকে;
উথলিল চারি দিকে দন্দুভির ধ্বনি;
বাহিরিল বামাদল বীরমদে মাতি,*
উলঙ্গিয়া অসিরাশি, কান্দুক টঙ্কারি,
আম্ফালি ফলকপুঞ্জ ! ঝক্ ঝক্ ঝকি
কাঞ্চন-কঙ্কুক-বিভা উজলিল পুরী !
মন্দুরায় হ্রেষে অশ্ব, উর্দ্ধ কর্ণে শুনি
নুপুরের ঝগঝগি, কিঙ্কিণীর বোলী,
ডমরুর রবে যথা নাচে কাল ফণী ।
বারীমাঝে নাদে গজ শ্রবণ বিদরি,
গন্তীর নিঘোষে যথা ঘোষে ঘনপতি
দুরে । রঙ্গে গিরি-শৃঙ্গে, কাননে, কন্দরে,^৬
নিদ্রা ত্যজি প্রতিধ্বনি জাগিলা অমনি;
সহসা পুরিল দেশ ঘোর কোলাহলে ।

নৃ-মুণ্ড-মালিনী নামে উগ্রচণ্ডা^৭ ধনী
সাজাইয়া শত বাজী বিবিধ সাজনে,
মন্দুরা হইতে আনে অলিন্দের^৮ কাছে
আনন্দে । চড়িলা ঘোড়া এক শত চেড়ী^৯
অশ্ব-পার্শ্বে কোষে অসি বাজিল বনবনি ।

নাচিল শীর্ষক-চূড়া; দুলিল কৌতুকে
পৃষ্ঠে মণিময় বেণী তুণীরের সাথে ।
হাতে শূল, কমলে কণ্টকময় যথা
মুগাল । হ্রৈবিল অশ্ব মগন হরষে,
দানব-দলনী-পদ্ম-পদ-যুগ^{১০} ধরি
বক্ষে, বিরূপাক্ষ সুখে নাদেন যেমতি !
বাজিল সমর-বাদ্য চমকিলা দিবে
অমর, পাতালে নাগ, নর নরলোকে ।

রোষে লাজভয় ত্যজি, সাজে তেজস্বিনী
প্রমীলা । কিরীট-ছটা কবরী-উপরি,
হায় রে, শোভিল যথা কাদস্বিনী-শিরে
ইন্দ্রচাপ ! লেখা ভালে অঞ্জনের রেখা,
ভৈরবীর ভালে যথা নয়নরঞ্জিকা
শশিকলা ! উচ্চ কুচ আবারি কবচে
সুলোচনা, কটিদেশে যতনে আঁটলা
বিবিধ রতনময় স্বর্ণ-সারসনে ।
নিষঙ্গের সঙ্গে পৃষ্ঠে ফলক দুলিল,
রবির পরিধি হেন ধাঁধিয়া নয়নে !
ঝকঝকি উরুদেশে (হায় রে, বর্জুল
যথা রক্তা বন-আভা !) হৈমময় কোষে
শোভে খরশান^{১১} অসি; দীর্ঘ শূল করে;
ঝলমলি ঝলে অঙ্গে নানা আভরণ !—
সাজিলা দানব-বালা, হৈমবতী যথা
নাশিতে মহিষাসুরে ঘোরতর রণে,
কিষা শুভ নিশুভ, উন্মাদ বীর-মদে ।^{১০}
ডাকিনি যোগিনী সম বেড়িলা সতীরে
অশ্বারূঢ়া চেড়ীবৃন্দ । চড়িলা সুন্দরী
বড়বা^{১২} নামেতে বামী^{১৩}—বাড়বাগ্নি-শিখা !^{১৪}
গন্তীরে অশ্বরে যথা নাদে কাদস্বিনী,
উচ্চৈঃস্বরে নিতস্বিনী কহিলা সন্তাষি

৬. কাশীরাম দাসের মহাভারতের অশ্বমেধ পর্ব প্রসঙ্গ । ৭. পর্বতগুহা । ৮. কোপনস্বভাবা । ৯. বারান্দা ।

১০. দাসী—নারী-প্রহরী ।

১১. অসুরনাশিনী কালীর পাদপদ্মযুগল । ১২. অত্যন্ত ধারালো । ১৩. মার্কণ্ডেয় চণ্ডীর শুভনিশুভ ও মহিষাসুর
বধের প্রসঙ্গ । ১৪. বড়বা নামের অশ্বী । ১৫. অশ্বী । ১৬. অশ্বারূঢ়া দেবী যেন বাড়বানলের শিখা ।

সখীবৃন্দে; “লঙ্কাপুরে, শুন লো দানবি,
 অরিন্দম ইন্দ্রজিৎ বন্দী-সম এবে।
 কেন যে দাসীরে ভুলি বিলম্বেন তথা
 প্রাণনাথ, কিছু আমি না পারি বুকিতে?
 যাইব তাঁহার পাশে; পশিব নগরে
 বিকট কটক” কাটি, জিনি ভুজবলে
 রঘুশ্রেষ্ঠে;—এ প্রতিজ্ঞা বীরাজনা, মম;
 নতুবা মরিব রণে—যা থাকে কপালে!
 দানব-কুল-সম্ভবা আমরা, দানবি;—
 দানবকুলের বিধি বধিতে সমরে,
 দ্বিষত”-শোণিত-নদে নতুবা ডুবিতে!
 অধরে ধরি লো মধু, গরল লোচনে
 আমরা; নাহি কি বল এ ভুজ-মৃগালে?
 চল সবে, রাঘবের হেরি বীরপণা।
 দেখিব যে রূপ দেখি সূর্ণগথা পিসী
 মাতিল মদন-মদে পঞ্চবটী-বনে;
 দেখিব লক্ষ্মণ শুরে; নাগ-পাশ দিয়া
 বাঁধি লব বিভীষণে—রক্ষঃ-কুলাঙ্গারে!
 দলিব বিপক্ষ-দলে, মাতঙ্গিনী যথা
 নলবন। তোমরা লো বিদ্যুত-আকৃতি
 বিদ্যুতের গতি চল পড়ি অরি-মাঝে!”
 নাদিল দানব-বালা হুঙ্কার রবে,
 মাতঙ্গিনীযুথ যথা—মস্ত মধু-কালে!
 যথা বায়ু সখা সহ দাবানল-গতি
 দুর্কার, চলিলা সতী পতির উদ্দেশে।
 চলিল কনক-লঙ্কা, গঞ্জিল জলধি;
 ঘনঘনাকারে রেণু উড়িল চৌদিকে;—
 কিন্তু নিশা-কালে কবে ধুম-পুঞ্জ পারে
 আবারিতে অগ্নি-শিখা? অগ্নিশিখা-তেজে
 চলিলা প্রমীলা দেবী বামা-বল-দলে।
 কত ক্ষণে উতরিলা পশ্চিম দুয়ারে
 বিধুমুখী। একবারে শত শঙ্খ ধরি
 ধ্বনিতা, টঙ্কারি রোষে শত ভীম ধনুঃ
 স্ত্রীবন্দ! কাঁপিল লঙ্কা আতঙ্কে; কাঁপিল
 মাতঙ্গ নিষাদী; রথে রথী; তুরঙ্গমে
 সাদীবর; সিংহাসনে রাজা; অবরোধে
 কুলবধু; বিহঙ্গম কাঁপিল কুলায়ে;
 পর্বত-গহুরে সিংহ; বন-হস্তী বনে;
 ডুবিল অতল জলে জলাচর যত।

পবন-নন্দন” হনু ভীষণ-দর্শন,
 রোষে অগ্রসরি শুর গরজি কহিলা;—
 “কে তোরা এ নিশা-কালে আইলি মরিতে?
 জাগে এ দুয়ারে হনু, যার নাম শুনি
 থরথরি রক্ষোনাথ কাঁপে সিংহাসনে!
 আপনি জাগেন প্রভু রঘু-কুল-মণি,
 সহ মিত্র বিভীষণ, সৌমিত্রি কেশরী,
 শত শত বীর আর—দুর্ধ্ব সমরে।
 কি রঙ্গে অঙ্গনা-বেশ ধরিলি দুস্মৃতি?
 জানি আমি নিশাচর পরম-মায়াবী।
 কিন্তু মায়া-বল আমি টুটি বাহু-বলে;
 যথা পাই মারি অরি ভীম প্রহরণে।”
 নু-মুণ্ড-মালিনী সখী (উগ্রচণ্ডা ধনী!)
 কোদণ্ড টঙ্কারি রোষে কহিলা হুঙ্কারে;—
 “শীঘ্র ডাকি আন হেথা তোর সীতানাথে,
 বর্কর! কে চাহে তোরে, তুই ক্ষুদ্রজীবী!
 নাহি মারি অস্ত্র মোরা তোর সম জনে
 ইচ্ছায়। শৃগাল সহ সিংহী কি বিবাদে?
 দিনু ছাড়ি; প্রাণ লয়ে পালা, বনবাসি।
 কি ফল বধিলে তোরে, অবোধ? যা চলি,
 ডাক সীতানাথে হেথা, লক্ষ্মণ ঠাকুরে,
 রাক্ষস-কুল-কলঙ্ক ডাক বিভীষণে!
 অরিন্দম ইন্দ্রজিৎ—প্রমীলা সুন্দরী
 পত্নী তাঁর; বাহুবলে প্রবেশিবে এবে
 লঙ্কাপুরে, পতিপদ পূজিতে যুবতী!
 কোন যোধ সাধ্য, মুঢ়, রোধিতে তাঁহারে?”
 প্রবল পবন-বলে বলীন্দ্র পাবনি
 হনু, অগ্রসরি শুর, দেখিলা সভয়ে
 বীরাজনা মাঝে রঙ্গে প্রমীলা দানবী।
 ক্ষণ-প্রভা-সম বিভা খেলিছে কিরীটে;
 শোভিছে বরাজে বর্ম, সৌর-অংশু-রাশি
 মণি-আভা সহ মিশি, শোভয়ে যেমন!
 বিস্ময় মানিয়া হনু, ভাবে মনে মনে;—
 “অলঙ্ঘ্য সাগর লঙ্ঘি, উতরিবু যবে
 লঙ্কাপুরে, ভয়ঙ্করী হেরিনু ভীমারে,”
 প্রচণ্ডা, খর্পর খণ্ডা” হাতে, মুণ্ডমালী।
 দানব-নন্দিনী যত মন্দোদরী-আদি
 রাবণের প্রণয়িনী দেখিনু তা সবে।
 রক্ষঃ-কুল-বালা-দলে, রক্ষঃ-কুল-বধু,

১৭. ভয়ঙ্কর সৈন্যবৃহৎ। ১৮. যে ষেব করে—শক্র।

১৯. হনুমান পবনদেবের ঔরসে অঞ্জনা নাম্নী বানরীর গর্ভজাত। ২০. ভয়ঙ্করী—চণ্ডী। ২১. খর্পর ও খড়্গ।

(শশিকলা-সম রূপে) ঘোর নিশা-কালে,
দেখিনু সকলে একা ফিরি ঘরে ঘরে।
দেখিনু অশোক-বনে (হায় শোকাকুলা)
রঘু-কুল-কমলেরে; কিন্তু নাহি হেরি
এ হেন রূপ মাধুরী কভু এ ভুবনে!
ধন্য বীর মেঘনাদ, যে মেঘের পাশে
প্রেম-পাশে বাঁধা সদা হেন সৌদামিনী!”

এতেক ভাবিয়া মনে অঞ্জনা-নন্দন
(প্রভঞ্জন স্বনে যথা) কহিলা গভীরে;
“বন্দীসম শিলাবন্ধে বাঁধিয়া সিন্দুরে,
হে সুন্দরি, প্রভু মম, রবি-কুল-রবি,
লক্ষ লক্ষ বীর সহ আইলা এ পুরে।
রক্ষোবাজ বৈরী তাঁর; তোমরা অবলা,
কহ, কি লাগিয়া হেথা আইলা অকালে?
নির্ভয় হৃদয়ে কহ; হনুমান আমি
রঘুদাস; দয়া-সিন্ধু রঘু-কুল-নিধি।
তব সাথে কি বিবাদ তাঁর সুলোচনে?
কি প্রসাদ মাগ তুমি, কহ ত্বরা করি;
কি হেতু আইলা হেথা? কহ, জানাইব
তব আবেদন, দেবি, রাখবের পদে।”

উত্তর করিলা সতী,—হায় রে সে বাণী
ধ্বনিল হনুর কানে বিণাবাণী যথা
মধুমাথা!—“রাঘবের পতি -বৈরী মম;
কিন্তু তা বলিয়া আমি কভু না বিবাদি
তাঁর সঙ্গে। পতি মম বীরেন্দ্র-কেশরী,
নিজ-ভুজ-বলে তিনি ভুবন-বিজয়ী;
কি কাজ আমার যুঝি তাঁর রিপু সহ?
অবলা, কুলের বালা, আমরা সকলে;
কিন্তু ভেবে দেখ, বীর, যে বিদ্যুত-ছটা
রমে আঁধি,^{২২} মরে নর, তাহার পরশে।
লও সঙ্গে, শুর, তুমি এই মোর দূতি।
কি যাচঞা করি আমি রামের সমীপে
বিবরিয়া কবে রামা; যাও ত্বরা করি।”

নু-মুণ্ড-মালিনী দূতী, নু-মুণ্ড-মালিনী-
আকৃতি,^{২৩} পশিয়া ধনী অরি-দল-মাঝে

নির্ভয়ে, চলিলা যথা গুরুত্বতী^{২৪} তরি,
তরঙ্গ-নিকরে রঙ্গে করি অবহেলা,
অকুল সাগর-জলে ভাস একাকিনী।
আগে আগে চলে হনু পথ দেখাইয়া।
চমকিলা বীরবন্দ হেরিয়া বামারে,
চমকে গৃহস্থ যথা ঘোর নিশা-কালে
হেরি অগ্নি-শিখা ঘরে! হাসিলা ভামিনী
মনে মনে। একদৃষ্টে চাহে বীর যত
দড়ে রড়ে জড় সবে^{২৫} হয়ে স্থানে স্থানে।
বাজিল নূপুর পায়ে, কাঞ্চী কটি-দেশে।
ভীমাকার শূল করে, চলে নিতম্বিনী
জরজরি সর্ব জনে কটাক্ষের শরে
তীক্ষ্ণতর। শিরোপরি শীর্ষকের চূড়া,
চন্দ্রক^{২৬}-কলাপময়,^{২৭} নাচে কুতূহলে;
ধকধকে রত্নাবলী কুচ-যুগমাঝে
পীবর^{২৮}! দুলিছে পৃষ্ঠে মণিময় বেণী,
কামের পতাকা যথা উড়ে মধু-কালে!
নব-মাতঙ্গিনী-গতি চলিলা রঞ্জিনী,
আলো করি দশ দিশ, কৌমুদী যেমতি,
কুমুদিনী-সখী, ঝলে বিমল সলিলে,
কিন্ধা উবা অংশুময়ী গিরিশঙ্ক-মাঝে!

শিবিরে বসেন প্রভু রঘু-চূড়ামণি;
কর-পুটে শুর-সিংহ লক্ষ্মণ সম্মুখে,
পাশে বিভীষণ সখা, আর বীর যত,
রুদ্র-কুল-সমতেজঃ, ভৈবর মুরতি।
দেব-দত্ত অস্ত্র-পুঞ্জ শোভে পিঠোপরি,
রঞ্জিত রঞ্জনরাগে^{২৯}, কুসুম-অঞ্জলি-
আবৃত;^{৩০} পুড়িছে ধূপ ধূমি ধূপদানে;
সারি সারি চারি দিকে জ্বলিছে দেউটী।
বিস্ময়ে চাহেন সবে দেব-অস্ত্র পানে।
কেহ বাখানেন খণ্ড চন্দ্রবর কেহ,
সুবর্ণ-মণ্ডিত যথা দিবা-অবসানে
রবির প্রসাদে মেঘ; তুণীর কেহ বা;
কেহ বস্ম, তেজোরশি! আপনি সুমতি
ধরি ধনুঃ-বরে করে কহিলা রাখব;

২২. দৃষ্টিকে মুগ্ধ করে। ২৩. নরমুণ্ডের মালা ধারিণী কালীর ন্যায় আকৃতি যার। ২৪. পালযুক্ত। ২৫. ভীতি ও
বিস্ময়ের ভাব নিয়ে সকলে মিলিত হয়েছে। ২৬. বর্ণোজ্জ্বল চিহ্ন। ২৭. ময়ূরপুচ্ছ (বর্ণোজ্জ্বল চিহ্নগুলি
ময়ূরপুচ্ছের চক্রাকার উজ্জ্বল বর্ণের চিহ্নের মত)। ২৮. স্কুল। ২৯. রক্তচন্দনে রঞ্জিত। ৩০. পুষ্পাঞ্জলির ফুলে
দেবতা ও অস্ত্র আবৃত।

“বৈদেহীর স্বয়ম্বরে ভাঙিনু পিনাকে
বাহু-বলে; এ ধনুকে নারি গুণ দিতে!
কেমনে, লক্ষ্মণ ভাই নোয়াইবে এরে?°”
সহসা নাদিল ঠাট°; জয় রাম ধ্বনি
উঠিল আকাশ-দেশে ঘোর কোলাহলে,
সাগর-কম্পোল যথা। ব্রহ্মে রক্ষোরথী,
দাশরথি পানে চাহি, কহিলা কেশরী;
“চেয়ে দেখ, রাঘবেন্দ্র, শিবির বাহিরে।
নিশীথে কি উষা আসি উতরিলা হেথা?”

বিস্ময়ে চাহিলা সবে শিবির বাহিরে।
“ভৈরবীক্লপিণী বামা,” কহিলা নৃগণি,
“দেবী কি দানবী, সখে, দেখ নিরখিয়া।
মায়াময় লক্ষা-খাম; পূর্ণ ইন্দ্র-জালে;
কাম-রূপী তবাগ্রজ।° দেখ ভাল করি;
এ কুহক তব কাছে অবিদিত নহে।
শুভক্ষণে, রক্ষোবর, পাইনু তোমারে
আমি! তোমা বিনা, মিত্র, কে আর রাখিবে
এ দুর্বল বলে,° কহ, এ বিপত্তি-কালে?
রামের চির-রক্ষণ তুমি রক্ষঃপুরে।”

হেন কালে হনু সহ উতরিলা দূতী
শিবিরে। প্রণমি বামা কৃতাজ্জলি-পুটে,
(ছত্রিশ রাগিণী যেন মিলি এক তানে!)
কহিলা; “প্রণমি আমি রাঘবের পদে,
আর যত গুরুজনে;—নৃ-মুণ্ড-মালিনী
নাম মম; দৈত্যবালা প্রমীলা সুন্দরী,
বীরেন্দ্র-কেশরী ইন্দ্রজিতের কামিনী,
তাঁর দাসী।” আশীষিয়া, বীর দাশরথি
সুখিলা; “কি হেতু, দূতি, গতি হেথা তব?
বিশেষিয়া কহ মোরে, কি কাজে ভূষিব
তোমার ভত্রিণী°, শুভে? কহ শীঘ্র করি।”

উত্তরিলা ভীমা-রূপী; “বীর-শ্রেষ্ঠ তুমি,
রঘুনাথ; আসি যুদ্ধ কর তাঁর সাথে;
নতুবা ছাড়হ পথ; পশিবে রূপসী
স্বর্ণলক্ষাপুরে আজি পূজিতে পতিরে।
বধেছ অনেক রক্ষঃ নিজ ভূজ-বলে;
রক্ষোবধু মাগে রণ; দেহ রণ তারে,
বীরেন্দ্র। রমণী শত মোরা; যাহে চাহ,
যুঝিবে সে একাকিনী। ধনুর্বাণ ধর,

ইচ্ছা যদি, নর-বর; নহে চন্দ্র আসি,
কিন্ধা গদা, মল্ল-যুদ্ধে সদা মোরা রত!
যথাক্রটি কর, দেব; বিলম্ব না সহে।
তব অনুরোধে সতী রোধে সখী-দলে,
চিত্রবাঘিনীরে° যথা রোধে কিরাতিনী,
মাতে যবে ভয়ঙ্করী—হেরি মৃগ-পালে।”

এতেক কহিয়া রামা শিরঃ নোমাইলা,
প্রফুল্ল কুসুম যথা। (শিশিরমণ্ডিত)
বন্দে নোমাইয়া শিরঃ মন্দ সমীরণে!
উত্তরিলা রঘুপতি; “শুন, সুকেশিনি,
বিবাদ না করি আমি কভু অকারণে।
অরি মম রক্ষঃ-পতি; তোমার সকলে
কুলবালা; কুলবধ; কোন্ অপরাধে
বৈরি-ভাব আচরিব তোমাদের সাথে?
আনন্দে প্রবেশ লক্ষা নিঃশঙ্ক হৃদয়।
জনম রামের, রামা, রঘুরাজ-কূলে
বীরেশ্বর; বীরপত্নী, হে সুনেত্রী দূতি,
তব ভ্রাতী, বীরাজনা সখী তাঁর যত।
কহ তাঁরে শত মুখে বাখানি, ললনে,
তাঁর পতি-ভক্তি আমি, শক্তি, বীরপণা
বিনা রণে পরিহার মাগি তাঁর কাছে!
ধন্য ইন্দ্রজিৎ! ধন্য প্রমীলা সুন্দরী!
ভিখারী রাঘব, দূতি, বিদিত জগতে;
বন-বাসী, ধন-হীন বিধি-বিড়ম্বনে;
কি প্রসাদ, সুবদনে, (সাজে যা তোমারে)
দিব আজি? সুখে থাক, আশীর্বাদ করি!”

এতেক, কহিয়া প্রভু কহিলা হনুরে;
“দেহ ছাড়ি পথ, বলি। অতি সাবধানে,
শিষ্ট আচরণে তুষ্ট কর বামা-দলে।”

প্রণমিয়া সীতানাথে বাহিরিলা দূতী।
হাসিয়া কহিলা মিত্র বিভীষণ; “দেখ,
প্রমীলার পরাক্রম দেখ বাহিরিয়া,
রঘুপতি! দেখ, দেব, অপূর্ব কৌতুক।
না জানি এ বামা-দলে কে আঁটে সমরে,
ভীমারূপী, বীর্যবতী চামুণ্ডা যেমতি
রক্তবীজ-কুল-অরি°?” কহিলা রাঘব;
“দূতীর আকৃতি দেখি ডরিনু হৃদয়ে,
রক্ষোবর। যুদ্ধ-সাধ ত্যজিনু তখনি!

৩১. মিথিলায় জনকপুরীতে রামচন্দ্রের হরধনুভঙ্গের প্রসঙ্গ। ৩২. সেনাদল। ৩৩. তোমার অগ্রজ রাবণ ইচ্ছামত
রূপ ধারণ করতে পারে—তাই কামরূপী। ৩৪. বলীকে—বলবানকে। ৩৫. পালন-কর্ত্রী। ৩৬. চিত্রবাঘিনী।
৩৭. মার্কণ্ডেয় চণ্ডী দেবী কর্তৃক রক্তবীজ সংহার প্রসঙ্গ।

মুট যে ঘাটায়, সখে, হেন বাঘিনীরে !
চল, মিত্র, দেখি তব ভ্রাতৃ-পুত্র-বধু।”

যথা দূর দাবানল পশিলে কাননে,
অগ্নিময় দশ দিশ; দেখিলা সন্মুখে
রাঘবেন্দ্রে বিবা-রাশি নির্ধুম আকাশে,
সুবর্ণি বারিদ-পুঞ্জ^{৭৮}। শুনিলা চমকি
কোদণ্ড-ঘর্ষর ঘোড়া দড়বাড়ি,
হুঙ্কার, কোষে বদ্ধ অসির ঝনঝনি।
সে রোলের সহ মিশি বাজিছে বাজন,
ঝড় সঙ্গে বহে যেন কাকলী-লহরী !
উড়িছে পতাকা—রত্ন-সঙ্কলিত-আভা;
মন্দগতি আঙ্কলিতে^{৭৯} নাচে বাজী-রাজী;
বোলিছে ঘম্বুরাবলী ঘন ঘন বোলে।
গিরি-চূড়াকৃতি ঠাট দাঁড়ায় দু-পাশে
অটল, চলিছে মধ্যে বামা-কুল-দলে।
উপত্যকা-পথে যথা মাতঙ্গিনী-যুথ,
গরজে পুরিয়া দেশ, ক্ষিতি টলমলি।

সর্ব-অগ্রে উগ্রচণ্ডা নৃ-মুণ্ড-মালিনী,
কৃষ্ণ-হয়ারাঢ়া ধনী, ধ্বজ-দণ্ড করে
হৈমময়; তার পাছে চলে বাদ্যকরী,
বিদ্যাধরী দল যথা, হায় রে ভূতলে
অতুলিত ! বীণা, বাঁশী, মৃদঙ্গ, মন্দিরা-
আদি যন্ত্র বাজে মিলি মধুর নিক্ষেপে।
তার পাছে শূল-পাণি বীরঙ্গনা-মাঝে
প্রমীলা, তারার দলে শশিকলা যথা !
পরাক্রমে ভীমা বামা। খেলিছে চৌদিকে
রতন-সম্ভবা বিভা ক্ষণ-প্রভা-সম।
অস্তুরীক্ষে সঙ্গে সঙ্গে চলে রতিপতি
ধরিয়া কুসুম-ধনুঃ, মুহূর্ষ হানি
অব্যর্থ কুসুম-শরে ! সিংহ-পৃষ্ঠে যথা
মহিষ-মর্দিনী দুর্গা; ঐরাবতে শচী
ইন্দ্রাণী; খগেন্দ্রে রমা উপেন্দ্র^{৮০}—রমণী
শোভে বীর্যবতী সতী বড়বার পিঠে—
বড়বা, বামী-ঈশ্বরী, মণ্ডিত রতনে !
ধীরে ধীরে, বৈরীদলে যেন অবহেলি,
চলি গেলা বামাকুল। কেহ টঙ্কারিলা
শিঞ্জিনী; হুঙ্কারি কেহ উলঙ্গিলা অসি;
আস্ফালিলা শূলে কেহ; হাসিলা কেহ বা
অট্রহাসে টিটকারি; কেহ বা নাদিল,
গহন বিপিনে যথা নাদে কেশরিণী,

বীর-মদে, কাম-মদে উন্মাদ ভৈরবী !

লক্ষ্য করি রক্ষোবরে, কহিলা রাঘব;
“কি আশ্চর্য্য, নৈকেষ্যে? কভু নাহি দেখি,
কভু নাহি শুনি হেন এ তিন ভুবনে !
নিশার স্বপন আজি দেখিনু কি জাগি ?
সত্য করি কহ মোরে, মিত্র-রত্নোত্তম।
না পারি বুঝিতে কিছু; চঞ্চল হইনু
এ প্রপঞ্চ^{৮১} দেখি, সখে বধো না আমারে।
চিত্ররথ-রথী-মুখে শুনিবু বারতা,
উরিবেন মায়া-দেবী দাসের সহায়ে;
পাতিয়া এ ছল সতী পশিলা কি আসি
লঙ্কাপুরে? কহ, বধ, কার এ ছলনা?”

উত্তরিল্য বিভীষণ; “নিশার স্বপন
নহে এ, বৈদেহী-নাথ, কহিনু তোমারে।
কালনেমি নামে দৈত্য বিখ্যাত জগতে
সুরারি, তনয়া তার প্রমীলা সুন্দরী।
মহাশক্তি-অংশে, দেব, জনম বামার,
মহাশক্তি-সম তেজে। কার সাধ্য আঁটে
বিক্রমে এ দানবীরে? দন্তোলী-নিক্ষেপী
সহস্রাক্ষে হে হর্যাক্ষ বিমুখে সংগ্রামে,
সে রক্ষেন্দ্রে, রাঘবেন্দ্রে, রাখে পদতলে
বিমোহিনী, দিগম্বরী যথা দিগম্বরে !
জগতের রক্ষা-হেতু গড়িলা বিধাতা
এ নিগড়ে, যাহে বাঁধা মেঘনাদ বলী—
মদ-কল কাল হস্তী ! যথা বারি-ধারা
নিবারে কানন-বৈরী ঘোর দাবানলে
নিবারে সতত সতী শ্রেম-আলাপনে
এ কালাগ্নি। যমুনার সুবাসিত জলে
ডুবি থাকে কাল ফণী, দুরন্ত দংশক !
সুখে বসে বিশ্ববাসী, ত্রিদিবে দেবতা,
অতল পাতালে নাগ, নর নরলোকে।”

কহিলেন রঘুপতি; “সত্য যা কহিলে,
মিত্রবর, রথীশ্রেষ্ঠ মেঘনাদ রথী।
না দেখি এ হেন শিক্ষা এ তিন ভুবনে
দেখিয়াছি ভুগুরামে,^{৮২} ভুগুমান গিরি-
সদৃশ অটল যুদ্ধে। কিন্তু শুভ ক্ষণে
তব ভ্রাতৃপুত্র, মিত্র, ধনুর্বাণ ধরে !
এবে কি করিব, কহ, রক্ষ-কুল-মগি ?
সিংহ সহ সিংহী আসি মিলিল বিপিনে;
কে রাখে এ মৃগ-পালে? দেখ হে চাহিয়া,

৩৮. মেঘখণ্ডগুলিকে স্বর্ণবর্ণে রঞ্জিত করে। ৩৯. দুলাকি চালা। ৪০. বিষ্ণু। ৪১. মায়া। ৪২. ভৃগুবংশের
রাম—কুঠারধারী পরশুরাম।

উথলিছে চারি দিকে ঘোর কোলাহলে
হলাহল সহ সিঙ্খু! নীলকণ্ঠ যথা
(নিস্তারিণী-মনোহর) নিস্তারিলে ভবে,^{৪০}
নিস্তার এ বলে, সখে, তোমারি রক্ষিত।—
ভেবে দেখ মনে শূর, কাল সর্প তেজে
তবাগ্রজ, বিষ-দন্ত তার মহাবলী
ইন্দ্রজিৎ। যদি পারি ভাঙিতে প্রকারে
এ দস্তে, সফল তবে মনোরথ হবে;
নতুবা এসেছি মিছে সাগরে বাঁধিয়া
এ কনক লঙ্কাপুরে, কহিনু তোমারে।”

কহিলা সৌমিত্রি শূর শিরঃ নোমাইয়া
ভ্রাতৃপদে; “কেন আর ডরিব রাক্ষসে,
রঘুপতি? সুরনাথ সহায় যাহার,
কি ভয় তাহার, প্রভু, এ ভব-মণ্ডলে?
অবশ্য হইবে ধ্বংস কালি মোর হাতে
রাবণি। অধর্ম কোথা কবে জয় লাভে?
অধর্ম-আচারী এই রক্ষঃ-কুলপতি;
তার পাপে হত-বল হবে রণ-ভূমে
মেঘনাদ; মরে পুত্র জনকের পাপে।
লঙ্কার পঙ্কজ-রবি যাবে অস্তাচলে
কালি, কহিলেন, চিত্ররথ সুর-রথী।
তবে এ ভাবনা, দেব, কর কি কারণে?”

উত্তরিলা বিভীষণ; “সত্য যা কহিলে,
হে বীর-কুঞ্জর! যথা ধর্ম জয় তথা।
নিজ পাপে মজে, হায়, রক্ষঃ-কুল-পতি।
মরিবে তোমার শরে স্বরীশ্বর-অরি
মেঘনাদ; কিন্তু তবু থাক সাবধানে।
মহাবীর্যবতী এই প্রমীলা দানবী;
নৃ-মুণ্ড-মালিনী, যথা নৃ-মুণ্ড-মালিনী,
রণ-প্রিয়া! কাল সিংহী পশে যে বিপনে
তার পাশে বাস যার, সতর্ক সতত
উচিত থাকিতে তার। কখন, কে জানে,
আসি আক্রমিবে ভীমা কোথায় কাহারে।
নিশায় পাইলে রক্ষা, মারিব প্রভাতে।”

কহিলেন রঘুমণি মিত্র বিভীষণে;
“কৃপা করি, রক্ষোবর, লক্ষ্মণেরে লয়ে,
দুয়ারে দুয়ারে সখে, দেখ সেনাগণে;
কোথায় কে জাগে আজি? মহাক্রান্ত সবে
বীরবাছ সহ রণে। দেখ চারি দিকে—

কি করে অঙ্গদ; কোথা নীল মহাবলী;
কোথা বা সূগ্রীব মিতা? এ পশ্চিম দ্বারে
আপনি জাগিব আমি ধনুবর্ষণ হাতে।”
“যে আঞ্জা,” বলিয়া শূর বাহিরিলা লয়ে
উশ্মিলা-বিলাসী শূরে। সুরপতি-সহ
তারক-সূদন যেন শোভিলা দুজনে,
কিন্মা ত্রিষাম্পতি-সহ ইন্দু সুধানিধি।

লঙ্কার কনক-দ্বারে উতরিলা সতী
প্রমীলা। বাজিল শিঙ্গা, বাজিল দুন্দুভি
ঘোর রবে; গরজিল ভীষণ রাক্ষস,
প্রলয়ের মেঘ কিন্মা করিযুথ যথা।
রোষে বিক্রাপাক্ষ রক্ষঃ প্রক্ষেপ্তন করে;
তালজম্বা—তাল-সম-দীর্ঘ-গদাধারী,
ভীমমূর্তি প্রমত্ত! হ্রেবিল অশ্বাবলী।
নাদে গজ; রথ-চক্র ঘুরিল ঘর্ঘরে;
দূরন্ত কৌণ্ডিক-কুল^{৪১} কুপ্তে আশ্মফালিল;
উড়িল নারাচ^{৪২}, আচ্ছাদিয়া নিশানাথে।
অগ্নিময় আকাশ পুরিল কোলাহলে,
যথা যবে ভূকম্পনে, ঘোর বজ্রনাদে,
উগরে আশ্বেয় গিরি অগ্নি-স্রোতরাশি
নিশীথে। আতঙ্কে লঙ্কা উঠিল কাঁপিয়া।

উচ্চৈঃস্বরে কহে চণ্ডা নৃ-মুণ্ড-মালিনী;
“কাহারে হানিস্ অঙ্গ, ভীরু, এ আধারে?
নহি রক্ষোরিপু মোরা, রক্ষঃ-কুল-বধু,
খুলি চক্ষু দেখ চেয়ে।” অমনি দুয়ারী
টানিল ছদ্মুকা ধরি হড় হড় হড়ে!
বজ্রশব্দে খুলে দ্বার। পশিলা সুন্দরী
আনন্দে কনক-লঙ্কা জয় জয় রবে।

যথা অগ্নি-শিখা দেখি পতঙ্গ-আবলী
ধায় রঙ্গে, চারি দিকে আইলা ধাইয়া
পৌর জন; কুলবধু দিলা ছলাছলি,
বরষি কুসুমাসারে; যন্ত্র-ধ্বনি করি
আনন্দে বন্দিল বন্দী। চলিলা অঙ্গনা
আশ্বেয় তরঙ্গ যথা নিবিড় কাননে।
বাজাইল বীণা, বাঁশী, মুরজ, মন্দিরা
বাদ্যকরী বিদ্যাধরী; হেধি আঙ্কন্দিল
হয়-বৃন্দ; বনঝনিল কৃপাণ পিধানে^{৪৩}।
জনজীর কোলে শিশু জাগিল চমকি।
খুলিয়া গবাঙ্ক কত রাক্ষসী যুবতী,

৪৩. সমুদ্রমহানে উৎপন্ন হলাহল পান করে মহাদেব নীলকণ্ঠ হয়েছিলেন। ৪৪. বর্শা বা বনমধারী সৈন্যদল।

৪৫. লৌহনির্মিত বাণ। ৪৬. কোষ বা ঝাপ।

নিরীখিয়া দেখি সবে সুখে বাখানিলা
প্রমীলার বীরপণা। কত ক্ষণে বামা
উতরিলা প্রেমানন্দে পতির মন্দিরে—
মণিহারা ফণী যেন পাইল সে ধনে!

অরিন্দম ইন্দ্রজিত কহিলা কৌতুকে ;—

“রক্তবীজে বধি বুঝি, এবে, বিধুমুখি,
আইলা কৈলাস-ধামে? ” যদি আঞ্জা কর,
পড়ি পদ-তলে তবে; চিরদাস আমি
তোমার, চামুণ্ডে!” হাসি, কহিলা ললনা;
“ও পদ-প্রসাদে, নাথ, ভব-বিজয়িনী
দাসী; কিন্তু মনমথে না পারি জিনিতে।
অবহেলি শরানলে; বিরহ-অনলে
(দুরূহ) ডরাই সদা; তেঁই সে আইনু,
নিত্য নিত্য মন যারে চাহে, তাঁর কাছে!
পশিল সাগরে আসি রক্তে তরঙ্গিনী।”

এতেক কহিয়া সতী, প্রবেশি মন্দিরে,

তাজিলা বীর-ভূষণে; পরিলা দুকূলে
রতনময় আঁচল, আঁটিয়া কাঁচলি
পীন-সুন্দী; শ্রোণিদেশে^{৪৭} ভাতিল মেখলা।
দুলিল হীরার হার, মুকুতা-আবলী
উরসে; ঙ্গলিল ভালে তারা-গাঁথা সিঁথি
অলকে মণির আভা কুণ্ডল শ্রবণে।
পরি নানা আভরণ সাজিলা রূপসী।
ভাসিলা আনন্দ-নীরে রক্ত-চূড়া-মণি
মেঘনাদ; স্বর্গাসনে বসিলা দম্পতী।
গাইল গায়ক-দল; নাচিল নর্তকী;
বিদ্যাধর বিদ্যাধরী ত্রিদেশ-আলয়ে
যথা; তুলি নিজ দুঃখ, পিঞ্জরে-মাঝারে,
গায় পাখী; উথলিল উৎস কলকলে,
সুধাংশুর অংশু-স্পর্শে যথা অনুরাশি।
বহিল বাসস্তানিল মধুর সুস্বনে,
যথা যবে ঋতুরাজ, বনস্থলী সহ,
বিরলে করেন কেলি মধু মধুকালে।

হেথা বিভীষণ সহ সৌমিত্রি কেশরী
চলিলা উত্তর-দ্বারে; সুগ্রীব সুমতি
জাগেন আপনি তথা বীর-দল সাথে,
বিদ্বা-শৃঙ্গ-বৃন্দ যথা—অটল সংগ্রামে।
পূরব দুয়ারে নীল, ভৈরব মুরতি;
বৃথা নিদ্রা দেবী তথা সাধিছেন তারে।

দক্ষিণ দুয়ারে ফিরে কুমার অঙ্গদ,
ক্ষুধাতুর হরি^{৪৯} যথা আহার-সন্ধানে,
কিন্মা নন্দী শূল-পাণি কৈলাস-শিখরে।
শত শত অগ্নি-রাশি ঙ্গলিছে চৌদিকে
ধূম-শূন্য; মধ্যে লঙ্কা, শশাঙ্ক যেমনি
নক্ষত্র-মণ্ডল মাঝে স্বচ্ছ নভঃস্থলে।
চারি দ্বারে বীর-ব্যূহ জাগে; যথা যবে
বারিদ-প্রসাদে পুষ্ট শস্য-কূল বাড়ে
দিন দিন, উচ্চ মঞ্চ গড়ি ক্ষেত্র-পাশে,
তাহার উপরে কৃষী জাগে সাবধানে,
খেদাইয়া যুগযুগে, ভীষণ মহিষে,
আর তৃণজীবী জীবে। জাগে বীরব্যূহ,
রাক্ষস-কুলের ত্রাস, লঙ্কার চৌদিকে।

হাষ্টমতি দুই জন চলিলা ফিরিয়া
যথায় শিবিরে বীর ধীর দাশরথি।

হাসিয়া কৈলাসে উমা কহিলা সন্তাষি
বিজয়ারে, “লঙ্কা পানে দেখ লো চাহিয়া,
বিধুমুখি! বীর-বেশে পশিছে নগরে
প্রমীলা, সঙ্গিনী-দল সঙ্গে বরাঙ্গনা।
সুবর্ণ-কঙ্কুক-বিভা উঠিছে আকাশে!
সবিস্ময়ে দেখ ওই দাঁড়িয়ে নুমাণি
রাঘব, সৌমিত্রি, মিত্র বিভীষণ-আদি
বীর যত! হেন রূপ কার নর-লোকে?
সাজিনু এ বেশ আমি নাশিতে দানবে
সত্য-যুগে। ওই শোন ভয়ঙ্কর ধ্বনি!
শিঞ্জিনী আকর্ষি রোবে টঙ্কারিছে বামা
হঙ্কারে। বিকট ঠাট কাঁপিছে চৌদিকে!
দেখ লো নাচিছে চূড়া কবরী-বন্ধনে।
তুরঙ্গম-আস্কন্দিতে উঠিছে পড়িছে
গৌরাঙ্গী, হায় রে মরি, তরঙ্গ-হিম্মোলে
কনক-কমল যেন মানস-সরসে!”

উত্তরে বিজয়া সখী; “সত্য যা কহিলে,
হৈমবতি, হেন রূপ কার নর-লোকে?
জানি আমি বীর্যবতী দানব-নন্দিনী
প্রমীলা, তোমার দাসী; কিন্তু ভাব মনে,
কিন্মাপে আপন কথা রাখিবে, ভবানি?
একাকী জগত-জয়ী ইন্দ্রজিত তেজে,
তা সহ মিলিল আসি প্রমীলা; মিলিল
বায়ু-সখী অগ্নি-শিখা সে বায়ুর সহ!

কেমনে রক্ষিবে রামে কহ, কাত্যায়নি ?
কেমনে লক্ষ্মণ শূর নাশিবে রাক্ষসে ?”

ক্ষণ কাল চিন্তি তবে কহিলা শঙ্করী;
“মম অংশে জন্ম ধরে প্রমীলা রূপসী,
বিজয়ে; হরিব তেজঃ কালি তার আমি ।
রবিচ্ছবি-করস্পর্শে উজ্জ্বল যে মণি
আভা-হীন হয় সে, লো, দিবা-অবসানে;
তেমতি নিস্তেজাঃ কালি করিব বামারে ।
অবশ্য লক্ষ্মণ শূর নাশিবে সংগ্রামে
মেঘনাদে ! পতি সহ আসিবে প্রমীলা

এ পুরে; শিবের সেবা করিবে রাবণি;
সখী করি প্রমীলারে তুষিবে আমরা ।”

এতেক কহিয়া সতী পশিলা মন্দিরে ।
মুদুপদে নিদ্রা দেবী আইলা কৈলাসে;
লভিলা কৈলাস-বাসী কুসুম-শয়নে
বিরাম ; ভবের ভালে দীপিৎ শশি-কলা,
উজ্জলিল সুখ-ধাম রজোময় তেজে ।

ইতি শ্রীমেঘনাদবধে কাব্যে সমাগমো নাম
তৃতীয়ঃ সর্গঃ

চতুর্থ সর্গ

নামি আমি, কবি-গুরু, তব পদান্বজে,
বান্দীকি । হে ভারতের শিরঃচূড়ামণি,
তব অনুগামী দাস, রাজেন্দ্র-সঙ্গমে
দীন যথা যায় দূর তীর্থ-দরশনে ।
তব পদ-চিহ্ন ধ্যান করি দিবা নিশি,
পশিয়াছে কত যাত্রী যশের মন্দিরে,
দমনিয়া ভব-দম দূরন্ত শমনে—
অমর । শ্রীভর্ষুহরি^১; সূরী^২ ভবভূতি^৩
শ্রীকঠ^৪; ভারতে খ্যাত বরপুত্র যিনি
ভারতীর, কালিদাস^৫—সুমধুর-ভাষী;
মুরারি-মুরলী-ধ্বনি-সদৃশ মুরারি^৬
মনোহর; কৃত্তিবাস^৭, কীর্ত্তিবাস^৮ কবি,
এ বঙ্গের অলঙ্কার । হে পিতঃ, কেমনে,
কবিতা-রসের সরে রাজহংস-কূলে
মিলি করি কেলি আমি, না শিখালে তুমি ?
গাঁথিব নূতন মালা, তুলি সযতনে
তব কাব্যোদ্যানে ফুল; ইচ্ছা সাজাইতে
বিবিধ ভূষণে ভাষা; কিন্তু কোথা পাব
(দীন আমি !) রত্নরাজী, তুমি নাহি দিলে,

রত্নাকর ? কৃপা, প্রভু, কর অকিঞ্চনে ।—

ভাসিছে কনক-লঙ্কা আনন্দের নীরে,
সুবর্ণ-দীপ-মালিনী, রাজেন্দ্রাণী যথা
রত্নহারা । ঘরে ঘরে বাজিছে বাজনা;
নাচিছে নর্শকী-বৃন্দ, গাইছে সুতানে
গায়ক;নায়কে লয়ে কেলিছে নায়কী,
খল খল খল হাসি মধুর অধরে ।
কেহ বা সুরাতে রত, কেহ শীখু^৯-পানে ।
দ্বারে দ্বারে ঝোলে মালা গাঁথা ফল-ফুলে;
গৃহাগ্রে উড়িছে ধ্বজ; বাতায়নে বাতি;
জনশ্রোতঃ রাজ-পথে বহিছে কন্ডোলে,
যথা মহোৎসবে, যবে মাতে পুরবাসী ।
রাশি রাশি পুষ্ট-বৃষ্টি হইছে চৌদিকে—
সৌরভে পুরিয়া পুরী । জাগে লঙ্কা আজি
নিশীথে, ফিরেন নিদ্রা দুয়ারে দুয়ারে,
কেহ নাহি সাধে তাঁরে পশিতে আলয়ে,
বিরাম-বর প্রার্থনে ! “মারিবে বীরেন্দ্র
ইন্দ্রজিত কালি রামে; মারিবে লক্ষ্মণে;
সিংহনাদে খেদাইবে শৃগাল-সদৃশ

৫০. দীপ্তিময় ।

১. রামচরিতাম্বক কাব্য ভট্টিকাব্য-এর রচয়িতা ।
২. পণ্ডিত ।
৩. রামচরিতাম্বক সংস্কৃত নাটক উত্তররামচরিত এবং বীরচরিতম্ প্রণেতা ।
৪. উত্তরচরিতম্-এ উল্লিখিত ভবভূতির উপাধি ।
৫. মহাকবি বান্দীকি ও কৃষ্ণদ্বৈপায়ন বেদব্যাস এই দুই লোকোত্তর প্রতিভার পর সংস্কৃত সাহিত্যের শ্রেষ্ঠ কবি ও নাট্যকার ।
৬. অনর্ধরায়বম্ নাটকের প্রমোতা মুরারি মিশ্র ।
৭. সর্বজনপ্রিয় বাংলা রামায়ণ কৃত্তিবাসী রামায়ণ এর রচয়িতা কৃত্তিবাস ওঝা ।
৮. কীর্ত্তিবাস কীর্ত্তির আবাস ।
৯. মধু ।

বৈরী-দলে সিদ্ধু-পারে; আনিবে বাঁধিয়া
বিভীষণে; পলাইবে ছাড়িয়া চাঁদরে
রাহু; জগতের আঁখি জুড়াবে দেখিয়া
পুনঃ সে সুধাংশু-ধনে;” আশা, মায়াবিনী,
পথে, ঘাটে, ঘরে, দ্বারে, দেউলে, কাননে,
গাইছে গো এই গীত আজি রক্ষঃপুরে—
কেন না ভাসিবে রক্ষঃ আত্মদ-সলিলে ?

একাকিনী শোকাকুলা, অশোক-কাননে,
কাঁদেন রাঘব-বাঞ্ছা।^{১০} আঁধার কুটীরে
নীরবে! দুরন্ত চেড়ী, সতীরে ছাড়িয়া,
ফেরে দূরে মত্ত সবে উৎসব-কৌতুকে—
হীন-প্রাণা হরিণীরে রাখিয়া বাঘিনী
নির্ভয় হৃদয়ে যথা ফেরে দূর বনে।^{১১}
মলিন-বদনা দেবী, হায় রে, যেমতি
খনির তিমির-গর্ভে (না পারে পশিতে
সৌর-কর-রাশি যথা) সূর্য্যকান্ত মণি,
কিন্মা বিশ্বাধরা রমা অনুরাশি-তলে^{১২}।
স্বনিছে পবন, দূরে রহিয়া রহিয়া
উচ্ছ্বাসে বিলাপী যথা। লড়িছে বিবাদে
মন্দিরিয়া পাতাকুল। বসেছে অরবে
শাখে পান্থী! রাশি রাশি কুসুম পড়েছে
তরুমূলে যেন তরু, তাপি মনস্তাপে
ফেলিয়াছে খুলি সাজ। দূরে প্রবাহিণী,
উচ্চ বীচি-রবে কাঁদি, চলিছে সাগরে,
কহিতে বারীশে যেন এ দুঃখ-কাহিনী!
না পশে সুধাংশু-অংশু সে ঘোর বিপিনে।
ফোটে কি কমল কভু সমল সলিলে!
তবুও উজ্জ্বল বন ও অপূৰ্ব রূপে।

একাকিনী বসি দেবী, প্রভা আভাময়ী
তমোময় ধামে যেন। হেন কালে তথা
সরমা সুন্দরী আসি বসিলা কাঁদিয়া
সতীর চরণ-তলে, সরমা সুন্দরী—
রক্ষঃকুল-রাজলক্ষ্মী রক্ষোবধু-বেশে।

কত ক্ষণে চক্ষুঃ-জল মুছি সুলোচনা
কহিলা মধুর-স্বরে; “দুরন্ত চেড়ীরা,

তোমারে ছাড়িয়া, দেবি, ফিরিছে নগরে
মহোৎসবে রত সবে আজি নিশা-কালে;
এই কথা শুনি আমি আইনু পূজিতে
পা দুখানি। আনিয়াছি কোঁটায় ভরিয়া
সিন্দুর; করিলে আজ্ঞা, সুন্দর ললাটে
দিব ফোটা। এয়ো তুমি, তোমার কি সাজে
এ বেশ ?^{১৩} নিষ্ঠুর, হায়, দুষ্ট লক্ষাপতি!
কে ছেঁড়ে পদ্মের পর্ণ! কেমনে হরিল
ও বরাক্স-অলঙ্কার, বুঝিতে না পারি ?”

কোঁটা খুলি, রক্ষোবধু যত্নে দিলা ফোঁটা
সীমন্তে; সিন্দুর-বিন্দু শোভিল ললাটে,
গোখুলি-ললাটে, আহা! তারা রত্ন যথা!
দিয়া ফোঁটা, পদ-খুলি লইলা সরমা।
“ক্ষম, লক্ষ্মি, ছুঁইনু ও দেব-আকাঙ্ক্ষিত
তনু; কিন্তু চির-দাসী দাসী ও চরণে!”

এতেক কহিয়া পুনঃ বসিলা যুবতী
পদতলে। আহা মরি, সুবর্ণ-দেউটী
তুলসীর মূলে যেন জ্বলিল উজলি
দশ দিশ। মৃদু স্বরে কহিলা মৈথিলী;^{১৪}—

“বৃথা গঞ্জ দশাননে তুমি, বিধুমুখি!
আপনি খুলিয়া আমি ফেলাইনু দূরে
আভরণ, যবে পান্থী আমারে ধরিল
বনাশ্রমে। ছড়াইনু পথে সে সকলে,
চিহ্ন-হেতু। সেই সেতু^{১৫} আনিয়াছে হেথা—
এ কনক-লক্ষ্যাপুরে—ধীর রঘুনাথে!
মণি, মুক্তা, রতন, কি আছে লো জগতে,
যাহে নাহি অবহেলি লভিতে এ ধনে?”

কহিলা সরমা; “দেবি, শুনিয়াছে দাসী
তব স্বয়ম্বর-কথা তব সুধা-মুখে;
কেন বা আইলা বনে রঘু-কুল-মণি।
কহ এবে দয়া করি, কেমনে হরিল
তোমারে রক্ষেন্দ্র, সতি? এই ভিক্ষা করি,
দাসীর এ তৃষা তোষ সুধা-বরিষণে।
দূরে দুষ্ট চেড়ীদল; এই অবসরে
কহ মোরে বিবরিয়া, শুনি সে কাহিনী।

১০. রাঘব যাকে বাঞ্ছা বা কামনা করেন—সীতা। ১১. মধুসূদন এই উপমাটি বাস্তবিক রামায়ণ থেকে গ্রহণ করেছেন। ১২. সমুদ্রমন্ডনের পৌরাণিক প্রসঙ্গ। দুর্ভাসার শাপে লক্ষ্মীর স্বর্গত্যাগ ও সমুদ্রতলে বাস।

১৩. এয়োস্ত্রীর লক্ষণ ললাটের সিঁদুর চিহ্ন। সীতার সিঁদুরবিহীন রূপের কথা বলা হয়েছে। ১৪. মিথিলা রাজকন্যা—সীতা। ১৫. যোগাযোগ। রাবণ কর্তৃক অপহৃত সীতা পথে তার চিহ্নরূপ অলঙ্কার বলে ফেলেছিলেন।

কি ছলে ছলিল রামে, ঠাকুর লক্ষ্মণে
এ চোর ? কি মায়া-বলে রাখবের ঘরে
প্রবেশি, করিল চুরি এ হেন রতনে ?”

যথা গোমুখীর মুখ হইতে সুস্বনে
ঝরে পূত বারিঃধারা, কহিলা জানকী,
মধুরভাষিণী সতী, আদরে সন্তাষি
সরমারে,—“হিতৈষিণী সীতার পরমা
তুমি, সখি ! পূর্ব-কথা শুনিবারে যদি
ইচ্ছা তব, কহি আমি, শুন মনঃ দিয়া।—

“ছিনু মোরা, সুলোচনে, গোদাবরী-তীরে,
কপোত কপোতী যথা উচচ বৃক্ষ-চূড়ে
বাঁধি নীড়, থাকে সুখে; ছিনু ঘোর বনে,
নাম পঞ্চবটী, মর্ন্তে সুর-বন-সম।
সদা করিতেন সেবা লক্ষ্মণ সুমতি।
দশুক ভাণ্ডার যার, ভাবি দেখ মনে,
কিসের অভাব তার ? যোগাভেন আনি
নিত্য ফল মূল বীর সৌমিত্রি; মৃগয়া
করিতেন কবু প্রভু; কিন্তু জীবনাশে
সতত বিরত, সখি, রাখবেশ্র বলী,—
দয়ার সাগর নাথ, বিদিত জগতে।

“ভুলিনু পূর্বের সুখ। রাজার নন্দিনী,
রঘু-কুল-বধু আমি; কিন্তু এ কাননে,
পাইনু, সরমা সই, পরম পিরীতি।
কুটীরের চারি দিকে কত যে ফুটিত
ফুলকুল নিত্য নিত্য, কহিব কেমনে ?
পঞ্চবটী-বন-চর মধু নিরবধি।”
জাগাত প্রভাতে মোরে কুহলি সুস্বরে
পিক-রাজ। কোন রাণী, কহ, শশিমুখি
হেন চিত্ত-বিনোদন বৈতালিক”-গীতে
খোলে আঁখি ? শিখী সহ, শিখিনী সুখিনী
নাচিত দুয়ারে মোর। নর্ষক নর্ষকী,
এ দোঁহার সম, রামা, আছে কি জগতে ?
অতিথি আসিত নিত্য করভ,” করভী
মৃগ-শিশু, বিহঙ্গম, ঞ্চ-অঙ্গ কেহ,
কেহ শুভ্র, কেহ কাল, কেহ বা চিত্রিত,
যথা বাসবের ধনুঃ ঘন-বর-শিরে;
অহিংসক জীব যত। সেবিতাম সবে,
মহাদরে; পালিতাম পরম যতনে,
মরুভূমে শ্রোতস্বতী তৃষাতুরে যথা,

আপনি সৃজলবতী বারিদ-প্রসাদে।—
সরসী আরসি মোর। তুলি কুবলয়ে
(অমূল রতন-সম) পরিতাম কেশে;
সাজিতাম ফুল-সাজে; হাসিতেন প্রভু,
বনদেবী বলি মোরে সন্তাষি কৌতুকে।
হায়, সখি, আর কিলো পাব প্রাণনাথে ?
আর কি এ পোড়া আঁখি এ ছার জনমে
দেখিবে সে পা দুখানি—আশার সরসে
রাজীব; নয়নমগি ? হে দারুণ বিধি,
কি পাপে পাপী এ দাসী তোমার সমীপে ?”

এতেক কহিয়া দেবী কাঁদিলা নীরবে।
কাঁদিলা সরমা সতী তিতি অশ্রু-নীরে।
কত ক্ষণে চক্ষুঃ-জল মুছি রক্ষোবধু
সরমা কহিলা সতী সীতার চরণে;
“স্মরিলে পূর্বের কথা ব্যথা মনে যদি
পাও, দেবি, থাক তবে; কি কাজ স্মরিয়া ?
হেরি তব অশ্রু-বারি ইচ্ছি মরিবারে।”

উত্তরিলো প্রিয়স্বদা” (কাদস্বা^{১০} যেমতি
মধু-স্বরা।); “এ অভাগী, হায়, লো, সুভগে
যদি না কাঁদিবে তবে কে আর কাঁদিবে
এ জগতে ? কহি, শুন পূর্বের কাহিনী।
বরিষার কালে, সখি, প্লাবন-পীড়নে
কাতর প্রবাহ, ঢালে, তীর অতিক্রমি,
বারি-রাশি দুই পাশে; তেমতি যে মনঃ
দুঃখিত, দুঃখের কথা কহে সে অপরে।
তেঁই আমি কহি, তুমি শুন, লো সরমে।
কে আছে সীতার আর এ অরু^{১১}-পূরে

“পঞ্চবটী-বনে মোরা গোদাবরী-তটে
ছিনু সুখে। হায়, সখি, কেমনে বর্ণিব
সে কান্তার^{১২}-কান্তি আমি ? সতত স্বপনে
শুনিতাম বন-বীণা বন-দেবী-করে;
সরসীর তীরে বসি, দেখিতাম কভু
সৌর-কর-রাশি-বেশে সুর-বালা-কেলি
পদ্মবনে; কভু সাধবী ঋষি-বংশ-বধু
সুহাসিনী আসিতেন দাসীর কুটীরে,
সুখাংশুর অংশু যেন অঙ্ককার ধামে।
অজিন^{১৩} (রঞ্জিত, আহা, কত শত রঙে।)
পাতি বসিতাম কভু দীর্ঘ তরু-মূলে,
সখী-ভাবে সন্তাষিয়া ছায়ায়, কভু বা

১৬. মধুর বনকুল পঞ্চবটী বনে সিরিকিজিত। ১৭. স্ততি পাঠক। ১৮. হাতির শাবক। ১৯. প্রিয় বাক্য বলে যে
মমণী। ২০. কলহসী। ২১. রাক্ষস। ২২. গন্ধ অরুণ্য। ২৩. মৃগচর্ম।

কুরঙ্গিনী-সঙ্গে সঙ্গে নাচিতাম বনে,^{২৪}
 গাইতাম গীত শুনি কোকিলের ধ্বনি !
 নব-লতিকার, সতি, দিতাম বিবাহ
 তরু-সহ; চুস্বিতাম, মঞ্জরিত যবে
 দম্পতী, মঞ্জরীবৃন্দে, আনন্দে সম্ভাষি
 নাতিনী বলিয়া সবে! গুঞ্জরিলে, অলি,
 নাতিনী-জামাই বলি বরিতাম তারে।^{২৫}
 কভু বা প্রভুর সহ ভ্রমিতাম সুখে
 নদী-তটে; দেখিতাম তরল সলিলে
 নূতন গগন যেন, নব তারাৱলী,
 নব নিশাকান্ত-কান্তি! কভু বা উঠিয়া
 পর্বত-উপরে, সখি, বসিতাম আমি
 নাথের চরণ-তলে, ব্রততী যেমতি
 বিশাল রসাল-মূলে; কত যে আদরে
 তুষিতেন প্রভু মোরে, বরষি বচন-
 সুধা, হায়, কব কারে? কব বা কেমনে?
 শুনেছি কৈলাস-পুরে কৈলাস-নিবাসী
 ব্যোমকেশ, স্বর্ণাসনে বসি গৌরী-সনে,
 আগম, পুরাণ, বেদ, পঞ্চতন্ত্র^{২৬} কথা
 পঞ্চ মুখে পঞ্চমুখ কহেন উমারে;
 শুনিতাম সেইরূপে আমিও, রূপসি,
 নানা কথা! এখনও, এ বিজন বনে,
 ভাবি আমি শুনি যেন সে মধুর বাণী!—
 সাক্ষ কি দাসীর পক্ষে, হে নিষ্ঠুর বিধি,
 সে সঙ্গীত?"—নীরবিলা আয়ত-লোচনা
 বিষাদে। কহিলা তবে সরমা সুন্দরী;
 “শুনিলে তোমার কথা, রাখব-রমণি,
 ঘৃণা জন্মে রাজ-ভোগে! ইচ্ছা করে, তাজি
 রাজ্য-সুখ, যাই চলি হেন বন-বাসে!
 কিন্তু ভেবে দেখি যদি, ভয় হয় মনে।
 রবিকর যবে, দেবি, পশে বনস্থলে
 তমোময়, নিজ গুণে আলো করে বনে
 সে কিরণ; নিশি যবে যায় কোন দেশে,
 মলিন-বদন সবে তার সমাগমে!
 যথা পদার্পণ তুমি কর, মধুমতি,
 কেন না হইবে সুখী সর্ব জন তথা,
 জগত-আনন্দ তুমি, ভুবন-মোহিনী!

কহ, দেবি, কি কৌশলে হরিল তোমারে
 রক্ষঃপতি? শুনিয়াছে বীণা-ধ্বনি দাসী,
 পিকবর-রব নব পল্লব-মাঝারে
 সরস মধুর মাসে; কিন্তু নাহি শুনি
 হেন মধুমাখা কথা কভু এ জগতে!
 দেখ চেয়ে, নীলাস্বরে শশী, যার আভা
 মলিন তোমার রূপে, পিইছেন^{২৭} হাসি
 তব বাক্য-সুধা, দেবি, দেব সুধানিধি!
 নীরব কোকিল এবে আর পাখী যত,
 শুনিবারে ও কাহিনী, কহিনু তোমারে।
 এ সবার সাধ, সাক্ষি, মিটাও কহিয়া।”

কহিলা রাখব-প্রিয়া; “এইরূপে, সখি,
 কাটাইনু কত কাল পঞ্চবটী-বনে
 সুখে। ননদিনী তব, দুষ্টা সূৰ্পণখা,
 বিষম জঞ্জাল আসি ঘটাইল শেষে!
 শরমে সরমা সই, মরি লো স্মরিলে
 তার কথা। যিক্‌ তারে। নারী-কুল-কালি।
 চাহিল মারিয়া মোরে বরিতে বাঘিনী
 রঘুবরে! ঘোর রোষে সৌমিত্রি কেশরী
 খেদাইলা দুরে তারে। আইল ধাইয়া
 রাক্ষস, তুমুল রণ বাজিল কাননে।
 সভয়ে পশিনু আমি কুটীর মাঝারে।
 কোদণ্ড-টঙ্কারে, সখি, কত যে কাঁদিনু
 কব কারে? মুদি আঁখি, কৃতাজলি-পুটে
 ডাকিনু দেবতা-কূলে রক্ষিতে রাখবে!
 আর্তনাদ, সিংহনাদ উঠিল গগনে।
 অজ্ঞান হইয়া আমি পড়িনু ভূতলে।

“কতক্ষণ এ দশায় ছিনু যে, স্বজনি,
 নাহি জানি; জাগাইলা পরশি দাসীরে
 রঘুশ্রেষ্ঠ। মৃদু স্বরে, (হায় লো, যেমতি
 স্বনে মন্দ সমীরণ কুসুম-কাননে
 বসন্তে!) কহিল কান্ত; ‘উঠ, প্রাণেশ্বরী,
 রঘুনন্দনের ধন! রঘু-রাজ-গৃহ-
 আনন্দ। এই কি শয্যা সাজে হে তোমারে,
 হেমাঙ্গি^{২৮}?’—সরমা সখি, আর কি শুনিব
 সে মধুর ধ্বনি আমি?”—সহসা পড়িলা
 মুচ্ছিত হইয়া সতী; ধরিল সরমা!

২৪. কুরঙ্গিনী—হরিনী। সখীভাবে হরিনীদের সঙ্গে আনন্দে নৃত্য করতেন। ২৫. নাতিনী-জামাইর-তামাসার পাত্র, বাল
 লীর একান্ত ঘরোয়া ভবনা। ২৬. অশ্বশাস্ত্রের পাঁচটি গ্রন্থের কথা বলা হয়েছে। নীতিকাহিনী গ্রন্থ পঞ্চতন্ত্র নয়।

২৭. পান করছেন। ২৮. হেম বা স্বর্ণের ন্যায় অসকান্তি যার।

যথা যবে ঘোর বনে নিষাদ, শুনিয়া
পাখীর ললিত গীত বৃক্ষ-শাখে, হানে
স্বর লক্ষ্য করি শর, বিবম-আঘাতে
ছটফটি পড়ে ভূমে বিহঙ্গী, তেমতি
সহসা পড়িলা সতী সরমার কোলে।

কত ক্ষণে চেতন পাইলা সুলোচনা।
কহিলা সরমা কাঁদি; “ক্ষম দোষ মম,
মৈথিলি! এ ক্রেশ আজি দিনু অকারণে,
হায়, জ্ঞানহীন আমি!” উত্তর করিলা
মুদু স্বরে সুকেশিনী রাঘব-বাসনা;—
“কি দোষ তোমার, সখি? শুন মনঃ দিয়া,
কহি পুনঃ পূর্ব-কথা। মারীচ কি ছিলে
(মরুভূমে মরীচিকা, ছলয়ে যেমতি!)
ছিলিল, শুনেছ তুমি সুপর্ণখা-মুখে।
হায় লো কুলগ্নে, সখি, মগ্ন লোভ-মদে,
মাগিনু কুরঙ্গ আমি! ধনুর্বাণ ধরি,
বাহিরিলা রঘুপতি, দেবর লক্ষ্মণে
রক্ষা-হেতু রাখি ঘরে। বিদ্যুত-আকৃতি
পলাইল মায়া-মৃগ, কানন উজলি,
বারগারি-গতি নাথ খাইলা পশ্চাতে
হারানু নয়ন-তারা আমি অভাগিনী!

সহসা শুনিনু, সখি, আর্তনাদ দুরে—
'কোথা রে লক্ষ্মণ ভাই, এ বিপত্তি-কালে?
মরি আমি!' চমকিলা সৌমিত্রি কেশরী!
চমকি ধরিয়া হাত, করিনু মিনতি;—
'যাও বীর; বায়ু-গতি পশ এ কাননে;
দেখ, কে ডাকিছে তোমা? কাঁদিয়া উঠিল
শুনি এ নিনাদ, প্রাণ! যাও ত্বর করি
বৃষি রঘুনাথ তোমা ডাকিছেন, রথি!'

“কহিলা সৌমিত্রি; ‘দেবি কেমনে পালিব
আজ্ঞা তব? একাকিনী কেমনে রহিবে
এ বিজন বনে তুমি? কত যে মায়াবী
রাক্ষস ভ্রমিছে হেথা, কে পারে কহিতে?
কাহারে ডরাও তুমি? কে পারে হিংসিতে
রঘুবংশ-অবতংসে’^{২৯} এ তিন ভুবনে,

ভৃগুরাম-গুরু বলে?—আবার শুনিনু
আর্তনাদ; ‘মরি আমি! এ বিপত্তি-কালে,
কোথা রে লক্ষ্মণ ভাই? কোথায় জানকি?’
ধৈর্য ধরিতে আর নারিনু, স্বজনি!
ছাড়ি লক্ষ্মণের হাত, কহিনু, কুক্ষণে;—
‘সুমিত্রা শাশুড়ী মোর বড় দয়াবতী;
কে বলে ধরিয়াছিল গর্ভে তিনি তোরে,
নিষ্ঠুর? পাষণ দিয়া গড়িলা বিধাতা
হিয়া তোর! ঘোর বনে নির্দয় বাঘিনী
জন্ম দিয়া পালে তোরে, বুঝিনু, দুঃস্বপ্নি’^{৩০}।
রে ভীরু, রে বীর-কুল-প্রাণি, যাব আমি,
দেখিব করুণ স্বরে কে স্মরে আমারে
দূর বনে?’ ক্রোধ-ভরে, আরক্ত-নয়নে
বীরমণি, ধরি ধনুঃ, বাঁধিয়া নিমিষে
পৃষ্ঠে তুণ, মোর পানে চাহিয়া-কহিলা;—
‘মাতৃ-সম মানি তোমা, জনক-নন্দিনি,
মাতৃ-সম! তেঁই সহি এ বৃথা গঞ্জনা!
যাই আমি! গৃহমধ্যে থাক সাবধানে।
কে জানে কি ঘটে আজি? নহে দোষ, মম;
তোমার আদেশে আমি ছাড়িনু তোমারে।’
এতক কহিয়া শূর পশিলা কাননে।

“কত যে ভাবিনু আমি বসিয়া বিরলে,
প্রিয়সখি, কহিব তা কি আর তোমারে?
বাড়িতে লাগিল বেলা; আহ্লাদে নিনাদি,
কুরঙ্গ, বিহঙ্গ-আদি মৃগ-শিশু যত,
সদাশ্রিত-ফলাহারী, করভ করভী
আসি উতরিল সবে। তা সবার মাঝে
চমকি দেখিনু যোগী, বৈশ্বানর-সম
তেজস্বী, বিভূতি অঙ্গে, কমণ্ডলু করে,
শিরে জটা। হায়, সখি, জানিতাম যদি
ফুল-রাশি মাঝে দৃষ্ট কাল-সর্প-বেশে,
বিমল সলিলে বিষ, তা হলে কি কভু
ভূমে লুটাইয়া শিরঃ নমিতাম তারে?

“কহিল মায়াবী; ‘ভিক্ষা দেহ, রঘুবধু,
(অন্নদা এ বনে তুমি!) ক্ষুধার্ত অতিথে।’

২৯. অলংকার বা গৌরব। ৩০. বিবাহের পর সস্ত্রীক অযোধ্যায় প্রত্যাবর্তন কালে পথে অস্ত্রশক্তি পরীক্ষায় রামচন্দ্র পরশুরামের দস্ত চূর্ণ করেছিলেন। সেই অর্থে রামচন্দ্র গুরু স্বরূপ।

৩১. লক্ষ্মণকে নিন্দাবাদের জন্য অনুতপ্ত সীতা অতীতকথা ব্যক্ত করছেন।

“আবরি বদন আমি ঘোমটায়, সখি,
কর-পুটে কহিনু, ‘অজিনাসনে বসি,
বিশ্রাম লভুন প্রভু তরু-মূলে; অতি-
ভুরায় আসিবে ফিরি রাঘবেন্দ্র যিনি,
সৌমিত্রি ত্রাতার সহ।’ কহিল দুশ্মতি—
(প্রতারিত রোষ** আমি নারিনু বুঝিতে)
‘ক্ষুধার্ত অতিথি আমি, কহিনু তোমারে।
দেহ ভিক্ষা; নহে কহ, যাই অন্য স্থলে।
অতিথি-সেবায় তুমি বিরত কি আজি,
জানকি? রঘুর বংশে চাহ কি ঢালিতে
এ কলঙ্ক-কালি, তুমি রঘু-বধু? কহ,
কি গৌরবে অবহেলা কর ব্রহ্ম-শাপে?
দেহ ভিক্ষা; শাপ দিয়া নহে যাই চলি।
দুরন্ত রাক্ষস এবে সীতাকান্ত-অরি
মোর শাপে।’—লজ্জা তাজি, হায় লো স্বজনি,
ভিক্ষা-দ্রব্য লয়ে আমি বাহিরিনু ভয়ে,—
না বুঝে পা দিনু ফাঁদে; অমনি ধরিল
হাসিয়া ভাসুর তব আমায় তখনি;

“একদা, বিধুবদনে, রাঘবের সাথ
অমিতেছিল কাননে; দূর গুম্ব-পাশে
চরিতেছিল হরিণী! সহসা শুনি
ঘোর নাদ; ভয়াকুলা দেখিনু চাহিয়া
ইরম্মদাকৃতি বাঘ ধরিল মূগীরে!
‘রক্ষ, নাথ,’ বলি আমি পড়ি চরণে।
শরানলে শূর-শ্রেষ্ঠ ভষ্মিলা শাদ্দলে
মুহূর্তে। যতনে তুলি বাঁচাইনু আমি
বন-সুন্দরীরে, সখি। রক্ষঃ-কুল-পতি,
সেই শাদ্দলের রূপে, ধরিল আমারে!
কিন্তু কেহ না আইল বাঁচাইতে, ধনি
এ অভাগা হরিণীরে এ বিপত্তি-কালে।
পূরিনু কানন আমি হাহাকার রবে।
শুনি ক্রন্দন-ধ্বনি; বনদেবী বুঝি
দাসীর দশায় মাতা কাতরা, কাঁদিল।
কিন্তু বৃথা সে ক্রন্দন। ছতাসন-তেজে
গলে লৌহ, বারি-ধারা দমে কি তাহারে?
অশ্রু-বিন্দু মানে কি লো কঠিন যে হিয়া।
“দূরে গেল জটাজুট; কমণ্ডলু দূরে।

রাজরথী-বেশে মুঢ় আমায় তুলিল
স্বর্ণ-রথে। কহিল যে কত দুশ্মতি,
কভু রোষে গর্জি, কভু সুমধুর স্বরে,
স্মরিলে, শরমে ইচ্ছি মরিতে, সরমা!

“চলাইল রথ রথী। কাল-সর্প-মুখে
কাঁদে যথা ভেকী, আমি কাঁদিনু, সুভগে,
বৃথা! স্বর্ণ-রথ-চক্র, ঘর্ষরি নির্ঘোবে,
পূরিল কানন-রাজী, হায়, ডুবাইয়া
অভাগীর আর্তনাদ; প্রভঞ্জন-বলে
ব্রহ্ম তরুকুল যবে নড়ে মড়মড়ে,
কে পায় শুনিতে যদি কুহরে কপোতী?
ফাঁফর হইয়া, সখি, খুলিনু সত্তরে
কঙ্কণ, বলয়, হার, সিঁথি, কণ্ঠমালা,
কুণ্ডল, নুপুর, কাঞ্চী; ছড়াইনু পথে;
ঠেঁই লো এ পোড়া দেহে নাহি, রক্ষোবধু,
আভরণ**। বৃথা তুমি গঞ্জ দশাননে।”

নীরবিলা শশিমুখী। কহিলা সরমা,—
“এখনও তৃষাতুরা এ দাসী, মৈথিলি;
দেহ সুধা-দান তারে। সফল করিলা
শ্রবণ-কুহর আজি আমার।” সুস্বরে
পুনঃ আরম্ভিলা তবে ইন্দু-নিভাননা;—

“শুনিতে লালসা যদি, শুন লো ললনে।
বৈদেহীর দুঃখ-কথা কে আর শুনিবে?—
“আনন্দে নিশাদ** যথা ধরি ফাঁদে পাখী,
যায় ঘরে, চলাইল রথ লঙ্কাপতি;
হায় লো, সে পাখী যথা কাঁদে ছটফটি
ভাঙিতে শৃঙ্খল তার, কাঁদিনু, সুন্দরি!

“‘হে আকাশ, শুনিয়াছি তুমি শব্দবহ,
(আরাধিনু মনে মনে) এ দাসীর দশা
খোর রবে কহ যথা রঘু-চূড়া-মণি,
দেবর লক্ষ্মণ মোর, ডুবন-বিজয়ী!
হে সমীর, গঙ্কবহ তুমি; দূত-পদে
বরিনু তোমায় আমি, যাও ত্বর করি
যথায় ভ্রমণ প্রভু! হে বারিদ, তুমি
ভীমনাদী ডাক নাথে গণ্ডীর নিনাদে!
হে ভ্রমর মধুলোভি, ছাড়ি ফুল-কূলে
গুঞ্জর নিকুঞ্জে, যথা রাঘবেন্দ্র বলী,

সীতার বারতা তুমি; গাও পঞ্চ স্বরে
সীতার দুঃখের গীত, তুমি মধু-সখা
কোকিল! শুনিবে প্রভু তুমি হে গাইলে!'
এইরূপে বিলাপিনু, কেহ না শুনিল।^{৭৫}

“চলিল কনক-রথ; এড়াইয়া দ্রুত
অভ্রভেদী গিরি-চূড়া, বন, নদ, নদী,
নানা দেশ। স্বনয়নে দেখেছ, সরমা,
পুষ্পকের^{৭৬} গতি তুমি; কি কাজ বর্ণিয়া?

“কত ক্ষণে সিংহনাদ শুনিব সন্মুখে
ডয়ঙ্কর! থরথরি আতঙ্কে কাঁপিল
বাজি-রাজি, স্বর্ণরথ চলিল অস্থিরে!
দেখিনু, মেলিয়া আঁখি, ভৈরব-মুরতি
গিরি-পৃষ্ঠে বীর, যেন প্রলয়ের কালে
কালমেঘ!^{৭৭} ‘চিনি তোরে,’ কহিলা গভীরে
ধীর-বর, ‘চোর তুই, লঙ্কার রাবণ।
কোন কুলবধু আজি হরিলি, দুঃখতি?
কার ঘর আঁধারিলি, নিবাহিয়া এবে
শ্রেম-দীপ? এই তোর নিত্য কৰ্ম, জানি।
অস্ত্রী-দল-অপবাদ ঘুচাইব আজি
এধি তোরে তীক্ষ্ণ শরে! আয় মুঢ়মতি!
ধিক তোরে রক্ষোবাজ! নির্লঙ্ঘ্য পামর
আছে কি রে তোর সম এ ব্রহ্ম-মণ্ডলে?’

“এতেক কহিয়া, সখি, গর্জিলা শূরেন্দ্র!
অচেতন হয়ে আমি পড়িবে স্যন্দনে!”

“পাইয়া চেতন পুনঃ দেখিবে রয়েছে
ধূতলে। গগন-মার্গে রথে রক্ষোরথী
যুঝিছে সে বীর-সঙ্গে ষ্ঠঙ্কার-নাদে।
অবলা-রসনা, ধনি, পারে কি বর্ণিতে
সে রণে? সভয়ে আমি মুদিবু নয়ন।
সামিনু দেবতা-কূলে, কাঁদিয়া কাঁদিয়া,
সে বীরের পক্ষ হয়ে নাশিতে রাক্ষসে,
অরি মোর; উদ্ধারিতে বিঘম সঙ্কটে
দাসীরে! উঠিনু ভাবি পশিব বিপিনে,
পলাইব দূর দেশে। হায় লো, পড়িনু

আছাড় খাইয়া, যেন ঘোর ভুকম্পনে!
আরাধিনু বসুধারে—‘এ বিজন দেশে,
মা আমার, হয়ে দ্বিধা, তব বক্ষঃস্থলে
লহ অভাগীরে, সাধি! কেমনে সহিছ
দুঃখিনী মেয়ের জ্বালা? এস শীঘ্র করি!
ফিরিয়া আসিবে দুষ্ট; হায়, মা, যেমতি
তঙ্কর আইসে ফিরি, ঘোর নিশাকালে,
পুঁতি যথা রত্ন-রাশি রাখে সে গোপনে,
পর-ধন! আসি মোরে তরাও, জননি!’

“বাজিল তুমুল যুদ্ধ গগনে, সুন্দরি;
কাঁপিল বসুধা; দেশ পুরিল আরবে^{৭৮}!
অচেতন হৈনু পুনঃ। শুন, লো ললনে,
মনঃ দিয়া শুন, সই, অপূর্ব কাহিনী।—
দেখিনু স্বপনে আমি বসুন্ধরা সতী
মা আমার! দাসী-পাশে আসি দয়াময়ী
কহিলা, লইয়া কোলে, সুমধুর বাণী,
‘বিধির ইচ্ছায়, বাছ, হরিছে গো তোরে
রক্ষোবাজ; তোরে হেতু সবংশে মজিবে
অধম। এ ভার আমি সহিতে না পারি,
ধরিনু গো গর্ভে তোরে লঙ্কা বিনাশিতে।
যে কক্ষণে তোর তনু হুঁইল দুঃখতি
রাবণ, জানিনু আমি, সুপ্রসন্ন বিধি
এত দিনে মোর প্রতি; আশীষিনু তোরে!
জননীর জ্বালা দূর করিলি, মৈথিলি!
ভবিতব্য-দ্বার আমি খুলি; দেখ চেয়ে।^{৭৯}”

“দেখিনু সন্মুখে, সখি, অভ্রভেদী গিরি;^{৮০}
পঞ্চ জন বীর তথা নিমগ্ন সকলে
দুঃখের সলিলে যেন! হেন কালে আসি
উতরিলা রঘুপতি লক্ষ্মণের সাথে।
বিরস-বদন নাথে হেরি, লো স্বজনি,
উতলা হইনু কত, কত যে কাঁদিবু
কি আর কহিব তার? বীর পঞ্চ জনে^{৮১}
পুঞ্জিল রাঘব-রাজে, পুঞ্জিল অনুজে।
একত্রে পশিলা সবে সুন্দর নগরে।

৭৫. সীতার এই পূর্বদৃষ্ট স্বপ্নের মধ্যে মানুষ ও প্রকৃতির সহজ সম্পর্ক ব্যক্ত হয়েছে। মূল্য রামায়ণ ও কাণ্ডদাসের জন্য শব্দভাণ্ডারেও এই চিত্র অঙ্কিত হয়েছে। ৩৬. রাবণের আকাশচরী স্বর্ণরথ। ৩৭. পক্ষীরাজ জটায়ুর কথা বলা হচ্ছে। ইনি রাজা দশরথের বন্ধু ছিলেন। ৩৮. ভীতিজনক শব্দ। ৩৯. সীতার স্বপ্নে ভবিষ্যৎ দর্শনের ডাকনা ব্যক্ত হয়েছে। প্রাচীন মহাকাব্যের এক বিশেষ রীতি। ৪০. গগন ভেদকরে উর্ধ্বমুখী যে পর্বত। এখানে ঋষামুখ পর্বতের কথা বলা হয়েছে।

৪১. পঞ্চবীর—সূত্রী, হনুমান, জাম্ববান, নল, নীল।

“মারি সে দেশের রাজা”^{৪২} তুমুল সংগ্রামে
 রঘুবীর, বসাইলা রাজ-সিংহাসনে
 শ্রেষ্ঠ যে পুরুষ-বর পঞ্চ জন মাঝে ।
 ধাইল চৌদিকে দূত; আইলা ধাইয়া
 লক্ষ লক্ষ বীর-সিংহ ঘোর কোলাহলে ।
 কাঁপিল বসুধা, সখি, বীর-পদ-ভরে !
 সভয়ে মুদিবু আঁখি । কহিলা হাসিয়া
 মা আমার, ‘কারে ভয় করিস, জানকি ?
 সাজিছে সুগ্রীব রাজা উদ্ধারিতে তোরে,
 মিত্রবর । বধিল যে শূরে তোর স্বামী,
 বালি নাম ধরে রাজা বিখ্যাত জগতে ।
 কিঙ্কিণ্ধ্যা নগর ওই । ইন্দ্র-তুল্য বলী-
 বৃন্দ^{৪৩} চেয়ে দেখে সাজে ।’ দেখিনু চাহিয়া,
 চলিছে বীরেন্দ্র-দল জল-স্রোতঃ যথা
 বরিষায়, হুহুকারি ! ঘোর মড়মড়ে
 ভাঙিল নিবিড় বন; শুধাইল নদী;
 ভয়াকুল বন-জীব পলাইল দূরে;
 পুরিল জগত, সখি, গম্ভীর নির্ধোষে ।

“উত্তরিলা সৈন্য-দল সাগরের তীরে ।

দেখিনু, সরমা সখি, ভাসিল সলিলে
 শিলা; শৃঙ্গধরে ধরি, ভীম পরাক্রমে
 উপাড়ি, ফেলিল জলে বীর শত শত ।
 বাঁধিল অপূর্ব সেতু শিল্লিকুল মিলি ।
 আপনি বারীশ পাশী, প্রভুর আদেশে,
 পরিলা শৃঙ্খল পায়ে । অলঙ্ঘ্য সাগরে
 লঙ্ঘি, বীর-মদে পার হইল কটক !
 টলিল এ স্বর্ণ-পুরী বৈরী-পদ-চাপে,
 ‘জয়, রঘুপতি, জয় !’ ধ্বনিল সকলে ।
 কাঁদিনু হরষে, সখি । সুবর্ণ-মন্দিরে
 দেখিনু সুবর্ণাসনে রক্ষঃ-কুল-পতি ।
 আছিল সে সভাতলে ধীর ধর্মসম
 বীর এক^{৪৪}; কহিল সে, ‘পূজ বধুবরে,
 বৈদেহীরে দেহ ফিরি; নতুবা মরিবে
 সবংশে !’ সংসার-মদে মত্ত রাঘবারি,
 পদাঘাত করি তারে কহিল কুবাণী ।
 অভিমানে গেলা চলি সে বীর-কুঞ্জর
 যথা প্রাণনাথ মোর ।”—কহিল সরমা,
 “হে দেবি, তোমার দুঃখে কত যে দুঃখিত
 রক্ষোবাজানুজ বলী, কি আর কহিব ?

দুজনে আমরা, সতি, কত যে কেঁদেছি
 ভাবিয়া তোমার কথা, কে পারে কহিতে ?”
 “জানি আমি,” উত্তরিলা মেথিলী রূপসী,
 “জানি আমি বিভীষণ উপকারী মম
 পরম । সরমা সখি, তুমিও তেমনি !
 আছে যে বাঁচিয়া হেথা অভাগিনী সীতা,
 সে কেবল, দয়াবতি, তব দয়া-গুণে !
 কিন্তু কহি, শুন মোর অপূর্ব স্বপন;

“সাজিল রাক্ষস-বৃন্দ যুঝবার আশে ;
 বাজিল রাক্ষস-বাদ্য; উঠিল গগনে
 নিনাদ । কাঁপিনু, সখি, দেখি বীর-দলে,
 তেজে হুতাশন-সম, বিক্রমে কেশরী ।
 কত যে হইল রণ, কহিব কেমনে ।
 বহিল শোণিত-নদী ! পর্বত-আকারে
 দেখিনু শবের রাশি, মহাভয়ঙ্কর ।
 আইল কবন্ধ^{৪৫}, ভূত, পিশাচ, দানব,
 শকুনি, গৃধ্রী আদি যত মাংসাহারী
 বিহঙ্গম; পালে পালে শৃগাল; আইল
 অসংখ্য কুক্কুর । লঙ্কা পুরিল ভৈরবে ।

“দেখিনু কবর্কুর-নাথে পুনঃ সভাতলে,
 মলিন বদন এবে, অশ্রময় আঁখি,
 শোকাকুল ! ঘোর রণে রাঘব-বিক্রমে
 লাঘব-গরব, সই ! কহিল বিষাদে
 রক্ষোবাজ, ‘হায়, বিধি, এই কি রে ছিল
 তোর মনে ? যাও সবে, জাগাও যতনে
 শূলী-শঙ্খ-সম ভাই কুম্ভকর্ণে মম ।
 কে রক্ষিবে রক্ষঃ-কুলে সে যদি না পারে ?
 ধাইল রাক্ষস-দল ; বাজিল বাজনা
 ঘোর রোলে ; নারী-দল ; দিল হ্লাহলি ।
 বিরাট-মুরতি-ধর পশিল কটকে
 রক্ষোবধী^{৪৬} । প্রভু মোর, তীক্ষ্ণতর শরে,
 (হেন বিচক্ষণ শিক্ষা কার লো জগতে ?)
 কাটিলা তাহার শির ! মরিল অকালে
 জাগি সে দুরন্ত শুর । জয় রাম ধ্বনি
 শুনিবু হরষে, সই ! কাঁদিলা রাবণ !
 কাঁদিল কনক-লঙ্কা হাহাকার রবে !

“চঞ্চল হইবু, সখি, শুনিয়া চৌদিকে
 জন্দন ! কহিনু মায়ে, ধরি পা দুখানি,
 ‘রক্ষঃ-কুল-দুঃখে বুক ফাটে মা, আমার !

৪২. কিঙ্কিণ্যর রাজা বালি । ৪৩. বলশালী বীরগণ । ৪৪. বিভীষণের প্রসঙ্গ । ৪৫. মুণ্ডহীন দেহ বিশিষ্ট এবং মুখ বুকের
 মধ্যে এমন আকৃতি বিশিষ্ট রাক্ষস । ৪৬. কুম্ভকর্ণের প্রসঙ্গ ।

পরে কাতর দেখি সতত কাতরা
এ দাসী; ক্ষম, মা, মোরে।' হাসিয়া কহিলা
বসুধা, 'লো রঘুবধু, সত্য যা দেখিলি!
শুভকর করি লক্ষ্য দণ্ডিবে রাবণে
পতি তোর। দেখ পুনঃ নয়ন মেলিয়া।'

“দেখিনু, সরমা সখি, সুর-বালা-দলে,
নানা আবরণ হাতে, মন্দারের মালা,
পট্টবস্ত্র। হাসি তারা বেড়িল আমারে।
কেহ কহে, 'উঠ, সতি, হত এত দিনে
দুরন্ত রাবণ রণে!' কেহ কহে, 'উঠ,
গঘনন্দনের ধন, উঠ, ত্বরা করি,
অবগাহ দেহ, দেবি, সুবাসিত জলে,
পর নানা আভরণ। দেবেন্দ্রাণী শচী
দিবেন সীতায় দান আজি সীতানাথে।'

“কহিনু, সরমা সখি, করপুটে আমি ;
'কি কাজ, হে সুরবালা, এ বেশ ভূষণে
দাসীরে? যাইব আমি যথা কান্ত মম,
এ দশায়, দেহ আজ্ঞা; কাঙ্গালিনী সীতা,
কাঙ্গালিনী-বেশে তারে দেখুন নৃমণি।'
“উত্তরিল সুরবালা; 'শুন লো মৈথিলি!
সমল খনির গর্ভে মণি; কিন্তু তারে
পরিষ্কারি রাজ-হস্তে দান করে দাতা!'

“কাঁদিয়া, হাসিয়া, সই, সাজিনু সত্বরে।
হেরিনু অদূরে নাথে, হায় লো, যেমতি
কনক-উদয়াচলে দেব অংশুমালী!
পাগলিনী প্রায় আমি ধাইনু ধরিতে
পদযুগ, সুবদনে! জাগিনু অমনি!
সহসা, স্বজন, যথা নিবিলে দেউটি,
ঘোর অন্ধকার ঘর; ঘটিল সে দশা
আমার, আধার বিশ্ব দেখিনু চৌদিকে!
হে বিধি, কেন না আমি মরিনু তখনি?
কি সাথে এ পোড়া প্রাণ রহিল এ দেহে?”
নীরাবিলা বিধুমুখী, নীরবে যেমতি
শৈলী, ছিড়ে তার যদি। কাঁদিয়া সরমা
(এক্ষণে-কুল-রাজ-লক্ষ্মী রক্ষোবধু-রূপে)
কহিলা; “পাইবে নাথে, জনক-নন্দিনি!
সত্য এ স্বপন তব, কহিনু তোমারে।
ভাসিছে সলিলে শিলা, পড়েছে সংগ্রামে
দেব-দৈত্য-নর-ত্রাস কুম্ভকর্ণ বলী;
সেবিচ্ছেন বিভীষণ জিঘৃষে রঘুনাথে

লক্ষ লক্ষ বীর সহ। মরিবে পৌলস্ত্য^{৪৭}
যথোচিত শাস্তি পাই^{৪৮}; মজিবে দুশ্মতি
সবংশে। এখন কহ, কি ঘটিল পরে।
অসীম লালসা মোর শুনিতে কাহিনী।”
আরঞ্জিলা পুনঃ সতী সুমধুর স্বরে;
“মিলি আখি, শশিমুখি, দেখিনু সম্মুখে
রাবণে; ভূতলে, হায়, সে বীর-কেশরী,
তুঙ্গ শৈল-শৃঙ্গ যেন চূর্ণ বজ্রাঘাতে!

“কহিল রাঘব-রিপু; ইন্দীবর আখি
উন্মীলি, দেখ লো চেয়ে, ইন্দু-নিভাননে,
রাবণের পরাক্রম! জগত-বিখ্যাত
জটায়ু হীনায়ু আজি মোর ভুজ-বলে!
নিজ দোষে মরে মুঢ় গরুড়-নন্দন
কে কহিল মোর সাথে যুক্তিতে বর্করে?”

“ধর্ম-কর্ম সাধিবারে মরিনু সংগ্রামে,
রাবণ; কহিলা শুর অতি মৃদু স্বরে
'সম্মুখে সমরে পড়ি যাই দেবালয়ে।
কি দশা ঘটবে তোর, দেখ রে ভাবিয়া?
শৃগাল হইয়া, লোভি, লোভিলি সিংহীরে!
কে তোরে রক্ষিবে, রক্ষণে? পড়িলি সঙ্কটে,
লক্ষ্যনাথ, করি চুরি এ নারী-রতনে।'

“এতেক কহিয়া বীর নীরব হইলা!
তুলিল আমায় পুনঃ রথে লক্ষ্যপতি।
কৃতাজলি-পুটে কাঁদি কহিনু, স্বজন,
বীরবরে; 'সীতা নাম, জনক-দুহিতা,
রঘুবধু দাসী, দেব! শন্য ঘরে পেয়ে
আমায়, হরিছে পাপী; কহিও এ কথা
দেখা যদি হয়, প্রভু, রাঘবের সাথে।'

“উঠিল গগনে রথ গন্তীর নিষোধে।
শুনিনু ভৈরব রব; দেখিনু সম্মুখে
সাগর নীলোন্মির্ময়^{৪৯}! বহিছে কল্পোলে
অতল, অকুল জল, অবিরাম-গতি।
ঝাঁপ দিয়া জলে, সখি, চাহিনু ডুবিতে;
নিবারিল দুষ্ট মোরে! ডাকিনু বারীশে,
জলচরে মনে মনে, কেহ না শুনিল,
অবহেলি অভাগীরে! অনন্বর-পথে
চলিল কনক-রথ মনোরথ-গতি।

“অবিলম্বে লক্ষ্যপুরী শোভিল সম্মুখে।
সাগরের ভালে, সখি, এ কনক-পুরী
রঞ্জনের রেখা! কিন্তু কারাগার যদি

সুবর্ণ-গঠিত, তবু বন্দীর নয়নে
কমনীয় কভু কি লো শোভে তার আভা?
সুবর্ণ-পিঞ্জর বলি হয় কি লো সুখী
সে পিঞ্জরে বন্ধ পাখী? দুঃখিনী সতত
যে পিঞ্জরে রাখ তুমি কুঞ্জ-বিহারিণী!
কুক্ষণে জনম মম, সরমা সুন্দরি!
কে কবে শুনেছে, সখি কহ, হেন কথা?
রাজার নন্দিনী আমি, রাজ-কুল-বধু,
তবু বন্ধ কারাগারে!”—কাঁদালা রূপসী
সরমার গলা ধরি; কাঁদালা সরমা।

কত ক্ষণে চক্ষুঃজল মুছি সুলোচনা
সরমা কহিলা; “দেবি, কে পারে খণ্ডিতে
বিধির নিব্বন্ধ? কিন্তু সত্য যা কহিলা
বসুধা। বিধির ইচ্ছা, তেঁই লক্ষ্যপতি
আনিয়াছে হরি তোমা! সবংশে মরিবে
দুষ্টমতি! বীর আর কে আছে এ পুরে
বীরযোনি? কোথা, সতি, ত্রিভুবন-জয়ী
যোধ যত? দেখ চেয়ে, সাগরের কূলে,
শবাহারী জন্তু-পুঞ্জ ভুঞ্জিছে উল্লাসে
শব-রাশি! কান দিয়া শুন, ঘরে ঘরে
কাঁদিছে বিধবা বধু! আশু পোহাইবে
এ দুঃখ-শকরী তব! ফলিবে, কহিনু,
স্বপ্ন! বিদ্যাধরী-দল মন্দারের দামে
ও বরাদ্দ রঙ্গ আসি আশু সাজাইবে!
ভেটিবে রাঘবে তুমি, বসুধা কামিনী
সরস বসন্তে যথা ভেটেন মধুরে!
ভুলো না দাসীরে, সাধি! যত দিন বাঁচি,
এ মনোমন্দিরে রাখি, আনন্দে পূজিব
ও প্রতিমা, নিত্য যথা, আইলে রজনী,
সরসী হরবে পূজে কৌমুদিনী-ধনে।

বহু ক্লেশ, সুকেশিনি, পাইলে এ দেশে।
কিন্তু নহে দোষী দাসী!” কহিলা সুস্বরে
মৈথিলী; “সরমা সখি, মম হিতৈষণী
তোমা সম আর কি লো আছে এ জগতে?
মরুভূমে প্রবাহিণী মোর পক্ষে তুমি,
রক্ষোবধু! সুশীতল ছায়া-রূপ ধরি,
তপন-তাপিত আমি, জুড়ালে আমারে!
মুষ্টিমতী দয়া তুমি এ নির্দয় দেশে!
এ পঙ্কিল জলে পদ্ম! ভুজঙ্গিনী-রূপী
এ কাল কনক-লঙ্কা-শিরে শিরোমণি!
আর কি কহিব, সখি? কাঙ্গালিনী সীতা,
তুমি লো মহাহাঁহু! রত্ন! দরিদ্র, পাইলে
রতন, কভু কি তারে অযতনে, ধনি?”

নমিয়া সতীর পদে, কহিলা সরমা;
“বিদায় দাসীরে এবে দেহ, দয়াময়ি!
না চাহে পরাণ মম ছাড়িতে তোমারে,
রঘু-কুল-কমলিনি! কিন্তু প্রাণপতি
আমার, রাঘব-দাস; তোমার চরণে
আসি কথা কই আমি, এ কথা শুনিলে
রুধিবে লঙ্কার নাথ, পড়িব সঙ্কটে!”^{১২}

কহিলা মৈথিলী; “সখি, যাও ত্বর করি,
নিজালয়ে; শুনি আমি দূর পদ-ধ্বনি;
ফিরি বুঝি চেড়ীদল আসিছে এ বনে।”
আতঙ্কে কুরঙ্গী যথা, গেলা দ্রুতগামী
সরমা; রহিলা দেবী সে বিজন বনে,
একটি কুসুম মাত্র অরণ্যে যেমতি।

ইতি শ্রীমেঘনাদবধে কাব্যে অশোকবনং নাম
চতুর্থঃ সর্গঃ

পঞ্চম সর্গ

হাসে নিশি তারাময়ী ত্রিদশ-আলয়ে।
কিন্তু চিন্তাকুল এবে বৈজয়ন্ত-ধামে
মহেন্দ্রে; কুসুম-শয্যা তাজি, মৌন-ভাবে
বসেন ত্রিদিব-পতি রত্ন-সিংহাসনে;—

সুবর্ণ-মন্দিরে সুপ্ত আর দেব যত।^১
অভিমানে স্বরীশ্বরী কহিলা সুস্বরে;
“কি দোষে, সুরেশ, দাসী দোষী তব পদে?
শয়ন-আগারে তবে কেন না করিছ

৫০. বীর সন্তানের জন্ম দিতে পারে এমন। ৫১. অতি মূল্যবান। ৫২. বিতীষণপত্নী সরমা রাঘব কর্তৃক সীতার
রক্ষণাবেক্ষণে নিযুক্ত ছিলেন।

১. স্বর্গ ও দেবমণ্ডলীর কবিকল্পনায় লৌকিক প্রভাব লক্ষণীয়।

পদার্পণ? চেয়ে দেখ, ক্ষণেক মুদিছে,
উন্মীলিছে পুনঃ আঁখি, চমকি তরাসে
মেনকা, উর্বশী, দেখ, স্পন্দ-হীন যেন!
চিত্র-পুস্তলিকা-সম চারু চিত্রলেখা!
তব ডরে ডরি দেবী বিরাম-দায়িনী
নিদ্রা নাহি যান, নাথ, তোমার সমীপে,
আর কারে ভয় তার? এ ঘোর নিশীথে,
কে কোথা জাগিছে, বল? দৈত্য-দল আসি
বসেছে কি থানা দিয়া স্বর্গের দুয়ারে?”

উত্তরিলে অসুরারি; “ভাবিতেছি, দেবি,
কেমনে লক্ষ্মণ শূর নাশিবে রাক্ষসে?
অজ্জয় জগতে, সতি, বীরেন্দ্র রাবণি।”

“পাইয়াছ অস্ত্র কাস্ত;” কহিলা পৌলোমী
অনন্ত-যৌবনা, “যাহে বধিলা তারকে
মহাশূর তরকারি; তব ভাগ্য-বলে,
তব পক্ষ বিরূপাক্ষ; আপনি পার্বতী,
দাসীর সাধনে সাক্ষী কহিলা, সুসিদ্ধ
হবে মনোরথ কালি; মায়া দেবীশ্বরী
বধের বিধান কহি দিবেন আপনি;
তবে এ ভাবনা, নাথ, কহ কি কারণে?”

উত্তরিলে দৈত্য-রিপু; “সত্য যা কহিলে,
দেবেন্দ্রাগি; প্রেরিয়াছি অস্ত্র লঙ্কাপুরে;
কিন্তু কি কৌশলে মায়া রক্ষিবে লক্ষ্মণে
রক্ষোযুদ্ধে, বিশালাক্ষি,^২ না পারি বুঝিতে।
জানি আমি মহাবলী সুমিত্রা-নন্দন;
কিন্তু দস্তী কবে, দেবি, আঁটে মৃগরাজে?
দন্তোলি-নিঘোষি আমি শুনি, সুবদনে;
মেঘের ঘর্ঘর ঘোর; দেখি ইরশ্বদে;
বিমানে আমার সদা বলে সৌদামিনী;
তবু খরথরি হিয়া কাঁপে, দেবি, যবে
নাদে রুঘি মেঘনাদ, ছাড়ে ছুঙ্কারে
অগ্নিময় শর-জাল বসাইয়া চাপে
মহেশ্বাস; ঐরাবত অস্থির আপনি
তার ভীম প্রহরণে!” বিধাদে নিশ্বাসি
নীরবিলা সুরনাথ; নিশ্বাসি বিধাদে
(পতি-খেদে সতী-প্রাণ কাঁদে রে সতত!)
বসিলা ত্রিদিব-দেবী দেবেন্দ্রের পাশে।

উর্বশী, মেনকা, রক্তা, চারু চিত্রলেখা
দাঁড়াইলা চারি দিকে; সরসে যেমতি
সুধাকর-কর-রাশি বেড়ে নিশাকালে
নীরবে মুদিত পন্থে। কিম্বা দীপাবলী
অশিকার পীঠতলে শারদ-পার্বণে,
হর্ষে মগ্ন বঙ্গ যবে পাইয়া মায়েরে
চির-বাঙ্গা! মৌনভাবে বসিলা দম্পতী;
হেন কালে মায়া-দেবী উতরিলা তথা।
রতন-সম্ভবা বিভা দ্বিগুণ বাড়িল
দেবালয়ে; বাড়ে যথা রবি-কর-জালে
মন্দার-কাঞ্চন-কান্তি^৩ নন্দন-কাননে^৪!

সসম্ভ্রমে প্রণমিলা দেব দেবী দৌহে
পাদপদ্মে। স্বর্ণাসনে বসিলা আশীষি
মায়া। কৃতাজ্জলি-পুটে সুর-কুল-নিধি
সুধিলা, “কি ইচ্ছা, মাতঃ, কহ এ দাসেরে?”

উত্তরিলে মায়াময়ী; “যাই, আদিতেয়,^৫
লঙ্কাপুরে; মনোরথ তোমার পূরিব;
রক্ষঃকুল-চূড়ামণি চূর্ণিব কৌশলে
আজি। চাহি দেখ ওই পোহাইছে নিশি।
অবিলম্বে, পুরন্দর,^৬ ভবানন্দময়ী
উষা দেখা দিবে হাসি উদয়-শিখরে;
লঙ্কার পঙ্কজ-রবি যাবে অস্তাচলে!
নিকুন্ডিলা যজ্ঞাগারে লইব লক্ষ্মণে,
অসুরারি। মায়া-জালে বেড়িব রাক্ষসে।
নিরস্ত্র, দুর্বল বলী দৈব-অস্ত্রাঘাতে,
অসহায় (সিংহ যেন আমায়^৭ মাঝারে)
মরিবে—বিধির বিধি কে পারে লঙ্ঘিতে?
মরিবে রাবণি রণে; কিন্তু এ বারতা
পাবে যবে রক্ষঃ-পতি কেমনে রক্ষিবে
তুমি রামানুজে, রামে, ধীর বিভীষণে
রঘু-মিত্র? পুত্র-শোকে বিকল দেবেন্দ্র,
পশিবে সমরে শূর কৃতাস্ত-সদৃশ
ভীমবাহু! কার সাধ্য বিমুখিবে তারে?—
ভাবি দেখ, সুরনাথ, কহিনু যে কথা।”

উত্তরিলে শচীকান্ত নমুচিসুদন^৮;—
“পড়ে যদি মেঘনাদ সৌমিত্রির শরে
মহামায়া, সুর-সৈন্য সহ কালি আমি

২. বিশাল বা দীর্ঘ যার চোখ। ৩. পারিজাত ফুলের মত স্বর্ণবর্ণ। ৪. স্বর্গের উপকন। ৫. দেবগণ আদিতির পুত্র। এখানে বিশেষ ভাবে ইন্দ্রকে বোঝানো হয়েছে। ৬. ইন্দ্র। ৭. যঁদ। ৮. ইন্দ্র কর্তৃক দৈত্য নমুচি হত্যার পৌরাণিক প্রসঙ্গ।

রক্ষিব লক্ষ্মণে পশি রাক্ষস-সংগ্রামে ।
না ডরি রাবণে, দেবি, তোমার প্রসাদে !
মার তুমি আগে, মাতঃ মায়া-জাল পাতি,
কৰ্ব্বুর-কুলের গৰ্ব্ব, দুৰ্ম্মদ সংগ্রামে
রাবণি ! রাখবচন্দ্র দেব-কুল-প্রিয়;
সমরিবে প্রাণপণে অমর, জননি,
তার জন্যে । যাব আমি আপনি ভূতলে
কালি, দ্রুত ইরম্মদে দক্ষিব কৰ্ব্বুরে ।”

“উচিত এ কৰ্ম্ম তব, অদিতি-নন্দন
বজ্রি !” কহিলেন মায়া, “পাইনু পিরীতি
তব বাক্যে, সুরশ্রেষ্ঠ ! অনুমতি দেহ,
যাই আমি লক্ষাধামে !” এতেক কহিয়া,
চলি গেলা শঙ্কীশ্বরী আশীষী দৌহারে ।—
দেবেশ্বের পরে নিদ্রা প্রণমিলা আসি ।

ইন্দ্রাণীর কর-পদ্ম ধরিয়া কৌতুকে
প্রবেশিলা মহা-ইন্দ্র শয়ন-মন্দিরে—
সুখালয় ! চিত্রলেখা, উৰ্ব্বশী, মেনকা,
রস্তা, নিজ গৃহে সবে পশিলা সত্বরে ।
খুলিলা নুপুর, কাঞ্চী, কঙ্কণ, কিঙ্কণী
আর যত আভরণ; খুলিলা কাঁচলি;
শুইলা ফুল-শয়নে সৌর-কর-রাশি-
রূপিণী সুর-সুন্দরী । সুস্বনে বহিল
পরিমলময় বায়ু, কভু ইন্দু-নিভাননে
কভু উচ্চ কুচে, কভু বা অলকে
করি কেলি, মন্ত যথা মধুকর, যবে
প্রফুল্লিত ফুলে অলি পায় বন-স্থলে !

স্বর্গের কনক-দ্বারে উতরিলা মায়া
মহাদেবী; সূনিদাদে আপনি খুলিল
হৈম দ্বার । বাহিরিয়া বিমোহিনী,
স্বপন-দেবীরে স্মরি, কহিলা সুস্বরে;—

“যাও তুমি লক্ষাধামে, যথায় বিরাজে
শিবিরে সৌমিত্রি শূর । সুমিত্রার বেশে
বসি শিরোদেশে তার,” কহিও, রঙ্গিণি,
এই কথা; উঠ বৎস, পোহাইল রাতি ।
লঙ্কার উত্তর দ্বারে বনরাজী মাঝে
শোভে সরঃ কূলে তার চণ্ডীর দেউল
স্বর্ণময়; স্নান করি সেই সরোবরে,
তুলিয়া বিবিধ ফুল, পূজ ভক্তি-ভাবে
দানব-দমনী মায়ে । তাঁহার প্রসাদে,

বিনাশিবে অনায়াসে দুৰ্ম্মদ রাক্ষসে,
যশস্বি ! একাকী, বৎস, যাইও সে বনে ।’
অবিলম্বে স্বপ্ন-দেবি, যাও লক্ষাপুরে;
দেখ, পোহাইছে রাতি, বিলম্ব না সহে ।”

চলি গেলা স্বপ্ন-দেবি; নীল নভঃ-স্থল
উজলি, খসিয়া যেন পড়িল ভূতলে
তারা ! ত্বরা উরি যথা শিবির মাঝারে
বিরাজেন রামানুজ, সুমিত্রার বেশে
বসি শিরোদেশে তাঁর, কহিলা সুস্বরে
কুহকিনী; “উঠ, বৎস, পোহাইল রাতি ।
লঙ্কার উত্তর দ্বারে বনরাজী মাঝে
শোভে সরঃ কূলে তার চণ্ডীর দেউল
স্বর্ণময়; স্নান করি সেই সরোবরে,
তুলিয়া বিবিধ ফুল, পূজ ভক্তি-ভাবে
দানব-দমনী মায়ে । তাঁহার প্রসাদে,
বিনাশিবে অনায়াসে দুৰ্ম্মদ রাক্ষসে,
যশস্বি ! একাকী, বৎস, যাইও সে বনে ।”

চমকি উঠিয়া বলী চাহিলা চৌদিকে !
হায় রে, নয়ন-জলে ভিজিল অমনি
বক্ষঃস্থল ! “হে জননি,” কহিলা বিষাদে
বীরেন্দ্র, “দাসের প্রতি কেন বাম এত
তুমি ? দেহ দেখা পুনঃ পূজি পা দুখানি;
পুরাই মনের সাধ লয়ে পদ-ধূলি,
মা আমার ! যবে আমি বিদায় হইনু
কত যে কাঁদিলে তুমি, স্মরিলে বিদরে
হৃদয় ! আর কি, দেবি, এ বৃথা জনমে
হেরিব চরণ-যুগ ?” মুছি অশ্রু-ধারা
চলিলা বীর-কুঞ্জর কুঞ্জর-গমনে
যথা বিরাজেন প্রভু রঘু-কুল-রাজা ।

কহিলা অনুজ, নমি অগ্রজের পদে—
“দেখিনু অদ্ভুত স্বপ্ন, রঘু-কুল-পতি ।
শিরোদেশে বসি মোর সুমিত্রা জননী
কহিলেন ; উঠ, বৎস, পোহাইল রাতি ।
লঙ্কার উত্তর দ্বারে বনরাজী মাঝে
শোভে সরঃ কূলে তার চণ্ডীর দেউল
স্বর্ণময়; স্নান করি সেই সরোবরে,
তুলিয়া বিবিধ ফুল, পূজ ভক্তি-ভাবে
দানব-দমনী মায়ে । তাঁহার প্রসাদে,
বিনাশিবে অনায়াসে দুৰ্ম্মদ রাক্ষসে,

যশস্বি! একাকী, বৎস, যাইও সে বনে।
এতেক कहিয়া মাতা অদৃশ্য হইলা।
কাঁদিয়া ডাকিনু আমি, কিন্তু না পাইনু
উত্তর কি আঞ্জা তব, কহ, রঘুমণি?

জিজ্ঞাসিলা বিভীষণে বৈদেহী-বিলাসী;—
“কি কহ, হে মিত্রবর, তুমি? রক্ষঃপুরে
রাঘব-রক্ষণ তুমি বিদিত জগতে।”

উত্তরিলা রক্ষঃশ্রেষ্ঠ; “আছে সে কাননে
চণ্ডীর দেউল, দেব, সরোবর-কূলে।
আপনি রাক্ষস-নাথ পূজেন সতীারে
সে উদ্যানে; আর কেহ নাহি যায় কভু
ভয়ে ভয়ঙ্কর স্থল! শুনেছি দুয়ারে
আপনি ভ্রমেন শব্দু—ভীম-শূল-পাণি!
যে পূজে মায়েরে সেথা জয়ী সে জগতে!
আর কি কহিব আমি? সাহসে যদ্যপি
প্রবেশ করিতে বনে পারেন সৌমিত্রি,
সফল, হে মহারথি, মনোরথ তব!”

“রাঘবের আঞ্জাবর্তী, রক্ষঃ-কুলোত্তম,
এ দাস”; কহিলা বলী লক্ষ্মণ, “যদ্যপি
পাই আঞ্জা, অনায়াসে পশিব কাননে!
কে রোধিবে গতি মোর?” সুমধুর স্বরে
কহিলা রাঘবেশ্বর, “কত যে সয়েছ
মোর হেতু তুমি, বৎস, সে কথা স্মরিলে
না চাহে পরাণ মোর আর আয়াসিতে”
তোমায়া! কিন্তু কি করি। কেমনে লাঙিঘব
দৈবের নিব্বন্ধ, ভাই? যাও সাবধানে,—
ধর্ম-বলে মহাবলী! আয়সী^{১১} সদৃশ
দেবকুল-আনুকূল্য রক্ষুক তোমারে!”

প্রণমি রাঘব-পদে, বন্দি বিভীষণে
সৌমিত্রি, কৃপাণ করে, যাত্রা করি বলী
নির্ভয়ে উত্তর দ্বারে চলিলা সত্বরে। জাগিছে
সুগ্রীব মিত্র বীতিহোত্র^{১২}—রূপী
বীর-বল-দলে তথা। শুনি পদধ্বনি,
গভীরে কহিলা শুর; “কে তুমি? কি হেতু
ঘোর নিশাকালে হেথা? কহ শীঘ্র করি,
বাঁচিতে বাসনা যদি! নতুবা মারিব
শিলাঘাতে চূর্ণি শিরঃ!” উত্তরিলা হাসি
রামানুজ “রক্ষাবংশে ধ্বংস, বীরমণি!
রাঘবের দাস আমি।” আশু অগ্রসরি

সুগ্রীব বন্দিলা সখা বীরেন্দ্র লক্ষ্মণে।
মধুর সন্তাষে তুমি কিঙ্কিন্ধ্যা-পতিরে,
চলিলা উত্তর মুখে উশ্মিলা-বিলাসী।

কত ক্ষণে উত্তরিয়া উদ্যান-দুয়ারে
ভীম-বাহু, সবিষ্ময়ে দেখিলা অদূরে
ভীষণ-দর্শন-মূর্তি! দীপিছে ললাটে
শশিকলা, মহোরগ-ললাটে যেমতি
মণি। জটাটুট শিরে, তাহার মাঝারে
জাহ্নবীর ফেন-লেখা, শারদ নিশাতে
কৌমুদীর রজোরেখা মেঘমুখে যেন!
বিভূতি-ভূষিত অঙ্গ; শাল-বৃক্ষ-সম
ত্রিশূল দক্ষিণ করে! চিনিলা সৌমিত্রি
ভূতনাথে। নিষ্কোষিয়া তেজস্কর অসি
কহিলা বীর-কেশরী; “দশরথ রথী,
রঘুজ-অজ-অঙ্গজ,^{১৩} বিখ্যাত ভুবনে,
তাঁহার তনয় দাস নমে তব পদে,
চন্দ্রচূড়! ছাড় পথ; পূজিব চণ্ডীরে
প্রবেশি কাননে; নহে দেহ রণ দাসে!
সতত অধর্ম কর্মে রত লঙ্কাপতি;
তবে যদি ইচ্ছ রণ, তার পক্ষ হয়ে,
বিরূপাক্ষ, দেহ রণ বিলম্ব না সহে!
ধর্মে সাক্ষী মানি আমি আহানি তোমারে;—
সত্য যদি ধর্ম, তবে অবশ্য জিনিব!”

যথা শুনি বজ্র-নাদ, উত্তরে হুঙ্কারি
গিরিরাজ, বৃষধ্বজ কহিলা গভীরে!
“বাখানি সাহস তোর, শুর-চূড়া-মণি
লক্ষ্মণ! কেমনে আমি যুঝি তোর সাথে!
প্রসন্ন প্রসন্নময়ী আজি তোর প্রতি,
ভাগ্যধর!” ছাড়ি দিলা দুয়ার দুয়ারী
কপর্দী; কানন মাঝে পশিলা সৌমিত্রি।

ঘোর সিংহনাদ বীর শুনিলা চমকি।
কাঁপিল নিবিড় বন মড় মড় রবে
চৌদিকে! আইল ধাই রক্ত-বর্ণ-আঁধি
হর্যাক্ষ, আশ্ফালি পুছে, দন্ত কড়মড়ি।
জয় রাম নাদে রথী উলঙ্গিলা অসি।^{১৪}
পলাইল মায়া-সিংহ, হুতাশন-তেজে
তমঃ যথা। ধীরে ধীরে চলিলা নির্ভয়ে
ধীমান্। সহসা মেঘ আবরিল চাঁদে
নির্ঘোষে! বহিল বায়ু হুঙ্কার স্বনে!

১১. ক্রেশ দিতে।

১২. লৌহর্ম। ১৩. অয়ি। ১৪. রাজা দশরথের পরিচয়। রঘুর পুত্র অজ, তার পুত্র দশরথ। ১৫. তলোয়ার।

চকমকি ক্ষণপ্রভাশোভিল আকাশে,
 দ্বিগুণ আঁধারি দেশ ক্ষণ-প্রভা-দানে !
 কড় কড় কড়ে বজ্র পড়িল ভূতলে
 মুহূর্মুহুঃ ! বাহু-বলে উপাড়িলা তরু
 প্রভঞ্জন ! দাবানল পশিল কাননে !
 কাঁপিল কনক-লঙ্কা, গর্জিল জলধি
 দূরে, লক্ষ লক্ষ শঙ্খ রণক্ষেত্রে যথা
 কোদণ্ড-টঙ্কার সহ মিশিয়া ঘর্ঘরে ।

অটল অচল যথা দাঁড়াইলা বলী
 সে রৌরবে !^{১৬} আচম্বিতে নিবিল দাবান্নি;
 থামিল তুমুল ঝড়; দেখা দিলা পুনঃ
 তারাকান্ত; তারাদল শোভিল গগনে !
 কুসুম-কুন্তলা মহী হাসিলা কৌতুকে ।
 ছুটিল সৌরভ; মন্দ সমীর স্বনিলা ।

সবিস্ময়ে ধীরে ধীরে চলিলা সুমতি ।
 সহসা পুরিল বন মধুর নিষ্কণে !
 বাজিল বাঁশরী, বীণা, মৃদঙ্গ, মন্দিরা,
 সপ্তস্বর; উথলিল সে রবের সহ
 স্ত্রী-কণ্ঠ-সম্ভব রব, চিত্ত বিমোহিয়া !

দেখিলা সম্মুখে বলী, কুসুম-কাননে
 বামাদল, তারাদল ভূপতিত যেন !
 কেহ অবগাহে দেহ স্বচ্ছ সরোবরে,
 কৌমুদী নিশীথে যথা ! দুকূল, কাঁচলি
 শোভে কূলে, অবয়ব বিমল সলিলে
 মানস-সরসে, মরি স্বর্ণপদ্ম যথা !
 কেহ তুলে পুষ্পরাশি; অলঙ্কারে কেহ
 অলক, কাম-নিগড় ! কেহ ধরে করে
 দ্বিরদ-রদ-নির্মিত, মুকুতা-খচিত
 কোলস্বক^{১৭}; ঝকঝকে হৈম তার তাহে,
 সঙ্গীত-রসের ধাম ! কেহ বা নাচিছে
 সুখময়ী; কুচযুগ পীবর মাঝারে
 দুলিছে রতন-মালা, চরণে বাজিছে
 নুপুর, নিতম্ব-বিশ্বে ঝগিছে^{১৮} রশনা^{১৯} !
 মরে নর কাল-ফণী-নশ্বর-দংশনে;—
 কিন্তু এ সবার পৃষ্ঠে দুলিছে যে ফণী
 মণিময়, হেরি তারে কাম-বিবে জ্বলে
 পরাণ ! হেরিলে ফণী পলায় তরাসে
 যার দৃষ্টি-পথে পড়ে কৃতান্তের দূত;
 হায় রে, এ ফণী হেরি কে না চাহে এরে

বাঁধিতে গলায়, শিরে, উমাকান্ত যথা,
 ভুজঙ্গ-ভূষণ শুলী ? গাইছে জাগিয়া
 তরুশাখে মধুসখা^{২০}; খেলিছে অদূরে
 জলযন্ত্র^{২১}; সমীরণ বহিছে কৌতুকে
 পরিমল-ধন লুটি কুসুম-আগারে !

অবিলম্বে বামাদল, ঘিরি অরিন্দমে,
 গাইল ; “স্বাগত, ওহে রঘু-চূড়া-মণি !
 নহি নিশাচরী মোরা, ত্রিদিব-নিবাসী !
 নন্দন-কাননে, শূর, সুবর্ণ-মন্দিরে
 করি বাস ; করি পান অমৃত উল্লাসে ;
 অনন্ত বসন্ত জাগে যৌবন-উদ্যানে;
 উরজ^{২২} কমল-যুগ প্রফুল্ল সতত ;
 না শুখায় সুধারস অধর-সরসে ;
 অমরী আমরা, দেব ! বরিনু তোমারে
 আমা সবে; চল, নাথ, আমাদের সাথে ।
 কঠোর তপস্যা নর করে যুগে যুগে
 লভিতে যে সুখ-ভোগ, দিব তা তোমারে,
 গুণমণি ! রোগ, শোক-আদি কীট যত
 কাটে জীবনের ফুল এ ভব-মণ্ডলে
 না পশে যে দেশে মোরা আনন্দে নিবাসি
 চিরদিন !” করপুটে কহিলা সৌমিত্রি,
 “হে সুর-সুন্দরী-বন্দ, ক্ষম এ দাসেরে !
 অগ্রজ আমার রথী বিখ্যাত জগতে
 রামচন্দ্র, ভার্য্যা তাঁর মৈথিলী; কাননে
 একাকিনী পাই তাঁরে আনিয়াছে হরি
 রক্ষেনাথ । উদ্ধারিব, যোর যুদ্ধে নাশি
 রাক্ষসে, জানকী সতী; এ প্রতিজ্ঞা মম
 সফল হউক, বর দেহ, সুরাঙ্গনে !
 নর-কূলে জন্ম মোর; মাতৃ হেন মানি
 তোমা সবে ।” মহাবাহু এতেক কহিয়া
 দেখিলা তুলিয়া আঁধি, বিজন সে বন !
 চলি গেছে বামাদল স্বপনে যেমতি,
 কিম্বা জলবিশ্ব যথা সদা সদ্যোজীবী^{২৩} !—
 কে বুঝে মায়ার মায়া এ মায়া-সংসারে ?
 ধীরে ধীরে পুনঃ বলী চলিলা বিস্ময়ে ।
 কত ক্ষণে শূরবর হেরিলা অদূরে
 সরোবর, কূলে তার চণ্ডীর দেউল
 সুবর্ণ-সোপান শত মণ্ডিত রতনে ।
 দেখিলা দেউলে বলী দীপিছে প্রদীপ;

১৬. ভীষণ পানীদের জন্য নির্দিষ্ট অগ্নিময় নরক। ১৭. বীণার কাঠামো। ১৮. বাজছে। ১৯. মেঘলা। ২০. মধু অর্থে
 বসন্তকাল। বসন্তকালের সখা কোকিল। ২১. জলের ফোয়ারা। ২২. স্তন। ২৩. ক্ষকাল জীবন যার।

পীঠতলে ফুলরাশি ; বাজিছে বাঁধরী,
শঙ্খ, ঘন্টা; ঘটে বারি; ধূম, ধূপদানে
পুড়ি, আমোদিছে দেশ মিশিয়া সুরভি
কুসুম-বাসের সহ। পশিয়া সলিলে
শূরেন্দ্র করিলা স্নান; তুলিলা যতনে
নীলোৎপল; দশ দিশ পুরিল সৌরভে।

প্রবেশি মন্দিরে তবে বীরেন্দ্র-কেশরী
সৌমিত্রি, পুজিলা বলী সিংহবাহিনী
যথাবিধি। “হে বরদে” কহিলা সাষ্টাঙ্গে
প্রণমিয়া রামানুজ, দেহ বর দাসে।
নাশি রক্ষঃশুরে, মাতঃ, এই ভিক্ষা মাগি
মানব-মনের কথা, হে অন্তর্যামিনি,
তুমি যত জান, হায়, মানব-রসনা
পারে কি কহিতে তত ? যত সাধ মনে,
পুরাও সে সবে, সাধি।” গরজিল দূরে
মেঘ; বজ্রনাদে লঙ্কা উঠিল কাঁপিয়া
সহসা ! দুলিল, যেন ঘোর ভূকম্পনে,
কানন, দেউল, সরঃ—থর থর থরে।

সম্মুখে লক্ষ্মণ বলী দেখিলা কাঞ্চন-
সিংহাসনে মহামায়ে। তেজঃ রাশি রাশি
ধাঁধিল নয়ন ক্ষণ বিজলী-ঝলকে।
আঁধার দেউল বলী হেরিলা সভয়ে
চৌদিক। হাসিলা সতী ; পলাইল তমঃ
দ্রুতে; দিব্য চক্ষুঃ লাভ করিলা সূমতি !
মধুর স্বর-তরঙ্গ বহিল আকাশে।

কহিলেন মহামায়া; “সুপ্রসন্ন আজি,
রে সতী-সুমিত্রা-সুত, দেব দেবী যত
তোর প্রতি ! দেব-অস্ত্র প্রেরিয়াছে তোরে
বাসব; আপনি আমি আসিয়াছি হেথা
সাধিতে এ কার্য তোঁর শিবের আদেশে।
ধরি, দেব-অস্ত্র, বলি, বিভীষণে লয়ে,
যা চলি নগর-মাঝে, যথায় রাবণি,
নিকুণ্ডিলা যজ্ঞাগারে, পুজে বৈশ্বানরে।
সহসা, শাদ্দুলাক্রমে আক্রমি রাক্ষসে,
নাশ তারে। মোর বরে পশিবি দুজনে

অদৃশ্য; নিকষে যথা অসি, আবরিব
মায়াজালে আমি দৌঁহে। নির্ভয় হৃদয়ে,
যা চলি, রে যশস্বি!” প্রণমি শুরমণি
মায়ার চরণ-তলে, চলিলা সত্বরে
যথায় রাঘব-শ্রেষ্ঠ। কুজনিল জাগি
পাখী-কুল ফুল-বনে, যজ্ঞীদল যথা
মহোৎসবে পুরে দেশ মঙ্গল-নিষ্কণে।
বৃষ্টিলা কুসুম-রাশি শুরবর-শিরে
তরুরাজী; সমীরণ বহিলা সুস্বনে।

শুভ ক্ষণে গর্ভে তোরে লক্ষ্মণ, ধরিল
সুমিত্রা জননী তোঁর !”—কহিলা আকাশে
আকাশ-সম্ভবা বাণী,—“তোঁর কীর্ত্তি-গানে
পুরিবে ত্রিলোক আজি, কহিনু রে তোঁরে !
দেবের অসাধ্য কর্ম সাধিলি, সৌমিত্রি,
তুই ! দেবকুল-তুল্য অমর হইলি।”
নীরবিলা সরস্বতী; কুজনিল পাখী
সুমধুরতর স্বরে সে নিকুঞ্জ-বনে।

কুসুম-শয়নে যথা সুবর্ণ-মন্দিরে
বিরাজে বীরেন্দ্র বলী ইন্দ্রজিৎ, তথা
পশিল কুজন-ধ্বনি সে সুখ-সদনে।
জাগিলা বীর-কুঞ্জর কুঞ্জবন-গীতে।
প্রমীলার করপদ্ম করপদ্মে ধরি
রথীন্দ্র, মধুর স্বরে, হায় রে, যেমতি
নলিনীর কানে অলি কহে গুঞ্জরিয়া
প্রেমের রহস্য কথা, কহিলা (আদরে
চুশ্বি নিমীলিত আঁখি)^{২৪} “ডাকিছে কুজনে,
হৈমবতী উষা তুমি, রূপসী, তোমারে
পাখী-কুল ! মিল, প্রিয়ে, কমল-লোচন !
উঠ, চিরানন্দ মোর ! সূর্য্যকান্তমণি-
সম এ পরাগ, কান্তা; তুমি রবিচ্ছবি;—
তেজোহীন আমি তুমি মুদিলে নয়ন।
ভাগ্য-বৃক্ষে ফলোত্তম তুমি হে জগতে
আমার। নয়ন-তারা ! মহাহঁ রতন।
উঠি দেখ, শশিমুখি, কেমনে ফুটিছে,
চুরি করি কান্তি তব মঞ্জু কুঞ্জবনে

কুসুম!" চমকি রামা উঠিলা সত্বরে,—
গোপিনী কামিনী যথা বেণুর সুরবে!"

আবরিলা অবয়ব সুচারু-হাসিনী
শরমে। কহিলা পুনঃ কুমার আদরে;—
“পোহাইল এতক্ষণে তিমির শব্দরী;
তা না হলে ফুটিতে কি তুমি, কমলিনি,
জুড়াতে এ চক্ষুঃদ্বয়? চল, প্রিয়ে, এবে
বিদায় হইব নমি জননীর পদে!
পরে যথাবিধি পূজি দেব বৈশ্বানরে,
ভীষণ-অশনি-সম শর-বরিষণে
রামের সংগ্রাম-সাধ মিটাব সংগ্রামে।”

সাজিলা রাবণ-বধু, রাবণ-নন্দন,
অকুল জগতে দোঁহে; বামাকুলোত্তমা
প্রমীলা, পুরুষোত্তম মেঘনাদ বলী!
শয়ন-মন্দির হতে বাহিরিলা দোঁহে—
প্রভাতের তারা যথা অরুণের সাথে!
লঙ্কায় মলিনমুখী পলাইলা দূরে
(শিশির অমৃতভোগ ছাড়ি ফুলদলে)
খদ্যোত; ধাইল অলি পরিমল-আশে;
গাইল কোকিল ডালে মধু পঞ্চস্বরে;
বাজিল রাক্ষস-বাদ্য; নমিল রক্ষক
জয় মেঘনাদ নাদ উঠিল গগনে!
রতন-শিবিকাসনে বসিলা হরষে
দম্পতি। বহিল যান যান-বাহ-দলে
মন্দোদরী মহিষীর সুবর্ণ-মন্দিরে।
মহাপ্রভাধর গৃহ; মরকত, হীরা,
দ্বিরদ-রদ-মণ্ডিত, অতুল জগতে।
নয়ন-মনোরঞ্জন যা কিছু সৃজিলা
বিধাতা, শোভে সে গৃহে! ভ্রমিছে দুয়ারে
প্রহরিণী, প্রহরণ কাল-দণ্ড-সম
করে; অশ্বারূঢ়া কেহ; কেহ বা ভুতলে।
তারাকারা দীপাবলী দীপিছে চৌদিকে।
বহিছে বাসস্তানিল, অযুত-কুসুম-
কানন-সৌরভ-বহ। উথলিছে মৃদু
বীণা-ধ্বনি, মনোহর স্বপন যেমতি!

প্রবেশিলা অরিন্দম, ইন্দু-নিভাননা
প্রমীলা সুন্দরী সহ, সে স্বর্ণ-মন্দিরে।
ত্রিজটা নামে রাক্ষসী আইল ধাইয়া।
কহিলা বীর-কেশরী; “শুন লো ত্রিজটে,
নিকুন্ডিলা-যজ্ঞ সাস্ত করি আমি আজি

যুঝিব রামের সঙ্গে পিতার আদেশে
নাশিব রাক্ষস-রিপু; তেঁই ইচ্ছা করি
পূজিতে জননী-পদ। যাও বার্তা লয়ে;
কহ, পুত্র পুত্রবধু দাঁড়য়ে দুয়ারে
তোমার, হে লঙ্কেশ্বরী!” সান্তাঙ্গে প্রণমি,
কহিল শূরে ত্রিজটা, (বিকটা রাক্ষসী)
“শিবের মন্দিরে এবে রাণী মন্দোদরী,
যুবরাজ! তোমার মঙ্গল-হেতু তিনি
অনিদ্রায়, অনাহারে পূজেন উমেশে!
তব সম পুত্র, শূর, কার এ জগতে।
কার বা এ হেন মাতা?” এতেক কহিয়া
সৌদামিনী-গতি দূতী ধাইল সত্বরে।

গাইল গায়িকা-দল সুযজ্ঞ-মিলনে;—
“হে কুন্তিকে হৈমবতি, শক্তিধর তব
কার্তিকৈয় আসি দেখ তোমার দুয়ারে
সঙ্গে সেনা সুলোচনা! দেখ আসি সুখে,
রোহিণী-গঞ্জিনী বধু; পুত্র, যাঁর রূপে
শশাঙ্ক কলঙ্কী মানে! ভাগ্যবতী তুমি!
ভুবন-বিজয়ী শূর ইন্দ্রজিৎ বলী—
ভুবন-মোহিনী সতী প্রমীলা সুন্দরী!”

বাহিরিলা লঙ্কেশ্বরী শিবালায় হতে।
প্রণমে দম্পতী পদে। হরবে দুজনে
কোলে করি, শিরঃ চুম্বি, কাঁদিলা মহিষী!
হায় রে, মায়ের প্রাণ, প্রেমাগার ভবে
তুই, ফুলকুল যথা সৌরভ-আগার,
শক্তি মুকুতার ধাম, মণিময় খনি।

শরদিন্দু পুত্র; বধু শারদ-কৌমুদী;
তারা-কিরীটিনী নিশিসদৃশী আপনি
রাক্ষস-কুল ঈশ্বরী! অশ্রু-বারি-ধারা
শিশির, কপোল-পর্শে পড়িয়া শোভিল!

কহিলা বীরজ্ঞ; “দেবি, আশীষ দাসেরে।
নিকুন্ডিলা-যজ্ঞ সাস্ত করি যথাবিধি
পশিব সমরে আজি, নাশিব রাঘবে!
শিশু ভাই বীরবাহু; বধিয়াছে তারে
পামর। দেখিব মোরে নিবারে কি বলে?
দেহ পদ-ধূলি, মাতঃ! তোমার প্রসাদে
নির্কিয় করিব আজি তীক্ষ্ম শর-জালে
লঙ্কা! বাঁধি দিব আনি তাত বিভীষণে
রাজদ্রোহী! খেদাইব সুগ্রীব, অঙ্গদে
সাগর অতল জলে!” উত্তরিলা রাণী

মুছিয়া নয়ন-জল রতন-আঁচলে;—

“কেমনে বিদায় তোরে করি রে বাছনি।

আঁধারি হৃদয়াকাশ, তুই পূর্ণ শশী
আমার। দুরন্ত রণে সীতাকান্ত বলী;
দুরন্ত লক্ষ্মণ শর; কাল-সর্প-সম
দয়া-শূন্য বিভীষণ! মত্ত লোভ-মদে,
স্ববন্ধু-বান্ধবে মূঢ় নাশে অনায়াসে,
ক্ষুধায় কাতর ব্যাঘ্র গ্রাসয়ে যেমতি
স্বশিশু! কুম্ভগণে, বাছা, নিকষা শাশুড়ী
ধরেছিল। গর্ভে দুষ্টে, কহিনি রে তোরে!
এ কনক-লঙ্কা মোর মজালে দুর্শ্মতি!”

হাসিয়া মায়ের পদে উত্তরিল। রথী;—

“কেন, মা, ডরাও তুমি রাখবে লক্ষ্মণে,
রক্ষোবৈরী? দুই বার পিতার আদেশে
তুমুল সংগ্রামে আমি বিমুখিনু দোঁহে
অগ্নিময় শর-জ্বালে! ও পদ-প্রসাদে
চির-জয়ী দেব-দৈত্য-নরের সমরে
এ দাস! জানেন তাত বিভীষণ, দেবি,
তব পুত্র-পরাক্রম; দন্তোলি-নিষ্কপী
সহস্রাঙ্ক সহ যত দেব-কুল-রথী;
পাতালে নাগেন্দ্র, মর্ন্ত্যে নরেন্দ্র! কি হেতু
সভয় হইলা আজি, কহ, মা, আমারে?
কি ছার সে রাম তারে ডরাও আপনি?”

মহাদরে শিরঃ চুম্বি কহিলা মহিষী;—

“মায়াবী মানব, বাছা, এ বেদেহী-পতি,
নতুবা সহায় তার দেবকুল যত!
নাগ-পাশে যবে তুই বাঁধিলি দুজন,
কে খুলিল সে বন্ধন? কে বা বাঁচাইল,
নিশারণে যবে তুই বাঁধিলি রাখবে
সসৈন্যে? এ সব আমি না পারি বুঝিতে!
গুনেছি মৈথিলী-নাথ আদেশিলে, জলে
ভাসে শিলা, নিবে অগ্নি; আসার বরষে!
মায়াবী মানব রাম! কেমনে, বাছনি,
বিদাইব তোরে আমি আবার যুক্তিতে
তার সঙ্গে? হায়, বিধি, কেন না মরিল
কুলক্ষণা সূর্ণগথা মায়ের উদরে।”
এতেক কহিয়া রাণী কাঁদিলা নীরবে।

কহিলা বীর-কৃষ্ণর; “পূর্ব-কথা স্মরি,
এ বৃথা বিলাপ, মাতঃ কর অকারণে!
নগর-তোরণে অরি; কি সুখ ভুঞ্জিব,

যত দিন নাহি তারে সংহারি সংগ্রামে!
আক্রমিলে হতাশন^{২৬} কে ঘুমায় ঘরে?
বিখ্যাত রাক্ষস-কুল, দেব-দৈত্য-নর-
ত্রাস ত্রিভুবনে, দেবি! হেন কুলে কালি
দিব কি রাখবে দিতে, আমি মা, রাবণি
ইন্দ্রজিত? কি কহিবে, গুনিলে এ কথা,
মাতামহ দনুজেন্দ্র ময়?^{২৭} রথী যত
মাতুল? হাসিবে বিশ্ব! আদেশ দাসেরে,
যাইব সমরে, মাতঃ নাশিব রাখবে!
ওই শুন, কুজনিছে বিহঙ্গম বনে।
পোহাইল বিভাবরী। পুজি ইষ্টদেবে,
দুর্দ্ধর রাক্ষস-দলে পশিব সমরে।
আপন মন্দিরে, দেবি, যাও ফিরি এবে।
ত্বরায় আসিয়া আমি পূজিব যতনে
ও পদ-রাজীব-যুগ, সমর-বিজয়ী!
পাইয়াছি পিতৃ-আজ্ঞা, দেহ আজ্ঞা তুমি।—
কে আঁটিবে দাসে, দেবি, তুমি আশীষিলে?”

মুছিয়া নয়ন-জল রতন-আঁচলে,
উত্তরিল। লঙ্কেশ্বরী; “যাইবি রে যদি—
রাক্ষস-কুল-রক্ষণ বিরূপাঙ্ক তোরে
রক্ষুন এ কাল-রণে! এই ভিক্ষা করি
তার পদযুগে আমি। কি আর কহিব?
নয়নের তারাহারা করি রে খুইলি
আমায় এ ঘরে তুই!” কাঁদিয়া মহিষী
কহিলা চাহিয়া তবে প্রমীলার পানে;
“থাক, মা, আমার সঙ্গে তুমি; জুড়াইব,
ও বিধুবদন হেরি, এ পোড়া পরাণ!
বহুলে^{২৮} তারার করে^{২৯} উজ্জ্বল ধরণী।”

বন্দি জননীর পদ বিদায় হইলা
ভীমবাহু। কাঁদি রাণী, পুত্র-বধু সহ
প্রবেশিলা পুনঃ গৃহে। শিবিকা ত্যজিয়া,
পদ-ব্রজে যুবরাজ চলিলা কাননে—
ধীরে ধীরে রথীবর চলিলা একাকী,
কুসুম-বিবৃত পথে, যজ্ঞ-শালা মুখে।

সহসা নুপুর-ধ্বনি ধ্বনিল পশ্চাতে।
চির-পরিচিত, মরি, প্রণয়ীর কানে
প্রণয়িনী-পদ-শব্দ! হাসিলা বীরেন্দ্র
সুখে বাহু-পাশে বাঁধি ইন্দীবরাননা
প্রমীলারে। “হায়, নাথ,” কহিলা সুন্দরী,
“ভেবেছিলি, যজ্ঞগৃহে যাব তব সাথে;

২৬. অগ্নি। ২৭. ময়দানব রাবণপত্নী মন্দোদরীর পিতা। সেই সূত্রে ময় ইন্দ্রজিতের মাতামহ।

২৮. কৃষ্ণপক্ষে। ২৯. তারার আলোয়।

সাজাইব বীর-সাজে তোমায়। কি করি ?
বন্দী করি স্বমন্দিরে রাখিলা শাশুড়ী।
রহিতে নারিনু তব পুনঃ নাহি হেরি
পদযুগ! শুনিয়াছি, শশিকলা না কি
রবি-তেজে সমুজ্জ্বলা; দাসীও তেমতি,
হে রাক্ষস-কুল-রবি! তোমার বিহনে,
আঁধার জগত, নাথ, কহিনু তোমারে!”
মুকুতামণ্ডিত বুকে নয়ন বর্ষিল
উজ্জ্বলতর মুকুতা! শতদল-দলে
কি ছার শিশির-বিন্দু ইহার তুলনে?

উত্তরিলা বীরোত্তম, “এখনি আসিব,
বিনাশি রাখবে রণে, লঙ্কা-সুশোভিনি।
যাও তুমি ফিরি, প্রিয়ে, যথা লঙ্কেশ্বরী।
শশাক্ষের অগ্রে, সতি, উদে লো রোহিণী!
সৃজিলা কি বিধি, সাধিব, ও কমল-আঁখি
কাঁদিত? আলোকাগারে কেন লো উদিকে
পয়োবহ^{৩০}? অনুমতি দেহ, রূপবতি,—
ভ্রান্তিমর্দে মস্ত নিশি, তোমারে ভাবিয়া
উষা, পলাইছে, দেখ, সত্বর গমনে,—
দেহ অনুমতি, সতি, যাই যজ্ঞাগারে।”

যথা যবে কুসুমেশু,^{৩১} ইন্দ্রের আদেশে,
রতিরে ছাড়িয়া শূর, চলিলা কৃষ্ণে
ভাঙিতে শিবের ধ্যান; হায় রে, তেমতি
চলিলা কন্দর্প-রূপী ইন্দ্রজিত বলী,—
ছাড়িয়া রতি-প্রতিমা প্রমীলা সতীরে!
কুলধ্বং করিলা যাত্রা মদন; কুলধ্বং
করি যাত্রা গেলা চলি মেঘনাদ বলী—
রাক্ষস-কুল-ভরসা, অজ্ঞেয় জগতে!
প্রাস্তনের গতি, হায়, কার সাধ্য রোধে?
বিলাপিলা যথা রতি প্রমীলা যুবতী।

কত ক্ষণে চক্ষুঃজল মুছি রক্ষোবধু,
হেরিয়া পতিরে দূরে কহিলা সুস্বরে;

“জানি আমি কেন তুই গহন কাননে
ভ্রমিস্ রে গজরাজ! দেখিয়া ও গতি,
কি লজ্জায় আর তুই মুখ দেখাইবি,
অভিমানি? সরু মাঝা তোর রে কে বলে,
রাক্ষস-কুল-হর্যাক্ষে হেরে যার আঁখি,
কেশরি? তুইও তেঁই সদা বনবাসী।
নাশিস্ বারণে তুই; এ বীর-কেশরী
ভীম-প্রহরণে রণে বিমুখে বাসবে,
দৈত্য-কুল-নিত্য-অরি, দেবকুল-পতি।”

এতেক কহিয়া সতী, কৃতাঞ্জলি-পুটে,
আকাশের পানে চাহি আরাধিলা কাঁদি;
“প্রমীলা তোমার দাসী, নগেন্দ্র-নন্দিনি,
সাধে তোমা, কৃপা-দৃষ্টি কর লঙ্কাপানে,
কৃপাময়ি! রক্ষঃশ্রেষ্ঠে রাখ এ বিগ্রহে!
অভেদ্য কবচ-রূপে আবর শুরেরে!
যে ব্রততী সদা, সতি, তোমারি আশ্রিত,
জীবন তাহার জীবো ওই তরুরাজে!
দেখো, মা, কুঠার যেন না স্পর্শে উহারে!
আর কি কহিবে দাসী? অন্তর্য়ামী তুমি!
তোমা বিনা, জদগম্বে, কে আর রাখিবে?”

বহে যথা সমীরণ পরিমল-ধনে
রাজ্যলয়ে, শব্দবহ আকাশ বহিলা
প্রমীলার আরাধনা কৈলাস-সদনে।
কাঁপিলা সভয়ে ইন্দ্র। তা দেখি, সহসা
বায়ু-বেগে বায়ুপতি দূরে উড়াইলা
তাহায়! মুছিয়া আঁখি, গেলা চলি সতী,
যমুনা-পুলিনে যথা, বিদায়ি মাধবে,
বিরহ-বিধুরা গোপী যায় শূন্য-মনে
শূন্যালয়ে, কাঁদি বামা পশিলা মন্দিরে।

ইতি শ্রীমেঘনাদবধে কাব্যে উদ্যোগো নাম
পঞ্চমঃ সর্গঃ

ষষ্ঠ সর্গ

তাজি সে উদ্যান, বলী সৌমিত্রি কেশরী
চলিলা, শিবিরে যথা বিরাজেন প্রভু
রঘু-রাজ; অতি দ্রুতে চলিলা সুমতি
হেরি মৃগরাজে^{৩০} বনে, ধায় ব্যাধ যথা

অস্ত্রালয়ে, বাছি বাছি লইতে সত্বরে
তীক্ষ্ণতর প্রহরণ নশ্বর^{৩১} সংগ্রামে।
কত ক্ষণে মহাযশাঃ উত্তরিল যথা
রঘুরথী। পদযুগে নমি, নমস্কারি

৩০. জল যে বহন করে মেঘ। ৩১. কামদেব।

১. পশুরাজ সিংহকে। ২. সহরক।

মিত্রবর বিভীষণে, কহিলা সুমতি,—
 “কৃতকার্য্য আজি, দেব, তব আশীর্বাদে
 চিরদাস! স্মরি পদ, প্রবেশি কাননে,
 পূজিনু চামুণ্ডে, প্রভু, সুবর্ণ-দেউলে।
 ছলিতে দাসেরে সতী কৃত যে পাতিলা
 মায়াজাল, কেমনে তা নিবেদি চরণে,
 মুঢ় আমি? চন্দ্রচূড়ে দেখিনু দুয়ারে
 রক্ষক; ছাড়িলা পথ বিনা রণে তিনি
 তব পুণ্যবলে, দেব; মহোরগ* যথা
 যায় চলি হতবল মহৌষধগুণে!
 পশিল কাননে দাস; আইল গর্জ্জিয়া
 সিংহ; বিমুখিনু তাহে; ভৈরব হুঙ্কারে
 বহিল তুমুল ঝড়; কালান্নি সদৃশ
 দাবান্নি বেড়িল দেশ; পুড়িল চৌদিকে
 বনরাজী; কত ক্ষণে নিবিলা আপনি
 বায়ুসখা* বায়ুদেব গেলা চলি দূরে।
 সুরবালাদলে এবে দেখিনু সম্মুখে
 কুঞ্জবনবিহারিণী; কৃতাজ্জলি-পুটে,
 পূজি, বর মাগি দেব, বিদাইনু সবে।
 অদূরে শোভিল বনে দেউল, উজ্জলি
 সুদেশ। সরসে পশি, অবগাহি দেহ,
 নীলোৎপলাঞ্জলি দিয়া পূজিনু মায়েরে
 ভক্তিভাবে। আবির্ভাবি বর দিলা মায়া।
 কহিলেন দয়াময়, —‘সুপ্রসন্ন আজি,
 রে সতীসুমিত্রাসুত, দেব দেবী যত
 তোর প্রতি। দেব-অস্ত্র খেরিয়াছে তোরে
 বাসব; আপনি আমি আসিয়াছি হেথা
 সাধিতে এ কার্য্য তোর শিবের আদেশে।
 ধরি দেব-অস্ত্র, বলি, বিভীষণে লয়ে,
 যা চলি নগর মাঝে, যথায় রাবণি,
 নিকুন্তিলা যজ্ঞাগারে, পূজে বৈশ্বানরে।
 সহসা শাদ্দূলক্রমে আক্রমি রাক্ষসে,
 নাশ্ তারে! মোর বরে পশিবি দুজনে
 অদৃশ্য; পিধানে যথা অসি, আবিব
 মায়াজালে আমি দাঁহে। নির্ভয় হৃদয়ে,
 যা চলি, রে যশস্বি!’ কি ইচ্ছা তব, কহ,
 নৃমণি? পোহায় রাত্তি; বিলম্ব না সহে।
 মারি রাবণিরে, দেব, দেহ আজ্ঞা দাসে?”

উত্তরিলা রঘুনাথ, “হায় রে, কেমনে—
 যে কৃতাস্ত্রদূতে* দূরে হেরি, উদ্ধৃশ্বাসে

ভয়াকুল জীবকুল ধায় বায়ুবেগে
 প্রাণ লয়ে; দেব নর ভস্ম যার বিধে;—
 কেমনে পাঠাই তোরে সে সপর্বিবরে,
 প্রাণাধিক? নাহি কাজ সীতায় উদ্ধারি।
 বৃথা, হে জলধি, আমি বাঁধিনু তোমারে;
 অসংখ্য রাক্ষসগ্রাম* বধিনু সংগ্রামে;
 আনিবু রাজেন্দ্রদলে* এ কনকপুরে
 সসৈন্যে; শোণিতস্রোতঃ, হায়, অকারণে,
 বরিষার জলসম, আর্দ্রিল মহীরে!
 রাজ্য, ধন, পিতা, মাতা, স্ববন্ধুবান্ধবে
 হারাইনু ভাগ্যদোষে; কেবল আছিল
 অন্ধকার ঘরে দীপ মৈথিলী; তাহারে
 (হে বিধি, কি দোষে দাস দোষী তব পদে?)
 নিবাইল দুরদৃষ্ট! কে আর আছে রে
 আমার সংসারে, ভাই যার মুখ দেখি
 রাখি এ পরাণ আমি? থাকি এ সংসারে?
 চল ফিরি, পুনঃ মোরা যাই বনবাসে,
 লক্ষ্মণ! কৃক্ষণে, ভুলি আশার ছলনে,
 এ রাক্ষসপুরে, ভাই, আইনু আমরা।”

উত্তরিলা বীরদর্পে সৌমিত্রি কেশরী;—
 “কি কারণে, রঘুনাথ, সভয় আপনি
 এত? দেববলে বলী যে জন, কাহারে
 ডরে সে ত্রিভুবনে? দেব-কুলপতি
 সহস্রাক্ষ পক্ষ তব; কৈলাস-নিবাসী
 বিরূপাক্ষ; শৈলবালা ধর্ম্ম-সহায়িনী!
 দেখ চেয়ে লক্ষা পানে; কাল মেঘ সম
 দেবক্রোধ আবরিছে স্বর্ণময়ী আভা
 চারি দিকে! দেবহাস্য উথলিছে, দেখ
 এ তব শিবির, প্রভু! আদেশ দাসেরে
 ধরি দেব-অস্ত্র আমি পশি রক্ষণগহে;
 অবশ্য নাশিব রক্ষণ ও পদপ্রসাদে।
 বিজ্ঞতম তুমি, নাথ! কেন অবহেল
 দেব-আজ্ঞা? ধর্ম্মপথে সদা গতি তব
 এ অধর্ম্ম কার্য্য, আর্ধ্য, কেন কর আজি?
 কে কোথা মঞ্জলঘট ভাঙে পদাঘাতে?”

কহিলা মদুরভাবে বিভীষণ বলী
 মিত্র;—“যা কহিলা সত্য রাঘবেন্দ্রে রথী।
 দুরন্ত কৃতাস্ত্র-দূত সম পরাক্রমে
 রাবণি, বাসবত্রাস, অজ্ঞেয় জগতে।
 কিন্তু বৃথা ভয় আজি করি মোরা তারে।

৩. মহাসর্প। ৪. অগ্নি। ৫. কৃতাস্ত্র—যম। সর্পস্বরূপ যমদূত।

৬. রাক্ষসদল ৭. রাজার দল—এখানে সুগ্রীব প্রভৃতির কথা বলা হয়েছে।

স্বপনে দেখিনু আমি, রঘুকুলমণি,
রক্ষঃকুল-রাজলক্ষ্মী; শিরোদেশে বসি,
উজ্জলি শিবির, দেব, বিমল কিরণে,
কহিলা অধীনে সাধ্বী;—“হায়! মত্ত মদে
ভাই তোর, বিভীষণ! এ পাপ-সংসারে
কি সাধে করি রে বাস, কলুষদেষ্ণীণী”
আমি? কমলিনী কভু ফোটে কি সলিলে
পঙ্কিল? জীমুতাবৃত গগনে কে কবে
হেরে তারা? কিন্তু তোর পূর্ব কন্মফলে
সুপ্রসন্ন তোর প্রতি অমর; পাইবি
শূন্য রাজ-সিংহাসন, ছত্রদণ্ড সহ,
তুই! রক্ষঃকুলনাথ-পদে আমি তোরে
করি অভিষেক আজি বিধির বিধানে,
যশস্বি! মারিবে কালি সৌমিত্রি কেশরী
ভ্রাতৃপুত্র মেঘনাদে; সহায় হইবি
তুই তার! দেব-আজ্ঞা পালিস্ যতনে,
রে ভাবি কৰ্ব্বুররাজ!—’ উঠিনু জাগিয়া;—
স্বর্গীয় সৌরভে পূর্ণ শিবির দেখিনু;
স্বর্গীয় বাদিত্র, দুরে শুনিব গগনে
মৃদু! শিবিরের দ্বারে হেরিনু বিস্ময়ে
মদনমোহনে মোহে যে রূপমাধুরী!
গ্রীবদেশে আচ্ছাদিছে কাদম্বিনীরূপী
কবরী; ভাতিছে কেশে রত্নরাশি;—মরি!
কি ছার তাহার কাছে বিজলীর ছটা
মেঘমালে! আচম্বিতে অদৃশ্য হইলা
‘জগদম্বা’। বহুক্ষণ রহিনু চাহিয়া
সতৃষ্ণ নয়নে আমি, কিন্তু না ফলিল
মনোরথ; আর মাতা নাহি দিলা দেখা।
শুন দাশরথি রথি, এসকল কথা
মন দিয়া। দেহ আজ্ঞা, সঙ্গে যাই আমি,
যথা যজ্ঞাগারে পূজে দেব বৈশ্বানরে
রাবণি। হে নরপাল, পাল সযতনে
দেবাদেশ! ইষ্টসিদ্ধি অবশ্য হইবে
তোমার, রাখব-শ্রেষ্ঠ, কহিনু তোমারে!”
উত্তরিল সীতানাথ সজল-নয়নে;—
“স্মরিলে পূর্বের কথা, রক্ষঃকুলোত্তম,
আকুল পরাণ কাঁদে! কেমনে ফেলিব
এ ভ্রাতৃ-রতনে আমি এ অতল জলে?
হায়, সখে, মহুরার কুপছায় যবে
ঢলিলা কৈকেয়ী মাতা, মম ভাগ্যদোষে
নির্দয়; ত্যজিনু যবে রাজ্যভোগ আমি

পিতৃসত্যরক্ষা হেতু; স্বেচ্ছায় তাঁজিল
রাজ্যভোগ প্রিয়তম ভ্রাতৃ-প্রেম-বশে!
কাঁদিলা সুমিত্রা মাতা! উচ্চে অবরোধে
কাঁদিলা উষ্মিলা বধু; পৌরজন যত—
কত যে সাধিল সবে, কি আর কহিব?
না মানিল অনুরোধ; আমার পশ্চাতে
(ছায়া যথা) বনে ভাই পশিল হরষে
জলাঞ্জলি দিয়া সুখে তরুণ যৌবনে।
কহিলা সুমিত্রা মাতা;—“নয়নের মণি
আমার, হরিলি তুই, রাখব! কে জানে,
কি কুহকবলে তুই ভুলালি বাছারে?
সঁপিনু এ ধন তোরে। রাখিস্ যতনে
এ মোর রতনে তুই, এই ভিক্ষা মাগি।”

নাহি কাজ, মিত্রবর, সীতায় উদ্ধারি।
ফিরি যাই বনবাসে। দুর্ব্বার সমরে,
দেব-দৈত্য-নর-ত্রাস, রথীন্দ্র রাবণি!
সুগ্রীব বাহুবলেন্দ্র; বিশারদ রণে
অঙ্গদ, সুযুবরাজ; বায়ুপুত্র হনু,
ভীমপরাক্রম পিতা প্রভঞ্জন যথা;
ধূম্রাক্ষ, সমর-ক্ষেত্রে ধুমকেতু সম
অগ্নিরাশি; নল, নীল; কেশরী-কেশরী
বিপক্ষের পক্ষে শুর; আর যোধ যত
দেবাকৃতি, দেববীর্ষ্য; তুমি মহারথী;—
এ সবার সহকারে নারি নিবারিতে
যে রক্ষে, কেমনে, কহ, লক্ষ্মণ একাকী
যুঝিবে তাহার সঙ্গে? হায়, মায়াবিনী
আশা তেঁই, কহি সখে, এ রাক্ষস-পুরে,
অলঙ্ঘ্য সাগর লঙ্ঘি, আইনু আমরা।”

সহসা আকাশ-দেশে, আকাশ-সত্ত্বা
সরস্বতী নিনাদিলা মধুর নিনাদে;
“উচিত কি তব, কহ, হে বৈদেহীপতি,
সংশয়িতে দেববাক্য, দেবকুলপ্রিয়
তুমি? দেবাদেশ, বলি, কেন অবহেল?
দেখ চেয়ে শূন্য পানে।” দেখিলা বিস্ময়ে
রঘুরাজ, অহি সহ যুঝিছে অম্বরে
শিখী। কেকারব মিশি ফণীর স্বননে,
ভৈরব আরবে দেশ পুরিছে চৌদিকে!
পক্ষছায়া আবারিছে, ঘনদল যেন,
গগন; জ্বলিছে মাঝে, কালানল-তেজে,
হলাহল! ঘোর রণে রণিছে’ উভয়ে।
মুহুমুহুঃ ভয়ে মহী কাঁপিলা; ঘোষিল

উথলিয়া জলদল। কতক্ষণ পরে,
গত প্রাণ শিখীবর পড়িলা ভূতলে;
গরজিলা অজাগর—বিজয়ী সংগ্রামে।”
কহিলা রাবণানুজ; “স্বচক্ষে দেখিলা
অদ্ভুত ব্যাপার আজি; নিরর্থ এ নহে,
কহিনু, বৈদেহীনাথ, বুঝ ভাবি মনে!
নহে ছায়াবাজী ইহা; আশু যা ঘটবে,
এ প্রপঞ্চরূপে”^{১১} দেব দেখালে তোমারে;
নির্বারিবে”^{১২} লক্ষ্মী আজি সৌমিত্রি কেশরী!”

প্রবেশি শিবিরে তবে রঘুকুলমণি
সাজাইলা প্রিয়ানুজে দেব-অস্ত্রে। আহা,
শোভিলা সুন্দর বীর স্বন্দ”^{১৩} তারকারি-
সদৃশ! পরিলা বক্ষে কবচ সুমতি
তারাময়; সরাসনে ঝল ঝল ঝলে
ঝলিল ভাস্কর”^{১৪} অসি মণ্ডিত রতনে।
রবির পরিধি সম দীপে পৃষ্ঠদেশে
ফলক; দ্বিরদ-রদ-নির্শিত,”^{১৫} কাঞ্চনে
জড়িত, তাহার সঙ্গে নিষঙ্গ”^{১৬} দুর্লিল
শরপূর্ণ। বাম হস্তে ধরিলা সাপটি
দেবধনুঃ ধনুর্ধর; ভাঙিল মস্তকে
(সৌরকরে গড়া যেন) মুকুট, উজলি
চৌদিক; মুকুটোপরি লড়িল সঘনে
সূচুড়া, কেশরীপৃষ্ঠে লড়য়ে যেমতি
কেশর! রাঘবানুজ সাজিলা হরষে,
তেজস্বী-মধ্যাহ্নে যথা দেব অংশুমালী!

শিবির হইতে বলী বাহিরিলা বেগে—
ব্যগ্র, তুরঙ্গম যথা শৃঙ্গকুলনাদে,
সমরতরঙ্গ যবে উথলে নির্ঘোষে!
বাহিরিলা বীরবর; বাহিরিলা সাথে
বীরবেশে বিভীষণ রণে!
বরবিলা পুষ্প দেব; বাজিল আকাশে
মঙ্গলবাজনা; শূন্যে নাচিল অঙ্গরা,
স্বর্গ, মর্ত্য, পাতাল পুরিল জয়রবে!

আকাশের পানে চাহি, কৃতাজ্জলিপুটে,
আরাধিল রঘুবর; “তব পদাম্বুজে,
চায় গো আশ্রয় আজি রাঘব ভিখারী,

অস্থিকে! ভুল না, দেবি, এ তব কিঙ্করে!
ধর্মরক্ষা হেতু, মাতঃ, কত যে পাইনু
আয়াস, ও রাঙা পদে অবিদিত নহে।
ভুঞ্জাও ধর্মের ফল, মৃত্যুঞ্জয়-প্রিয়ে,
অভাজনে; রক্ষ, সতি, এ রক্ষঃসমরে,
প্রাণাধিক ভাই এই কিশোর লক্ষ্মণে!
দুন্দাস্ত দানবে দলি, নিস্তারিলা তুমি,
দেবদলে, নিস্তারিগি! নিস্তার অধীনে,
মহিষমর্দিনি, মর্দি দুর্মদ রাক্ষসে!”

এইরূপে রক্ষোরিপু স্তুতিলা সতীরে।
যথা সমীরণ বহে পরিমল-ধনে
রাজালয়ে, শব্দবহ আকাশ বহিলা
রাঘবের আরাধনা কৈলাসসদনে।
হাসিলা দিবিল্ল দিবে; পবন অমনি
চলাইলা আশুতরে”^{১৭} সে শব্দবাহকে।”^{১৮}
শুনি সে সু-আরাধনা, নগেন্দ্রনন্দিনী,
আনন্দে, তথাস্ত, বলি আশীষিলা মাতা।

হাসি দেখা দিল উষা উদয়-অচলে
আশা যথা, আহা মরি, আঁধার হৃদয়ে,
দুঃখতমোবিনাশিনী! কুঞ্জিল পাখী
নিকুঞ্জে, গুঞ্জরি অলি, ধাইল চৌদিকে
মধুজীবী; মৃদুগতি চলিলা শব্দরী,
তারাদলে লয়ে সঙ্গে; উবার ললাটে
শোভিল একাট তারা, শত-তারা-তেজে!
ফুটিল কুন্তলে ফুল, নব তারা বলী!

লক্ষ্য করি রক্ষাবরে রাঘব কহিলা;
“সাবধানে যাও, মিত্র। অমূল রতনে
রামের, ভিখারী রাম অর্পিছে তোমারে,
রথীবর! নাহি কাজ বৃথা বাক্যব্যয়ে—
জীবন, মরণ মম আজি তব হাতে!”

আশ্বাসিলা মহেৎবাসে বিভীষণ বলী।
“দেবকুলপ্রিয়”^{১৯} তুমি, রঘুকুলমণি;
কাহারে ডরাও, প্রভু? অবশ্য নাশিবে
সমরে সৌমিত্রি শুর মেঘনাদ শুরে।”

বন্দি রাঘবেন্দ্রপদ, চলিলা সৌমিত্রি
সহ মিত্র বিভীষণ। ঘন ঘনাবলী

১১. অঙ্গুর শব্দটিকে কবি কবিতার ধ্বনি ও মাত্রার অনুবোধে অজাগর লিখেছেন। ১২. মায়ারূপে।

১৩. বীজমূন্য করবে। ১৪. কর্তৃক। ১৫. উজ্জ্বল। ১৬. স্থতির দাঁতে তেরি। ১৭. ফুল। ১৮. অতিশীঘ্র। ১৯. বায়ু।

২০. দেবতাদের প্রিয়।

বেড়িল দৌহারে, যথা বেড়ে হিম্মনীতে^{২১}
কুঙ্কটিকা গিরিশৃঙ্গে, পোহাইলে রাতি।
চলিলা অদৃশ্যভাবে লঙ্কামুখে দৌহে।^{২২}

যথায় কমলাসনে বসেন কমলা—
রক্ষঃকুল-রাজলক্ষ্মী—রক্ষাবধু-বেশে,
প্রবেশিলা মায়াদেবী সে স্বর্ণ-দেউলে।
হাসিয়া সুধিলা রমা, কেশববাসনা;—
“কি কারণে, মহাদেবি, গতি এবে তব
এ পুরে? কহ, কি ইচ্ছা তোমার, রঙ্গিনি?”

উত্তরিলা মৃদু হাসি মায়ী শঙ্কীশ্বরী;—
“সম্বর, নীলাম্বুসুতে,^{২৩} তেজঃ তব আজি;
পশিবে এ স্বর্ণপুরে দেবাকৃতি^{২৪} রথী
সৌমিত্রি; নাশিবে শূর, শিবের আদেশে,
নিকুণ্ডিলা যজ্ঞাগারে দস্তী মেঘনাদে।—
কালান্নল সম তেজঃ তব, তেজস্বিনি;
কার সাধ্য বৈরিভাবে পশে এ নগরে?
সুপ্রসন্ন হও, দেবি, করি এ মিনতি,
রাঘবের প্রতি তুমি! তার, বরদানে,
ধর্মপথ-গামী রামে, মাধবরমণি!”

বিষাদে নিশ্বাস ছাড়ি কহিলা ইন্দ্রিরা;—
“কার সাধ্য, বিশ্বধোয়া,^{২৫} অবহেলে তব
আজ্ঞা? কিন্তু প্রাণ মম কাঁদে গো স্মরিলে
এ সকল কথা! হায়, কত যে আদরে
পূজে মোরে রক্ষঃশ্রেষ্ঠ, রাণী মন্দোদরী,
কি আর কহিব তার? কিন্তু নিজদোষে
মজে রক্ষঃকুলনিধি! সম্বরবি, দেবি,
তেজঃ;—প্রাক্তনের গতি কার সাধ্য রোধে?
কহ সৌমিত্রিরে তুমি পশ্বিতে নগরে
নির্ভয়ে। সমস্তই হয়ে বর দিনু আমি,
সংহারিবে এ সংগ্রামে সুমিত্রানন্দন!”
বলী—অরিন্দম মন্দোদরীর নন্দনে!”

চলিলা পশ্চিম দ্বারে কেশববাসনা—
সুরমা, প্রফুল্ল ফুল প্রত্যুষে যেমতি
শিশির-আসারে ধৌত! চলিলা রঙ্গিনী
সঙ্গে মায়ী। শুখাইল রজাতরুরাজি;
ভাঙ্গিল মঙ্গলঘট; শুবিলা মেদিনী

বারি। রাঙা পায়ে আসি মিশিল সত্বরে
তেজোরশি, যথা পশে, নিশা-অবসানে,
সুধাকর-কর-জাল রবি-কর-জালে!
শ্রীভ্রষ্টা হইল লঙ্কা; হারাইলে, মরি!
কুণ্ডলশোভন মণি ফণিনী যেমনি!
গভীর নির্যোষে দূরে ঘোষিলা সহসা
ঘনদল; বৃষ্টিহলে গগন কাঁদিলা;
কম্পোলিলা জলপতি; কাঁপিলা বসুধা,
আক্ষেপে, রে রক্ষঃপুরি, তোর এ বিপদে,
জগতের অলঙ্কার তুই, স্বর্ণময়ি!

প্রাচীরে উঠিয়া দৌহে হেরিলা অদূরে
দেবাকৃতি সৌমিত্রিরে, কুঙ্কটিকাবৃত
যেন দেব ত্রিষাম্পতি, কিম্বা বিভাবসু
ধুমপুঞ্জ। সাথে সাথে বিভীষণ রথী—
বায়ুসখা সহ বায়ু—দুর্বার সমরে।
কে আজি রক্ষিবে, হায়, রাক্ষসভরসা
রাবণিরে! ঘন বনে, হেরি দূরে যথা
মৃগবরে, চলে ব্যাঘ্র গুপ্ত-আবরণে,
সুযোগপ্রয়াসী; কিম্বা নদীগর্ভে যথা
অবগাহকেরে দূরে নিরখিয়া, বেগে
যমচক্ররূপী^{২৬} নক্র^{২৭} ধায় তার পানে
অদৃশ্যে, লক্ষ্মণ শূর, বধিতে রাক্ষসে,
সহ মিত্র বিভীষণ, চলিলা সত্বরে।

বিষাদে নিশ্বাস ছাড়ি, বিদায়ি মায়ারে,
স্বমন্দিরে গেলা চলি ইন্দ্রিরা সুন্দরী।
কাঁদিলা মাধবপ্রিয়া! উল্লাসে শুবিলা
অশ্রুনিব্দু বসুন্ধরা—শুবে শুক্তি যথা
যতনে, হে কাদস্বিনি, নয়নাম্বু তব,
অমূল্য মুকুতাফল ফলে যার শুণে
ভাতে যবে স্বাতী^{২৮} সতী গগনমণ্ডলে।^{২৯}

প্রবল মায়ার বলে পশিলা নগরে
বীরদ্বয়। সৌমিত্রির পরশে খুলিল
দুয়ার অশনি-নাদে; কিন্তু কার কানে
পশিল আরাব? হায়! রক্ষোরথী যত
মায়ার ছলনে অন্ধ, কেহ না দেখিলা
দুরন্ত কৃতাস্ত্রদুতসম রিপুদ্বয়ে,

২১. শীতকালে। ২২. দুজনো। ২৩. লক্ষ্মী। ২৪. দেবতার ন্যায় আকৃতি বিশিষ্ট। ২৫. জগতের আরাধ্য।

২৬. যমচক্রের ন্যায় ভয়ানক। ২৭. কুমীর। ২৮. একটি নক্ষত্র। চন্দ্রের পত্নীরূপে কথিত। ২৯. স্বাতী নক্ষত্রের
জল পড়লে শুষ্টিগর্ভে মুক্তার জন্ম হয়—প্রচলিত বিশ্বাস।

সুম-রাশিতে অহি পশিল কৌশলে !
 সবিস্ময়ে রামানুজ দেখিলা চৌদিকে
 চতুরঙ্গ বল দ্বারে;—মাতঙ্গ নিষাদী,
 তুরঙ্গমে সাদীবন্দ, মহারথী রথে,
 তুলে শমনদূত পদাতিক যত—
 ঐমাকৃতি ভীমবীৰ্য্য; অজেয় সংগ্রামে ।
 কাশানল-সম বিভা উঠিছে আকাশে !
 হেরিলা সভয়ে বলী সৰ্ব্বভুকরূপী
 ঐক্যপাক মহারক্ষঃ, প্রক্ষেপনধারী,
 সুবর্ণ স্যন্দনারুঢ়; তালবৃক্ষাকৃতি
 দীর্ঘ তালজম্বা শূর—গদাধর যথা
 মূর-অরি; গজপৃষ্ঠে কালনেমি, বলে
 ঐপুকুলকাল বলী; বিশারদ রণে,
 রণপ্রিয়, বীরমদে প্রমত্ত সতত
 প্রমত্ত; চিহ্নুর রক্ষঃ যক্ষ পতি-সম;—
 আর আর মহাবলী, দেবদৈত্যনর-
 চিরত্রাস । ধীরে ধীরে, চলিলা দুজনে;
 নীরবে উভয় পার্শ্বে হেরিলা সৌমিত্রি
 শত শত হেম-হর্ষ্য, দেউল, বিপনি,^{৩০}
 উদ্যান, সরসী উৎস; অশ্ব অশ্বালয়ে,
 গজালয়ে গজবন্দ; স্যন্দন অগণ্য
 অগ্নিবর্ণ; অস্ত্রশালা, চারু নাট্যশালা,
 মন্ডিত রতনে, মরি ! যথা সুরপুরে !—
 লঙ্কার বিভব যত কে পারে বর্ণিতে—
 দেবলোভ, দৈত্যকুল-মাৎস্য^{৩১} ? কে পারে
 গণিতে সাগরে রত্ন, নক্ষত্র আকাশে ?
 নগর মাঝারে শূর হেরিলা কৌতুকে
 রক্ষেরাজরাজগৃহ । ভাতে সারি সারি
 কাঞ্চনহীরকস্তম্ভ; গগন পরশে
 গৃহচূড়, হেমকুটশৃঙ্গাবলী যথা
 বিভাময়ী । হস্তিদন্ত স্বর্ণকাস্তি সহ
 শোভিছে গবাক্ষে, দ্বারে, চক্ষুঃ বিনোদিয়া
 তুষাররাশিতে শোভে প্রভাতে যেমতি
 সৌরকর ! সবিস্ময়ে চাহি মহাযশাঃ
 সৌমিত্রি, শুরেন্দ্রে মিত্র বিভীষণ পানে,
 কহিলা—“অগ্রজ তব ধন্য রাজকুলে,
 রক্ষোবর, মহিমার অর্ণব জগতে ।
 এ হেন বিভব, আহা কার ভবতলে ?”
 বিষাদে নিশ্বাস ছাড়ি উত্তরিলা বলী

বিভীষণ,—“যা কহিলে সত্য, শূরমণি !
 এ হেন বিভব, হায়, কার ভবতলে ?
 কিন্তু চিরস্থায়ী কিছু নহে এ সংসারে ।
 এক যায় আর আসে, জগতের রীতি,—
 সাগরতরঙ্গ যথা ! চল ত্বর করি,
 রথীবর, সাধ কাজ বধি মেঘনাদে;
 অমরতা লভ, দেব, যশঃসুধা-পানে !”
 সত্বরে চলিলা দৌহে,মায়ার প্রসাদে
 অদৃশ্য ! রাক্ষসবধ, মুগাক্ষীগঞ্জিনী,
 দেখিলা লক্ষ্মণ বলী সরোবরকুলে,
 সুবর্ণ-কলসি কাঁখে, মধুর অধরে
 সুহাসি ! কমল ফুল ফোটে জলাশয়ে
 প্রভাতে ! কোথাও রথী বাহিরিছে বেগে
 ভীমকায়; পদাতিক, আয়সী-আবৃত,
 ত্যজি ফুলশয্যা; কেহ শূঙ্গ নিনাদিছে
 ভৈরবে নিবারি নিদ্রা; সাজাইছে বাজী
 বাজীপাল^{৩২}; গর্জি গজ সাপটে প্রমদে
 মুদগর; শোভিছে পটু-আবরণ পিঠে
 ঝালরে মুকুতাপাতি; তুলিছে যতনে
 সারথি বিবিধ অস্ত্র স্বর্ণধ্বজ রথে ।
 বাজিছে মন্দিরবন্দে প্রভাতী বাজনা,
 হায় রে, সুমনোহর, বঙ্গগৃহে যথা
 দেবদোলোৎসব বাদ্য; দেবদল যবে,
 আবির্ভাবি ভবতলে, পুঞ্জন রমেশে !^{৩৩}
 অবচয়ি ফুলচয়, চলিছে মালিনী
 কোথাও, আমোদি পথ ফুল-পরিমলে
 উজলি চৌদিক রূপে, ফুলকুলসখী
 উষা যথা ! কোথাও বা দখি দুষ্ক ভারে
 লইয়া, খাইছে ভারী;ক্রমশঃ বাড়িছে
 কন্ডোল, জাগিছে পুরে পুরবাসী যত ।
 কেহ কহে, “চল, ওহে উঠিগে প্রাচীরে ।
 না পাইব স্থান যদি না যাই সকালে
 হেরিতে অস্ত্রত যুদ্ধ জুড়াইব আঁখি
 দেখি আজি যুবরাজে সমর-সাজনে,
 আর বীরশ্রেষ্ঠ সবে ।” কেহ উত্তরিছে
 প্রগলভে,^{৩৪} “কি কাজ, কহ, প্রাচীর উপরে ?
 মুহূর্ত্তে নাশিবে রামে অনুজ লক্ষ্মণে
 যুবরাজ, তাঁর শরে কে স্থির জগতে ?
 দহিবে বিপক্ষদলে, শুদ্ধ তুণে যথা

দেহে বহি, রিপুদম্নী। প্রচণ্ড আঘাতে
দণ্ডি তাত বিভীষণে, বাঁধিবে অধমে।
রাজপ্রসাদের হেতু অবশ্য আসিবে
রণজয়ী সভাতলে; চল সভাতলে।”

কত যে শুনিলা বলী, কত যে দেখিলা,
কি আর কহিবে কবি? হাসি মনে মনে,
দেবাকৃতি, দেববীৰ্য্য, দেব-অস্ত্রধারী
চলিলা যশস্বী, সঙ্গে বিভীষণ রথী;—
নিকুন্তিলা যজ্ঞাগার শোভিল অদূরে।

কুশাসনে ইন্দ্রজিত পূজে ইষ্টদেবে
নিভৃত্তে; কৌষিক বস্ত্র, কৌষিক উত্তরী,
চন্দনের ফোটা ভালে, ফুলমালা গলে।
পুড়ে ধূপদানে ধূপ; জ্বলিছে চৌদিকে
পুত ঘৃতরসে দীপ; পুষ্প রাশি রাশি,
গণ্ডারের শৃঙ্গে গড়া কোষা কোষী, ভরা
হে জাহবি, তব জলে, কলুষনাশিনী
তুমি। পাশে হেম-ঘন্টা, উপহার নানা,
হেম-পাত্রে; রুদ্ধ দ্বার;—বসেছে একাকী
রথীন্দ্র, নিমগ্ন তপে চন্দ্রচূড় যেন—
যোগীন্দ্র—কৈলাস গিরি, তব উচ্চ চূড়ে।

যথা ক্ষুধাতুর ব্যায়্র পশে গোষ্ঠগৃহে
যমদূত, ভীমবাহ লক্ষ্মণ পশিলা
মায়াবলে দেবালয়ে। ঝনঝনিল অসি
পিধানে, ধ্বনিল বাজি তুণীর-ফলকে,
কাঁপিল মন্দির ঘন বীরপদভরে।

চমকি মুদিত আঁখি মিলিলা রাবণি।
দেখিলা সম্মুখে বলী দেবাকৃতি রথী—
তেজস্বী মধ্যাহ্নে যথা দেব অংশুমালী!

সাপ্তাঙ্গে প্রণমি শুর, কৃতাজলিপটে,
কহিলা, “হে বিভাবসু, শুভ ক্ষণে আজি
পূজিল তোমারে দাস, তেঁই, প্রভু, তুমি
পবিত্রিলা লক্ষাপুরী ও পদ অর্পণে!

কিস্ত কি কারণে, কহ, তেজস্বি আইলা
রক্ষঃকুলরিপু নর লক্ষ্মণের রূপে
প্রসাদিতে এ অধীনে? এ কি লীলা তব,
প্রভাময়?” পুনঃ বলী নমিলা ভূতলে।

উত্তরিলা বীরদর্পে রৌদ্র দাশরথি;—
“নাহি বিভাবসু আমি, দেখ নিরখিয়া,
বাবণি! লক্ষ্মণ নাম, জন্ম রঘুকুলে
সংহারিতে, বীরসিংহ, তোমায় সংগ্রামে

আগমন হেথা মম; দেহ রণ মোরে
অবিলম্বে।” যথা পথে সহসা হেরিলে
উর্ধ্ব ফণা ফণীশ্বরে, ত্রাসে হীনগতি
পথিক, চাইলা বলী লক্ষ্মণের পানে।
সভয় হইল আজি ভয়শূন্য হিয়া!
প্রচণ্ড উত্তাপে পিণ্ড, হায় রে গলিল!
গ্রাসিল মিহিরে রাহ, সহসা আঁধারি
তেজঃপুঞ্জ! অস্থনাথে নিদাঘ শুষিল!
পশিল কৌশলে কলি নলের শরীরে!*

বিস্ময়ে কহিলা শুর, “সত্য যদি তুমি
রামানুজ, কহ, রথি, কি ছলে পশিলা
রক্ষোরাজপুরে আজি? রক্ষঃ শত শত,
যক্ষপতিত্রাস বলে, ভীম অস্ত্রপাণি,
রক্ষিছে নগর-দ্বার; শৃঙ্গধরসম
এ পুর-প্রাচীর উচ্চ; প্রাচীর উপরে
অমিছে অযুত যোধ চক্রাবলীরূপে;—
কোন মায়াবলে, বলি, ভুলালে এ সবে?
মানবকুলসম্ভব, দেবকুলোদ্ভবে
কে আছে রথী এ বিশ্বে, বিমুখ্যে রণে
একাকী এ রক্ষোবৃন্দে? এ প্রপঞ্চে তবে
কেন বঞ্চাইছ দাসে, কহ তা দাসেরে
সর্বভুক? কি কৌতুক এ তব, কৌতুকি?
নহে নিরাকার দেব, সৌমিত্রি; কেমনে
এ মন্দিরে পশিবে সে? এখনও দেখ
রুদ্ধ দ্বার! বর, প্রভু, দেহ এ কিঙ্করে
নিঃশঙ্কা করিব লক্ষ্য বধিয়া রাঘবে
আজি, খেদাইব দূরে কিঙ্কিঙ্ক্যা-অধিপে,
বাঁধি আনি রাজপদে দিব বিভীষণে
রাজদ্রোহী। ওই শুন, নাদিছে চৌদিকে
শৃঙ্গ শৃঙ্গনাদিগ্রাম*। বিলম্বিলে আমি,
ভগ্নোদ্যম রক্ষঃ-চমু, বিদাও আমারে!”

উত্তরিলা দেবাকৃতি সৌমিত্রি কেশরী,—
“কৃতান্ত আমি রে তোর, দূরন্ত রাবণি!
মাটি কাটি দংশে সর্প আয়ুহীন জনে!
মদে মত্ত সদা তুই; দেব-বলে বলী,
তবু অবহেলা, মৃঢ় করিস সতত
দেবকুলে। এত দিনে মজিলি দুশ্মতি;
দেবাদেশে রণে আমি আহানি রে তোরে!”
এতেক কহিয়া বলী উলঙ্গিলা অসি
ভৈরবে। ঝলসি আঁখি কালানল-তেজে

ভাতিল কৃপাণবর, শত্রুকরে যথা
ইরম্মদময় বজ্র ! কহিলা রাবণি,—
“সত্য যদি রামানুজ তুমি, ভীমবাছ
লক্ষ্মণ; সংগ্রাম-সাধ অবশ্য মিটাব
মহাহবে”^{৩৮} আমি তব, বিরত কি কভু
রণরঙ্গে ইন্দ্রজিৎ? আতিথেয় সেবা,
তিষ্ঠি, লহ, শূরশ্রেষ্ঠ, প্রথমে এ ধামে—
রক্ষোরিপু তুমি, তবু অতিথি হে এবে।
সাজি বীরসাজে আমি। নিরস্ত্র যে অরি,
নহে রথীকুলপ্রথা আগাতিতে তারে।
এ বিধি, হে বীরবর, অবিদিত নহে,
ক্ষত্র তুমি, তব কাছে,—কি আর কহিব?”

জলদ-প্রতিম স্বনে^{৩৯} কহিলা সৌমিত্রি,
“আনায় মাঝারে বাঘে পাইলে কি কভু
ছাড়ে রে কিরাত তারে? বধিব এখনি,
অবোধ, তেমতি তোরে। জন্ম রক্ষঃকুলে
তোর, ক্ষত্রধর্ম, পাপি, কি হেতু পালিব
তোর সঙ্গে? মারি অরি, পারি যে কৌশলে।”

কহিলা বাসবজেতা, (অভিমন্যু যথা
হেরি সপ্ত শুরে শূর তপ্তলৌহাকৃতি
রোষে!^{৪০}) “ক্ষত্রকুলপ্রানি, শত ধিক্ তোরে,
লক্ষ্মণ! নিলঙ্ঘ্য তুই। ক্ষত্রিয় সমাজে
রোধিবে শ্রবণপথ ঘৃণায়, শুনিলে
নাম তোর রথীবন্দ। তস্কর যেমতি,
পশিলি এ গৃহে তুই; তস্কর-সদৃশ
শাস্তিয়া নিরস্ত্র তোরে করিব এখনি!
পশে যদি কাকোদর গরুড়ের নীড়ে,
ফিরি কি সে যায় কভু আপন বিবরে,
পামর? কে তোরে হেথা আনিল দুম্মতি?”

চক্ষের নিমিষে কোষা তুলি ভীমবাছ
নিষ্কেপিলা ঘোর নাদে লক্ষ্মণের শিরে।
পড়িলা ভূতলে বলী ভীম প্রহরণে,
পড়ে তরুরাজ যথা প্রভঞ্জনবলে
মড়মড়ে। দেব-অস্ত্র বাজিল ঝনঝনি,
কাঁপিল দেউল যেন ঘোর ভূকম্পনে।
বহিল রুধির-ধারা! ধরিলা সত্ত্বরে
দেব-অসি ইন্দ্রজিৎ;—নারিলা তুলিতে

তাহায়। কাম্বুক ধরি কব্বিলা; রহিল
সৌমিত্রির হাতে ধনুঃ। সাপটিলা কোপে
ফলক; বিফল বল সে কাজ সাধনে।
যথা শুগুধর টানে শুণ্ডে জড়াইয়া
শুঙ্গধরশঙ্গে বৃথা, টানিলা তুণীরে
শূরেন্দ্রে! মায়ার মায়া কে বুঝে জগতে!
চাহিলা দুয়ার পানে অভিমানে মानी।
সচকিতে বীরবর দেখিলা সম্মুখে
ভীমতম শূল হস্তে, ধুমকেতুসম
খুল্লতাত বিভীষণে—বিভীষণ রণে!

“এত ক্ষণে”—অরিন্দম কহিলা বিবাদে—
“জানিু কেমনে আসি লক্ষ্মণ পশিল
রক্ষঃপুরে। হায়, তাত, উচিত কি তব
এ কাজ, নিকষা সতী তোমার জননী,
সহোদর রক্ষঃশ্রেষ্ঠ? শূলীশস্ত্রনিভ^{৪১}
কুম্ভকর্ণ? ভ্রাতৃপুত্র বাসববিজয়ী।
নিজগৃহপথ, তাত, দেখাও তস্করে?
চণ্ডালে বসাও আনি রাজার আলয়ে?
কিস্ত নাহি গঞ্জি^{৪২} তোমা, গুরু জন তুমি
পিতৃতুল্য। ছাড় দ্বার, যাব অস্ত্রাগারে,
পাঠাইব রামানুজে শমন-ভবনে,
লঙ্কার কলঙ্ক আজি ভুঞ্জিব^{৪৩} আহবে।”

উত্তরিলা বিভীষণ; “বৃথা এ সাধনা,
ধীমান! রাখবদাস আমি; কি প্রকারে
তাহার বিপক্ষ কাজ করিব, রক্ষিতে
অনুরোধ?” উত্তরিলা কাতরে রাবণি;—
“হে পিতৃব্য, তব বাক্যে ইচ্ছি মরিবারে।
রাঘবের দাস তুমি? কেমনে ও মুখে
আনিলে এ কথা, তাত, কহ তা দাসেরে।
স্থাপিলা বিধুরে^{৪৪} বিধি স্থাণুর ললাটে;
পড়ি কি ভূতলে শশী যান গড়াগড়ি
ধলায়? হে রক্ষোরথি, ভুলিলে কেমনে
কে তুমি? জনম তব কোন্ মহাকুলে?
কে বা সে অধম রাম? স্বছে সরোবরে
করে কেলি রাজহংস পঙ্কজ-কননে;
যায় কি সে কভু, প্রভু, পঙ্কিল সলিলে
শৈবালদলের ধাম? মুগেন্দ্রে কেশরী,

৩৮. মহাযুদ্ধ। ৩৯. মেঘনাদবধের ন্যায় গুরুগভীর শব্দে। ৪০. মহাভারতের অভিমন্যুবধ প্রসঙ্গ। দ্রোণাচার্য, কর্ণ অশ্বখামা, পুরোধন, দুঃশাসন ও শকুনি—এই সপ্তরথী একযোগে যুদ্ধ করে ব্যুহমধ্যে একা অভিমন্যুকে বধ করেছিলেন। ৪১. শূলধারী মহাদেবের ন্যায়। ৪২. গঞ্জনা করি না। ৪৩. কিনাশ করব। ৪৪. চন্দ্র।

কবে হে বীরকেশরি, সম্ভাষে শৃগালে .
মিত্রভাবে? অঞ্জ দাস, বিজ্ঞতম তুমি,
অবিদিত নহে কিছু তোমার চরণে।
ক্ষুদ্রমতি নর, শূর লক্ষণ; নহিলে
অস্ত্রহীন যোধে কি সে সন্ধ্যোষে সংগ্রামে?
কহ, মহারথি, এ কি মহারথীপ্রথা?
নাহি শিশু লক্ষাপুরে, শুনি না হাসিবে
এ কথা। ছাড়হ পথ; আসিব ফিরিয়া
এখনি! দেখিব আজি, কোন দেববলে,
বিমুখে সমরে মোরে সৌমিত্রি কুমতি!
দেব-দৈত্য-নর-রণে, স্বচক্ষে দেখেছ,
রক্ষঃশ্রেষ্ঠ, পরাক্রম দাসের! কি দেখি
ডরিবে এ দাস হেন দুর্কল মানবে?
নিকুণ্ডিলা যজ্ঞাগারে প্রগল্ভে পশিল
দস্তী; আজ্ঞা কর দাসে, শাস্তি নরাধমে।
তব জন্মপুরে, তাত, পদার্পণ করে
বনবাসী! হে বিধাতঃ, নন্দন-কাননে
ভ্রমে দূরাচার দৈত্য? প্রফুল্ল কমলে
কীটবাস? কহ তাত, সহিব কেমনে
হেন অপমান আমি, —স্নাতৃ-পুত্র তব?
তুমিও, হে রক্ষোমণি, সহিছ কেমনে?”

মহামন্ত্র-বলে যথা নব্রশিরঃ ফণী,
মলিনবদন লাজে, উত্তরিলো রথী
রাবণ-অনুজ, লক্ষি রাবণ-আস্বজ্ঞে;
“নহি দোষী আমি, বৎস; বৃথা ভর্ৎস মোরে
তুমি! নিজ কৰ্ম-দোষে, হয়, মজাইলা
এ কনক-লক্ষা রাজা, মজিলা আপনি!”
বিরত সতত পাপে দেবকুল; এবে
পাপপূর্ণ লক্ষাপুরী; প্রলয়ে যেমতি
বসুধা, ডুবিছে লক্ষা এ কালসলিলে!
রাঘবের পদাশ্রয়ে রক্ষার্থে আশ্রয়ী
তেঁই আমি! পরদোষে কে চাহে মজিতে?”
কৃষিলা বাসবত্রাস। গস্তীরে যেমতি
নিশীথে অন্ধরে মস্ত্রে জীমূতেস্ত্র কোপি,^{৪৫}
কহিলা বীরেন্দ্রে বলী,—“ধৰ্মপথগামী,
হে রাক্ষসরাজানুজ, বিখ্যাত জগতে
তুমি;—কোন ধৰ্ম মতে, কহ দাসে, শুনি,

জ্ঞাতিত্ব, ভ্রাতৃত্ব, জাতি,এ সকলে দিলা
জলাঞ্জলি? শাস্ত্রে বলে, গুণবান্ যদি
পরজন, গুণহীন স্বজন, তথাপি
নির্গুন স্বজন শ্রেয়ঃ, পরঃ পরঃ সদা!^{৪৬}
এ শিক্ষা, হে রক্ষোবর, কোথায় শিখিলে?
কিন্তু বৃথা গঞ্জি তোমা! হেন সহবাসে,
হে পিতৃব্য, বর্করতা কেন না শিখিবে?
গতি যার নীচ সহ, নীচ সে দুর্ন্যতি!”^{৪৭}

হেথায় চেতন পাই মায়ায় যতনে
সৌমিত্রি, হুকারে ধনুঃ টঙ্কারিলা বলী।
সন্ধানি^{৪৮} বিক্ষিলা শূর খরতর শরে
অরিন্দম ইন্দ্রজিতে, তারকারি যথা
মহেশ্বাস শরজালে বিধেন তারকে!^{৪৯}
হায় রে, রুধির-ধারা (ভূধর-শরীরে
বহে বরিষার কালে জলস্রোতঃ যথা,)
বহিল, তিতিয়া বস্ত্র, তিতিয়া মেদিনী!
অধীর ব্যথায় রথী, সাপটি সত্বরে
শঙ্খ, ঘণ্টা, উপহারপাত্র ছিল যত
যজ্ঞাগারে, একে একে নিক্ষেপিলা কোপে;
যথা অভিমন্যু রথী, নিরস্ত্র সমরে
সপ্ত রথী অস্ত্রবলে, কভু বা হানিলা
রথচূড়, রথচক্র; কভু ভগ্ন অসি,
ছিন্ন চৰ্ম, ভিন্ন বর্শ, যা পাইলা হাতে!^{৫০}
কিন্তু মায়ায়ময়ী মায়া, বাহু-প্রসরণে,
ফেলাইলা দূরে সবে, জননী যেমতি
খেদান মশকবন্দে সুপ্ত সূত হতে
করপদ্ম-সঞ্চালনে!^{৫১} সরোষে রাবণি
ধাইলা লক্ষণ পানে গজ্জি-ভীম নাদে,
প্রহারকে হেরি যথা সম্মুখে কেশরী!
মায়ায় মায়ায় বলী হেরিলা চৌদিকে
ভীষণ মহিষাকৃৎ ভীম দণ্ডধরে;
শূল হস্তে শূলপাগি; শঙ্খ, চক্র গদা
চতুর্ভূজে চতুর্ভূজ; হেরিলা সভয়ে
দেবকুলরথীবৃন্দে সুদিব্য বিমানে।
বিষাদে নিশ্বাস ছাড়ি দাঁড়াইলা বলী
নিষ্কল^{৫২}, হায় রে মরি, কলাধর যথা
রাহুগ্রাসে; কিম্বা সিংহ আনায় মাঝারে!

৪৫. আপনা আপনি কিন্ট হলে। ৪৬. ক্রুদ্ধ হয়ে। ৪৭. প্রচলিত উক্তি প্রয়োগ। ৪৮. রামলক্ষণের অনুগামী
বিভীষণের প্রতি তিরস্কারবাক্য। ৪৯. লক্ষ্য করে। ৫০. কার্তিক কর্তৃক তারকাসুর বধের পৌরাণিক প্রসঙ্গ।
৫১. মেঘনাদের সঙ্গে লক্ষণের অনায়ায়যুদ্ধের প্রসঙ্গে অভিমন্যু-হত্যার উল্লেখ। ৫২. লক্ষণের নিক্ষিপ্ত তীর মেঘনাদ
মশকাদি তাড়নের ন্যায় সরিয়ে দিচ্ছেন—হোমরীয় কল্পনার প্রভাবে। ৫৩. বলহীন, নিথর।

তাজি ধনুঃ, নিষ্কোষিলা অসি মহাতেজাঃ
 রামানুজঃ ঝলসিলা ফলক-আলোকে
 নয়ন ! হায় রে, অন্ধ অরিপদম বলী
 ইন্দ্রজিৎ, ঋগাঘাতে পড়িলা ভূতলে
 শোণিতার্দ্র । থরথরি কাঁপিলা বসুধা;
 গর্জ্জিলা উথলি সিদ্ধু ! ভৈরব আরবে
 সহসা পুরিল বিশ্ব ! ত্রিদিবে, পাতালে,
 মর্ত্যে, মরমর জীব প্রমাদ গণিলা
 আতঙ্কে ! যথায় বসি হৈম সিংহাসনে
 সভায় কর্ণূরপতি, সহসা পড়িল
 কনক-মুকুট খসি, রথচূড় যথা
 রিপূরথী কাটি যবে পাড়ে রথতলে ।
 সশঙ্ক লঙ্কেশ শূর স্মরিলা শঙ্করে !
 প্রমীলার বামেতর নয়ন নাচিল !
 আত্মবিস্মৃতিতে, হায়, অকস্মাৎ সতী
 মুছিলা সিন্দুরবিন্দু সুন্দর ললাটে !
 মুর্চ্ছিলা রাক্ষসেন্দ্রাণী মন্দোদরী দেবী
 আচম্বিতে । মাতৃকোলে নিদ্রায় কাঁদিল
 শিশুকুল আর্জুনাদে, কাঁদিল যেমতি
 ব্রজে ব্রজকুলশিশু, যবে শ্যামমণি,
 আঁধারি সে ব্রজপুর, গেলা মধুপুরে !^{৫৪}
 অন্যায় সমরে পড়ি, অসুরারি-রিপু,
 রাক্ষসকুল ভরসা, পরুষ^{৫৫} বচনে
 কহিলা লক্ষ্মণ শরে, “বীরকুলপ্ৰানি,
 সুমিত্রানন্দন তুই ! শত ধিক্ তোরে !
 রাবণনন্দন আমি, না ডরি শমনে !
 কিন্তু তোর অস্ত্রাঘাতে মরিনু যে আজি,
 পামর, এ চিরদুঃখ রহিল রে মনে !
 দৈত্যকুলদল^{৫৬} ইন্দ্রে দমিনু সংগ্রামে
 মরিতে কি তোর হাতে ? কি পাপে বিধাতা
 দিলেন এ তাপ দাসে, বুঝিব কেমনে ?
 আর কি কহিব তোরে ? এ বারতা যবে
 পাইবেন রক্ষোনাথ, কে রক্ষিবে তোরে,
 নরাধম ? জলধির অতল সলিলে
 ডুবিস যদিও তুই, পশিবে সে দেশে
 রাজরোষ—বাড়বাগ্নিরাশিসম তেজে !
 দাবাগ্নিসদৃশ তোরে দক্ষিণে কাননে
 সে রোষ, কাননে যদি পশিস্ কুমতি ।
 নারিবে রজনী, মুঢ় আবরিতে তোরে ।

দানব, মানব, দেব, কার সাধ্য হেন
 ত্রাণিবে, সৌমিত্রি, তোরে, রাবণ কৃষিলে ?
 কে বা এ কলঙ্ক তোর ডঞ্জিবে জগতে,
 কলঙ্কি ?” এতেক কহি, বিবাদে সুমতি
 মাতৃপিতৃপাদপদ্ম স্মরিলা অস্তিতে ।
 অধীর হইলা ধীর ভাবি প্রমীলারে
 চিরানন্দ ! লোহ সহ মিশি অশ্রুধারা,
 অনর্গল বহি, হায়, আর্দ্রিল মহীরে ।
 লঙ্কার পঙ্কজ-রবি গেলা অস্ত্রাচলে ।
 নির্বাণ পাবক যথা, কিম্বা ত্রিষাম্পতি
 শান্তরশ্মি, মহাবল রহিলা ভূতলে ।

কহিলা রাবণানুজ সজল নয়নে;—
 “সুপট্ট-শয়নশায়ী তুমি, ভীমবাহু,
 সদা, কি বিরাগে এবে পড়ি হে ভূতলে ?
 কি কহিবে রক্ষো রাজ হেরিলে তোমারে
 এ শয্যায় ? মন্দোদরী, রক্ষঃকুলেন্দ্রাণী ?
 শরদিন্দুনিভাননা প্রমীলা সুন্দরী ?
 সুরবালা-প্ৰানি রূপে দিতিসূতা যত
 কিঙ্করী ? নিকষা সতী—বৃদ্ধা পিতামহী ?
 কি কহিবে রক্ষঃকুল, চূড়ামণি তুমি
 সে কুলে ? উঠ, বৎস ! খুল্লতাত আমি
 ডাকি তোমা—বিভীষণ; কেন না শুনিছ,
 প্রাণাধিক ? উঠ, বৎস, খুলিব এখনি
 তব অনুরোধে দ্বার ! যাও অস্ত্রালয়ে
 লঙ্কার কলঙ্ক আজি ঘুচাও আহবে !
 হে কর্ণূরকুলগর্ক, মধ্যাহ্নে কি কভু
 যান চলি অস্ত্রাচলে দেব অংশুমালী
 জগতনয়নানন্দ ? তবেকেন তুমি
 এ বেশে, যশস্বি, আজি পড়ি হে ভূতলে ?
 নাদে শৃঙ্গনাদী, শুন, আহুনি তোমারে;
 গজ্জৈ গজরাজ, অশ্ব ছেবিছে ভৈরবে;
 সাজে রক্ষঃঅনীকিনী^{৫৭}, উগ্রচণ্ডা রণে ।
 নগর-দুয়ারে অরি, উঠ, অরিপদম !
 এ বিপুল কুলমান রাখ এ সমরে !”

এইরূপে বিলাপিলা বিভীষণ বলী
 শোকে । মিত্রশোকে শোকী সৌমিত্রি কেশরী
 কহিলা,—“সম্বর খেদ, রক্ষঃচূড়ামণি !
 কি ফল এ বৃথা খেদে ? বিধির বিধানে
 বাধিনু এ যোধে আমি, অপরাধ নহে

তোমার ! যাইব চল যথায় শিবিরে
 চিত্তাকুল চিত্তামণি দাসের বিহনে ।
 বাজিছে মঙ্গলবাদ্য শুন কান দিয়া
 ত্রিদশ-আলয়ে, শুর ।” শুনিলে সুরথী
 ত্রিদিব-বাদিত্র-ধ্বনি—স্বপনে যেমনি
 মনোহর ! বাহিরিলা আশুগতি দৌঁহে,
 শার্দূলী অবর্ত্তমানে, নাশি শিশু যথা
 নিশাদ, পবনবেগে ধায় উর্ধ্বশ্বাসে
 প্রাণ লয়ে, পাছে ভীমা আক্রমে সহসা,
 হেরি গতজীব শিশু, বিবশা বিষাদে !
 কিম্বা যথা দ্রোণপুত্র অশ্বখামা রথী,
 মারি সুপ্ত পঞ্চ শিশু পাশ্ববশিবিরে
 নিশীথে, বাহিরি, গেলা মনোরথগতি,
 হরষে তরাসে ব্যগ্র, দুয়োর্ধান যথা
 ভগ্ন-উরু কুরুরাজ কুরুক্ষেত্ররণে !^{৫৮}
 মায়ার প্রসাদে দৌঁহে অদৃশ্য, চলিলা
 যথায় শিবিরে শুর মৈথিলীবিলাসী ।

প্রণমি চরণাশ্বজে, সৌমিত্রি কেশরী
 নিবেদিলা করপুটে,—“ও পদ-প্রসাদে,
 রঘুবংশ-অবতংস, জয়ী রক্ষোরণে
 এ কিঙ্কর ! চুষি শিরঃ, আলিঙ্গি আদরে
 অনুজে, কহিলা প্রভু সজল নয়নে,—
 “লভিনু সীতায় আজি তব বাহুবলে,

হে বাহুবলেন্দ্র ! ধন্য বীরকুলে তুমি !
 সুমিত্রা জননী ধন্য ! রঘুকুলনিধি
 ধন্য পিতা দশরথ, জন্মদাতা তব !
 ধন্য আমি তবাপ্রজ্ঞ ! ধন্য জন্মভূমি
 অযোধ্যা ! এ যশঃ তব ঘোষিবে জগতে
 চিরকাল ! পূজ কিন্তু বলদাতা দেবে,
 প্রিয়তম ! নিজবলে দুর্বল সতত
 মানব; সু-ফল ফলে দেবের প্রসাদে !”

মহামিত্র বিভীষণে সন্তাষি সুস্বরে
 কহিলা বেদেহীনাথ,—“শুভক্ষণে, সখে
 পাইনু তোমায় আমি এ রাক্ষসপুরে ।
 রাঘবকুলমঙ্গল তুমি রক্ষোবেশে !
 কিনিলে রাঘবকুলে আজি নিজগুণে,
 গুণমণি ! গ্রহরাজ দিননাথ যথা,
 মিত্রকুলরাজ তুমি, কহিনু তোমাতে !
 চল সবে, পূজি তাঁরে, শুভঙ্করী যিনি
 শঙ্করী !” কুসুমাসার বৃষ্টিলা আকাশে
 মহানন্দে দেববৃন্দ; উল্লাসে নাদিল,
 “জয় সীতাপতি জয় !” কটক চৌদিকে,—
 আতঙ্কে কনক-লঙ্কা জাগিলা সে রবে ।

ইতি শ্রীমেঘনাদবধে কাব্যে বধো নাম
 ষষ্ঠঃ সর্গঃ ।

সপ্তম সর্গ

উদীলা আদিত্য এবে উদয়-অচলে,
 পদ্মপর্ণে সুপ্ত দেব পদ্মযোনি’ যেন,
 উন্মীলি নয়নপদ্ম সুপ্রসন্ন ভাবে,
 চাহিলা মহীর পানে ! উল্লাসে হাসিলা
 কুসুমকুণ্ডলা মহী, মুক্তামালা গলে ।
 উৎসবে মঙ্গলবাদ্য উথলে যেমতি
 দেবালয়ে, উথলিল সুস্বরলহরী
 নিকুঞ্জে । বিমল জলে শোভিল নলিনী;
 স্থলে সমপ্রেক্ষাকাঙ্ক্ষী হেম সূর্যমুখী ।

নিশীর শিশিরে যথা অবগাহে দেহ
 কুসুম, প্রমীলা সতী, সুবাসিত জলে

স্নানি পীনপয়োধরা, বিনানিলা বেণী ।
 শোভিল মুকুতাপাতি সে চিকণ কেশে;
 চন্দ্রমার রেখা যথা ঘনাবলী মাঝে
 শরদে !^১ রতনময় কঙ্কণ লইলা
 ভূষিতে মৃগালভূজ সুমৃগালভূজা;—
 বেদনিল বাহু, আহা, দৃঢ় বাঁধে যেন,
 কঙ্কণ ! কোমল কণ্ঠে স্বর্ণকণ্ঠমালা
 ব্যথিল কোমল কণ্ঠ ! সন্তাষি বিস্ময়ে
 বসন্তসৌরভা সখী বাসন্তীরে, সতী
 কহিলা,—“কেন লো, সাই, না পারি পরিতে
 অলঙ্কার ? লঙ্কাপুরে কেন বা শুনছি

৫৮. মহাভারতের দুর্যোধনের মৃত্যু ও অশ্বখামা কৃপাচার্য কর্তৃক দ্রৌপদীর পঞ্চ শিশুপুত্রের হত্যাকাহিনী প্রসঙ্গ ।

১. ব্রহ্মা । ২. পতিপ্রাণা প্রমীলার রূপসজ্জার মাধ্যমে কবির হৃদয়ের গভীর সহনুভূতির প্রকাশ ঘটেছে । মেঘনাদের মৃত্যু সংবাদ তখনো প্রমীলা পাননি ।

রোদন-নিনাদ দূরে, হাহাকার ধ্বনি ?
বামেতর আঁখি মোর নাচিছে সতত;
কাঁদিয়া উঠিছে প্রাণ ! না জানি, স্বজনি,
হায় লো, না জানি আজি পড়ি কি বিপদে ?
যজ্ঞাগারে প্রাণনাথ, যাও তাঁর কাছে,
বাসন্তি ! নিবার যেন না যান সমরে
এ কুদিনে বীরমণি । কহিও জীবেশে
অনুরোধে দাসী তাঁর ধরি পা দুখানি !”

নীরবিলা বীণাবাণী, উত্তরীলা সখী
বাসন্তী, “বাড়িছে ক্রমে, শুন কান দিয়া
আর্তনাদ, সুবদনে ! কেমনে কহিব
কেন কাঁদে পুরবাসী ? চল আশুগতি
দেবের মন্দিরে যথা দেবী মন্দোদরী
পূজিছেন আশুতোষে । মত্ত রণমদে,
রথ, রথী, গজ, অশ্ব চলে রাজপথে;
কেমনে যাইব আমি যজ্ঞাগারে, যথা
সাজিছেন রণবেশে সদা রণজয়ী
কাস্ত তব, সীমন্তিনী ?” চলিলা দুজনে
চন্দ্রচূড়ালয়ে, যথা রক্ষঃকুলেশ্বরী
আরাধেন চন্দ্রচূড়ে রক্ষিতে নন্দনে—
বৃথা ! ব্যগ্রচিত্ত হোঁহে চলিলা সত্বরে ।

বিরসবদন এবে কৈলাস-সদনে
গিরিশ । বিবাদে ঘন নিশ্বাসি ধূর্জটি,
হৈমবতী পানে চাহি, কহিলা, “হে দেবি,
পূর্ণ মনোরথ তব; হত রথীপতি
ইন্দ্রজিৎ কাল রণে । যজ্ঞাগারে বলী
সৌমিত্রি নাশিল তারে মায়ার কৌশলে !
পরম ভকত মম রক্ষঃকুলনিধি,
বিধুমুখি ! তার দুঃখে সদা দুঃখী আমি ।
এই যে ত্রিশূল, সতি হেরিছ এ করে,
ইহার আঘাত হতে গুরুতর বাজে
পুত্রশোক ! চিরস্থায়ী, হায়, সে বেদনা,—
সর্ব্বহর কাল তহে না পারে হরিতে !
কি কবে রাবণ, সতি, শুনি হত রণে
পুত্রবর ? অকস্মাৎ মরিবে, যদ্যপি
নাহি রক্ষি রক্ষে আমি রুদ্রতেজোদানে ।
তৃষিণু বাসবে, সাধিব, তব অনুরোধে ;
দেহ অনুমতি এবে তুযি দশাননে ।”

উত্তরীলা কাতায়নী, “যাহা ইচ্ছা কর,
ত্রিপুরারি !^৩ বাসবের পূরিবে বাসনা,
ছিল ভিক্ষা তব পদে, সফল তা বেবে ।
দাসীর ভকত, প্রভু, দাশরথি রথী;
এ কথাটি, বিশ্বনাথ থাকে যেন মনে !
আর কি কহিবে দাসী ও পদরাজীব ?”

হাসিয়া স্মরিলা শূলী বীরভদ্র শুরে ।
ভীষণ-মুরতি রথী প্রণমিলে পদে
সান্ত্বাসে, কহিলা হর,—“গতজীব রণে
আজি ইন্দ্রজিৎ, বৎস । পশি যজ্ঞাগারে,
নাশিল সৌমিত্রি তারে উমার প্রসাদে ।
ভয়াকুল দূতকুল এ বারতা দিতে
রক্ষোনাথে । বিশেষতঃ কি কৌশলে বলী
সৌমিত্রি নাশিলা রণে দুর্ম্মদ রাক্ষসে,
নাহি জানে রক্ষোদূত । দেব ভিন্ন, রথি,
কার সাধ্য দেবমায়ী বুঝে এ জগতে ।
কনক-লঙ্কায় শীঘ্র যাও, ভীমবাহু,
রক্ষোদূতবেশে তুমি; ভর, রুদ্রতেজে,
নিকষানন্দনে আজি আমার আদেশে ।”

চলিলা আকাশপথে বীরভদ্র বলী
ভীমাকৃতি; ব্যোমচর নমিলা চৌদিকে
সভয়ে; সৌন্দর্য্যতেজে হীনতেজাঃ রবি,
সুধাংশু নিরংশু যথা সে রবির তেজে ।
ভয়ঙ্করী শূলছায়া পড়িল ভূতলে ।
গভীর নিনাদে নাদি অনুরাশিপতি
পূজিলা ভৈরবদূতে । উত্তরীলা রথী
রক্ষঃপুরে ; পদচাপে থর থর থরি
কাঁপিল কনক-লঙ্কা, বৃক্ষশাখা যথা
পক্ষীন্দ্র গরুড় বৃক্ষে পড়ে উড়ি যবে ।

পশি যজ্ঞাগারে শুর দেখিলা ভূতলে
বীরেন্দ্র ! প্রফুল্ল, হায় কিংশুক^৪ যেমতি
ভূপতিত বনমাঝে প্রভঞ্জন-বলে ।
সজল নয়নে বলী হেরিলা কুমারে ।
ব্যথিল অমর-হিয়া মর-দুঃখ হেরি ।

কনক-আসনে যথা দশানন রথী,
রক্ষঃকুলচূড়ামণি, উত্তরীলা তথা
দূতবেশে বীরভদ্র, ভস্মরাশি মাঝে
গুপ্ত বিভাবসু সম তেজোহীন এবে ।

প্রণামের ছলে বলী আশীষি রাক্ষসে,
দাঁড়াইলা করপুটে*, অশ্রময় আঁধি,
সন্মুখে। বিস্ময়ে রাজা সুধিলা, “কি হেতু
হে দূত, রসনা তব বিরত সাধিতে
স্বকর্ম? মানব রাম, নহ ভৃত্য তুমি
রাঘবের, তবে কেন, হে সন্দেশ-বহ,
মলিন বদন তব? দেবদৈত্যজয়ী
লঙ্কার পঙ্কজরবি সাজিছে সমরে
আজি, অমঙ্গল বার্তা কি মোরে কহিবে?
মরিল রাঘব যদি ভীষণ অশনি-
সম প্রহরণে রণে, কহ সে বারতা,
প্রসাদি তোমারে আমি।” ধীরে উত্তরিলা
ছন্নবেশী; “হায়, দেব, কেমনে নিবেদি
অমঙ্গল বার্তা পদে, ক্ষুদ্র প্রাণী আমি?
অভয় প্রদান অগ্রে, হে কর্ণুরপতি,
কর দাসে!” ব্যগ্রচিত্তে উত্তরিলা বলী,
“কি ভয় তোমার, দূত? কহ ত্বর করি,
শুভাশুভ ঘটে ভবে বিধির বিধানে।
দানি নু অভয়, ত্বর কহ বার্তা মোরে!”

বিরূপাক্ষচর বলী রক্ষোদূতবেশী
কহিলা, “হে রক্ষঃশ্রেষ্ঠ, হত রণে আজি
কর্ণুর-কুলের গর্ভ মেঘনাদ রথী!”

যথা যবে ঘোর বনে নিষাদ বিঁধিলে
মৃগেন্দ্রে নশ্বর শরে, গর্জি ভীম নাদে
পড়ে মহীতলে হরি, পড়িলা ভূপতি
সভায়! সচিববৃন্দ, হাহাকার রবে,
বেড়িল চৌদিকে শুরে; কেহ বা আনিল
সুশীতল বারি পাত্রে, বিউনিল কেহ।

রুদ্রতেজে বীরভদ্র আশু চেতনিলা
রক্ষাবরে। অগ্নিকণা পরশে যেমতি
বারুদ উঠিয়া বলী, আদেশিলা দূতে
“কহ, দূত, কে বধিল চিররণজয়ী
ইন্দ্রজিতে আজি রণে? কহ শীঘ্র করি।”

উত্তরিল ছন্নবেশী; “ছন্নবেশে পশি
নিকুণ্ডিলা যজ্ঞাগারে সৌমিত্রি কেশরী,
রাজেন্দ্র, অন্যায় যুদ্ধে বধিল কুমতি
বীরেন্দ্রে! প্রফুল্ল, হায়, কিংশুক যেমনি
ভূপতিত বনমাঝে প্রভঞ্জন-বলে,

মন্দিরে দেখিনু শুরে। বীরশ্রেষ্ঠ তুমি
রক্ষোনাথ, বীরকর্মে ভুল শোক আজি।
রক্ষঃকুলাঙ্গনা, দেব, আর্দ্রিবে মহীরে
চক্ষুঃজলে। পুত্রহানী* শক্র যে দুর্মতি,
ভীম প্রহরণে তারে সংহারি সংগ্রামে,
তোষ তুমি, মহেৎবাস, পৌর জনগণে!”

আচম্বিতে দেবদূত অদৃশ্য হইলা,
স্বর্গীয় সৌরভে সভা পুরিল চৌদিকে।
দেখিলা রাক্ষসনাথ দীর্ঘজটাবলী,
ভীষণ ত্রিশূল-ছায়া।* কৃতাজ্জলিপুটে
প্রণমি, কহিলা শৈব; “এত দিনে, প্রভু,
ভাগ্যহীন ভৃত্যে এবে পড়িল কি মনে
তোমার? এ মায়া, হায়, কেমনে বুঝিব
মৃত্ত আমি, মায়াময়? কিন্তু অগ্রে পালি
আজ্ঞা তব, হে সর্বভজ; পরে নিবেদিব
যা কিছু আছে এ মনে ও রাজীবপদে।”

সরোষে—তেজস্বী আজি মহারুদ্রতেজে—
কহিলা রাক্ষসশ্রেষ্ঠ, “এ কনক-পুরে,
ধনুর্ধর আছ যত, সাজ শীঘ্র করি
চতুরঙ্গে! রণরঙ্গে ভুলিব এ জ্বালা—
এ বিষম জ্বালা যদি পারি রে ভুলিতে!”

উখলিল সভাতলে দুন্দুভির ধ্বনি,
শৃঙ্গনিদাদক যেন, প্রলয়ের কালে,
বাজাইলা শৃঙ্গবরে গভীর নিনাদে!
যথা সে ভৈরব রবে কৈলাস-শিখরে-
সাজে আশু ভূতকুল সাজিল চৌদিকে
রাক্ষস; টলিল লঙ্কা বীরপদভরে!
বাহিরিল অগ্নিবর্ণ রথগ্রামে বেগে
স্বর্ণধ্বজ; ধূস্রবর্ণ বারণ, আশ্ফালি
ভীষণ মুদগর শুণ্ডে; বাহিরিল হ্রেষে
তুরঙ্গম, চতুরঙ্গে আইলা গর্জিয়া
চামর*, অমর-ত্রাস; রথীবৃন্দ সহ
উদগ্র*, সমরে উগ্র; গজবৃন্দ মাঝে
বাস্কল*, জীমূতবৃন্দ মাঝারে যেমতি
জীমূতবাহন বজ্রী ভীম বজ্র করে!
বাহিরিল হুঙ্কারি অসিলোমা*° বলী
অশ্বপতি; বিভালাক্ষ*° পদাতিবদলে
মহাভয়ঙ্কর রক্ষঃ দুর্মদ সমরে!

৬. যুক্ত করে। ৭. বাতাস করল। ৮. পুত্রকে যে হনন করল। ৯. রাবণ শিবের উপাসক ছিলেন। ১০. কবি চামর, উদগ্র, বাস্কল, অসিলোমা, বিভালাক্ষ প্রভৃতি রাক্ষস সেনাপতিদের নাম মার্কণ্ডেয় চণ্ডী থেকে গ্রহণ করেছেন।

আইল পতাকীদল, উড়িল পতাকা,
ধুমকেতুরাশি যেন উদিল সহসা
আকাশে! রাক্ষসবাদ্য বাজিল চৌদিকে।

যথা দেবতেজে জন্মি দানবনাশিনী
চণ্ডী, দেব-অস্ত্রে সতী সাজিলা উল্লাসে
অট্টহাসি, লঙ্কাধামে সাজিলা ভৈরবী
রক্ষঃকুল-অনীকিনী—উগ্রচণ্ডা রণে।^{১১}
গজরাজতেজঃ ভুজে; অশ্বগতি পদে;
স্বর্ণরথ শিরঃচূড়া; অঞ্চল পতাকা
রত্নময়; ভেরী, তুরী, দুন্দুভি, দামামা
আদি বাদ্য সিংহনাদ! শেল, শক্তি, জাটি,
তোমর, ভোমর, শূল, মুঘল, মুষ্কার,
পট্টিশ, নারাচ, কৌস্ত—শোভে দন্তরূপে!
জনমিল নয়নাগ্নি সাঁজোয়ার তেজে!
থর থর থরে মহী কাঁপিলা সঘনে;
কম্পোলিলা উথলিয়া সভয়ে জলধি;
অধীর ভূধরব্রজ^{১২},—ভীমার গর্জনে,
পুনঃ যেন জন্মি চণ্ডী নিনাদিলা রোষে!

চমকি শিবিরে শুর রবিকুলরবি
কহিলা সত্ত্বাষি মিত্র বিভীষণে, “দেখ,
হে সখে, কাঁপিছে লঙ্কা মুহুমুহঃ এবে
ঘোর ভুকম্পনে যেন! ধুমপঞ্জ উড়ি
আবরিছে দিননাথে ঘন ঘন রূপে;
উজলিছে নভস্তল ভয়ঙ্করী বিভা,
কালাগ্নিসম্ভবা যেন শুন, কান দিয়া,
কম্পোল, জলধি যেন! উথলিছে দূরে
লয়িতে^{১৩} প্রলয়ে বিশ্ব!” কহিলা—সত্রাসে
পাণ্ডুগণ্ডদেশ রক্ষঃ, মিত্রচূড়ামণি,
“কি আর কহিব দেব? কাঁপিছে এ পুরী
রক্ষাবীরপদভরে, নহে ভুকম্পনে!
কালাগ্নিসম্ভবা বিভা নহে যা দেখিছ
গগনে, বৈদেহীনাথ; স্বর্ণবর্ষ-আভা
অস্ত্রাদির তেজঃ সহ মিশি উজলিছে
দশ দিশ! রোধিছে যে কোলাহল, বলি,
শ্রবণকুহর এবে, নহে সিদ্ধধ্বনি;
গরজে রাক্ষসচমু, মাতি বীরমদে।
আকুল পুত্রেন্দ্রশোকে, সাজিছে সুরথী
লঙ্কেশ! কেমনে, কহ রক্ষিবে লক্ষ্মণে,
আর যত বীরে, বীর, এঘোর সঙ্কটে?”

সুস্থরে কহিলা প্রভু, “যাও ত্বরা করি
মিত্রবর, আন হেথা আহ্বানি সত্বরে
সৈন্যাধ্যক্ষদলে তুমি। দেবাস্তিত সদা,
এ দাস; দেবতাকুল রক্ষিবে দাসেরে।”

শৃঙ্গ ধরি রক্ষোবর নাদিলা ভৈরবে।
আইলা কিঙ্কিঙ্ক্যানাথ গজপতিগতি;
রণবিশারদ শুর অঙ্গদ; আইলা
নল, নীল দেবাকৃতি; প্রভঞ্জনসম
ভীমপরাক্রম হনু; জযুবান বলী;
বীরকুলর্ভব বীর শরভ; গবাক্ষ
রক্তাক্ষ, রাক্ষসত্রাস; আর নেতা যত।

সত্ত্বাষি বীরেন্দ্রদলে যথাবিধি বলী
রাঘব, কহিলা প্রভু; “পুত্রশোকে আজি
বিকল রাক্ষসপতি সাজিছে সত্বরে
সহ রক্ষঃ-অনীকিনী; সঘনে চলিছে
বীরপদভরে লঙ্কা! তোমরা সকলে
ত্রিভুবনজয়ী রণে; সাজ ত্বরা করি;
রাখ গো রাঘবে আজি এ ঘোর বিপদে।
স্ববন্ধুবাক্ষবহীন বনবাসী আমি
ভাগ্যদোষে; তোমরা হে রামের ভরসা,
বিক্রম, প্রতাপ,রণে! একমাত্র রথী
জীবে লঙ্কাপুরে এবে; বধ আজি তারে,
বীরবৃন্দ! তোমাদেরি প্রসাদে বাঁধি
সিদ্ধ; শূলীশঙ্কুনিভ কুন্তকর্ণ শুরে
বধি তুমুল যুদ্ধে; নাশিল সৌমিত্রি
দেবদৈত্যনরত্রাস ভীম মেঘনাদে!
কুল, মান, প্রাম মোর রাখ হে উদ্ধারি,
রঘুবন্ধু, রঘুবধু, বন্ধা কারাগারে
রক্ষঃ-হলে! স্নেহপণে কিনিয়াছ রামে
তোমরা; বাঁধ হে আজি কৃতজ্ঞতা-পাশে
রঘুবংশে, দাক্ষিণাত্য^{১৪} দাক্ষিণ্য^{১৫} প্রকাশি!”

নীরবিলা রঘুনাথ সজল নয়নে।
বারিদপ্রতিম^{১৬} স্বনে স্বনি উত্তরিলা
সুগ্রীব; “মরিব, নহে মারিব রাবণে,
এ প্রতিজ্ঞা, শুরশ্রেষ্ঠ, তব পদতলে!
ভুক্তি রাজ্যসুখ, নাথ, তোমার প্রসাদে;—
ধনমানদাতা তুমি; কৃতজ্ঞতা-পাশে
চির বাঁধা, এ অধীন, ও পদপঙ্কজে!
আর কি কহিব, শুর? মম সঙ্গীদলে

১১. মার্কণ্ডেয় পুরাণের প্রসঙ্গ। ১২. পর্বতসমূহ। ১৩. লয় বা বিনাশ সাধন করতে। ১৪. দক্ষিণভারতের অধিবাসীবৃন্দের
প্রতি সম্বোধন। ১৫. দয়া। ১৬. মেঘের ন্যায়।

নাহি বীর, তব কৰ্ম সাধিতে যে ডরে
কৃতান্ত। সাজুক রক্ষঃ, যুবিব আমরা
অভয়ে।” গর্জিল্লা রোষে সৈন্যাধ্যক্ষ যত,
গর্জিল্লা বিকট ঠাট^১ জয় রাম নাদে।

সে ভৈরব রবে রুবি, রক্ষঃ-অনীকিনী
নিলাদিলা বীরমদে, নিনাদেন যথা
দানবদলনী দুর্গা দানবনিলাদে।—
পূরিল কনক-লঙ্কা গস্তীর নিঘোষে।

কমল-আসনে যথা বসেন কমলা,
রক্ষঃকুলরাজলক্ষ্মী, পশিল সে স্থলে
আবাব; চমকি সতী উঠিলা সত্বরে।
দেখিলা পদ্মাঙ্কী, রক্ষঃ সাজিছে চৌদিকে
ক্রোধাঙ্ক; রাক্ষসধ্বজ উড়িছে আকাশে,
জীবকুল-কুলক্ষণ! বাজিছে গস্তীরে
রক্ষোবাদ্য। শূন্যপথে চলিলা ইন্দ্রিরা—
শরদিন্দুনিভাননা^২—বেজয়স্ত ধামে।

বাজিছে বিবিধ বাদ্য ত্রিদশ-আলয়ে ;
নাচিছে অঙ্গরাবন্দ; গাইছে সুতানে
কিন্নর; সুবর্ণাসনে দেবদেবীদলে
দেবরাজ, বামে শচী সুচারুহাসিনী;
অনন্ত বাসস্তানিল বহিছে সুস্থনে ;
বর্ষিছে মন্দারপুঞ্জ গন্ধর্ব্ব চৌদিকে।

পশিলা কেশব-প্রিয়া দেবসভাতলে।
প্রণমি কহিলা ইন্দ্র, “দেহ পদধূলি,
জননি; নিঃশঙ্ক দাস তোমার প্রসাদে—
গতজীব রণে আজি দূরন্ত রাবণি!
ভুঞ্জিব স্বর্গের সুখ নিরাপদে এবে।
কৃপাদৃষ্টি যার প্রতি কর, কৃপাময়ি,
তুমি, কি অভাব তার?” হাসি উত্তরিলা
রত্নাকররত্নোত্তমা ইন্দ্রিরা সুন্দরী,—
“ভূতলে পতিত এবে, দৈত্যকুলরিপু,
রিপু তব; কিন্তু সাজে রক্ষোবলদলে
লঙ্কেশ, আকুল রাজা প্রতিবিধানিতে
পুত্রবধ! লক্ষ রক্ষঃ সাজে তার সনে।
দিতে এ বারতা, দেব, আইন এ দেশে।
সাধিল তোমার কৰ্ম সৌমিত্রি সুমতি;
রক্ষ তারে, আদিতেয়! উপকারী জনে,
মহৎ যে প্রাণ-পণে উদ্ধারে বিপদে।
আর কি কহিব, শত্রু? অবিদিত নহে
রক্ষঃকুলপরাক্রম! দেখ চিন্তা করি,
কি উপায়ে শচীকান্ত, রাখিবে রাখবে।”

উত্তরিলা দেবপতি,—“স্বর্গের উত্তরে,
দেখ চেয়ে, জগদম্বে, অম্বর প্রদেশে;—
সুসঙ্ক অমরদল। বাহিরায় যদি
রণ-আশে মহেৎবাস রক্ষঃকুলপতি,
সমরিব তার সঙ্গে রঙ্গে, দয়াময়ি।—
না ডরি রাবণে, মাতঃ, রাবণি বিহনে!”

বাসবীয় চমু রমা দেখিলা চমকি
স্বর্গের উত্তর ভাগে। যত দূর চলে
দেবদৃষ্টি, দৃষ্টি দানে হেরিলা সুন্দরী
রথ, গজ, অশ্ব, সাদী, নিষাদী, সুরথী,
পদাতিক যমজীয়, বিজয়ী সমরে।
গন্ধর্ব্ব, কিন্নর, দেব, কালাগ্নি-সদৃশ
তেজে; শিখিধ্বজরথে স্কন্দ তারকারি
সেনানী, বিচিত্র রথে চিত্ররথ রথী।
জ্বলিছে অম্বর যথা বন দাবানলে;
ধুমপুঞ্জ সম তাহে শোভে গজরাজী ;
শিখারূপে শূলগ্রাম ভাতিছে ঝলসি
নয়ন। চপলা যেন অচলা, শোভিছে
পতাকা; রবিপরিধি জিনি তেজেগুণে,
ঝকঝকে চর্ম; বর্ম ঝলে ঝলঝলে।

সুধিলা মাধবপ্রিয়া;—“কহ দেবনিধি
আদিতেয়, কোথা এবে প্রভঞ্জন-আদি
দিকপাল? ত্রিদিবসৈন্য শূন্য কেন হেরি
এ বিরহে?” উত্তরিলা শচীকান্ত বনী;
“নিজ নিজ রাজ্য আজি রক্ষিতে দিকপালে
আদেশিনু, জগদম্বে। দেবরক্ষারণে,
(দুর্জয় উভয় কুল) কে জানে কি ঘটে?—
হয়ত মজিবে মহী, প্রলয়ে যেমতি,
আজি, এ বিপুল সৃষ্টি যাবে রসাতলে।”

আশীষিয়া সুকেশিনী কেশববাসনা
দেবেশে, লঙ্কায় মাতা সত্বরে ফিরিলা
সুবর্ণ ঘনবাহনে; পশি স্বমন্দিরে,
বিষাদে কমলাসনে বসিলা কমলা,—
আলো করি দশ দিস রূপের কিরণে,
বিরসবদন, মরি, রক্ষঃকুলদুঃখে!

রণমদে মত্ত, সাজে রক্ষঃকুলপতি;—
হেমকূট-হেমশৃঙ্গ-সমোজ্জ্বল তেজে
চৌদিকে রথীন্দ্রদল। বাজিছে অদূরে
রণবাদ্য; রক্ষোধ্বজ উড়িছে আকাশে,
অসম্ভ্য রক্ষোসবন্দ নাদিছে হুঙ্কারে।
হেন কালে সভাতলে উত্তরিলা রাণী

মন্দোদরী, শিশুশূন্য নীড় হেরি যথা
আকুলা কপোতী, হয়। ধাইছে পশ্চাতে
সখীদল। রাজপদে পড়িলা মহিষী।

যতনে সতীরে তুলি, কহিলা বিষাদে
রক্ষোবাজ, “বাম এবে, রক্ষঃ-কুলেন্দ্রাণি,
আমা দোঁহা প্রতি বিধি। তবে যে বাঁচিছি
এখনও, সে কেবল প্রতিবিধিৎসিতে
মৃত্যু তার। যাও ফিরি শূন্য ঘরে তুমি;—
রণক্ষেত্রযাত্রী আমি, কেন রোধ মোরে?
বিলাপের কাল, দেবি, চিরকাল পাব!
বৃথা রাজ্যসুখে, সতি, জলাঞ্জলি দিয়া,
বিরলে বসিয়া দোঁহে স্মরিব তাহারে
অহরহঃ। যাও ফিরি; কেন নিবাইবে
এ রোষাণি অশ্রুণীরে, রাণি মন্দোদরী?
বনসুশোভন শাল ভূপতিত আজি;
চূর্ণ তুঙ্গতম শৃঙ্গ গিরিবর শিরে;
গগনরতন শশী চিররাহুগ্রাসে।”

ধরাধরি করি সখী লইলা দেবীরে
অবরোধে। ক্রোধভরে বাহিরি, ভৈরবে
কহিলা রাক্ষসনাথ, সছোষি রাক্ষসে ;—
“দেব-দৈত্য-নর-রণে যার পরাক্রমে
জয়ী রক্ষঃ-অনীকিনী; যার শরজালে
কাতর দেবেন্দ্রে সহ দেবকুল-রথী ;
অতল পাতালে নাগ, নর নরলোকে ;—
হত সে বীরেশ আজি অনায়ায় সমরে,
বীরবৃন্দ! চোরবেশে পশি দেবালয়ে,
সৌমিত্রি বধিল পুত্রে, নিরস্ত্র সে যবে
নিভূতে। প্রবাসে যথা মনোদুঃখে মরে
প্রবাসী, আসন্নকালে না হেরি সম্মুখে
স্নেহপাত্র তার যত—পিতা, মাতা ভ্রাতা,
দয়িতা—মরিল আজি স্বর্ণ-লঙ্কাপুরে,
স্বর্ণলঙ্কা-অলঙ্কার। বহুকালাবধি
পালিয়াছি পুত্রসম তোমা সবে আমি;—
জিজ্ঞাসহ ভূমণ্ডলে, কোন্ বংশখ্যাতি
রক্ষোবংশখ্যাতিসম? কিন্তু দেব নরে
পরাভবি, কীর্্তিবৃক্ষ রোপিণ্ড জগতে
বৃথা! নিদারুণ বিধি, এত দিনে এবে
বামতম” মম প্রতি; তেঁই শুখাইল

জলপূর্ণ আলবাল^{১০} অকাল নিদাঘে।
কিন্তু না বিলাপি আমি। কি ফল বিলাপে?
আর কি পাইব তারে? অশ্রুবারিধারা,
হায় রে, দ্রবে কি কভু কৃতান্তের হিয়া
কঠিন? সমরে এবে পশি বিনাশিব
অধর্মী সৌমিত্রি মুঢ়ে, কপট-সমরী^{১১};
বৃথা যদি রত্ন আজি, আর না ফিরিব—
পদার্পণ আর নাহি করিব এ পুরে
এ জন্মে! প্রতিজ্ঞা মম এই, রক্ষোরথি!
দেবনৈতানরত্রাস তোমরা সমরে;
বিশ্বজয়ী; স্মরি তারে, চল রণস্থলে;
মেঘনাদ হত রণে, এ বারতা শুনি,
কে চাহে বাঁচিতে আজি এ কৰ্কুরকুলে,
কৰ্কুরকুলের গর্ভ মেঘনাদ বলা!

নীরবিলা মহেশ্বাস নিশ্বাসি বিষাদে।
ক্ষোভে রোষে রক্ষঃসৈন্য নাদিলা নিষেধে,
তিতিয়া মহীরে, মরি, নয়ন-আসারে!

শুনি সে ভীষণ স্বন নাদিলা গষ্ঠীরে
রঘুসৈন্য। ত্রিদিবেন্দ্রে নাদিলা ত্রিদিবে!
রুঘিলা বেদেহীনাথ, সৌমিত্রি কেশরী,
সুগ্রীব, অঙ্গদ, হনু, নেতৃনিধি যত,
রক্ষোযম; নল, নীল, শরভ সুমতি,—
গর্জিল বিকট ঠাট জয় রাম নাদে!
মন্ত্রিলা জীমূতবৃন্দ আবারি অশ্বরে;
ইরম্মদে ধাঁধি বিশ্ব, গর্জিল অশনি;
চামুণ্ডার হাসিরাশিসদৃশ হাসিল
সৌদামিনী, যবে দেবী হাসি বিনাশিলা
দুর্ম্মদ দানবদলে, মত্ত রণমদে।
ডুবিলা তিমিরপুঞ্জ তিমির-বিনাশী
দিনমণি; বায়ুদল বহিলা চৌদিকে
বৈশ্বানরশ্বাসরূপে; জ্বলিল কাননে
দাবান্নি; প্লাবন নাদি প্রাসিল সহসা
পূরী, পল্লী; ভূকম্পনে পড়িল ভূতলে
অট্টালিকা, তরুরাজী; জীবন ত্যজিল
উচ্চ কাঁদি জীবকুল, প্রলয়ে যেমতি।

মহাভয়ে ভীতা মহী কাঁদিয়া চলিলা
বৈকুণ্ঠে। কনকাসনে বিরাজেন যথা
মাধব, প্রণমি সাধ্বী আরাধিলা দেবে;—

১৯. একান্ত বিমুখ। ২০. গাছের গোড়ায় জল আটকবার জন্য গোলাকার মাটির ঘেরা। ২১. সমরে যে কপটতার আশ্রয় নেয়। ২২. মার্কণ্ডেয় পুরাণের প্রসঙ্গ।

“বারে বারে অধীনিরে, দয়াসিদ্ধু তুমি,
হে রমেশ, তরাইলা বহু মুক্তি ধরি ;
কুস্মপৃষ্ঠে তিষ্ঠাইলা দাসীরে প্রলয়ে
কুস্মরূপে;”^{২০} বিরাজিনু দশনশিখরে
আমি, (শশাঙ্কের দেহে কলঙ্কের রেখা-
সদৃশী) বরাহমুক্তি ধরিলে যে কালে,
দীনবন্ধু!^{২১} নরসিংহবেশে বিনাশিয়া
হিরণ্যকশিপু দৈত্যে, জুড়ালে দাসীরে!^{২২}
খর্কিলা বলির গর্ভে খর্কাকারছিলে,
বামন!^{২৩} বাঁচিনু, প্রভু, তোমার প্রসাদে!
আর কি কহিব, নাথ! পদাশ্রিতা দাসী!
তেঁই পাদপদ্মতলে এ বিপত্তিকালে।”

হাসি সুমধুর স্বরে সুধিলা মুরারি,
“কি হেতু কাতরা আজি, কহ জগন্নাথঃ
বসুধে? আয়াসে আজি কে বৎসে, তোমারে?”

উত্তরিলে কাঁদি মহী; “কি না তুমি জান,
সর্ব্বজ্ঞ? লঙ্কার পানে দেখ, প্রভু, চাহি।
রণে মত্ত রক্ষো রাজ; রণে মত্ত বলী
রাঘবেন্দ্রে; রণে মত্ত ত্রিদিবেন্দ্রে রথী!
মদকল করি ত্রয় আয়াসে”^{২৪} দাসীরে!
দেবতাকৃতি রথীপতি সৌমিত্রি কেশরী
বধিলা সংগ্রামে আজি ভীম মেঘনাদে;
আকুল বিষম শোকে রক্ষঃকুলনিধি
করিল প্রতিজ্ঞা, রণে মারিবে লক্ষ্মণে;
করিলা প্রতিজ্ঞা ইন্দ্রে রক্ষিতে তাহারে
বীরদর্পে;—অবিলম্বে, হায়, আরম্ভিবে
কাল রণ, পীতাম্বর স্বর্ণলঙ্কাপুরে
দেব, রক্ষঃ, নর রোবে। কেমনে সহিব
এ ঘোর যাতনা, নাথ কহ তা আমারে?”

চাহিলা রমেশ হাসি স্বর্ণলঙ্কা পানে।
দেখিলা রাক্ষসবল বাহিরিছে দলে
অসম্ভ্যা, প্রতিঘ-অঙ্ক^{২৫}, চতুঃস্কন্ধরূপী।
চলিছে প্রতাপ আগে জগত কাঁপায়ে;
পশ্চাতে শব্দ চলে শ্রবণ বধিরি;
চলিছে পরাগ^{২৬} পরে দৃষ্টিপথ রোধি
ঘন ঘনাকাররূপে!^{২৭} টলিছে সঘনে
স্বর্ণলঙ্কা! বহির্ভাগে দেখিলা শ্রীমতি

রঘুসৈন্য; উর্ধ্বকুল সিদ্ধুমুখে যথা
চির-অরি প্রভঞ্জন দেখা দিলে দূরে।
দেখিলা পুণ্ডরীকাক্ষ^{২৮}, দেবদল বেগে
ধাইছে লঙ্কার পানে, পক্ষিরাজ যথা
গরুড়, হেরিয়া দূরে সদা-ভঙ্ক্য ফণী,
হুঙ্কারে! পুরিছে বিশ্ব গন্তীর নিষোধে!
পলাইছে যোগীকুল যোগ যাগ ছাড়ি;
কোলে করি শিশুকুলে কাঁদিছে জননী,
ভয়াকুলা; জীবব্রজ ধাইছে চৌদিকে
ছন্নমতি! ক্ষণকাল চিন্তি চিন্তামণি
(যোগীন্দ্র-মানস-হংস) কহিলা মহীরে;—
“বিষম বিপদ, সতি, উপস্থিত দেখি
তব পক্ষে। বিরূপাক্ষ, রুদ্রতেজোদানে,
তেজস্বী করিলা আজি রক্ষঃকুলরাজে।
না হেরি উপায় কিছু; যাহ তাঁর কাছে,
মেদিনী!” পদারবিন্দে কাঁদি উত্তরিলে
বসুন্ধরা; “হায়, প্রভু, দুরন্ত সংহারী
ত্রিশূলী; সতত রত নিধনসাধনে!
নিরন্তর তমোগুণে পূর্ণ ত্রিপুরারি।
কাল-সর্প-সাধ, সৌরি^{২৯}, সদা দঙ্কাইতে,
উগরি বিষাগ্নি, জীবে। দয়াসিদ্ধু তুমি,
বিশ্বস্তর; বিশ্বভার তুমি না বহিলে,
কে আর বহিবে, কহ? বাঁচাও দাসীরে,
হে শ্রীপতি, এ মিনতি ও রাঙা চরণে!”

উত্তরিলে হাসি বিভু, “যাও নিজ স্থলে,
বসুধে; সাধিব কার্য তোমার, সম্বরি
দেববীর্য্য। না পারিবে রক্ষিতে লক্ষ্মণে
দেবেন্দ্রে, রাক্ষসদুঃখে দুঃখী উমাপতি।”

মহানন্দে বসুন্ধরা গেলা নিজ স্থলে।
কহিলা গরুড়ে প্রভু, “উড়ি নভোদেশে,
গরুস্থান, দেবতেজঃ হর আজি রণে,
হরে অশুরাশি যথা তিমিরারি রবি;
কিস্বা তুমি, বৈনতেয়, হরিলা যেমতি
অমৃত। নিস্তেজ দেবে আমার আদেশে।”

বিস্তারি বিশাল পক্ষ, উড়িলা আকাশে
পক্ষিরাজ; মহাছায়া পড়িল ভূতলে,
আঁধারি অযুত বন, গিরি, নদ, নদী।

২৩. বিষ্ণুর কূর্ম অবতারের পৌরাণিক প্রসঙ্গ। ২৪. বিষ্ণুর বরাহ অবতারের প্রসঙ্গ। ২৫. বিষ্ণুর নৃসিংহ অবতারের প্রসঙ্গ। ২৬. বিষ্ণুর বামনাবতারের প্রসঙ্গ। ২৭. ক্লেষ দেয়। ২৮. ক্রোধে অঙ্কের ন্যায়। ২৯. খুলে। ৩০. মেঘের আকৃতিতে। ৩১. বিষ্ণু বা নারায়ণ। ৩২. সূর্যপুত্র যম।

যথা গৃহমাঝে বহি জ্বলিলে উস্তেজে,
গবাক্ষ-দুয়ার-পথে বাহিরায় বেগে
শিখাপুঞ্জ, বাহিরিল চারি দ্বার দিয়া
রাক্ষস, নিনাদি রোবে; গর্জিল চৌদিকে
রঘুসৈন্য; দেববৃন্দ পশিলা সমরে।
আইলা মাতঙ্গবর ঐরাবত, মাতি
রণরঙ্গে; পৃষ্ঠদেশে দস্তোলিনিক্ষেপী
সহস্রাক্ষ, দীপ্যমান মেরুশৃঙ্গ যথা
রবিকরে, কিন্না ভানু মধ্যাহ্নে; আইলা
শিখিধ্বজ রথে রথী স্কন্দ তারকারি
সেনানী; বিচিত্র রথে চিত্ররথ রথী;
কিন্নর, গন্ধর্ব্ব, যক্ষ, বিবিধ বাহনে!
আতঙ্কে শুনিলা লক্ষা স্বর্গীয় বাজনা;
কাঁপিল চমকি দেশ অমর-নিনাদে!

সাপ্তাঙ্গে প্রণমি ইন্দ্রে কহিলা নৃমণি,
“দেবকুলদাস দাস, দেবকুলপতি!
কত যে করিনু পুণ্য পূর্ব্বজন্মে আমি,
কি আর কহিব তার? তেঁই সে লভিনু
পদাশ্রয় আজি তব এ বিপত্তি-কালে,
বজ্রপাণি! তেঁই আজি চরণ-পরশে
পবিত্রিলা ভূমন্ডল ত্রিদিবনিবাসী?”

উত্তরিলা স্বরীশ্বর সন্তাষি রাঘবে,
“দেবকুলপ্রিয় তুমি, রঘুকুলমণি!
উঠি দেবরথে, রথি, নাশ বাহুবলে
রাক্ষস অধর্মাচারী। নিজ কস্মদোষে
মজে রক্ষঃকুলনিধি; কে রক্ষিবে তারে?
লভিনু অমৃত যথা মথি জলদলে,
লণ্ডভণ্ডি লক্ষা আজি, দণ্ডি নিশাচরে,
সাধ্বী মৈথিলীরে, শূর, অপর্বিবে তোমারে
দেবকুল! কত কাল অতল সলিলে
বসিবেন আর রমা, আঁধারি জগতে?”

বাজিল তুমুল রণ দেবরক্ষোনরে।
অম্বুরাশি সম কশু ঘোষিল চৌদিকে
অযুত; টঙ্কারি ধনুঃ ধনুর্ধ্বর বলী
রোধিলা শ্রবণপথ। গগন ছাইয়া
উড়িল কলস্কুল ইরস্মদতেজে
ভেদি বস্ম, চস্ম, দেহ, বহিল প্রাবনে
শোণিত! পড়িল রক্ষোনরকুলরথী;
পড়িল কুঞ্জরপুঞ্জ, নিকুঞ্জে যেমতি
পত্র প্রভঙ্জনবলে; পড়িল নিনাদি

বাজীরাজী; রণভূমি পুরিল ভৈরবে।

আক্রমিলা সুরবৃন্দে চতুরঙ্গ বলে
চামর—অমরত্রাস। চিত্ররথ রথী
সৌরতেজঃ রথে শূর পশিলা সংগ্রামে,
বারণারি সিংহ যথা হেরি সে বারণে।
আহানিল ভীম রবে সূগ্রীবে উদগ্র
রথীশ্বর; রথচক্র ঘুরিল ঘর্ঘরে
শতজলস্রোতোনাদে। চালাইলা বেগে
বাস্কল মাতঙ্গযুথে, যুথনাথ যথা
দুর্বার, হেরিয়া দূরে অঙ্গদে; রুঘিলা
যুবরাজ, রোবে যথা সিংহশিশু হেরি
মৃগদলে! অসিলোমা, তীক্ষ্ণ অসি করে,
বাজীরাজী সহ ক্রোধে বেড়িল শরভে
বীরর্ষভ। বিড়ালাক্ষ (বিরূপাক্ষ যথা
সর্ব্বনাশী) হনু সহ আরঙিলা কোপে
সংগ্রাম। পশিলা রণে দিব্য রথে রথী
রাঘব, দ্বিতীয়, আহা, স্বরীশ্বর যথা
বজ্রধর। শিখিধ্বজ স্কন্দ তারকারি,
সুন্দর লক্ষ্মণ শূরে দেখিলা বিস্ময়ে
নিজপ্রতিমূর্ত্তি মর্ত্যে। উড়িল চৌদিকে
ঘনরূপে রেণুরাশি; টলটল টলে
টলিলা কনক-লক্ষা; গর্জিলা জলধি।
সৃজিলা অপূর্ব্ব ব্যূহ শচীকান্ত বলী।

বাহিরিলা রক্ষোরাজ পুষ্পক-আরোহী;
ঘর্ঘরিল রথচক্র নির্যোবে, উগরি
বিস্মুলিঙ্গ; তুরঙ্গম হ্রেবিল উল্লাসে।
রতনসন্তাষা বিভা, নয়ন ধাঁধিয়া,
ধায় অগ্রে, উষা যথা, একচক্র রথে
উদেন আদিত্য যবে উদয়-অচলে!
নাদিল গভীরে রক্ষঃ হেরি রক্ষোনাথে।

সন্তাষি সারথিবরে, কহিলা সুরথী,
“নাহি যুঝে নর আজি, হে সূত, একাকী,
দেখ চেয়ে!°° ধুমপুঞ্জে অগ্নিরাশি যথা,
শোভে অসুরারিদল রঘুসৈন্য মাঝে।
আইলা লক্ষায় ইন্দ্রে শুনি হত রণে
ইন্দ্রজিত।” স্মরি পুত্রে রক্ষঃকুলনিধি,
সরোবে গর্জিয়া রাজা কহিলা গভীরে;
“চালাও, হে সূত, রথ যথা বজ্রপাণি
বাসব।” চলিল রথ মনোরথগতি।
পালাইল রঘুসৈন্য, পালায় যেমনি

মদকল করিরাজে হেরি, উর্ধ্বশ্বাসে
 বনবাসী! কিম্বা যথা ভীমাকৃতি ঘন,
 বজ্র-অগ্নিপূর্ণ, যবে উড়ে বায়ুপথে
 ঘোর নাদে, পশুপক্ষী পালায় চৌদিকে
 আতঙ্কে! টঙ্কারি ধনুঃ, তীক্ষ্ণতর শরে
 মুহূর্ত্তে ভেদিলা ব্যূহ বীরেন্দ্র-কেশরী,
 সহজে প্লাবন যথা ভাঙে ভীমাঘাতে
 বালিবন্ধ^{৩৪}! কিম্বা যথা ব্যাত্র নিশাকালে
 গোষ্ঠবৃতি^{৩৫}! অগ্রসরি শিখিধ্বজ রথে,
 শিঞ্জিনী আকর্ষি রোষে তারকারি^{৩৬} বলী
 রোধিলা সে রথগতি। কৃতাজ্জলিপুটে
 নমি শুরে লক্ষ্মেশ্বর রুহিলা গজীরে,
 “শঙ্করী শঙ্করে, দেব, পূজে দিবানিশি
 কিঙ্কর! লজ্জায় তবে বৈরীদল মাঝে
 কেন আজি হেরি তোমা? নরাধম রামে
 হেন আনুকূল্য দান কর কি কারণে,
 কুমার? রথীন্দ্র তুমি; অন্যায় সমরে
 মারিল নন্দনে মোর লক্ষ্মণ; মারিব
 কপটসমরী মুঢ়ে; দেহ পথ ছাড়ি!”

কহিলা পার্কর্ষীপুত্র, “রক্ষিব লক্ষ্মণে,
 রক্ষোরাজ, আজি আমি দেবরাজাদেশে।
 বাহুবলে, বাহুবল, বিমুখ আমরা,
 নতুবা এ মনোরথ নারিবে পূর্ণিতে!”

সরোষে, তেজস্বী আজি মহারুদ্রতেজে,
 হুকারি হানিল অস্ত্র রক্ষঃকুলনিধি
 অগ্নিসম, শরজালে কাতরিয়া রণে
 শক্তিধরে!^{৩৭} বিজয়ারে সন্তাষি অভয়া
 কহিলা, “দেখ্ লো, সখি চাহি লক্ষা পানে,
 তীক্ষ্ণ শরে রক্ষেশ্বর বিধিছে কুমারে
 নির্দয়! আকাশে দেখ্, পক্ষীন্দ্র হরিছে—
 দেবতেজঃ যা লো তুই সৌদামিনীগতি,
 নিবার্ কুমারে, সেই। বিদরিছে হিয়া
 আমার, লো সহচরি, হেরি রক্তধারা
 বাছার কোমল দেহে!^{৩৮} ভকত-বৎসল
 সদানন্দ; পুত্রাধিক স্নেহেন ভকতে;
 তেঁই সে রাবণ এবে দুর্বার সমরে,

স্বজনী!” চলিলা আশু সৌরকররূপে
 নীলাশ্বরপথে দূতী। সম্বোধি কুমারে
 বিধুমুখী, কর্ণমূলে কহিলা—“সম্বর
 অস্ত্র তব, শক্তিধর, শক্তির আদেশে।
 মহারুদ্রতেজে আজি পূর্ণ লক্ষাপতি!”
 ফিরাইলা রথ হাসি স্কন্দ তারকারি
 মহাসুর। সিংহনাদে কটক^{৩৯} কাটিয়া
 অসম্ব্য, রাক্ষসনাথ ধাইলা সত্বরে
 ঐরাবত-পৃষ্ঠে যথা দেব বজ্রপাণি।

বেড়িল গন্ধর্ব নর শত প্রসরণে
 রক্ষেন্দ্রে; হুকারি শূর নিরস্তিলা সবে
 নিমিষে, কালাগ্নি যথা ভস্মে বনরাজী।
 পালাইলা বীরদল জলাঞ্জলি দিয়া
 লজ্জায়! আইলা রোষে দৈত্যকুল-অরি,
 হেরি পার্থে কর্ণ যথা কুরুক্ষেত্ররণে!^{৪০}

ভীষণ তোমর রক্ষঃ হানিলা হুকারি
 ঐরাবতশিরঃ লক্ষি। অর্ধপথে তাহে
 শর বৃষ্টি স্বরীশ্বর কাটিলা সত্বরে।
 কহিলা কর্করূরপতি গর্বে সুরনাথে;
 “যার ভয়ে বৈজয়ন্তে, শচীকান্ত বলি,
 চির কম্পবান্ তুমি, হত সে রাবণি,
 তোমার কৌশলে, আজি কপট সংগ্রামে!
 তেঁই বুঝি আসিয়াছ লক্ষাপুরে তুমি;
 নির্লঙ্ক! অবধ্য তুমি অমর; নহিলে
 দমনে শমন যথা, দমিতাম তোমা
 মুহূর্ত্তে! নারিবে তুমি, রক্ষিতে লক্ষ্মণে,
 এ মম প্রতিজ্ঞা, দেব!” ভীম গদা ধরি,
 লক্ষ্ম দিয়া রথীশ্বর পড়িলা ভূতলে
 সঘনে কাঁপিলা মহী পদযুগভরে,
 উরুদেশে কোষে অসি বাজিল বান্‌বানি!

হুকারি কুলিশী রোষে ধরিলা কুলিশে!
 অমনি হরিল তেজঃ গরুড়; নারিলা
 লাড়িতে দন্তোলি দেব দন্তোলিনিক্ষেপী।
 প্রহারিলা ভীম গদা গজরাজশিরে
 রক্ষোরাজ, প্রভঞ্জন যেমতি, উপাড়ি
 অভভেদী মহীরুহ, হানে গিরিশিরে

৩৪. বাপির বাঁধ। ৩৫. গোয়ালের বেড়া। ৩৬. তারক নামক অসুর সংহারক—কার্তিক। ৩৭. এখানে শক্তিমান কার্তিকের কথা বলা হয়েছে। ৩৮. দেবীর চরিত্রে মানবিকতা আরোপিত হয়েছে। ৩৯. সৈন্যদল। ৪০. মহাভারতের কর্ণ ও অর্জুনের যুদ্ধের প্রসঙ্গ।

ঝড়ে ! ভীমাঘাতে হস্তী নিরস্ত, পড়িলা
হাঁটু গাড়ি। হাসি রক্ষঃ উঠিলা স্বরথে।
যোগাইলা মুহূর্তেকে মাতলি সারথি
সুরথ ; ছাড়িলা পথ দিতিসুতরিপু
অভিমনে। হাতে ধনুঃ, ঘোর সিংহনাদে
দিব্য রথে দাশরথি পশিলা সংগ্রামে।

কহিলা রাক্ষসপতি; “না চাহি তোমারে
আজি, হে বৈদেহীনাথ। এ ভবমণ্ডলে
আর এক দিন তুমি জীব নিরাপদে।
কোথা সে অনুজ তব কপটসমরী
পামর ? মারিব তারে; যাও ফিরি তুমি
শিবিরে, রাঘবশ্রেষ্ঠ।” নাদিলা ভৈরবে
মহেশ্বাস, দূরে শূর হেরি রামানুজে।
বৃষপালে সিংহ যথা, নাশিছে রাক্ষসে
শুরেন্দ্রে; কভু বা রথে, কভু বা ভূতলে।

চলিল পুষ্পক বেগে ঘর্ষরি নির্যোষে;
অগ্নিচক্র-সম চক্র বর্ষিল চৌদিকে
অগ্নিরাশি; ধুমকেতু-সদৃশ শোভিল
রথচূড়ে রাজকেতু। যথা হেরি দূরে
কপোত, বিস্তারি পাখা, ধায় বাজপতি
অস্বরে; চলিলা রক্ষঃ হেরি রণভূমে
পুত্রহা সৌমিত্রি শুরে; ধাইলা চৌদিকে
হৃঙ্কারে দেব নর রক্ষিতে শুরেশে।
ধাইলা রাক্ষসবৃন্দ হেরি রক্ষোনাথে।

বিড়ালাক্ষ রক্ষঃশুরে বিমুখি সংগ্রামে,
আইলা অঞ্জনাপুত্র,—প্রভঞ্জনসম
ভীমপরাক্রম হনু, গর্জিৎ ভীম নাদে।

যথা প্রভঞ্জনবলে উড়ে তুলারশি
চৌদিকে ; রাক্ষসবৃন্দ পালাইলা রড়ে
হেরি যমাকৃতি বীরে। রুধি লঙ্কাপতি
চোক্ চোক্^{৪১} শরে শূর অস্থিরিলা শুরে।
অধীর হইলা হনু, ভূধর যেমতি
ভুকম্পনে ! পিতৃপদ স্মরিলা বিপদে
বীরেন্দ্রে, আনন্দে বায়ু নিজ বল দিলা
নন্দনে, মিহির যথা নিজ করদানে
ভূষেন কুমুদবাঞ্জা সুধাংশুনিধিরে।
কিন্তু মহারুদ্ধতেজে তেজস্বী সুরথী
নৈকষেয়, নিবারিলা পবনডনয়ে ;—
ভঙ্গ দিয়া রণরঙ্গে পালাইলা হনু।

আইলা কিঙ্কিণ্যাপতি, বিনাশি সংগ্রামে

উদগ্রে বিগ্রহপ্রিয়। হাসিয়া কহিলা
লঙ্কানাথ,—“রাজ্যভোগ ত্যজি কি কৃষ্ণণে,
বর্কর, আইলি তুই এ কনকপুরে ?
ব্রাতৃবধু তারা তোর তারাকারা রূপে ;
তারে ছাড়ি কেন হেথা রথীকুল মাঝে
তুই, রে কিঙ্কিণ্যানাথ ? ছাড়িঁনু, যা চলি
স্বদেশে ! বিধবাদশা কেন ঘটাইবি
আবার তাহার, মুঢ় ? দেবর কে আছে
আর তার ?” ভীম রবে উত্তরিলা বলী
সুগ্রীব,—“অধর্মচারী কে আছে জগতে
তোর সম, রক্ষো রাজ ? পরদারালোভে^{৪২}
সবংশে মজিলি, দুষ্ট ? রক্ষঃকুলকালি
তুই, রক্ষঃ ? মৃত্যু তোর আজি মোর হাতে !
উদ্ধারিব মিত্রবধু বধি আজি তোরে !”

এতেক কহিয়া বলী গর্জিৎ নিক্ষেপিলা
গিরিশৃঙ্গ। অনস্বর আঁধারি ধাইল
শিখর; সুতীক্ষ্ণ শরে কাটিলা সুরথী
রক্ষো রাজ, খান খান করি সে শিখরে।
টঙ্কারি কোদণ্ড পুনঃ রক্ষঃ-চূড়ামণি
তীক্ষ্ণতম শরে শূর বিধিলা সুগ্রীবে
হৃঙ্কারে ! বিঘমাঘাতে ব্যথিত সুমতি,
পালাইলা ; পালাইলা সত্রাসে চৌদিকে
রঘুসেন্য, (জল যথা জাঙাল ভাঙিলে
কোলাহলে); দেবদল, তেজোহীন এবে,
পালাইলা নর সহ, ধুম সহ যথা
যায় উড়ি অগ্নিকণা বহিলে প্রবলে
পবন ! সম্মুখে রক্ষঃ হেরিলা লক্ষ্ণণে
দেবাকৃতি ! বীরমদে দুর্মদ সমরে
রাবণ, নাদিলা বলী হৃঙ্কার রবে;
নাদিলা সৌমিত্রি শুর নির্ভয় হৃদয়ে,
নাদে যথা মত্ত করী মত্তকরিনাদে !
দেবদত্ত ধনুঃ ধর্মী টঙ্কারিলা রোষে।
“এত ক্ষণে, রে লক্ষ্ণণ,”—কহিলা সরোষে
রাবণ, “এ রণক্ষেত্রে পাইনু কি তোরে,
নরাদম ? কোথা এবে দেব বজ্রপাণি ?
শিখিধ্বজ শক্তিধর ? রঘুকুলপতি,
ব্রাতা তোর ? কোথা রাজা সুগ্রীব ? কে তোরে
রক্ষিবে পামর, আজি ? এ আসন্ন কালে
সুমিত্রা জননী তোর, কলত্র^{৪৩} উর্শিলা,
ভাব্দোহে ! মাংস তোর মাংসাহারী জীবে

দিব এবে ; রক্তশ্রোতঃ শুষিবে ধরণী !
কুম্ভগণে সাগর পার হইলি, দুশ্মতি,
পশিলি রাক্ষসালয়ে চোরবেশ ধরি,
হরিলি রাক্ষসরত্ন—অমূল জগতে !”

গর্জ্জলা ভৈরবে রাজা বসাইয়া চাপে
অগ্নিশিখাসম শর ; ভীম সিংহনাদে
উত্তরিলে ভীমনাদী সৌমিত্রি কেশরী,
“ক্ষত্রকূলে জন্ম মম, রক্ষঃকুলপতি,
নাহি ডরি যমে আমি; কেন ডরাইব
তোমায় ? আকুল তুমি পুত্রশোকে আজি,
যথা সাধ্য কর, রথি; আশু নিবারিব
শোক তব, প্রেরি তোমা পুত্রবর যথা !”

বাজিল তুমুল রণ; চাহিলা বিস্ময়ে
দেব নর দোঁহা পানে; কাটিলা সৌমিত্রি
শরজাল মুহূর্মুহঃ হৃৎকার রবে !
সবিস্ময়ে রক্ষো রাজা কহিলা, “বাখানি
বীরপণা তোর আমি, সৌমিত্রি কেশরি !
শক্তিধরাধিক শক্তি ধরিস সুরথি,
তুই ; কিন্তু নাহি রক্ষা আজি মোর হাতে !”

স্মরি পুত্রবরে শূর, হানিলা সরোষে
মহাশক্তি^{৪৪} ! বজ্রনাদে উঠিলা গর্জ্জিয়া,
উজ্জ্বলি অস্বরদেশ সৌদামিনীরূপে
ভীষণরিপুনাশিনী ! কাঁপিলা সভয়ে
দেব, নর ! ভীমাঘাতে পড়িল ভুতলে
লক্ষ্মণ, নক্ষত্র যথা; বাজিল বনুবনি
দেব-অস্ত্র, রক্তশ্রোতে আভাহীন এবে ।
সপল্লগ^{৪৫} গিরিসম পড়িলা সুমতি ।

গহন কাননে যথা বিধি মৃগবরে
কিরাত অব্যর্থ শরে, ধায় দ্রুতগতি
তার পানে ; রথ ত্যজি রক্ষো রাজ বলী

ধাইল ধরিতে শবে ! উঠিল চৌদিকে
আর্তনাদ ! হাহাকারে দেবনররথী
বেড়িলা সৌমিত্রি শূরে ।^{৪৬} কেলাসসদনে
শঙ্করের পদতলে কহিলা শঙ্করী,—
“মারিল লক্ষ্মণে, প্রভু, রক্ষঃকুলপতি
সংগ্রামে ! ধূলায় পড়ি যায় গড়াগড়ি
সুমিত্রানন্দন এবে ! তুঘিলা রাক্ষসে,
ভকত-বৎসল তুমি; লাঘবিলা রণে
বাসবের বীরগর্ভ; কিন্তু ভিক্ষা করি,
বিরূপাক্ষ, রক্ষ, নাথ, লক্ষ্মণের দেহে !”

হাসিয়া কহিলা শূলী বীরভদ্র শূরে
“নিবার লক্ষ্যে, বীর !” মনোরথ-গতি,
রাবণের কর্ণমূলে কহিলা গণ্ডীরে
বীরভদ্র ; “যাও ফিরি স্বর্ণলঙ্কাধামে,
রক্ষো রাজ ! হত রিপু, কি কাজ সমরে ?”

স্বপ্নসম দেবদূত অদৃশ্য হইলা ।
সিংহনাদে শূরসিংহ আরোহিলা রথে;
বাজিল রাক্ষস-বাদ্য, নাদিল গণ্ডীরে
রাক্ষস ; পশিলা পুরে রক্ষঃ-অনীকিনী—
রণবিজয়িনী ভীমা, চামুণ্ডা যেমতি
রক্তবীজে নাশি দেবী, তাণ্ডবি উল্লাসে,
অটুহাসি রক্তাধরে, ফিরিলা নিনাদি
রক্তশ্রোতে আর্দ্রদেহ ! দেবদল মিলি
স্তুতিলা সতীরে যথা, আনন্দে বন্দিলা
বন্দীবৃন্দ রক্ষঃসেনা বিজয়সংগীতে ।^{৪৭}

হেথা পারভূত যুদ্ধে, মহা-অভিমাণে
সুরদলে সুরপতি গেলা সুরপুরে ।

ইতি শ্রীমেঘনাদবধে কাব্যে শক্তিনির্ভেদো নাম
সপ্তমঃ সর্গঃ ।

৪৪. অপ্রতিরোধ্য এক ভয়ঙ্কর অস্ত্র । ৪৫. সর্পসহ । ৪৬. যুদ্ধে নিহত শত্রুর মৃতদেহের লাঞ্ছনার মধ্যে দুর্মর আক্রোশ ও দুর্বীর প্রতিহিংসার পর ঘৃণা প্রকাশ পাচ্ছে । ৪৭. মার্কণ্ডেয় চণ্ডীর প্রসঙ্গ ।

অষ্টম সর্গ

রাজকাজ সাধি যথা, বিরাম-মন্দিরে,
প্রবেশি, রাজেন্দ্র খুলি রাখেন যতনে
কীরীট; রাখিলা খুলি অস্ত্রচলচূড়ে
দিনান্তে শিরের রক্ত তমোহা^১ মিহিরে
দিনদেব; তারাদলে আইলা রজনী;
আইলা রজনীকান্ত শান্ত সুধানিধি।

শত শত অগ্নিরাশি জ্বলিল চৌদিকে
রণক্ষেত্রে। ভূপতিত যথায় সুরথী
সৌমিত্রি, বৈদেহীনাথ ভূপতিত তথা
নীরবে! নয়নজল, অবিরল বহি,
প্রাতুলোহ সহ মিশি, তিতিছে মহীরে,
গিরিদেহে বহি যথা, মিশ্রিত গৈরিকে;^২
পড়ে তলে প্রস্রবণ! শূন্যমনাঃ খেদে
গধুসেন্য;—বিভীষণ বিভীষণ রণে,
কুমুদ, অঙ্গদ, হনু, নল, নীল বলী,
শরভ, সুমালী, বীরকেশরী সুবাহু,
সুগ্রীব, বিষল্ল সব প্রভুর বিষাদে!

চেতন পাইয়া নাথ কহিলা কাতরে;—
“রাজ্য ত্যজি, বনবাসে নিবাসিনু যবে,
পক্ষ্মণ, কুটীরদ্বারে, আইলে যামিনী,
ধনুঃ করে হে সুধম্বি, জাগিতে সতত
রক্ষিতে আমায় তুমি; আজি রক্ষঃপুরে—
আজি এই রক্ষঃপুরে অরি মাঝে আমি,
ধিপদ-সলিলে মগ্ন; তবুও ভুলিয়া
আমায়, হে মহাবাহু, লভিছ ভূতলে
বিরাম? রাখিবে আজি কে, কহ, আমারে?
উঠ, বলি! কবে তুমি বিরত পালিতে
প্রাত-আজ্ঞা? তবে যদি মম ভাগ্যদোষে—
চিরভাগ্যহীন আমি—তাজিলা আমারে,
প্রাণাধিক, কহ, শুনি, কোন অপরাধে
অপরাধী তব কাছে অভাগী জানকী?
দেবর লক্ষ্মণে স্মরি রক্ষঃকারণারে
কাঁদিছে সে দিবানিশি! কেমনে ভুলিলে
হে ভাই, কেমনে তুমি ভুলিলে হে আজি
মাতৃসম নিত্য যারে সেবিতো আদরে!
হে রাঘবকুলচূড়া, তব কুলবধু,
রাখে বাঁধি পৌলস্ত্যেয়? না শাস্তি সংগ্রামে

হেন দুষ্টমতি চোরে, উচিত কি তব
এ শয়ন—বীরবীর্যে সর্বভুক সম
দুর্বার সংগ্রামে তুমি? উঠ, ভীমবাহু,
রঘুকুলজয়কেতু! অসহায় আমি
তোমা বিনা, যথা রথী শূন্যচক্র রথে!
তোমার শয়নে হনু বলহীন, বলি,
গুণহীন ধনুঃ যথা; বিলাপে বিষাদে
অঙ্গদ; বিষল্ল মিতা সুগ্রীব সুমতি,
অধীর কব্ধরোস্তম বিভীষণ রথী,
ব্যাকুল এ বলীদল! উঠ, দ্বরা করি,
জুড়াও নয়ন, ভাই, নয়ন উন্মীলি!

“কিন্তু ক্লাস্ত যদি তুমি এ দুরন্ত রণে,
ধনুর্ধর, চল ফিরি যাই বনবাসে।
নাহি কাজ, প্রিয়তম, সীতায় উদ্ধারি,^৩—
অভাগিনী! নাহি কাজ বিনাশি রাক্ষসে।
তনয়-বৎসলা যথা সুমিত্রা জননী
কাঁদেন সরযুতীরে, কেমনে দেখাব
এ মুখ, লক্ষ্মণ, আমি, তুমি না ফিরিলে
সঙ্গে মোর? কি কহিব, সুধিবেন যবে
মাতা, ‘কোথা, রামভদ্র, নয়নের মণি
আমার, অনুজ তোর?’ কি বলে বুঝাব
উন্মীলা বধুরে আমি, পুরবাসী জনে?
উঠ, বৎস!^৪ আজি কেন বিমুখ হে ভ্রমি
সে প্রাতার অনুরোধে, যার প্রেমবশে,
রাজ্যভোগ ত্যজি তুমি পশিলা কাননে।
সমদুঃখে সদা তুমি কাঁদিতো হেরিলে
অশ্রুস্রবণ এ নয়ন; মুছিতে যতনে
অশ্রুধারা; তিতি এবে নয়নের জলে
আমি, তবু নাহি তুমি চাহ মোর পানে
প্রাণাধিক? হে লক্ষ্মণ, এ আচার কভু
(সুপ্রাতঃবৎসল তুমি বিদিত জগতে!)
সাজে কি তোমারে, ভাই, চিরানন্দ তুমি
আমার। আজন্ম আমি ধর্মে লক্ষ্য করি,
পূজিনু দেবতাকূলে দিলা কি দেবতা
এই ফল? হে রজনী, দয়াময়ী তুমি;
শিশির-আসরে, নিত্য সরস কুসুমে,
নিদাঘার্ঘ্য; প্রণদান দেহ এ প্রসূনে!

১. তমঃ বা অঙ্গকার নাশক। ২. গিরিজাত এক ধরনের রক্তবর্ণ মাটি। ৩. প্রাতার বিরহদুঃখে রামচন্দ্রের আক্ষেপ।
৪. রামচন্দ্রের হৃদয়নিংড়ানো বিলাপ।

সুধানিধি তুমি, দেব সুধাংশু; বিতর
জীবনদায়িনী সুধা, বাঁচাও লক্ষ্মণে—
বাঁচাও, করুণাময়, ভিখারী রাখবে।”

এইরূপে বিলাপিতা রক্ষঃকুলরিপু
রণক্ষেত্রে, কোলে করি প্রিয়তমানুজ্ঞে;
উচ্ছ্বাসিলা বীরবৃন্দ বিষাদে চৌদিকে
মহীরূহব্যূহ যথা উচ্ছ্বাসে নিশীথে,
বহে যবে সমীরণ গহন বিপিনে।

নিরানন্দ শৈলসূতা কৈলাস-আলয়ে
রঘুনন্দনের দুঃখে; উৎসঙ্গ-প্রদেশে,^৫
ধূজ্জটির পাদপদ্মে পড়িছে সঘনে
অশ্রুবারি, শতদলে শিশির যেমতি
প্রত্যবে! সুধিলা প্রভু, “কি হেতু, সুন্দরি,
কাতরা তুমি হে আজি, কহ তা আমারে?”
“কি না তুমি জান, দেব?” উত্তরিলো দেবী
গৌরী, লক্ষ্মণের শোকে, স্বর্ণলঙ্কাপুরে,
আক্ষেপিছে রামচন্দ্র, শুন, সক্রুণে।
অধীর হৃদয় মম রামের বিলাপে।
কে আর, হে বিশ্বনাথ, পূজিবে দাসীরে
এ বিশ্বে? বিষম লজ্জা দিলে, নাথ, আজি
আমায়; ডুবালে নাম কলঙ্কসলিলে।
তপোভঙ্গ দোষে দাসী দোষী তব পদে,
তাপসেন্দ্র; তেঁই বুঝি, দণ্ডিলা একায়ে?
কুক্ষণে আইল ইন্দ্র আমার নিকটে!
কুক্ষণে মৈথিলীপতি পূজিল আমারে।”

নীরবিলা মহাদেবী কাঁদি অভিমানে।
হাসি উত্তরিলো শব্দ, “এ অল্প বিষয়ে
কেন নিরানন্দ তুমি, নগেন্দ্রনন্দিনি?
প্রের রাখবেস্ত্র শূরে কৃতাস্তনগরে*
মায়া সহ; সশরীরে, আমার প্রসাদে,
প্রবেশিবে প্রেতদেশে দাশরথি রথী।
পিতা রাজা দশরথ দিবে তারে কয়ে
কি উপায়ে ভাই তার জীবন লভিবে,
আবার; এ নিরানন্দ ত্যজ চন্দ্রাননে!
দেহ এ ত্রিশূল মম মায়ায়, সুন্দরি।
তমোময়, যমদেশে অগ্নিস্তম্ভ সম
জ্বলি উজ্জ্বলিবে দেশ; পূজিবে ইহারে
প্রেতকুল; রাজদণ্ডে প্রজাকুল যথা।”

কৈলাস-সদনে দুর্গা স্মরিলো মায়ারে।

অবিলম্বে কুহকিনী আসি প্রণমিলা
অধিকায়; মৃদু স্বরে কহিলা পার্বতী;—
“যাও তুমি লঙ্কাধামে, বিশ্ববিমোহিনি।
কাঁদিছে মৈথিলীপতি, সৌমিত্রির শোকে
আকুল; সস্বোধি তারে সুমধুর ভাবে,
লহ সঙ্গে প্রেতপুরে; দশরথ পিতা
আদেশিবে কি উপায়ে লভিবে সুমতি
সৌমিত্রি জীবন পুনঃ, আর যোধ যত,
হত এ নশ্বর রণে। ধর পদ্মকরে
ত্রিশূলীর শূল, সতি। অগ্নিস্তম্ভ সম
তমোময় যমদেশে জ্বলি উজ্জ্বলিবে
অস্তবর।” প্রণমিয়া উমায় চলিলা
মায়া। ছায়াপথে ছায়া পালাইলা দূরে
রূপের ছটায় যেন মলিন। হাসিল
তারাবলী—মণিকুল সৌরকরে যথা।
পশ্চাতে খমুখে^৬ রাখি আলোকের রেখা,
সিঙ্ঘুনিরে তরী যথা, চলিলা রূপসী
লঙ্কা পানে। কত ক্ষণে উতরিলা দেবী
যথায় সসৈন্যে ক্ষুণ্ণ রঘুকুলমণি।
পুরিল কনক-লঙ্কা স্বর্গীয় সৌরভে।

রাঘবের কর্ণমূলে কহিলা জননী,
“মুছ অশ্রুবারিধারা, দাশরথি রথি,
বাঁচিবে প্রাণের ভাই; সিঙ্ঘুতীর্থ-জলে
করি স্নান, শীঘ্র তুমি চল মোর সাথে
যমালয়ে; সশরীরে পশিবে, সুমতি,
তুমি প্রেতপুরে আজি শিবের প্রসাদে।
পিতা দশরথ তব দিবেন কহিয়া
কি উপায়ে সুলক্ষণ লক্ষ্মণ লভিবে
জীবন। হে ভীমবাহু, চল শীঘ্র করি।
সৃজিব সুডঙ্গপথ; নির্ভয়ে, সুরথি,
পশ তাহে; যাব আমি পথ দেখাইয়া
তবাগ্রে। সুগ্রীব-আদি নেতৃপতি যত
কহ সবে, রক্ষা তারা করুক লক্ষ্মণে।”

সবিস্ময়ে রাখবেস্ত্র সাবধানি যত,
নেতৃনাথে, সিঙ্ঘুতীরে চলিলা সুমতি
মহাতীর্থ। অবগাহি পূত স্রোতে দেহ
মহাভাগ,^৭ তষি দেব পিতৃলোক-আদি
তর্পণে শিবির-দ্বারে উতরিলা দ্বরা
একাকী। উজ্জ্বল এবে দেখিলা নৃমণি

দেবতেজঃপুঞ্জ গৃহ । কৃতাঞ্জলিপুটে,
পুষ্পাঞ্জলি দিয়া রথী পূজিলা দেবীরে ।
কৃষিয়া ভীষণ তনু সুবীর ভূষণে
শীরেশ, সুড়ঙ্গপথে পশিলা সাহসে
কি ভয় তাহারে, দেব সুপ্রসন্ন যারে ?

চলিলা রাঘবশ্রেষ্ঠ, তিমির কানন-
পথে পথী চলে যথা, যবে নিশাভাগে
সুখাংশুর অংশু পশি হাসে সে কাননে ।
আগে আগে মায়াদেবী চলিলা নীরবে ।

কত ক্ষণে রঘুবর শুনিলা চমকি
কম্পোল, সহস্র শত সাগর উথলি
রোষে কম্পোলিছে যেন ! দেখিলা সভয়ে
অদূরে ভীষণ পুরী, চিরনিশাবৃত !
বহিছে পরিখারূপে বৈতরণী নদী
বজ্রনাদে; রহি রহি উথলিছে বেগে
তরঙ্গ, উথলে যথা তপ্ত পাত্রে পয়ঃ
উচ্ছসিয়া ধুমপুঞ্জ, ত্রস্ত অগ্নিতেজে !^{১০}
নাহি শোভে দিনমণি সে আকাশদেশে;
কিস্বা চন্দ্র, কিস্বা তারা; ঘন ঘনাবলী,
উগরি পাবকরাশি, ভ্রমে শূন্যপথে
বাতগর্ভ, গর্জি উচে, প্রলয়ে যেমতি
পিনাকী,^{১১} পিনাকে ইমু^{১২} বসাইয়া রোষে ।

সবিস্ময়ে রঘুনাথ নদীর উপরে
হেরিলা অদ্ভুত সেতু অগ্নিময় কভু
কভু ঘন ধুমাবৃত, সুন্দর কভু বা
সুবর্ণে নিশ্চিত যেন ! ধাইছে সতত
সে সেতুর পানে প্রাণী লক্ষ লক্ষ কোটি
হাহাকার নাদে কেহ; কেহ বা উল্লাসে !

সুখিলা বৈদেহীনাথ,—“কহ, কৃপাময়ি
কেন নানা বেশ সেত ধরিছে সতত ?
কেন বা অগণ্য প্রাণী (অগ্নিশিখা হেরি
পতঙ্গের কুল যথা) ধায় সেত পানে ?”

উত্তরিলা মায়াদেবী,—“কামরূপী সেতু,

সীতানাথ; পাপী-পক্ষে অগ্নিময় তেজে,
ধুমাবৃত; কিন্তু যবে আসে পুণ্য-প্রাণী,
প্রশস্ত, সুন্দর, স্বর্গে স্বর্গপথ যথা !
ওই যে অগণ্য আত্মা দেখিছ, নৃমণি
তাজি দেহ ভবধামে, আসিছে সকলে
শ্রেতপুরে, কস্মফল ভুঞ্জিতে এ দেশে ।
ধর্মপথগামী যারা যায় সেতুপথে
উত্তর, পশ্চিম, পূর্বদ্বারে; পাপী যারা
সাঁতারিয়া নদী পার হয় দিবানিশি
মহাক্রেশে; যমদূত পীড়য়ে পুলিনে,
জলে জলে পাপ-প্রাণ তপ্ত তৈলে যেন !^{১৩}
চল মোর সাথে তুমি; হেরিবে সত্বরে
নরচক্ষুঃ কভু নাহি হেরিয়াছে যাহা।”

ধীরে ধীরে রঘুবর চলিলা পশ্চাতে,
সুবর্ণ-দেউটী সম অগ্রে কুহকিনী
উজ্জলি বিকট দেশ । সেতুর নিকটে
সভয়ে হেরিলা রাম বিরাট-মুরতি
যমদূত দশপাণি । গর্জি বজ্রনাদে
সুখিল কৃতাঞ্জুর, “কে তুমি ? কি বলে,
সশরীরে, হে সাহসি, পশিলা এ দেশে
আত্মময় ? কহ ত্বরা, নতুবা নাশিব
দণ্ডাঘাতে মুহূর্ত্তেকে !” হাসি মায়াদেবী
শিবের ত্রিশূল মাতা দেখাইলা দূতে ।

নতভাবে নমি দূত কহিল সতীরে;
“কি সাধ্য আমার, সাধিব, রোধি আমি গতি
তোমার ? আপনি সেতু স্বর্ণময় দেখ
উল্লাসে, আকাশ যথা উবার মিলনে !”

বৈতরণী নদী পার হইলা উভয়ে ।
লৌহময় পুরীদ্বার দেখিলা সম্মুখে
রঘুপতি; চক্রাকৃতি অগ্নি রাশি রাশি
ঘোরে অবিরাম-গতি চৌদিক উজলি !
আগ্নেয় অক্ষরে লেখা দেখিলা নৃমণি
ভীষণ তোরণ-মুখে,—“এই পথ দিয়া

৯. রামের নরকদর্শন বর্ণনা লক্ষ্মণীয় । ১০. বৈতরণী নদীর পৌরাণিক বর্ণনা । ১১. পিনাক নামক ধনুক যিনি ধারণ করেন—মহাদেব । ১২. বাণ । ১৩. যমপুরীর পৌরাণিক বর্ণনা ।

যায় পাপী দুঃখদেশে চির দুঃখ-ভোগে;
হে প্রবেশি, তাজি স্পৃহা প্রবেশ এ দেশে!”^{১৪}

অস্থিচর্মসার দ্বারে দেখিলা সুরথী
জ্বর-রোগ। কভু শীতে কাঁপে ক্ষীণ তনু
থর থরি ; ঘোর দাহে কভু বা দহিছে,
বাড়বাগ্নিতেজে যথা জলদলপতি।
পিত্ত, শ্লেষ্মা, বায়ু, বলে কভু আক্রমিছে
অপহরি জ্ঞান তার। সে রোগের পাশে
বিশাল-উদর বসে উদরপরতা;
অজীর্ণ ভোজন-দ্রব্য উগরি দুঃখতি
পুনঃ পুনঃ দুই হস্তে তুলিয়া গিলিছে
সুখাদ্য। তাহার পাশে প্রমত্ত হসে
ঢুল ঢুলু ঢুলু আঁখি। নাচিছে, গাইছে
কভু, বিবাদিছে কভু, কাঁদিছে কভু বা
সদা জ্ঞানশূন্য মুঢ়, জ্ঞানহর সদা!
তার পাশে দুষ্ট কাম, বিগলিত-দেহ
শব যথা, তবু পাপী রত গো সুরতে
দহে হিয়া অহরহঃ কামানলতাপে।
তার পাশে বসি যক্ষ্মা শোণিত উগরে,
কাসি কাসি দিবানিশি; হাঁপায় হাঁপানি—
মহাপীড়া! বিসূচিকা গতজ্যোতিঃ আঁখি;
মুখ-মল-দ্বারে বহে লোহের লহরী
শুভ্রজলররূপে। তৃষারূপে রিপু
আক্রমিছে মুহূর্মুহুঃ; অঙ্গগ্রহ নামে
ভয়ঙ্কর যমচর গ্রহিছে প্রষলে
ক্ষীণ অঙ্গ, যথা ব্যাঘ্র, নাশি জীব বনে
রহিয়া রহিয়া পড়ি কামড়ায় তারে
কৌতুকে! অদূরে বসে সে রোগের পাশে
উন্মত্ততা,—উগ্র কভু, আর্থতি পাইলে
উগ্র অগ্নিশিখা যথা। কভু হীনবলা।
বিবিধ ভূষণে কভু ভূষিত; কভু বা
উলঙ্গ, সমর-রঙ্গ হরপ্রিয়া যথা
কালী! কভু গায় গীত করতালি দিয়া
উন্মদা; কভু বা কাঁদে; কভু হাসিরাশি
বিকট অধরে; কভু কাটে নিজ গলা
তীক্ষ্ণ অস্ত্রে; গিলে বিষ; ডুবে জলাশয়ে,

গলে দড়ি! কভু, ধিক্! হাব ভাব-আদি
বিভ্রমবিলাসে বামা আহানে কামীরে
কামাতুরা! মল, মুত্র, না বিচারি কিছু
অন্ন সহ মাখি, হায়, খায় অনায়াসে।
কভু বা শৃঙ্খলাবন্ধা, কভু ধীরা যথা
স্রোতোহীন প্রবাহিণী—পবন বিহনে!
আর আর রোগ যত কে পারে বর্ণিতে?

দেখিলা রাঘব রথী অগ্নিবর্ণ রথে
(বসন শোণিতে আর্দ্র, খর অসি করে,)
রণে! রথমুখে বসে ক্রোধ সূতবেশে!
নরমুণ্ডমালা গলে, নরদেহরাশি
সম্মুখে। দেখিলা হত্যা, ভীম ঋক্ষপাণি;
উর্ধ্ববাহু সদা, হায়, নিধনসাধনে!
বৃক্ষশাখে গলে রজ্জ্ব দুলিছে নীরবে
আত্মহত্যা, লোলজিহ্বা উন্মীলিত আঁখি
ভয়ঙ্কর! রাঘবেন্দ্রে সস্তাষি সুভাষে
কহিলেন মায়াদেবী—“এই যে দেখিছ
বিকট শমনদূত যত, রঘুরাশি,
নানা বেশে এ সকলে ভ্রমে ভূমণ্ডলে
অবিশ্রাম, ঘোর বনে কিরাত যেমতি
মৃগয়ার্থে। পশ তুমি কৃতান্তনগরে,
সীতাকান্ত; দেখাইব আজি হে তোমারে
দিক দশায় আত্মকুল”^{১৫} জীবে আত্মদেশে”^{১৬}!
দক্ষিণ দুয়ার এই; চৌরাশি নরক-
কুণ্ড আছে এই দেশে।”^{১৭} চল ত্বর করি।”

পশিলা কৃতান্তপুরে সীতাকান্ত বলী,
দাবদন্ধ বনে, মরি, ঋতুরাজ যেন
বসন্ত; অমৃত কিম্বা জীবশূন্য দেহে!
অন্ধকারময় পুরী, উঠিছে চৌদিকে
আর্দ্রনাদ; ভূকম্পনে কাঁপিছে সঘনে
জল স্থল; মেঘাবলী উগরিছে রোষে
কালাগ্নি; দুর্গন্ধময় সমীর বহিছে
লক্ষ লক্ষ শব যেন পুড়িছে শ্মশানে!
কত ক্ষণে রঘুশ্রেষ্ঠ দেখিলা সম্মুখে
মহাহুদ; জলরূপে বহিছে কন্মোলে
কালাগ্নি। ভাসিছে তাহে কোটি কোটি প্রাণী

১৪. যমপুরীর এই বর্ণনায় পাশ্চাত্য প্রভাব লক্ষ্যণীয়। ১৫. প্রেতাশ্বাসমূহ। ১৬. যমলোকে। ১৭. ভারতীয় বিশ্বাস মতে বিভিন্ন নামে বিভিন্ন প্রকার অপরাধীর জন্য ৮৪ টি নরক আছে।

ছটফটি হাহাকারে। “হায় রে, বিধাতঃ
নির্দয়, সৃজিলি কি রে আমা সবাকারে
এই হেতু? হা দারুণ, কেন না মরিনু
জঠর-অনলে মোরা মায়ের উদরে?
কোথা তুমি, দিনমণি? তুমি, নিশাপতি
সুধাংশু? আর কি কভু জুড়াইব আঁখি
হেরি তোমা দৌহে, দেব? কোথা সূত, দারা,
আত্মবর্গ? কোথা, হায়, অর্থ যার হেতু
বিবিধ কুপথে রত ছিনু রে সতত
করিনু কুকর্ম, ধর্মে দিয়া জলাঞ্জলি?”

এইরূপে পাপী-প্রাণ বিলাপে সে হুদে
মুহূর্ষঃ। শূন্যদেশে অমনি উত্তরে
শূন্যদেশভবা বাণী ভৈরব নিনাদে,
“বৃথা কেন, মূঢ়মতি, নির্দিস্ বিধিরে
তোরা? স্বকরম-ফল ভুঞ্জিস এ দেশে!
পাপের ছলনে ধর্মে ভুলিলি কি হেতু?
সুবিধি বিধির বিধি বিদিত জগতে।”

নীরবিলে দৈববাণী, ভীষণ-মুরতি
যমদূত হানে দণ্ড মস্তক-প্রদেশে;
কাটে কুমি;” বজ্রনখা মাংসাহারী পাখী
উড়ি পড়ি ছায়াদেহে ছিড়ি নাড়ী-ভুঁড়ি
ছহ্কারে। আর্জনাতে পুরে দেশ পাপী!

কহিলা বিবাদে মায়া রাঘবে সঞ্জামি,
“রৌরব” এ হুদ নাম, শুন, রঘুমণি,
অগ্নিময়! পরধন হরে যে দুশ্মতি,
তার চিরবাস হেথা; বিচারী যদ্যপি
অবিচারে রত, সেও পড়ে এই হুদে;
আর আর প্রাণী যত, মহাপাপে পাপী।
না নিবে পাবক হেথা, সদা কীট কাটে!
নহে সাধারণ অগ্নি কহিনু তোমারে,
জ্বলে যাহে প্রেতকুল এ ঘোর নরকে,
রঘুবর; অগ্নিরূপে বিধিরোম হেথা
জ্বলে নিত্য। চল, রথি, চল, দেখাইব
কুণ্ডীপাকে;” তপ্ত তৈলে যমদূত ভাজে
পপীবৃন্দে যে নরকে। ওই শুন বলি,
অদূরে ক্রন্দনধ্বনি! মায়াবলে আমি

রোধিয়াছি নাসাপথ তোমার, নহিলে
নারিতে তিষ্ঠিতে হেথা, রঘুশ্রেষ্ঠ রথি!
কিন্মা চল যাই, যথা অন্ধতম কুপে
কাঁদিছে আত্মহা পাপী হাহাকার রবে
চিরবন্দী!” করপুটে কহিলা নৃপতি,
“ক্ষম, ক্ষেমঙ্করি, দাসে! মরিব এখনি
পরদুঃখে, আর যদি দেখি দুঃখ আমি
এইরূপ! হায়, মাতঃ, এ ভবমণ্ডলে
স্বেচ্ছায় কে গ্রহে জন্ম, এই দশা যদি
পরে? অসহায় নর; কলুষকুকহে”
পারে কি গো নিবারিতে?” উত্তরিল মায়া,—
“নাহি বিষ, মহেৎবাস, এ বিপুল ভবে,
না দমে ঔষধ যারে! তবে যদি কেহ
অবহেলে সে ঔষধে, কে বাঁচায় তারে?
কর্মক্ষেত্রে পাপ সহ রণে যে সুমতি,
দেবকুল অনুকুল তার প্রতি সদা;—
অভেদ্য কবচে ধর্ম আবরেন তারে!
এ সকল দণ্ডস্থল দেখিতে যদ্যপি,
হে রথি, বিরত তুমি, চল এই পথে!”

কত দূরে সীতাকাণ্ড শিলা কান্তারে—
নীরব, অসীম, দীর্ঘ; নাহি ডাকে পাখী,
নাহি বহে সমীরণ সে ভীষণ-বনে,
না ফোটে কুসুমাবলী—বনসুশোভিনী।
স্থানে স্থানে পত্রপুঞ্জ ছেদি প্রবেশিছে
রশ্মি, তেজেহীন কিন্তু, রোগীহাস্য যথা।

লক্ষ লক্ষ লক্ষ প্রাণী সহসা বেড়িল
সবিস্ময়ে রঘুনাথে, মধুভাণ্ডে যথা
মক্ষিক। সুখিল কেহ সক্ররুণ স্বরে,
“কে তুমি, শরীরি? কহ, কি গুণে আইলা
এ স্থলে? দেব কি নর, কহ শীঘ্র করি?
কহ কথা; আমা সবেতোষ, গুণনিধি,
বাকা-সুধা-বরিশণে! যে দিন হরিল
পাপপ্রাণ যমদূত, সে দিন অবধি
রসনাজনিত ধ্বনি বঞ্চিত আমরা।
জুড়াল নয়ন হেরি অঙ্গ তব, রথি,
বরাস, এ কর্ণদ্বয়ে জুড়াও বচনে!”^{২২}

১৮. এখানকার নরকবর্ণনা ভারতীয় বিশ্বাসের অনুরূপ। ১৯. ঘোরতর পাপীদের জন্য অগ্নিময় একটি নরক। ২০. অপর একটি নরকের নাম। ২১. পাপের ছলনায়। ২২. নরকের এক হৃদয়বিদারী দৃশ্য। কবির সমবেদনার স্পর্শ স্পষ্ট।

উত্তরীলা রক্ষোরিপু, “রঘুকুলোদ্ভব
এ দাস, হে শ্রেতকুল; দশরথ রথী
পিতা, পাটেশ্বরী দেবী কৌশল্যা জননী;
রাম নাম ধরে দাস; হায়, বনবাসী
ভাগ্য-দোষে! ত্রিশূলীর আদেশে ভেটিব
পিতায়, তেঁই গো আজি এ কৃতান্তপুরে।”

উত্তরিল প্রেত এক, “জানি আমি তোমা,
শুরেন্দ্র; তোমার শরে শরীর ত্যজিনু
পঞ্চবটীবনে আমি।” দেখিলা নৃমণি
চমকি মারীচ রক্ষে—দেহহীন এবে!

জিজ্ঞাসিলা রামচন্দ্র, “কি পাপে আইলা
এ ভীষণ বনে, রক্ষঃ, কহ তা আমারে?”

“এ শান্তির হেতু হায়, পৌলস্ত্য দুর্শ্রুতি,
রঘুরাজ!” উত্তরীলা শূন্যদেহ প্রাণী,
“সাধিতে তাহার কার্য বঞ্চিনু তোমারে,
তেঁই এ দুর্গতি মম!” আইল দুষণ
সহ খর, (খর যথা তীক্ষ্ণতর অসি
সমরে, সজীব যবে,) হেরি রঘুনাথে,
রোষে, অভিমানে দৌঁছে চলি গেলা দূরে,
বিষদগুহীন অহি হেরিলে নকুলে
বিষাদে লুকায় যথা। সহসা পুরিল
ভৈরব আরবে বন, পালাইল রড়ে
ভূতকুল, শুষ্ক পত্র উড়ি যায় যথা
বহিলে প্রবল ঝড়। কহিলা শুরেশে
মায়া, “এই শ্রেতকুল শুন রঘুমণি,
নানা কুশে করে বাস; কভু কভু অসি
ভ্রমে এ বিলাপবনে^{২০}, বিলাপি নীরবে।
ওই দেখ যমদূত খেদাইছে রোষে
নিজ নিজ স্থানে সবে!” দেখিলা বৈদেহী—

হৃদয়কমলরবি, ভূত পালে পালে,
পশ্চাতে ভীষণ-মুষ্টি যমদূত; বেগে
ধাইছে নিনাদি ভূত, মৃগপাল যথা
ধায় বেগে ক্ষুধাতুর সিংহের তাড়নে
উর্ধ্বশ্বাস! মায়া সহ চলিলা বিষাদে
দয়াসিদ্ধ রামচন্দ্র সজল নয়নে।

কত ক্ষণে আর্তনাদ শুনিলা সুরথী
সিহরি। দেখিলা দূরে লক্ষ লক্ষ নারী,
আভাহীন, দিবাভাগে শশিকলা যথা
আকাশে। কেহ বা ছিঁড়ি দীর্ঘ কেশাবলী,
কহিছে, “চিকণি তোরে বাঁধিতাম সদা,

বাঁধিতে কামীর মনঃ, ধর্ম কর্ম ভুলি;
উন্মদা যৌবনমদে।” কেহ বিদরিছে
নখে বক্ষঃ, কহি, “হায়, হীরামুক্তা ফলে
বিফলে কাটানু দিন সাজাইয়া তোরে;
কি ফল ফলিল পরে!” কোন নারী খেদে
কুড়িছে নয়নদ্বয়, (নির্দয় শকুনি
মৃতজীব-আঁখি যথা) কহিয়া, “অঞ্জনে
রঞ্জি তোরে, পাপচক্ষুঃ, হানিতাম হাসি
চৌদিকে কটাক্ষশর; সুদর্পণে হেরি
বিভা তোর, ঘৃণিতাম কুরঙ্গনয়নে!
গরিমার পুরস্কার এই কি রে শেষে?”

চলি গেলা বামাদল কাঁদিয়া কাঁদিয়া।—

পশ্চাতে কৃতান্তদূতী, কুস্তল-প্রদেশে
স্বনিছে ভীষণ সর্প^{২১}; নখ অসি-সম;
রক্তাক্ত অধর গুষ্ঠ; দুলিছে সঘনে
কদাকার স্তনযুগ ঝুলি নাভিতলে;
নাসাপথে অগ্নিশিখা জ্বলি বাহিরিছে
ধকধকি; নয়নাগ্নি মিশিছে তা সহ।
সম্ভাষি রাখবে মায়া কহিলা, “এই যে
নারীকুল, রঘুমণি, দেখিছ সম্মুখে,
বেশভূবাসস্তা সবে ছিল মহীতলে।
সাজিত সতত দুপ্তা, বসন্তে যেমতি
বণস্থলী, কামী-মনঃ মজাতে বিক্রমে
কামাতুরা! এবে কোথা সে রূপমাধুরী,
সে যৌবনধন, হায়?” অমনি বাজিল
প্রতিধ্বনি, “এবে কোথা সে রূপমাধুরী,
সে যৌবনধন, হায়!” কাঁদি ঘোর রোলে
চলি গেলা বামাকুল যে যার নরকে।

আবার কহিলা মায়া;—“পুনঃ দেখ চেয়ে
সম্মুখে, হে রক্ষোরিপু” দেখিলা নৃমণি
আর এক বামাদল সম্মোহন রূপে!
পরিমলময় ফুলে মণ্ডিত কবরী,
কামাগ্নির তেজোরশি কুরঙ্গ-নয়নে,
মিষ্টতর সুধা-রস মধুর অধরে!
দেবরাজ-কনু-সম মণ্ডিত রতনে
গ্রীবাদেশ; সুস্ব স্বর্ণ-সুতার কাঁচলি
আচ্ছাদন-ছলে ঢাকে কেবল দেখাতে
কুচ-কুচি, কাম-ক্ষুধা বাড়িয়ে হৃদয়ে
কামীর! সুক্ষীণ কটি; নীল পট্টবাসে,
(সুস্ব অতি) গুরু উরু যেন ঘৃণা করি

২০. ক্রন্দনময় অরণ্য। কল্পনায় হোমরীয় প্রভাব। ২৪. যমদূতীদের খোঁপায় বিষধর সর্প গাঁজা। এই কল্পনায়
পাশ্চাত্য প্রভাব স্পষ্ট।

আবরণ, রক্তা-কান্তি দেখায় কৌতুকে,
উলঙ্গ বরাঙ্গ যথা মানসের জলে
অঙ্গরীর, জল-কেলি করে তারা যবে।
বাজিছে নুপুর পায়ে, নিতম্বে মেখলা;
মৃদঙ্গের রঙ্গে, বীণা, রবাব, মন্দিরা,
আনন্দে স্বরঙ্গ সবে মন্দে মিলাইছে।
সঙ্গীত-তরঙ্গে রঙ্গে ভাসিছে অঙ্গনা।

রূপস পুরুষদল আর এক পাশে
বাহিরিল মৃদু হাসি; সুন্দর যেমতি
কৃন্তিকা-বল্লভ দেব কার্তিকেয় বলী,
কিষ্ণা, রতি মনমথ, মনোরথ তব।

হেরি সে পুরুষ-দলে কামমদে মাতি
কপটে কটাঙ্ক-শর হানিলা রমণী,
কঙ্কণ বাজিল হাতে শিঞ্জিনীর বোলে।
তপ্ত শ্বাসে উড়ি রজঃ কুসুমের দামে
ধূলারূপে স্তান-রবি আশু আবরিল।
হারিল পুরুষ রণে; হেন রণে কোথা
জিনিতে পুরুষদলে আছে হে শক্তি ?

বিহঙ্গ বিহঙ্গী যথা প্রেমরঙ্গে মজি
করে কেলি যথা তথা—রসিক নাগরে,
ধরি পশে বন-মাঝে রসিকা নাগরী—
কি মানসে, নয়ন তা কহিল নয়নে।

সহসা পুরিল বন হাহাকার রবে।
বিস্ময়ে দেখিলা রাম করি জড়াজড়ি
গড়াইছে ভূমিতলে নাগর নাগরী
কামড়ি আঁচড়ি, মারি হস্ত, পদাঘাতে।
ছিড়ি চুল কুড়ি আঁখি, নাক মুখ চিরি
বজ্রনখে। রক্তশোতে তিতিলা ধরণী।
যুঝিল উভয়ে ঘোরে, যুঝিল যেমতি
কীটকের সহ ভীম নারী-বেশ ধরি
বিরাটে।^{২৫} উত্তরি তথা যমদূত যত
লৌহের মুগ্ধর মারি আশু তাড়াইলা
দুই দলে। মৃদুভাবে কহিলা সুন্দরী
মায়া রঘুকুলানন্দ রাঘবনন্দনে :—

“জীবনে কামের দাস, শুন বাছা, ছিল
পুরুষ; কামের দাসী রমণী-মণ্ডলী।
কাম-স্কুধা পূরাইল দোঁহে অবিরামে
বিসজ্জি ধর্ম্মেরে, হায়, অধর্ম্মের জলে,
বর্জ্জি লজ্জা; দশু এবে এই যমপুরে।
ছলে যথা মরীচিকা তৃষাতুর জনে,

মরু-ভূমে; স্বর্ণকান্তি মাকাল যেমতি
মোহে স্কুধাতুর প্রাণে; সেই দশা ঘটে
এ সঙ্গমে; মনোরথ বৃথা দুই দলে।
আর কি কহিব, বাছা, বুঝি দেখ তুমি।
এ দুর্ভোগ, হে সুভগ, ভোগে বহু পাপী
মর-ভূমে নরকাগ্রে; বিধির এ বিধি—
যৌবনে অন্যায়ে ব্যয়ে বয়েসে কাকালী।
অনির্কেয়^{২৬} কামানল পোড়ায় হৃদয়ে;
অনির্কেয় বিধি-রোধ কামানল-রূপে
দহে দেহ, মহাবাহু, কহিনু তোমারে—
এ পাপী-দলের এই পুরস্কার শেষে!”—

মায়ার চরণে নমি কহিলা নৃমণি,
“কত যে অদ্ভুত কাণ্ড দেখিনু এ পুরে,
তোমার প্রসাদে, মাতঃ, কে পারে বর্ণিতে ?
কিস্ত কোথা রাজ-স্বাধি ? লইব মাগিয়া
কিশোর লক্ষ্মণে ভিক্ষা তাঁহার চরণে—
লহ দাসে সে সুধামে, এ মম মিনতি।”

হাসিয়া কহিলা মায়া, “অসীম এ পুরী,
রাঘব, কিষ্কিৎ মাত্র দেখানু তোমারে।
দ্বাদশ বৎসর যদি নিরন্তর ভ্রমি
কৃতান্ত-নগরে, শূর, আমা দোঁহে, তবু
না হেরিব সর্বভাগ। পূর্বদ্বারে সুখে
পতি সহ করে বাস পতিপরায়ণা
সাধ্বীকুল;^{২৭} স্বর্গে, মর্ত্যে, অতুল এ পুরী
সে ভাগে; সুরম্য হর্ম্ম্য সুকানন মাঝে,
সুসরসী সুকমলে পরিপূর্ণ সদা,
বাসন্ত সমীর চির বহিছে সুস্বনে,
গাইছে সুগিকপুঞ্জ সদা পঞ্চস্বরে।
আপনি বাজিছে বীণা, আপনি বাজিছে
মুরঞ্জ, মন্দিরা, বাঁশী, মধু সপ্তস্বরী!
দধি, দুগ্ধ, ঘৃত, উৎসে উখলিছে সদা
চৌদিকে, অমৃতফল ফলিছে কাননে;
প্রদানেন পরমাত্র আপনি অন্নদা!
চর্ক্য, চোষ্য, লেহ্য পেয়, যা কিছু যে চাহে,
অমনি পায় সে তারে, কামধুকে যথা
কামলতা, মহেশ্বাস, সদা ফলবতী।
নাহি কাজ যাই তথা; উত্তর দুয়ারে
চল, বলি, ক্ষণকাল ভ্রম সে সুদেশে।
অবিলম্বে পিতৃ-পদ হেরিবে, নৃমণি!”

উত্তরাভিমুখে দোঁহে চলিলা সত্বরে।

দেখিলা বৈদেহীনাথ গিরি শত শত
বন্ধা, দন্ধ, আহা, যেন দেবরোষানলে।
তুঙ্গশৃঙ্গশিরে কেহ ধরে রাশি রাশি
তুবার; কেহ বা গর্জি উগরিছে মুহুঃ
অগ্নি, দ্রবি শিলাকুলে অগ্নিময় স্রোতে,
আবরি গগন ভস্মে, পুরি কোলাহলে
চৌদিক! দেখিলা প্রভু মরুক্ষেত্র শত
অসীম, উত্তপ্ত বায়ু বহি নিরবধি
তাড়াইছে বালিবৃন্দে উর্ষিদলে যেন!
দেখিলা তড়াগ^{২৪} বলী, সাগর-সদৃশ
অকুল; কোথায় ঝড়ে হুঙ্কার উথলে
তরঙ্গ পর্বতাকৃতি; কোথায় পচিছে
গতিহীন জলরাশি; করে কেলি তাহে
ভীষণ-মুরতি ভেক, চীৎকারি গভীরে!
ভাসে মহোরগবৃন্দ, অশেষশরীরী
শেষ যথা; হলাহল জ্বলে কোন স্থলে;
সাগর-মগ্ননকালে সাগরে যেমতি।
এ সকল দেশে পাপী ভ্রমে, হাহারবে
বিলাপি! দংশিছে সর্প, বৃশ্চিক কামড়ে,
ভীষণদশন কীট! আশুন ভুতলে,
শূন্যদেশে ঘোর শীত! হায় রে, কে কবে
লভয়ে বিরাম ক্ষণ এ উত্তর দ্বারে!
দ্রুতগতি মায়া সহ চলিলা সুরথী।

নিকটয়ে তট যবে, যতনে কাণ্ডারী
দিয়া পাড়ী জলারণ্যে, আশু ভেটে তারে
কুসুমবনজনিত পরিমলসখা
সমীর; জুড়ায় কান শুনি বহুদিনে
পিককুল-কলরব, জনরব সহ;
ভাসে সে কাণ্ডারী এবে আনন্দ-সলিলে।
সেইরূপে রঘুবর শুনিলা অদূরে
বাদ্যধ্বনি! চারি দিকে হেরিলা সুমতি
সবিস্ময়ে স্বর্ণসৌধ, সুকাননরাজী
কনক-প্রসূন-পূর্ণ;—সুদীর্ঘ সরসী,
নবকুবলয়ধাম। কহিলা সুস্বরে
মায়া, “এই দ্বারে, বীর, সম্মুখসংগ্রামে
পড়ি, চিরসুখ ভুঞ্জে মহারথী যত।
অশেষ, হে মহাভাগ, সন্তোষ এ ভাগে
সুখের! কানন-পথে, চল ভীমবাহু
দেখিবে যশস্বী জনে, সঞ্জীবনী পুরী^{২৫}”

যা সবার যশে পূর্ণ, নিকুঞ্জ যেমতি
সৌরভে। এ পুণ্যভূমে বিধাতার হাসি
চন্দ্র-সূর্য্য-তারারূপে দীপে, অহরহঃ
উজ্জ্বলে।” কৌতুকে রথী চলিলা সত্বরে,
অগ্রে শূলহস্তে মায়া। কত ক্ষণে বলী
দেখিলা সম্মুখে ক্ষেত্র—রঙ্গভূমিরূপে।
কোন স্থলে শূলকুল শালবন যথা
বিশাল; কোথায় হ্রেষে তুরঙ্গমরাজী
মণ্ডিত রণভূষণে; কোথায় গরজে
গজেন্দ্র! খেলিছে চর্ম্মী অসি চর্ম্ম ধরি;
কোথায় যুঝিছে মগ্ন ক্ষিতি টলমলি;
উড়িছে পতাকাচয় রণানন্দে যেন
কুসুম-আসনে বসি, স্বর্ণবীণা করে,
কোথায় গাইছে কবি, মোহি শ্রোতাকুলে,
বীরকুলসংকীর্তনে। মাতি সে সঙ্গীতে
হুঙ্কারিছে বীরদল; বর্ষিছে চৌদিকে,
না জানি কে, পারিজাত ফুল রাশি রাশি
সুসৌরভে পুরি দেশ। নাচিছে অঙ্গরা;
গাইছে কিম্বরকুল, ত্রিদিবে যেমতি।

কহিলা রাখবে মায়া, “সত্যযুগ-রণে
সম্মুখসমরে হত রথীশ্বর যত,
দেখ এই ক্ষেত্রে আজি, ক্ষত্রুচূড়ামণি!
কাঞ্চনশরীর যথা হেমকূট দেখ
নিশুভ্তে; কিরীট-আভা উঠিছে গগনে
মহাবীর্য্যবান্ রথী। দেবতেজোদ্ভবা
চণ্ডী ঘোরতর রণে নাশিলা শুরেশে।
দেখ শুভ্তে, শূলীশভুনিভ পরাক্রমে;
ভীষণ মহিষাসুরে, তুরঙ্গমদমী;
ত্রিপুরারি-অরি শূর সুরথী ত্রিপুরে;
বৃত্র-আদি দৈত্য যত, বিখ্যাত জগতে।
সুন্দ-উপসুন্দ দেখ আনন্দে ভাসিছে
ভাতৃপ্রেমনীরে পুনঃ।” সুধিলা সুমতি
রাঘব, “কেন না হেরি, কহ দয়াময়ি,
কুস্তকর্ণ, অতিকায় নরশুক (রণে
নরশুক), ইন্দ্রজিৎ আদি রক্ষঃ-শুরে?”

উত্তরিলা কুহকিনী, “অস্ত্যোষ্টি ব্যতীত,
নাহি গতি এ নগরে, হে বৈদেহীপতি।
নগর বাহিরে দেশ, ভ্রমে তথা প্রাণী,
যত দিন প্রেতক্রিয়া না সাধে বাহুবে

যতনে; বিধির বিধি কহিনু তোমাতে ৩০
চেয়ে দেখ, বীরবর, আসিছে এদিকে
সুবীর; অদৃশ্যভাবে থাকিব, নৃমণি,
তব সঙ্গে; মিষ্টালাপ কর রঙ্গে, তুমি।”
এতেক কহিয়া মাতা অদৃশ্য হইলা।

সবিস্ময়ে রঘুবর দেখিলা বীরেশে
তেজস্বী; কিরীটচূড়ে খেলে সৌদামিনী,
ঝল ঝলে মহাকায়ে, নয়ন ঝলসি,
আভরণ। করে শূল, গজপতিগতি।

অগ্রসরি শরেশ্বর সন্তাষি রামেরে,
সুধিলা,—“কি হেতু হেথা সশরীরে আজি,
রঘুকুলচূড়ামণি? অন্যায়ে সমরে
সংহারিলে মোরে তুমি তুষিতে সুগ্রীব;ে;
কিস্তু দূর কর ভয়; এ কৃতান্তপুুরে
নাহি জানি ক্রোধ মোরা, জিতেপ্রিয় সবে।
মানবজীবনস্রোতঃ পৃথিবী-মণ্ডলে,
পঙ্কিল, বিমল রয়ে” বহে সে এ দেশে।
আমি বালি।” সলজ্জায় চিনিলা নৃমণি
রথীন্দ্র কিঙ্কিণ্যানাথে। কহিলা হাসিয়া
বালি, “চল মোর সাথে, দাশরথি রথি।
ওই যে উদ্যান, দেব, দেখিছ অদূরে
সুবর্ণ-কুসুমময়, বিহারেন সদা
ও বনে জটায়ু রথী, পিতৃসখা তব।
পরম পীরিতি রথী পাইবেন হেরি
তোমায়। জীবনদান দিলা মহামতি
ধর্মকর্মে—সতী নারী রাখিতে বিপদে;
অসীম গৌরব তেই। চল ত্বর করি।”

জিজ্ঞাসিলা রক্ষোরিপু, “কহ, কৃপা করি,
হে সুরথি, সমসুখী এদেশে কি তোমা
সকলে?” “খনির গর্ভে” উত্তরিলি বালি,
“জনমে সহস্র মণি, রাখব; কিরণে
নহে সমতুল সবে, কহিনু তোমাতে;—
তবু অভাহীন কেবা, কহ, রঘুমণি?”
এইরূপে মিষ্টালাপে চলিলা দুজনে।

রম্য বনে, বহে যথা পীযুষসলিলা
নদী সদা কলকলে, দেখিলা নৃমণি,
জটায়ু গরুড়পুত্রে, দেবাকৃতি রথী;
দ্বিরদ-রদ-নিশ্চিত, বিবিধ-রতনে
খচিত আসনাসীন। উথলে চৌদিকে
বীণাধরনি। পদ্মপর্ণবর্ণ বিভাৱাশি

উজ্জ্বলে সে বনরাজী, চন্দ্রাতপে ভেদি
সৌরকরপুঞ্জ যথা উৎসব-আলায়ে।
চিরপরিমলময় সমীর বহিছে
বাসন্ত। আদরে বীর কহিলা রাখবে,—
“জুড়ালে নয়ন আজি, নরকুলমণি
মিত্রপুত্র। ধন্য তুমি। ধরিলা তোমাতে
শুভ ক্ষণে গর্ভে, শুভ, তোমার জননী।
ধন্য দশরথ সখা, জন্মদাতা তব।
দেবকুলপ্রিয় তুমি, তেঁই সে আইলে
সশরীরে এ নগরে। কহ, বৎস, শুনি,
রণ-বার্তা। পড়েছে কি সমরে দুস্মৃতি
রাবণ?” প্রণমি প্রভু কহিলা সুস্বরে,—
“ও পদ-প্রসাদে, তাত, তুমুল সংগ্রামে,
বিনাশিনু বহু রক্ষে; রক্ষঃকুলপতি
রাবণ একাকী বীর এবে রক্ষঃপুুরে।
তার শরে হতজীব লক্ষ্মণ সুমতি,
অনুজ; আইল দাস এ দুর্গম দেশে,
শিবের আদেশে আজি। কহ, কৃপা করি,
কহ দাসে, কোথা পিতা, সখা তব, রথি?”

কহিলা জটায়ু বলী, “পশ্চিম দুয়ারে
বিরাজেন রাজ-ঋষি রাজ-ঋষিদলে।
নাহি মানা মোর প্রতি ভ্রমিতে সে দেশে;
যাইব তোমার সঙ্গে, চল, রিপুদমি” ৩১।”

বহুবিধ রম্য দেশ দেখিলা সুমতি,
বহু স্বর্ণ-অট্টালিকা; দেবাকৃতি বহু রথী;
সরোবরকূলে, কুসুমকাননে,
কেলিছে হরষে প্রাণী, মধুকালে যথা
গুঞ্জরে ভ্রমরকুল সুনিকুঞ্জবনে;
কিন্মা নিশাভাগে যথা খদ্যোত, উজলি
দশ দিশ। দ্রুতগতি চলিলা দুজনে।
লক্ষ লক্ষ লক্ষ প্রাণী বেড়িল রাখবে।

কহিলা জটায়ু বলী, “রঘুকুলোত্তম
এ সুরথী। সশরীরে শিবের আদেশে,
আইলা এ প্রেতপুুরে, দরশন-হেতু
পিতৃপদ; আশীর্বাদি যাহ সবে চলি
নিজস্থানে, প্রাণীদল।” গেলা চলি সবে
আশীর্বাদি। মহানন্দে চলিলা দুজনে।
কোথায় হোমান্দিগিরি উঠিছে আকাশে
বৃক্ষচূড়, জটায়ু যথা জটায়ুধারী
কপর্দী। বহিছে কলে প্রবাহিণী ঝরি।

৩০. বিধি—প্রজাপতি ব্রহ্মা। ভারতীয় বিশ্বাস, ব্রহ্মা প্রত্যেক মানুষের ভাগ্য নির্ধারণ করে দেন। ৩১. প্রবাহ।

৩২. শত্রুকে যিনি দমন করেন।

হীরা, মণি, মুক্তাফল ফলে স্বচ্ছ জলে।
কোথায় বা নীচদেশে শোভিছে কুসুমে
শ্যামভূমি; তাহে সরঃ, খচিত কমলে।
নিরন্তর পিকবর কুহরিছে বনে।

বিনতানন্দনাথ্যজ্ঞ কহিলা সজ্জাষি
রাঘবে, “পশ্চিম দ্বার দেখ, রঘুমণি।
হিরন্ময়; এ সুদেশে হীরক-নির্মিত
গৃহাবলী। দেখ চেয়ে, স্বর্ণবৃক্ষমূলে
মরকতপত্রছত্র দীর্ঘশিরোপরি,
কনক-আসনে বসি দিলীপ নুমণি,
সঙ্গে সুদক্ষিণা সাধ্বী! পূজ ভক্তিভাবে
বংশের নিদান তব। বসেন এ দেশে
অগণ্য রাজর্ষিগণ, ইক্ষ্বাকু, মাঙ্কাতা,
নহয় প্রভৃতি সবে বিখ্যাত জগতে।
অগ্রসরি-পিতামহে পূজ, মহাবাহু।”

অগ্রসরি রথীশ্বর সাষ্টাঙ্গে নমিলা
দম্পতীর পদতলে; সুখিলা আশীষি
দিলীপ, “কে তুমি? কহ, কেমনে আইলা
সশরীরে প্রেতদেশে, দেবাকৃতি রথি?
তব চন্দ্রানন হেরি আনন্দসলিলে
ভাসিল হৃদয় মম!” কহিলা সুস্বরে
সুদক্ষিণা, “হে সুভগ, কহ ত্বরা করি,
কে তুমি? বিদেশে যথা স্বদেশীয় জনে
হেরিলে জুড়ায় আঁখি, তেমনি জুড়াল
আঁখি মম, হেরি তোমা। কোন্ সাধ্বী নারী
শুভক্ষণে গর্ভে তোমা ধরিল, সুমতি!
দেবকুলোত্তব যদি, দেবাকৃতি, তুমি,
কেন বন্দ আমা দৌহে? দেব যদি নহ,
কোন্ কুল উজ্জ্বলিলা নরদেবরূপে?”

উত্তরিলা দাশরথি কৃতাজ্জলিপুটে,
“ভুবনবিখ্যাত পুত্র রঘু নামে তব,
রাজর্ষি, ভুবন জিনি জিনিলা স্ববলে
দিগবিজয়ী, অজ নামে তাঁর জনমিলা
তনয়—বসুধাপাল; বরিলা অজেরে
ইন্দুমতী; তাঁর গর্ভে জনম লভিলা
দশরথ মহামতি; তাঁর পাটেশ্বরী
কৌশল্যা; দাসের জন্ম তাঁহার উদরে;
সুমিত্রা-জননী-পুত্র লক্ষ্মণ কেশরী,
শক্রয়—শক্রয় রণে! কৈকেয়ী জননী
ভরত ভাতারে, প্রভু, ধরিলা গরভে।”

উত্তরিলা রাজ-ঋষি, “রামচন্দ্র তুমি,
ইক্ষ্বাকু-কুলশেখর, আশীষি তোমারে।

নিত্য নিত্য কীর্ষি তব ঘোষিবে জগতে,
যত দিন চন্দ্র সূর্য্য উদয়ে আকাশে,
কীর্ষিমান্। বংশ মম উজ্জ্বল ভূতলে
তব গুণে, গুণিশ্রেষ্ঠ! ওই যে দেখিছ
স্বর্ণগিরি, তার কাছে বিখ্যাত এ পুরে,
অক্ষয় নামেতে বট বৈতরণীতটে।
বৃক্ষমূলে পিতা তব পূজেন সতত
ধর্ম্মরাজে তব হেতু; যাও মহাবাহু,
রঘুকুল-অলঙ্কার, তাঁহার সমীপে।
কাতর তোমার দুঃখে দশরথ রথী।”

বন্দি চরণারবিন্দ আনন্দে নুমণি,
বিদায়ি জটায়ু শুরে, চলিলা একাকী
(অস্তুরীক্ষে সঙ্গে মায়ী) স্বর্ণগিরি দেশে
সুরম্য, অক্ষয় বৃক্ষে হেরিলা সুরথী
বৈতরণী নদীতীরে, পীযুষসলিলা
এ ভূমে; সুবর্ণ-শাখা, মরকত পাতা,
ফল, হায়, ফলছটা কে পারে বর্ণিতে?
দেবারাধ্য তরুরাজ, মুকতিপ্রদায়ী।

হেরি-দূরে পুত্রবরে রাজর্ষি, প্রসরি
বাহুয়ুগ, (বক্ষঃস্থল আর্দ্র অশ্রুজলে)
কহিলা, “আইলি কি রে এ দুর্গম দেশে
এত দিনে, প্রাণাধিক, দেবের প্রসাদে,
জুড়াতে এ চক্ষুঃদ্বয়? পাইনু কি আজি
তোরে, হারাধন মোর? হায় রে, কত যে
সহিনু বিহনে তোর, কহিব কেমনে,
রামভদ্র? লৌহ যথা গলে অগ্নিতেজে,
তোর শোকে দেহত্যাগ করিনু অকালে।
মুদিনু নয়ন, হায়, হৃদয়জ্বলনে।

নিদারুণ বিধি, বৎস, মম কর্ম্মদোষে
লিখিলা আয়াস, মরি, তোর ও কপালে,
ধর্ম্মপথগামী তুই! তেঁই, সে ঘটিল
এ ঘটনা; তেঁই, হায়, দলিল কৈকেয়ী
জীবনকাননশোভা আশালতা মম
মত্ত মাতঙ্গিনীরূপে।” বিলাপিলা বলী
দশরথ; দাশরথি কাঁদিলা নীরবে।

কহিলা রাঘবশ্রেষ্ঠ, “অকুল সাগরে
ভাসে দাস, তাত, এবে; কে তারে রক্ষিবে
এ বিপদে? এ নগরে বিদিত যদ্যপি
ঘটে যা ভবমণ্ডলে, তবে ও চরণে
অবিদিত নহে, কেন আইল এ দেশে
কিঙ্কর! অকালে, হায় ঘোরতর রণে,
হত প্রিয়ানুজ আজি! না পাইলে তারে

আর না ফিরিব যথা শোভে দিনমণি,
চন্দ্র, তারা! আঞ্জা দেহ, এখনি মরিব,
হে তাত, চরণতলে। না পারি ধরিতে
তাহার বিরহে প্রাণ!” কাঁদিলে নৃমণি
পিতৃপদে; পুত্রদুঃখে কাতর, কহিলা
দশরথ,—“জানি আমি, কি কারণে তুমি
আইলে এ পুরে, পুত্র। সদা আমি পূজি
ধন্মরাজে, জলাঞ্জলি দিয়া সুখভোগে,
তোমার মঙ্গল হেতু। পাইবে লক্ষ্মণে,
সুলক্ষণ। প্রাণ তার এখনও দেহে
বদ্ধ, ভগ্ন কারাগারে বদ্ধ বন্দী যথা।
সুগন্ধমাদন গিরি, তার শৃঙ্গদেশে
ফলে মহৌষধ, বৎস, বিশল্যকরণী,
হেমলতা; আনি তাহা বাঁচাও অনুজে।
আপনি প্রসন্নভাবে যমরাজ আজি
দিলা এ উপায় কহি। অনুচর তব
আশুগতিপুত্র^{৩৩} হনু, আশুগতিগতি;
প্রেম তারে; মুহূর্ত্তেকে আনিবে ঔষধে
ভীমপরাক্রম বলী প্রভঞ্জনসম।
নাশিবে সময়ে তুমি বিষম সংগ্রামে
রাবণে; সবংশে নষ্ট হবে দুষ্টমতি
তব শরে; রঘুকুললক্ষ্মী পুত্রবধু
রঘুগৃহ পুনঃ মাতা ফিরি উজ্জ্বলিবে;—
কিন্তু সুখ ভোগ ভাগে; নাহি, বৎস তব।
পুড়ি ধূপদানে, হায় গন্ধরস যথা
সুগন্ধে আমোদে দেশ, বহু ক্লেশ সহি,

পূরিবে ভারতভূমি, যশস্বি, সুযশে!
মম পাপ হেতু বিধি দণ্ডিলা তোমারে;—
স্বপাপে মরিনু আমি তোমার বিচ্ছেদে।

“অর্দ্ধগত নিশামাত্র এবে ভূমণ্ডলে।
দেববলে বলী তুমি, যাও শীঘ্র ফিরি
লঙ্কাধামে; প্রের ত্বরা বীর হনুমানে;
আনি মহৌষধ, বৎস, বাঁচাও অনুজে—
রজনী থাকিতে যেন আনে সে ঔষধে।”

আশীষিলা দশরথ দাশরথি শুরে।
পিতৃ-পদধূলি পুত্র লইবার আশে,
অর্পিলা চরণপদ্মে করণপদ্ম;— বৃথা!
নারিলা স্পর্শিতে পদ! কহিলা সুস্বরে
রঘুজ-অজ-অঙ্গজ দশরথাস্বজে
“নহে ভূতপূর্ব্ব দেহ এবে যা দেখিছ
প্রাণাধিক! ছায়া মাত্র! কেমনে ছুঁইবে
এ ছায়া, শরীরী তুমি? দর্পণে যেমতি
প্রতিবিস্ব, কিস্বা জলে, এ শরীর মম।—
অবিলম্বে, প্রিয়তম, যাও লঙ্কাধামে।”

প্রথমি বিস্ময়ে পদে চলিলা সুমতি,
সন্ধে মায়া। কত ক্ষণে উতরিলা রলী
যথায় পতিত ক্ষেত্রে লক্ষ্মণ সুরথী;
চারি দিকে বীরবৃন্দ নিদ্রাহীন শোকে।

ইতি শ্রীমেঘনাদবধে কাব্যে প্রেতপুরী নাম
অষ্টমঃ সর্গঃ।

নবম সর্গ

প্রভাতিল বিভাবরী; জয় রাম নাদে
নাদিল বিকট ঠাট লঙ্কার চৌদিকে।

কনক-আসন ত্যজি, বিষাদে ভূতলে
বসেন যথায়, হায়, রক্ষোদলপতি
রাবণ; ভীষণ স্নন স্বনিল সে স্থলে
সাগরকম্পোলসম। বিস্ময়ে সুরথী
সুধিলা সারণে লক্ষি, “কহ ত্বরা করি,
হে সচিবশ্রেষ্ঠ বৃধ, কি হেতু নিনাদে
বৈরিবৃন্দ, নিশাভাগে নিরানন্দ শোকে।
কহ শীঘ্র। প্রাণদান পাইলা কি পুনঃ

কপট-সমরী মুঢ় সৌমিত্রি? কে জানে
অনুকুল দেবকুল তাই বা করিল!
অবিরামগতি স্রোত বাঁধিল কৌশলে
যে রাম; ভাসিল শিলা যার মায়াতেজে
জলমুখে; বাঁচিল যে দুইবার মরি
সমরে, অসাধ্য তার কি আছে জগতে?
কহ শুনি, মন্ত্রিবর, কি ঘটিল এবে?

কর পুটি মন্ত্রীবর উত্তরিলা খেদে।—
“কে বুঝে দেবের মায়া এ মায়াসংসারে,
রাজেন্দ্র? গন্ধমাদন, শৈলকুলপতি,

দেবাত্মা, আপনি আসি গত নিশাকালে,
মহৌষধ-দানে, প্রভু, বাঁচাইলা পুনঃ
লক্ষ্মণে; তেঁই সে সৈন্য নাদিছে উল্লাসে।
হিমাতে দ্বিগুণতেজঃ ভুজঙ্গ যেমতি,
গরজে সৌমিত্রি শূর—মত্ত বীরমদে;
গরজে সুগ্রীব সহ দাক্ষিণাত্য যত,
যথা করিযুথ, নাথ, শুনি যুথনাথে।”

বিষাদে নিশ্বাস ছাড়ি কহিলা সুরথী
লক্ষ্মণ,—“বিধির বিধি কে পারে খণ্ডিতে ?
বিমুখি অমর মরে, সম্মুখ-সমরে
বধিনু যে রিপু আমি, বাঁচিল সে পুনঃ
দৈববলে ? হে সারণ, মম ভাগ্যদোষে,
ভুলিলা স্বধর্ম আজি কৃতান্ত আপনি !
গ্রাসিলে কুরঙ্গে সিংহ ছাড়ে কি হে কভু
তাহায় ? কি কাজ কিন্তু এ বৃথা বিলাপে ?
বুকিনু নিশ্চয় আমি, ডুবিল তিমিরে
কর্কুর-গৌরব-রবি ! মরিল সংগ্রামে
শূলীশভুসম ভাই কুন্তকর্ণ মম,
কুমার বাসবজয়ী, দ্বিতীয় জগতে
শক্তিধর ! প্রাণ আমি ধরি কোন্ সাধে ?
আর কি এ দোঁহে ফিরি পাব ভবতলে ?—
যাও তুমি, হে সারণ, যথায় সুরথী
রাঘব;—কহিও শূরে,—‘রক্ষঃকুলনিধি
রাবণ, হে মহাবাহু, এই ভিক্ষা মাগে
তব কাছে, তিষ্ঠ তুমি সসৈন্যে এ দেশে
সপ্ত দিন, বৈরিভাব পরিহরি, রথি !’
পুত্রের সৎক্রিয়া রাজা ইচ্ছেন সাধিতে
যথাবিধি। বীরধর্ম পাল রঘুপতি !
বিপক্ষ সুবীরে বীর সম্মানে সতত।
তব বাহুবলে, বলি, বীরশূন্য এবে
বীরযোনি স্বর্ণলঙ্কা। ধন্য বীরকূলে
তুমি ! শুভ ক্ষণে ধনুঃ ধরিলা, নুমগি !
অনুকূল তব প্রতি শুভদাতা বিধি;
দৈববশে রক্ষঃপতি পতিত বিপদে ;
পরমনোরথ আজি পুরাও, সুরথি।’
যাও শীঘ্র, মন্ত্রিবর, রামের শিবিরে।”

বন্দি রক্ষঃকুল-ইন্দ্রে, সঙ্গীদল সহ,
চলিলা সচিবশ্রেষ্ঠ। অমনি খুলিল
ভীষণ নিনাদে দ্বার দ্বারপাল যত।
ধীরে ধীরে রক্ষোমন্ত্রী চলিলা বিষাদে

চির-কোলাহলময় পয়োনিধিতীরে।

শিবিরে বসেন প্রভু রঘুকুলমণি,
আনন্দসাগরে মগ্ন; সম্মুখে সৌমিত্রি
রথীশ্বর, যথা তরু হিমাতীবিহনে
নবরস; পূর্ণশশী সুহাস আকাশে
পূর্ণিমায়; কিম্বা পদ্ম, নিশা-অবসানে,
প্রফুল্ল ! দক্ষিণে রক্ষঃ বিভীষণ-বলী
মিত্র, আর নেতৃ যত দুর্ধর্ব সংগ্রামে,
দেবেন্দ্রে বিড়িয়া যেন দেবকুল-রথী !

কহিল সংক্ষেপে বার্তা বার্তাবহ দ্বারা
“রক্ষঃকুলমন্ত্রী, দেব, বিখ্যাত জগতে,
সারণ, শিবিরদ্বারে, সঙ্গীদল সহ
কি আজ্ঞা তোমার, দাসে কহ নরমণি।”

আদেশিলা রঘুবর, “আন দ্বারা করি,
বার্তাবহ, মন্ত্রিবরে সাদরে এ স্থলে।
কে না জানে, দূতকুল অবধ্য সমরে ?”

প্রবেশি শিবিরে তবে সারণ কহিলা—
(বন্দি রাজপদযুগ) “রক্ষঃকুলনিধি
রাবণ, হে মহাবাহু, এই ভিক্ষা মাগে
তব কাছে,—‘তিষ্ঠ তুমি সসৈন্যে এ দেশে
সপ্ত দিন, বৈরিভাব পরিহরি, রথি !
পুত্রের সৎক্রিয়া রাজা ইচ্ছেন সাধিতে
যথাবিধি। বীরধর্ম পাল, রঘুপতি !
বিপক্ষ সুবীরে বীর সম্মানে সতত।
তব বাহুবলে, বলি, বীরশূন্য এবে
বীরযোনি স্বর্ণলঙ্কা। ধন্য বীরকূলে
তুমি ! শুভ ক্ষণে ধনুঃ ধরিলা, নুমগি ;
অনুকূল তব প্রতি শুভদাতা বিধি ;
দৈববশে রক্ষঃপতি পতিত বিপদে ;
পরমনোরথ আজি পুরাও, সুরথি।”

উত্তরিলা রঘুনাথ,—“পরমারি মম,
হে সারণ, প্রভু তব ; তবু তাঁর দুঃখে
পরম দুঃখিত আমি, কহিনু তোমারে !
রাঙ্কাসে হেরি সূর্য্যে কার না বিদরে
হৃদয় ? যে তরুরাজ জ্বলে তাঁর তেজে
অরণ্যে, মলিনমুখ সেও হে সে কালে !
বিপদে অপর পর সম মম কাছে,
মন্ত্রীবর ! যাও ফিরি স্বর্ণলঙ্কাধামে
তুমি, না ধরিব অস্ত্র সপ্ত দিন আমি
সসৈন্যে। কহিও বুধ, রক্ষঃকুলনাথে,

ধর্মকর্মে রত জনে কভু না প্রহারে
ধার্মিক !” এতেক কহি নীরবিলা বলী ।

নতভাবে রক্ষোমন্ত্রী কহিলা উত্তরি;
“নরকুলোত্তম তুমি, রঘুকুলমণি;
বিদ্যা, বুদ্ধি, বাহুবলে অতুল জগতে !
উচিত এ কর্ম তব, শুন, মহামতি !
অনুচিত কর্ম কভু করে কি সূজনে ?
যথা রক্ষোদলপতি নৈকেষেয় বলী;
নরদলপতি তুমি রাখব ! কৃষ্ণণে
ক্ষম এ আক্ষেপ, রথি, মিনতি ও পদে !
কৃষ্ণণে ভেটিলে দোঁহা দোঁহে রিপুভাবে !
বিধির নির্বন্ধ কিন্তু কে পারে খণ্ডাতে ?
যে বিধি, হে মহাবাহু; সৃজিলা পবনে
সিদ্ধ-অরি; মৃগ-ইন্দ্রে গজ-ইন্দ্রে রিপু;
খগেন্দ্র নাগেন্দ্রবৈরী; তাঁর মায়াছলে
রাঘব রাবণ-অরিদোষিব কাহারে ?”

প্রসাদ পাইয়া দ্রুত চলিলা সত্বরে
যথায় রাক্ষসনাথ বসেন নীরবে,
তিতিয়া বসন, মরি নয়ন-আসারে,
শোকার্শ্ব ! হেথায় আঞ্জা দিলা নরপতি
নেতাবৃন্দে; রণসজ্জা ত্যজি কুতূহলে,
বিরাম লভিলা সবে যে যার শিবিরে ।

যথায় অশোকবনে বসেন বৈদেহী,
অতল জলধিতলে, হায় রে, যেমতি
বিরহে কমলা সতী, আইলা সরমা
রক্ষঃকুলরাজলক্ষ্মী রক্ষোবধুবশে ।
বন্দি চরণারবিন্দ বসিলা ললনা
পদতলে । মধুস্বরে সুধিলা মৈথিলি,
কহ মোরে, বিধুমুখি, কেন হাহাকারে
এ দুদিন পুরবাসী ? শুনি নু সভয়ে
রণনাদ সারাদিন কালি রণভূমে;
কাঁপিল সঘনে বন, ভূকম্পনে যেন
দূর বীরপদভরে; দেখি নু আকাশে
অগ্নিশিখাসম শর; দিবা-অবসানে,
জয়-নাদে রক্ষঃসৈন্য পশিল নগরে,
বাজিল রাক্ষসবাদ্য গভীর নিষ্কণে !
কে জিনিল ? কে হারিল ? কহ ত্বরা করি,
সরমে ! আকুল মনঃ, হায় লো, না মানে
প্রবোধ ! না জানি হেথা জিজ্ঞাসি কাহারে ?
না পাই উত্তর যদি সুধি চেড়ীদলে ।
বিকটা ত্রিভুজটা, সখি, লোহিতলোচনা
করে খরসান অসি চামুণ্ডারপিণী,

আইল কাটিতে মোরে গত নিশাকালে,
ক্রোধে অন্ধা ! আর চেড়ী রোধিল তাহারে;
বাঁচিল এ পোড়া প্রাণ তেঁই, সুকেশিনি !
এখনও কাঁপে হিয়া স্মরিলে দুস্তারে !”

কহিলা সরমা সতী সুমধুর ভাবে;—
“তব ভাগ্যে, ভাগ্যবতি, হতজীব রণে
ইন্দ্রজিত ! তেঁই লক্ষা বিলাপে এক্রপে
দিবানিশি । এত দিনে গতবল, দেবি,
কবরুর-ঈশ্বরী বলী ! কাঁদে মন্দোদরী;
রক্ষঃকুলনারীকুল আকুল বিষাদে;
নিরানন্দ রক্ষোরথী । তব পুণ্যবলে,
পদ্মাক্ষি, দেবর তব লক্ষ্মণ সুরথী
দেবের অসাধ্য কর্ম সাধিলা সংগ্রামে,—
বাধিলা বাসবজিতে অজ্ঞেয় জগতে !”

উত্তরিলা প্রিয়স্বদা,—“সুবচনী তুমি
মম পক্ষে, রক্ষোবধু সদা লো এ পুরে !
ধন্য বীর-ইন্দ্র-কূলে সৌমিত্রি কেশরী ।
শুভ ক্ষণে হেন পুত্রে সুমিত্রা শাশুড়ী
ধরিলা সুগর্ভে, সই ! এত দিনে বুঝি
কারণারদ্বার মম খুলিলা বিধাতা
কৃপায় ! একাকী এবে রাবণ দূষ্মতি
মহারথী লক্ষাধামে । দেখিব কি ঘটে,—
দেখিবার কি দুঃখ আছে এ কপালে ?
কিন্তু শুন কান দিয়া ! ক্রমশঃ বাড়িছে
হাহাকার-ধ্বনি, সখি !”—কহিলা সরমা
সুবচনী,—“কর্কুরেন্দ্রে রাঘবেন্দ্রে সহ
করি সন্ধি, সিদ্ধুতীরে লইছে তনয়ে
প্রেতক্রিয়াহেতু সতি ! সপ্ত দিবানিশি
না ধরিবে অস্ত্র কেহ এ রাক্ষসদেশে
বৈরিভাবে—এ প্রতিজ্ঞা করিলা নৃমণি
রাবণের অনুরোধে;—দয়াসিদ্ধু, দেবি,
রাঘবেন্দ্রে ! দৈত্যবালা প্রমীলা সুন্দরী—
বিদরে হৃদয়, সাধিব, স্মরিলে সে কথা !—
প্রমীলা সুন্দরী ত্যজি দেহ দাহস্থলে
পতির উদ্দেশে সতী, পতিপরায়ণা
যাবে স্বর্গপুরে আজি ! হর-কোপানেল,
হে দেবি, কন্দর্প যবে মরিলা পুড়িয়া
মরিলা কি রতি সতী প্রাণনাথে লয়ে ?”

কাঁদিলা রাক্ষসবধু তিতি অশ্রুতীরে
শোকাকুলা । ভবতলে মূর্ত্তিমতী দয়া
সীতারূপে, পরদুঃখে কাতর সতত,
কহিলা—সজল আঁখি, সম্ভাষি সখীরে;—

“কৃষ্ণে জনম মম, সরমা রাক্ষসি !
 সুখের প্রদীপ, সখি, নিবাই লো সদা
 প্রবেশি যে গৃহে, হায়, অমঙ্গলারূপী
 আমি !” পোড়া ভাগ্যে এই লিখিলা বিধাতা !
 নরোত্তম পতি মম, দেখ, বনবাসী
 বনবাসী, সুলক্ষণে, দেবর সুমতি
 লক্ষ্মণ ! ত্যজিলা প্রাণ পুত্রশোকে, সখি,
 শ্বশুর ! অযোধ্যাপুরী আঁধার লো এবে,
 শূন্য রাজসিংহাসন ! মরিলা জটায়ু,
 বিকট বিপক্ষপক্ষে ভীমভুজবলে,
 রক্ষিতে দাসীর মান ! হ্যাদে দেখ হেথা
 মরলি বাসবজিৎ অভাগীর দোষে,
 আর রক্ষোরথী যত, কে পারে গণিতে ?
 মরিবে দানববালা অতুলা এ ভবে
 সৌন্দর্য্যে ! বসন্তরন্তে, হায় লো, শুখাল
 হেন ফুল !” — “দোষ তব,” — সুখিলা সরমা,
 মুছিয়া নয়নজল — “কহ কি, রূপসি ?
 কে ছিঁড়ি আনিল হেথা এ স্বর্ণব্রততী,
 বক্ষিয়া রসালরাজে ? কে আনিল তুলি
 রাঘবমানসপন্ন এ রাক্ষসদেশে ?
 নিজ কৰ্মদোষে মজে লঙ্কা-অধিপতি !
 আর কি কহিবে দাসী ?” কাঁদিলা সরমা
 শোকে ! রক্ষঃকুলশোকে সে অশোক-বনে,
 কাঁদিলা রাঘববাঞ্ছা — দুঃখী পর-দুঃখে ।
 খুলিল পশ্চিম দ্বার অশনি-নিনাদে ।
 বাহিরিল লক্ষ রক্ষঃ স্বর্ণদণ্ড করে,
 কৌষিক পতাকা তাহে উড়িছে আকাশে ।
 রাজপথ-পার্শ্বদ্বয়ে চলে সারি সারি ।
 নীরবে পতাকিকুল । সৰ্ব্বাশ্রয়ে দুন্দুভি
 করিপৃষ্ঠে পুরে দেশ গভীর আরবে ।
 পদব্রজে পদাতিক কাতারে কাতারে ;
 বাজীরাজী সহ গজ ; রথীবৃন্দ রথে
 মৃদুগতি, বাজে বাদ্য সক্রমে ক্রমে ।
 যত দূর চলে দৃষ্টি, চলে সিঙ্কুমুখে
 নিরানন্দে রক্ষোদল । ঝক ঝক ঝকে
 স্বর্ণ-বর্ন ধাঁধি আঁখি । রবিকরতেজে
 শোভে হৈমধ্বজদণ্ড ; শিরোমণি শিরে ;
 অসিকোষ সারসনে ; দীর্ঘ শূল হাতে ;

বিগলিত অশ্রুধারা, হায় রে, নয়নে !
 বাহিরিল বীরাক্ষনা (প্রমীলার দাসী)
 পরাক্রমে ভীম-সমা, রূপে বিদ্যাধরী,
 রণবেশে;—কৃষ্ণ-হয়ে নৃমুণ্ডমালিনী,—
 মলিন বদন, মরি, শশিকলাভাবে
 নিশা যথা ! অবিরল ঝরে অশ্রুধারা
 তিতি বন্ধ, তিতি অশ্ব, তিতি বসুধারে !
 উচ্ছাসিছে কোন বামা; কেহ বা কাঁদিছে
 নীরবে ; চাহিছে কেহ রঘুসৈন্য পানে
 অগ্নিময় আঁখি রোষে, বাধিনী যেমনি
 (জালাবৃত) ব্যাধবর্গে হেরিয়া অদুরে !
 হায় রে, কোথা সে হাসি—সৌদামিনী-ছটা !
 কোথা সে কটাক্ষধর, কামের সমরে
 সৰ্বভেদী ? চেড়ীবৃন্দ মাঝারে বড়বা,
 শূন্যপৃষ্ঠ, শোভাশূন্য, কুসুম বিহনে
 বৃত্ত যথা ! চুলাইছে চামর চৌদিকে
 কিঙ্করী; চলিছে সঙ্গে বামাব্রজ কাঁদি
 পদব্রজে; কোলাহল উঠিছে গগনে !
 প্রমীলার বীরবেশ শোভে ঝলঝলে
 বড়বার পৃষ্ঠে,—অসি, চর্ম, তুণ, ধনুঃ
 কিরীট, মণ্ডিত, মরি অমূল্য রতনে !
 সারসন মণিময়; কবচ খচিত
 সুবর্গে, মলিন,—দৌহে । সারসন স্মরি,
 হায় রে, সে সক্র কটি ! কবচ ভাবিয়া
 সে সু-উচ্চ কুচযুগে-গিরিশৃঙ্গসম !
 ছড়াইছে খই, কড়ী, স্বর্ণমুদ্রা আদি
 অর্থ, দাসী ; সক্রুপে গাইছে গায়কী;
 পেশল-উরস হানি কাঁদিছে রাক্ষসী ।
 বাহিরিল মৃদুগতি রথবৃন্দ মাঝে
 রথবর, ঘনবর্গ, বিজলীর ছটা
 চক্রে ; ইন্দ্রচাপরূপী ধ্বজ চূড়দেশে;
 কিন্তু কান্তিশূন্য আজি, শূন্যকান্তি যথা
 প্রতিমাপঞ্জর, মরি, প্রতিমা বিহনে
 বিসর্জন-অস্তে।—কাঁদে ঘোর কোলাহলে
 রক্ষোরথী, ক্ষণ বক্ষঃ হানি মহাক্ষেপে
 হতজ্ঞান ! রথমধ্যে শোভে ভীম ধনুঃ
 তুণীর, ফলক, খড়্গ, শঙ্খ, চক্র গদা-
 আদি অস্ত্র ; সুকবচ ; সৌরকর-রাশি-

সদৃশ কিরীট ; আর বীরভূষা যত ।
সকরণ গীতে গীতী গাইছে কাঁদিয়া
রক্ষোদুঃখ ! স্বর্ণমুদ্রা ছড়াইছে কেহ,
ছড়ায় কুসুম যথা লড়ি ঘোর ঝড়ে
তরু । সুবাসিত জল ঢালে জলবহ,
দমি উচ্চগামী রেণু, বিরত সহিতে
পদভর । চলে রথ সিঙ্কুতীরমুখে ।

সুবর্ণ-শিবিকাসনে, আবৃত কুসুমে,
বসেন শবের পাশে প্রমীলা সুন্দরী,
মর্ন্ত্যে রতি মৃত কাম সহ সহগামী ।
ললাটে সিন্দুর-বিন্দু, গলে ফুলমালা,
কঙ্কণ মৃগালভূজে; বিবিধ ভূষণে
ভূষিতা রাক্ষসবধু । ঢুলাইছে কাঁদি
চামরিণী সূচামর; কাঁদি ছড়াইছে
ফুলরাশি বামাবন্দ । আকুল বিষাদে,
রক্ষঃকুল-নারীকুল কাঁদে হাহারবে ।
হায় রে, কোথা সে জ্যোতিঃ ভাতিত যে সদা
মুখচন্দ্রে ? কোথা, মরি, সে সূচাক হসি,
মধুর অধরে নিত্য শোভিত যে, যথা
দিনকর-কররাশি তোর বিস্বাধরে,
পঙ্কজিনি ? মৌনব্রতে ব্রতী বিধুমুখী—
পতির উদ্দেশে প্রাণ ও বরাদ্দ ছাড়ি
গেছে যেন তথা পতি বিরাজেন এবে ।
শুখাইলে তরুরাজ, শুখায় রে লতা,
স্বয়ম্বরী বধু ধনী । কাতারে, কাতারে,
চলে রক্ষোরথী সাথে, কোষন্য অসি
করে, রবিকর তাহে ঝলে ঝলঝলে,
কাঞ্চন-কঙ্কুক-বিভা নয়ন ঝলসে !
উচ্চে উচ্চারয়ে বেদ বেদজ্ঞ চৌদিকে;
বহে হবির্বহ° হোত্রী° মহামন্ত্র জপি;
বিবিধ ভূষণ, বস্ত্র, চন্দন, কস্তুরী,
কেশর, কুঙ্কুম, পুষ্প বহে রক্ষোবধু
স্বর্ণপাত্রে; স্বর্ণকুণ্ডে পূত অস্তোরশি°
গাঙ্গেয় । সুবর্ণদীপ দীপে চারি দিকে ।
বাজে ঢাক, বাজে ঢোল, কাড়া কড়কড়ে;
বাজে করতাল, বাজে মৃদঙ্গ, তুসুকী;
বাজিছে ঝাঁঝরী শংখ; দেয় ছলাছলি
সখবা রাক্ষসনারী আর্দ্র অশ্রুণীরে
হায় রে মঙ্গলধ্বনি, অমঙ্গল দিনে !

বাহিরিলা পদব্রজে রক্ষঃকুলরাজা

রাবণ ; বিশদ বস্ত্র, বিশদ উত্তরি,
ধৃতুরার মালা যেন ধূর্জটির গলে;
চারি দিকে মস্ত্রীদল দূরে নতভাবে ?
নীরব কব্জুরপতি, অশ্রুপূর্ণ আঁখি,
নীরব সচিববন্দ, অধিকারী যত
রক্ষঃশ্রেষ্ঠ । বাহিরিল কাঁদিয়া পশ্চাতে
রক্ষোপুরবাসী রক্ষঃ—আবাল, বনিতা,
বৃদ্ধ; শূন্য করি পুরী, আঁধার রে এবে
গোকুলভবন যথা শ্যামের বিহনে !
ধীরে ধীরে সিঙ্কুমুখে, তিতি অশ্রুণীরে,
চলে-সবে, পুরি দেশ বিবাদ-নিনাদে !

কহিলা অঙ্গদে প্রভু সুমধুর স্বরে—
“দশ শত রথী সঙ্গে যাও, হে সুবধি !
যুবরাজ, রক্ষঃ সহ মিত্রভাবে তুমি,
সিঙ্কুতীরে ! সাবধানে যাও, মহাবলি
আকুল পরাণ মম রক্ষঃকুলশোকে !
এ বিপদে পরাপর নাহি ভাবি মনে,
কুমার ! লক্ষ্মণ-শুরে হেরি পাছে রোষে,
পূর্বকথা স্মরি মনে কব্জুরাধিপতি,
যাও তুমি, যুবরাজ । রাজচূড়ামণি,
পিতা তব বিমুখিলা সমরে রাক্ষসে,
শিষ্টাচারে, শিষ্টাচার, তোম তুমি তারে !”

দশ শত রথী সাথে চলিলা সুরথী
অঙ্গদ সাগরমুখে । আইলা আকাশে
দেবকুল;—ঐরাবতে দেবকুলপতি,
সঙ্গে বরাদ্দনা শচী অনন্তযৌবনা,
শিখিধ্বজে শিখিধ্বজ স্কন্ধ তারকারি
সেনানী; চিত্রিত রথে চিত্ররথ রথী,
মুগে বায়ুকুলরাজ; ভীষণ মহিবে
কৃতান্ত; পুষ্পকে যক্ষ, অলকার পতি;
আইলা রজনীকান্ত শান্ত সুধানিধি,
মলিন তপনতেজে; আইলা সুহাসী
অশ্বিনীকুমারযুগ, আর দেব যত ।
আইলা সুরসুন্দরী, গন্ধর্ব্ব, অঙ্গরা,
কিন্নর, কিন্নরী । সঙ্গে বাজিল অস্বরে
দিব্য বাদ্য । দেব-ঋষি আইলা কৌতুকে
আর আর প্রাণী যত ত্রিদিবনিবাসী ।

উতরি সাগরতীরে, রচিলা সত্ত্বরে
যথাবিধি চিতা রক্ষঃ; বহিল বাহকে
সুগন্ধ চন্দনকাষ্ঠ, ঘৃত ভারে ভারে

৪. অগ্নি। ৫. হোম করেন যিনি। ৬. জলরাশি।

মধু—৯

মন্দাকিনী-পূতজলে ধুইয়া যতনে
 শবে, সুকৌশিক বস্ত্র পরাই, থুইল
 দাহস্থানে রক্ষোদল; পড়িলা গঞ্জীরে
 মস্ত্র রক্ষঃ-পুরোহিত। অবগাহি দেহ
 মহাতীরে সাধ্বী সতী প্রমীলা সুন্দরী
 খুলি রত্ন-আভরণ, বিতারিলা সবে।
 প্রণমিয়া গুরুজনে মধুরভাষিণী,
 সম্ভাষি মধুরভাবে দৈত্যবালাদলে,
 কহিলা,—“লো সহচরি, এত দিনে আজি
 ফুরাইল জীবলীলা জীবলীলাস্থলে’
 আমার। ফিরিয়া সবে যাও দৈত্যদেশে!
 কহিও পিতার পদে এ সব বারতা,
 বাসন্তি। মায়েরে মোর”—হায় রে, বহিল
 সহসা নয়নজল! নীরবিলা সতী;
 কাঁদিলা দানববালা হাহাকার রবে!

মুহূর্ত্তে সম্বরী শোক, কহিলা সুন্দরী,
 “কহিও মায়েরে মোর, এ দাসীর ভালে
 লিখিলা বিধাতা যাহা, তাই লো ঘটিল
 এত দিনে। যার হাতে সঁপিলা দাসীরে
 পিতা মাতা, চলিলু লো আজি তাঁর সাথে;—
 পতি বিনা অবলার কি গতি জগতে?
 আর কি কহিব, সখি? ভুল না লো তারে—
 প্রমীলার এই ভিক্ষা তোমা সবা কাছে!”

চিতায় আরোহি সতী (ফুলাসনে যেন!)
 বসিলা আনন্দমতি পতি-পদতলে;
 প্রফুল্ল কুসুমদাম কবরী-প্রদেশে।
 বাজিল রাক্ষসবাদ্য; উচ্চে উচ্চারিল
 বেদ বেদী; রক্ষোনারী দিল ছলাছলি;
 সে রবের সহ মিশি উঠিল আকাশে
 হাহারব! পুষ্পবৃষ্টি হইল চৌদিকে।
 বিবিধ ভূষণ, বস্ত্র, চন্দন কস্তুরী,
 কেশর, কুঙ্কুম-আদি দিল রক্ষোবালা
 যথাবিধি; পশুকুলে নাশি তীক্ষ্ণ শরে
 ঘৃতাভ্র করিয়া রক্ষঃ যতনে থুইল
 চারি দিকে যথা মহানবমীর দিনে,

শান্ত ভক্ত-গৃহে, শক্তি তব পীঠতলে!

অগ্রসরি রক্ষোরাজ কহিলা কাতরে;
 “ছিল আশা, মেঘনাদ, মুদিব অন্তমে
 এ নয়নদ্বয় আমি তোমার সম্মুখে;—
 সঁপি রাজ্যভার, পুত্র, তোমায়, করিব
 মহাযাত্রা! কিন্তু বিধি—বুঝিব কেমনে
 তাঁর লীলা? ভাঁড়াইলা সে সুখ আমারে!
 ছিল আশা, রক্ষঃকুল-রাজ-সিংহাসনে
 জুড়াইব আঁষি, বৎস, দেখিয়া তোমারে,
 বামে রক্ষঃকুললক্ষ্মী রক্ষোরাজীরূপে
 পুত্রবধু! বৃথা আশা! পূর্বজন্মফলে
 হেরি তোমা দোঁহে আজি এ কাল-আসনে!”
 কৰ্কর-গৌরব-রবি চির রাখ্ত্রাসে!
 সেবিনু শিবেরে আমি বহু যত্ন করি,
 লভিতে কি এই ফল? কেমনে ফিরিব,
 হায় রে, কে কবে মোরে, ফিরিব কেমনে
 শূন্য লক্ষ্যধামে আর? কি সাঙ্ঘনাছিলে
 সাঙ্ঘনিব মায়ে তব, কে কবে আমারে?
 ‘কোথা পুত্র পুত্রবধু আমার?’ সুধিবে
 যবে রাণী মন্দোদরী,—‘কি সুখে আইলে
 রাখি দোঁহে সিদ্ধুতীরে, রক্ষঃকুলপতি?’—
 কি কয়ে বুঝাব তারে? হায় রে, কি কয়ে?
 হা পুত্র! হা বীরশ্রেষ্ঠ! চিরজয়ী রণে।
 হা মাতঃ রাক্ষসলক্ষ্মি! কি পাপে লিখিলা
 এ পীড়া দারুণ বিধি রাবণের ভালে?”

অধীর হইলা শূলী কৈলাস-আলয়ে!

লড়িল মস্তকে জটা; ভীষণ গর্জনে
 গর্জিল ভূজঙ্গবৃন্দ; ধক ধক ধকে
 জ্বলিল অনল ভালে; ভৈরব কল্পোলে
 কল্পোলিলা ত্রিপথগা^৯, বরিষায় যথা
 বেগবতী স্রোতস্বতী পর্বতকন্দরে!
 কাঁপিল কৈলাসগিরি থর থর থরে!
 কাঁপিল আতঙ্কে বিশ্ব; সভয়ে অভয়া
 কৃতাঞ্জলিপুটে সাধ্বী কহিলা মহেশে;
 “কি হেতু সরোষ, প্রভু, কহ তা দাসীরে

৭. সংসারে। ৮. রাবণের অন্তোষ্টিক্রিয়ার বর্ণনা লক্ষ্যণীয়।

৯. ভারতীয় বিশ্বাসমতে জন্মান্তর প্রসঙ্গ।

১০. স্বর্গ মর্ত পাতাল এই তিনদিকে যার গতি—গঙ্গা।

মারিল সমরে রক্ষঃ বিধির বিধানে;
নহে দোষী রঘুরথী! তবে যদি নাশ
অধিচারে তারে, নাথ, কর ভস্ম আগে
আমায়!" চরণযুগ ধরিলা জননী।

সাদরে সতীরে তুলি কহিলা ধূর্জটি;
"বিদরে হৃদয় মম, নগরাজবালে,
রক্ষোদুঃখে! জান তুমি কত ভালবাসি
নৈকেষয় শূরে আমি! তব অনুরোধে,
ক্ষমিব, হে ক্ষেমক্ষরি, শ্রীরাম লক্ষ্মণে।"

আদেশিলা অগ্নিদেবে বিষাদে ত্রিশূলী;
"পবিত্রি, হে সর্বশুচি, তোমার পরশে,
আন শীঘ্র এ সুধামে রাক্ষসদম্পতী।"

ইরন্দরূপে অগ্নি ধাইলা ভূতলে!
সহসা জ্বলিল চিতা। সচকিতে সবে
দেখিলা আশ্বেয় রথ; সুবর্ণ-আসনে
সে রথে আসীন বীর বাসববিজয়ী
দিব্যমূর্তি! বাম ভাগে প্রমীলা রূপসী,
অনন্ত যৌবনকান্তি শোভে তনুদেশে;

চিরসুখহাসিরামি মধুর অধরে!

উঠিল গগনপথে রথবর বেগে;
বরষিলা পুষ্পাসার দেবকুল মিলি;
পূরিল বিপুল বিশ্ব আনন্দ-নিনাদে।
দুগ্ধধারে নিবাইল উজ্জ্বল পাবকে
রাক্ষস।" পরম যত্নে কুড়াইয়া সবে
ভস্ম, অধুরাশিতলে বিসর্জিলা তাহে!
ধৌত করি দাহস্থল জাহ্নবীর জলে
লক্ষ রক্ষঃশিল্পী আশু নিশ্চল মিলিয়া
স্বর্ণ-পাটিকেলে মঠ চিতার উপরে;
ভেদি অত্র, মঠচূড়া উঠিল আকাশে।^{১২}

করি স্নান সিঙ্কুনীরে, রক্ষোদল এবে
ফিরিলা লঙ্কার পানে, আর্দ্র অশ্রুণীরে^{১৩}
বিসর্জি প্রতিমা যেন দশমী দিবসে^{১৪}
সপ্ত দিবানিশি লক্ষা কাঁদিলা বিষাদে।।

ইতি শ্রীমেঘনাদবধে কাব্যে সংক্ষিপ্তা নাম
নবমঃ স্বর্গঃ।

১১. ১২. ১৩. রাবণের চিতার শেষ দৃশ্য ও স্মৃতিমন্দির নির্মাণের বর্ণনায় লৌকিক রীতি লক্ষ্যণীয়। ১৪. বাঙালীর
পূর্ণাঙ্গসেবের উল্লেখ।